

0
SANGO EYAMU
YA
MATYIU E LĚNDĚKIDI.

THE GOSPEL ACCORDING TO
MATTHEW,

TRANSLATED INTO THE BENGAL LANGUAGE

BY THE LATE REV. G. M'QUEEN, AND WITH THE OTHER GOSPELS
REVISED AND HARMONIZED BY REV. R. H. NASSAU.

GABOON AND CORISCO MISSION, WEST AFRICA.

NEW YORK:
AMERICAN BIBLE SOCIETY,
INSTITUTED IN THE YEAR MDCCCXVI.

1881.

[Bengal, 16mo.]

SANGO EYAMU

YA

MATYIU E LĚNDĚKIDI.

KAPITA I.

1. Ekae e ndi ejanganangobo ya mba-
mba ya Jisus Kraist, mwana ua David,
mwana ua Ebrahamu.

2. Ka Ebrahamu a ja Aisak; ka Aisak
a ja Jekob; ka Jekob a ja Judas na bana
ba hangwě;

3. Ka Judas a ja na Thamar, Fares, na
Zara; ka Fares a ja Esrom; ka Esrom a ja
Aram;

4. Ka Aram a ja Aminadab; ka Amina-
dab a ja Neason; ka Neason a ja Salmon;

5. Ka Salmon a ja na Rahab, Boaz; ka
Boaz a ja na Ruth, Oběd; ka Oběd a ja
Jěsi;

6. Ka Jěsi a ja upolo David; ka upolo
David a ja Sălâmoni na a diyakidi mwada
ua Yuraia;

7. Ka Sălâmoni a ja Roboam; ka Roboam
a ja Abaia; ka Abaia a ja Asa;

8. Ka Asa a ja Josafat; ka Josafat a ja Joram; ka Joram a ja Ozaia;

9. Ka Ozaia a ja Joatham; ka Joatham a ja Ahaz; ka Ahaz a ja Ezekaias;

10. Ka Ezekaias a ja Manasa; ka Manasa a ja Amon; ka Amon a ja Josaia;

11. Ka Josaia a ja Jěkonaia na bana ba hangwě, o 'gombe 'abu e valanakudwě o Babulon:

12. O bâ-ba pâkudwě o Babulon, ka Jěkonaia a ja Salathiěl; ka Salathiěl a ja Zorobaběl;

13. Ka Zorobaběl a ja Abaiud; ka Abaiud a ja Elaiakim; ka Elaiakim a ja Azor;

14. Ka Azor a ja Sadok; ka Sadok a ja Akim; ka Akim a ja Elaiud;

15. Ka Elaiud a ja Eleazar; ka Eleazar a ja Mathan; ka Mathan a ja Jakob;

16. Ka Jakob a ja Josěf momi 'a Meriua Jisus a jakudwě A tubakwě, na, Kraist.

17. Nonaně nd' o mbamba jěhěpi oviya Ebrahim nala David i ndi jomu na mbamba inai; oviya David nala o 'gombe 'abu e valanakudwě o Babulon, jomu ja mbamba na mbamba tepě inai; oviya o bâ-ba valanakudwě o Babulon nala Kraist, jomu ja mbamba na mbamb' inai.

18. ¶ Ijawě ja Jisus Kraist i diyaki kakaná:—O Josěf a diyakidi a nyima nyangwě Meri ovaně ba t' o lata, a duwana-kiyendi na jemi j' Ilina Iyamu.

19. Ndi momi 'aju Josěf, o mâ-a diyaki mot' uyamu, au vahaka o sala mâ o bato ba jadi, ndi a vahakindi o vëngidě mâ ikutakuta.

20. O mâ-a diyakidi a pikilakiya belombo tēkabe, enjěl ya Anyambě e pumakiyi mâ o ndâtâ, na, Josěf ja mwana ua David, o bangake o nângâ mwad' 'âvě Meri; ikabojana jemi tē ijaju i kahidi dině i ndi j' Ilina Iyamu.

21. A ka ji mwana, na nâvě o ka vangidi mâ dina, na, JISUS: ikabojana a ka yongi bato baju oviya bobe boabu.

22. Nandi, ekabe beēhēpi be hamakindi na ovaně nd' o nyanga ya Upangiyi e kalakidi na usaki, e ka hohonganě, na,

23. Ehila e ka kahi jemi, na yâ e ka ji mwana, na bâ-ba ka vangidi mâ dina na Imanuel, i jadi ja uludwě i ndi, na, Anyambě a na hwě.

24. Ka Josěf a 'muwa oviya viyâ, ka mâ-a ha ka enjěl ya Upangiyi e langwakiyi mâ, ka mâ-a nângâ mwad' 'aju.

25. Au ngakiya na ju kabo mâ jango njad' 'aju ya momo : ka mâ-a vangidě mâ, na, JISUS.

KAPITA II.

1. O Jisus a jakudwě o Běthlihěm ya Judia, o hwi ja upolo Hěrod, umbwakiyate, bato b' iyowě ba vakiyendi oviya mbuhwa na pá o Jěruselěm,

2. Na, A di jawěngo Upolo mua Jiu a l' ove? Ikabojana ho yěněngo nyětět' 'aju o mbuhwa, ho ma viyi ka kaliya Mâ.

3. O upolo Hěrod a yokakidi, a yěněki njuke, na ba Jěruselěm bēhēpi.

4. O mâ-a latakidu prist ja meolo na balěndi bēhēpi, ka mâ-a batě bâ iboko via Kraist vi ka jawě.

5. Ka bâ-ba va na mâ, nă, O Běthlihěm ya Judia, ikabojana e lěnděkudwěndi na usaki, na,

6. Âvě, Běthlihěm e jadi o ehe ya Juda o 'bě o hălâviyě o mepolo mea Juda : ikabojana Găven e ka viyandi o âvě o jadi e ka pangiyě bato bamě Israel.

7. Jâ ndi ja Hěrod ja bē bato b' iyowě ndiyango ikutakuta, ka mâ-a batě bâ na-

ngudi o pělě 'a 'gombe ya nyětěti e pumakidě.

8. Ka mâ-a loma bâ o. Běthlihēm, na, Kěkěni, ka butakěni ukěkě bwam'; oningě oa duwi mâni oa timbana pi 'mbani ndaga, ovaně nd' umba-mbi ka 'lē ka kaliya Mâ tepě.

9. O bâ-ba běkidi yokango k' upolo u vâkidi, na bâ na kěkě; na, umbwakiyate, nyětěti 'abu e yěněkidi o mbuhwa e kěkě o boho boabu na 'la ka tēmě o Ukěkě u diyakidi.

10. Ba yěněki mbya 'něně mětě o bâ-ba yěněkidi nyětěti těně.

11. ¶ O bâ-ba ngakiyedi o ndabo, ka bâ-ba yěně Ukěkě na nyangwě Meri, ka bâ-ba kwa o he na kalakiya Mâ: o bâ-ba dubwaki belandi beabu, ka bâ-ba vě Mâ bea bo-věkě; gold, frankinsěns na měr.

12. Ka Anyambě a kelevidě bâ o ndâtâ, na, baa timbake pě o Hěrod a jadi, ka bâ-ba vala o ehe 'abu na njeya 'pâkwě.

13. O bâ-ba diyaki ba vala, umbwakiyate enjěl ya Upangiyi ya pumiya Josěf o ndâtâ, na, Umwaka, na nâvě wa nangâ Ukěkě na nyangwě, wa kweya o Ijipt, o ka diyaka ovoně kabo 'mba běkidi 'avě

ndaga: ikabojana Hěrod a vahakand' o weya Mwana.

14. O mâ-a umwakidi, ka mâ-a nângâ Ukěķě na nyangwě na bulu, ka mâ-a vala o Ijpt:

15. A diyakindi ovoně kwanga nala iwe-do ja Hěrod: na ovaně nd' o ya Upangiyi e kalaki na usâki e ka hohonganě, na, O Ijpt nd' Umba-mbi ndiyi Mwan' amě.

16. ¶ Jâ ndi ja Hěrod ja yoka ngamb' eitě, o mâ-a yěněki na bamo b' iyowě ba henjiyi mâ, ka mâ-a lomidě o Běthlihěm n' indendandenda těvině viěhěpi, ka weya betumbě be diyakid' omě beěhěpi oviya be diyakidi mepuma mebale utodu na be diya-kidi be t' o pādě, hohonganěngo na 'gombe 'aju e batakidě bamo b' iyowě.

17. Jâ ndi ja ya usaki Jěrimi e kalakidi ya timwě, na,

18. Joyi i yokakudwěndi o Rama,—mbe-mbe na iya na kwedi 'něně,—Ratyěl a yaka bana baju, au bâbâkâ o hwěmudwě, ikabojana ba iběwě.

19. ¶ Nd' o Hěrod a běki wango, umbwakiyate, enjěl ya Upangiyi ya pumiya Josěf o ndâtâ o mâ-a diyakidi o Ijpt,

20. Na, Umwaka, wa nângâ Mwana na

nyangwě, na nâvē wa vala o ehe ya Israel :
ikabojana ba vahakidi o weya Mwana ba
wendi.

21. Ka mâ-a 'muwa ka mâ-a nângâ Mwana
na nyangwě, ka mâ-a vala o ehe ya Israel.

22. Nd' o mâ-a yokakidi na Arkileâs a bě
nd' upolo mua Judia o maihana ma hangwě
Hěrod, a bangakindi o vala ovoně : ndi o
mâ-a kelevakudwě na Anyambě o ndâtâ,
ka mâ-a 'luwa na vala o pělě ja Galili :

23. Ka mâ-a vala ka diya o mboka e
tubakwě na Nazarëth : na ovaně nd' o yâ
e ka timwě ka basâki .ba kalakidi, na, A
ka tubwi na, Nazarini.

KAPITA III.

1. O hwi tēdině Jân Baptist a vakindi, a
vaka, a kalakiya o nginga ya Judia,

2. Na, Ulwaki melema : ikabojana ipa-
ngiya ja Hěvēn ja bě ndi piělě.

3. Ikabojana Mâ nd' ekaně ua usâki
Iseas a vâkidi, na, Joyi j' umbâkâ a yamaka
o nginga, na, Kenjakěni njeya ja Upangiyi,
těkidi njeya jaju.

4. Jâ Jân tē i diyaki na ngâi ya mevâtâ
mea kaměl, na utumba mu' ekoto o 'hen'

'aju: beja beaju be diyakindi lehěnjěnjě na boyi boa 'hiki.

5. Ka bato ba Jeruselēm na Judia běhěpi, na ba inděndandenda via Jordan viěhěpi, na kěķē o mĀ-a jadi,

6 Na bâ na baptisakwě na mĀ o Jordan, ba mēměķē mabe mabu.

7. ¶ Nd' o mĀ-a yěņěkidi Farisi na Sajusi iitě i vaka o baptisma 'aju, a vĀki na bâ, na, A! igona ja mbamba, nj' a kelevide 'nyěni na kweyakiyani malingwa na vakě?

8. Nandi, lĀngĀkĀni ebuma e di lukango n' iluwa j' ulema: .

9. O pikilakiyeni o vĀ inyi mětě, na, Ho na hangw' 'ahu Ebrahim': ikabojana mbi vĀki n' inyěni, na, Ānyambě a t' a yĀlĀķē o 'mudě malale tēkama ma bě bana ba Ebrahim.

10. Nandi, ubĀki u tepě nangudwěngq o tina ya bele: ovaně vĀkĀna ele yěhěpi e ha langĀkĀ bebuma beyamu e kwělěkwěndi, na yĀ y' uhwě o veyā.

11. Mbambayě, mbi baptisakandi 'nyěni na miba o iluwa ja melema: ndi A vakě o mbuhwa 'amě, A wa n' umbā, mbi 'bě we-yango ibapě ja makogo maju: A ka baptisandi 'nyěni n' Ilina Iyamu na veyā.

12. A na 'pepa o 'nâ 'aju, A ka viyândi ndëk' 'aju, na mâ-a yolë hwit jaju o ndabo; nd' A ka dikidi behavu na vey a vi ha di-maka.

13. ¶ Ka Jisus a viya oviya Galili nala o Jordan o Jân a jadi ka baptiswë na mâ.

14. Ka Jân a petuwa na Mâ, ua, Umba ndi mbi vahakë o baptiswë o Ávë o jadi, na nâvë o ka vaka pë umba-mbi jadi?

15. Ka Jisus a yavwana mâ, na, Bâbâkâ kya tēkanë: ikabojana kakana nd' o yâ e lukakë na hwë-ho timakë bwam' bwëhëpi. Ka mâ-a bâbâ Mâ.

16. O Jisus a bēkidi baptiswëngo, ka Mâ-a hungana o jabuwa o miba: umbwa-kiyate, oba e dubwakudwi Mâ, ka Mâ-a yënë Ilina ja Anyambë i hubaka ona mbe-nga, na jâ i batamaka o Mâ-a jadi.

17. Ka joyi ja viya oviya oba, na, Ekanë a ndi Mwan' 'amë a tândâkë, a tândâkidë 'Mba bwamu.

KAPITA IV.

1. Jâ ndi ja Jisus ja tumbwanwë na Ilina o nginga ka yējudwë na Dëvil.

2. A yokaki nja, o Mâ-a diyakidi a bē

mabo ma meehe manai na ma mebulu manai aa je.

3. O Uyějiyi u pâkidi o Mâ-a jadi u vâki, na, Oningě na o Mwana ua Anyambě, sombiyakě malale těkama na ma diyake beja.

4. Ndi ka Mâ-a yawuwa, na, E lëndwěngo, na, Moto aa diye kabo na beja pa, ndi tepě na ndaga yěhěpi e pumakě o udumbu mua Anyambě.

5. Já ndi ja Děvil ja valana Mâ o mboka ya hole, ka mâ-a tědě Mâ o hâkâ ya těmpěl.

6. Ka mâ-a vâ na ju, na, Oningě na O te Mwana ua Anyambě, pukwaka o he: ika-bojana e lëndwěngo, na, A ka sombiyěndi enjěl o pěl' 'ávě, na já i ka hukand' 'ávě o benâ beabu o banga 'gombe te 'gombe wa tudiya eko o ilale.

7. Ka Jisus a vâ na mâ, na, E tepě lëndwěngo, na, O yějěkiye Upangiyi Anyambě 'ávě.

8. Ka Děvil a valana pě Mâ o ukodi mu' udomb' uitě, e ka levakidě Mâ mapangiya ma he měhěpi, n' ivenda ja mâ.

9. Ka mâ-a vâ na ju, na, Mbi ka vënd' Avě belombo těkabe beěhěpi oningě O balamingě na nâvě wa kaliya 'mba.

10. Já ndi ja Jisus ja vâ na ju, na, Věngëměkě 'Mba o mbuhwa Setan; ikabojana e lëndwěngo, na, Kalakiya Upangiyi Anyambě 'ávě, o ka dilakě Mâ dipâ.

11. Já ndi ja Děvil ja dika Mâ; umbwakiyate, ka enjěl ja viya na hakiya Mâ.

12. ¶ O Jisus a yokakidi na Jân a vamudwěndi o ntyogo, ka Mâ-a vala o Galili.

13. Ka Mâ-a věngëmě o Názarěth, ka Mâ-a vala ka điya o Kapěrneum, e jadi o 'těbě, o mekabo mea Zabulon na Něftalim:

14. Ovaně nd' o yâ e ka timwě ka Isea y' usâki a kalakidi, na,

15. Ehe ya Zabulon na ehe ya Něftalim o pěl' 'a njeya ya manga, o pělě 'pâkwě ya Jordan, Galili ya Betomba,

16. Bato ba diyakidi o ivititi ba yěněki-ndi bwe eněně; bwe e bumwakindi o ba diyakidi o indendandenda via 'dingihě y' iwedo.

17. ¶ Oviya 'gombe těně ka Jisus a yalě o kaliya, na, Ulwakani melema; ikabojana ipangiya ja Hěvěn ja běndi pyělě.

18. ¶ Jisus a tamwaka pyělě na manga ma Galili, ka mât-a yěně ba nyangwě pâkâ babale, Saimon a tubakwě na Pitě, na

Andru mwana-nyangwě, ba uhwaká elâba o manga ; ikabojana ba diyaki bahombwedi.

19. Ka Mâ-a vâ na bâ, na, Vitanaki 'Mbani, vâkâna Mbi pangindi 'nyëni mehombwedi mea bato.

20. Ka bâ-ba paniya o dika belâba beabu, ka bâ-ba vitě Mâ.

21. A di t' o 'vala oviya iboko těvině, ka Mâ-a yěně bapâkwě babale nyangwě pâkâ, Jems mwana ua Zěbědi na Jân mwana-nyangwě, o 'lende na Zěbědi hangwě 'abu, ba hângâkâ belâba ; ka Mâ-a ndiya bâ.

22. Ka bâ-ba paniya o dika 'lende na hangwě 'abu, ka bâ-ba vitě Mâ.

23. ¶ Ka Jisus a vala A kěkě A 'lwana-kidě Galili, A yokwakidě o ndabo jabu ĵa Anyambě, A kalakiya tepě sango eyamu ya ipangiya, A yongakě jângâ ja ebědi jěhěpi na jângâ ja mehiyo jěhěpi be jadi o bato.

24. Ka kum' 'aju ya hamana o Siria yěhěpi ; ka bâ-ba vana Mâ mebědi měhěpi me diyakidi na bebědi bea mangâmangâ na majili, na ba diyaki na děvil, na ba diyaki beboki, na ba diyaki bevandi limbelimbe : ka Mâ-a yongě bâ.

25. Bebimba bea bato beněně be vitanakidi Mâ oviya Galili na Děkapolis na

Jërusalëm na Judia na ba mwidi mua Jordan.

KAPITA V.

1. O Mâ-a yënëkidi bebimba bea bato, ka Mâ-a bet' o 'kodi; o Mâ-a diyaki diya, ka beyokwedi beaju bea viya o Mâ-a jadi.

2. Ka Mâ-a bumudě udumbu muaju, na Mâ-a ka yokwakidě bâ, na,

3. Ibâtâ na ba nyamanakě o melema; ikabojana ipangiya ja Hëvën i nd' ijabu.

4. Ibâtâ na ba yënëkě ngěbě: ikabojana ba ka yenudwi mbya.

5. Ibâtâ na ba di hwěyi: ikabojana ba ka jigi he.

6. Ibâtâ na ba yokakě nja na evělě o iva-ha ja bwamu: ikabojana ba ka vulandi.

7. Ibâtâ na ba yokanakiya ngâtâ: ikabojana ba ka yokudwi tepě ngâtâ.

8. Ibâtâ na ba bebumulema bea kěngě-ngě: ikabojana ba ka yënëndi Anyambě.

9. Ibâtâ na balati ba monga: ikabojana ba ka tubwi na bana ba Anyambě.

10. Ibâtâ na ba hakwě njuke o pělě 'a bwam': ikabojana ipangiya ja Hëvën i nd' ijabu.

11. Ibâtâ n' inyëni, oningě bato ba kila-ka inyëni, na bâ-ba ka haka inyëni njuke, na bâ-ba ka timbakě inyëni jângâ ja ndaga ibe jěhěpi ja bojowa, o nyang' 'amě.

12. Peyakani, n' inyëni o ka yěněkěni mbya 'něně; ikabojana mahomano manyu ma nd' o kena o Hěvën : nonaně tepě o bâ-ba hakidi basâki ba taki na viya njuke.

13. ¶ O ndini vyanga via he : ndi oningě vyanga via nyangě hombo 'aju, vi ka pa-hiya lě pě hombo na ove ? vakâna via bě te bwam' boa naně, na bo uhwakwě, na viâ vi ka pitakwě na beko bea bato.

14. O ndini bwe ya he. Mboka 'něně ya longwě o ukodi yaa kutame.

15. Bato ba běkě vitwa yoděngo, na bâ baa ngidě viâ ibomako ja kwe, ndi ba vama-ki viâ o uhângâ ; na viâ vi ka věkě bwe o ba jad' o ndabo běhěpi.

16. Bwe 'anyu e bumwake o bato ba jadi, ovaně nd' o bâ-ba ka yěně behavu beanyu beyamu, na bâ-ba ka bendakě Hângw' 'anyu a jad' o Hěvën.

17. ¶ O piviyakeni n' ipě na Mbi viyendi ka weya belekanako na basaki : Mbu viya ka weya, ndi kabo ka timě beâ.

18. Mbi vâki n' inyëni, pâkwěpâkwě, ka-

bo oba na he bea tomba, nd' o ibě n' itâbě na ba epuhu ehâlě yâkâ e ka tombě o belekanako, kabo beěhěpi bea timwě.

19. A ka weyě elekanako yâkâ o belekanako tě behâlě ekabe, na mâ-a ka yokwakidě bato nonaně, a ka tubwi bohâlě o ipangiya ja Hěvěn: nd' a ka hayě na mâ-a ka yokwakidě, ma t' a ka tubwi boněně o ipangiya ja Hěvěn.

20. Ikabojana Mbi vâki n' inyěni, na, Oningě bwamu boanyu bo kebe boa Balěndi na Farisi, o 'běni na ngudi e ngakiyěni o ipangiya ja Hěvěn.

21. ¶ O teni yokango na e vânakudwi na ba 'gombe ya vyo, na, O weyake moto: nd' a ka weyě moto a ka diye na mahihi o yěkě:

22. Ndi Mbi vâki n' inyěni, na, A ka linguwě na mwana-nyangwě o naně, a ka diyi na mahihi o yěkě: tepě, na, A ka vâyě na mwana-nyangwě, na, Raka, a ka diyi na mahihi o 'hoka: nd' a ka vâyě, na, Morě, a ka diyi na mahihi ma vey a via Hěl.

23. Nd' oningě wa vana bova boâvě o âltar, na nâvě wa yongidě na o na mwana-nyangwě na 'lombo,

24. Wa ta dika bova boâvě ovaně pyělě

na âltar, na nâvě wa ta vala ka nyěvěnidě
na mwana-nyângwě, nandi běngě o vake
ka vě bova boâvě.

25. Lataka n' uloni muâvě wâwâ o âvě o
ngit' o njeya na ju; o banga egombe te
'gombe, uloni muâvě mâ-a vě âvě o uyěkidi,
n' uyěkidi mâ-a vě âvě o uvomwanidi, na
nâvě wa vamwě o ntyogo.

26. Pâkwěpâkwě, Mbi vâki na nâvě, wa
pume na vilolombo kabo wa vě farthing ya
madikanido.

27. ¶ O teni yokango na e vânákwěndi
na ba vyo, na, O diyake na ihonde:

28. Ndi Mbi vâki n' inyěni, na, Uěhěpi a
ka tamuvě mwajo o idokuwa jaju, a handi
ihonde na ju pâni o ulema muaju.

29. Oningě dihâ jâvě iyomi ja panga 'vě
o kâbâkâ, tongwaka jâ, na nâvě wa uhwa
jâ: ikabojana e ndi bwamu na nâvě na
evand' 'âvě yâkâ e nyangaka, ndi hanga na
nyolo 'âvě yěhěpi e uhwakwě o Hěl.

30. Tepě, oningě ikadu jâvě iyomi ja
panga 'vě o kâbâkâ, lenaka jâ, na nâvě wa
uhwa jâ: ikabojana e ndi bwamu na nâvě
na evand' 'âvě yâkâ e nyangaka ndi hanga
na nyolo 'âvě yěhěpi e uhwakwě o Hěl.

31. E vânákwědi, na, A ka věngidě

mwad' 'aju, a věke mâ ejanganangobo ya ivěngidě.

32. Ndi Mbi vâki n' inyěni, na, A ka věngidě mwad' 'aju, i diye itato j' ihonde, vâkâna a pangi mâ a haka ihonde: na a ka bâyě mâ a di věngudwěngo, a handi ihonde.

33. ¶ O tepěni yokango na e vânakudwi na bâ o 'gombe ya vyo, na, O kanakiye nyolo 'âvě mětě, ndi timakě ikana jâvě o Upangiyi a jadi.

34. Ndi Mbi vâki n' inyěni, na, O kanakiyeni na vilolombo; tombete Hěvěn, ikabojana e nd' eka ya Anyambě:

35. Tombete he; ikabojana e ndi 'bong' 'aju e pitakiyě: tombete Jěrusalēm; ikabojana e ndi mboka ya Upol' uněně.

36. Na nâvě, tepě, o kanakiye molo muâvě, ikabojana wa yâlě o panga howe pâkâ botano tombe bovindo.

37. Ndi joyi janyu i diyake, E, e; Nyawě, nyawě: ikabojana beěhěpi be di wa na ekabe be vakiyandi o bobe.

38. ¶ O teni yokango na e vânakudwi, na, Dihâ te dihâ, ihonga t' ihonga:

39. Ndi Mbi vâki n' inyěni, na, O timbakeni bobe: ndi a ka bweyě âvě ibuku 'yomi, ulwakidě mâ ipâkwě tepě.

40. Oningě moto a ha 'vė 'vāvâ, na mâ-a nângâ ngâi 'âvě, a nangake tepě koto 'âvě.

41. Na, a ka pinyilid' âvě na kěķě na ju nanda pākâ, kěķengě na ju ibale.

42. Věķě a jombakě âvě, na nâvě o kumbakiye a vahakě o nângânâ âvě njěmbi mbuhwa.

43. ¶ O teni yokango na e vanakudwi, na, Tândâkâ a diyakě pyělě na nâvě, o ka binaka uloni muâvě.

44. Ndi Mbi vâki n' inyěni, na, Tândâkâni baloni banyu, vambakiyani ba hâkâķě inyěni ibâtâ, hakani ba binakě 'nyěni bwa-mu, n' inyěni o ka kalakiyani o pělě 'a ba ngongolakidě 'nyěni, na ba hakě 'nyěni njuke:

45. Ovaně nd' inyěni-o ka diyěni bana ba Hângw' 'anyu a jad' o Hěvăn: ikabojana A pumaki joba o babe na o bayamu ba jadi, na Mâ-a nâkidě mbwiya o ba mahuwa na ba ha ibě mahuwa ba jadi.

46. 'O li na nja mahomano-ě, oningě o tândâkâni ba tândâķě 'nyěni? bayoli-pago baa hakate nyanga tě?

47. Nandi, oningě wa homani bana ba nyângwě pa, nd' o haka li nde wa na bapâ-ķwě? bayoli-pago baa hakate nyanga tě?

48. Diyakani hânjâbiyëngo, panika Hângw' 'anyu A jadi o Hëvën A di hanjâbiyëngo.

KAPITA VI.

1. Bandamakidëni iha ja bwamu boanyu o boho boa hato iyënëñě na bâ; oningě nonañě vâkâna wa pahiyeni mahomano o Hângw' 'anyu A jad' o Hëvën a didi.

2. Nandi oningě o haka bova boâvě, o lângâke 'heba o boho boâvě ka menoki ba hakě o ndabo ja Anyambě na o mehěngě, na ovaně nd' o ba ka bendwě na bato. Pâkwěpâkwě, Mbi vâki n' inyëni, na, ba na mahomano mabu.

3. Ndi o âvě o haka bova, en' 'âvě ya 'měngwě e yowake nyanga ya en' 'âvě eyomi e hakě;

4. Na ovaně nd' o ivënë jâvě i ka diyě 'kutakuta: na Hângwě a yěněkě 'kutakuta Mâ mětě a ka homanaka 'vě o bwebwe.

5. ¶ Oningě o kalakiya, o diyake ka menoki ba jadi: ikabojana ba tândâkândi o kaliya tēmetēme o ndabo ja Anyambě, na o mani ma mehěngě, na ovaně nd' o bâ-ba ka yënëñě na bato. Pâkwěpâkwě,

Mbi vâki n' inyëni, Ba na mahomanó n' imabu.

6. Ndi âvě, o âvě o ka kaliya, ngakiya o bëdi 'âvě, wa diba jâmbě jâvě, na nâvě o ka kalakiya Hângwě a jadi 'kutakuta: na Hângwě a yěněkě 'kutakuta, A ka homanaka 'vě o bwebwe.

7. Nd' oningě o kalakiyani, o timbakiyeni ndaga botimbakiya o naně, panika bato ba ha 'wě Anyambě: ikabojana ba piviyaki na ba ka yokwëndi na iyavidě j' ikala.

8. O kwanaki bâni: ikabojana Hângw' 'anyu A yowuděte beanyu be vahakě ovăně o t' o uwi Mâni.

9. Nandi, kalakiyani kakana: Hangw' 'ahu a jad' o Hěvën, dina, jâvě i diyake hole.

10. Ipangiya jâvě i vake. Upango muâvě u hamake o he, ka m' u jad' oba.

11. Věkě hwě o buhwa těkabo beja bea buhwa ka buhwa.

12. Na, nâvě o ka iyakidě hwě mabe mahu panika hwě-ho iyakidě ba hakě hwě bobe.

13. O valakidě hwě o iyějudwě, ndi vě-ngěkidě hwě o bobe: ikabojana ipangiya, na ngudi, n' ivenda be nd' ibeâvě. Aměn.

14. Ikabojana, oningě o yiděngěni bato belemě beabu, Hângw' 'anyu a jad' o Hěvën a ka yidě tepě 'nyëni.

15. Ndi oningě o yiděni bato belemě beabu, Hângw' 'anyu a yide tepě 'nyëni belemě beanyu.

16. ¶ Tepě, oningě o hindinakani, o diya-keni panika menoki ba boho boa ngěbě; ikabojana ba ulwakidi meoho meabu, na ovaně nd' o ba ka yěněně na bato na ba hindinakandi. Pâkwěpâkwě, Mbi vâki n' inyëni, na, Ba na mahomano n' imabu.

17. Nd' âvë, o âvë o 'hindinakě, hakiya mavulě o molo muâvë, na nâvë wa tuka boho boâvë;

18. Ovaně nd' âvë o ka mëndě o yowaně na bato na o hindinakandi, ndi kabo na Hângwě a jadi 'kutakuta: na Hângwě, a yěněkě 'kutakuta, a ka homanand' âvë o bwebwe.

19. ¶ O kumakiděni hik' 'anyu o he, o jadi na nyělělě na nyanga be jongolakidě, o meyibi me tubakě na meâ me ka ibaka:

20. Ndi kumakiděni hik' 'anyu o Hěvën, o nyělělě na nyanga be ha jongolakidě, na o meyibi me ha tubaka na meâ me iba.

21. Ikabojana o hik' 'anyu e jadi, melema meanyu me ka diya tepě ovoně.

22. Bwe ya nyolo ndi dihâ: ndi oningě dihâ jávě i tamwingě bwam', nyolo 'ávě yěhěpi e ka londi na bwe.

23. Ndi oningě dihâ jávě i diyingě bobě, nyolo 'ávě yěhěpi e ka londi n' ivititi. Ndi oningě bwe e di na návě ya b' ivititi, ivititi tėvině vi ndi viněně.

24. ¶ O ibě na moto a ka yâlě o dilě bahangwě babale: ikabojana a nd' a bina-ka 'mbâkâ, na mâ-a tândâ upâkwě; tombe nonaně, vâkâna a ka bweyiděnd' umbâkâ na mâ-a pějě upâkwě. Wa yâlěni o dilě Anyambě na Mamon.

25. Ovaně nd' Umba-mbi vâkě n' inyěni, na, O nakakeni eměná 'anyu, ibeanyu be ka jě, n' ibeanyu be ka mâtě; tombe na bea nyolo janyu ibeanyu be ka bătě. Eměná e ibě wa na beja, nyolo wa n' ibâtâ?

26. Umbwakiyateni lonâni la oba nyang' 'abu e ha liyaka, na lâ la benjaka, na lâ la yolakě o mandabo; ndi Hângw' 'anyu a jad' o Hěvăn a bombakate lâ. O 'běni wa na lâ?

27. Nja didi 'nyěni o jadi a didi a badaka

ekulu bwaba ka hamba 'nâ o utě muaju na bonakaka?

28. Ndi, o nakaka lě ni 'bâtâ nande? Hilakěteni manga ma 'hiki ka mâ-ma tombwakě; maa haka ehavu, na mâ-maa vihaka:

29. Ndi Mbi vâki n' inyěni, na, O věngě lě Sâlomân n' ivenda jaju jěhěpi, au bâtdkudwě ka manga těkama.

30. Ndi pě lě Anyambě, a batidě lě behavu bea 'hiki be jadi o buhwa, vakě bea tumbwě, a bătide 'nyěni wa, inyěni ba ikamidě 'hălě?

31. Ndi, o nakakeni, na, Ho ka ja lě nde? ndi, Ho ka mâtâ lě nde? ndi, Ho ka bătudwě lě nande?

32. (Ikabojana Betomba be vahaki belombo těkabe): ikabojana Hângw' 'anyu a jad' o Hěvën a te yowěngo na o ndini belombo těkabe beěhěpi na mala.

33. Ndi vahakani o boboboho ipangiya ja Anyambě na bwamu boaju: vâkâna belombo těkabe beěhěpi be ka badudwěndi 'nyěni.

34. O nakakeni vakě; ikabojana vakě e ka naki belombo beaju mětě. Bobe boa buhwa bo kokango na boâ.

KAPITA VII.

1. O yěkěněkiděni, o banga wa yěku-dwěni.

2. Ikabojana yěkě 'anyu e yěkěněkidě yâ tepě eanyu e ka yěkěnudwě; na eyějâ 'anyu e yějěněkě yâ tepě eanyu e ka yějěnwě.

3. E lě nd' eávě e umbwakiyě uhâmbâ u didi o dihá ja mwana-nyângwě, ndi wa pi-viye ukákâ u didi o dihá jávě?

4. Nd' o ka vâ lě na mwana-nyângwě, na, Ta ha, mbi věngidě uhâmbâ o dihá jávě; umbwakiyate, ukákâ u ndi o ijávě dihá?

5. Ávě unoki, ta věngidě ukákâ u jadi o ijávě dihá; běngě o yěněke bwe o ivěngidě ja uhâmbâ o dihá ja mwana-nyângwě.

6. ¶ O věkeni e jadi hole mbwa, o uhwa-ke tepěni pěrl janyu o ngweya i jadi, o banga ja pita já na beko beabu, na já ja 'luwa pě ka kom' inyěni.

7. ¶ Uwakani, e ka věwěndi 'nyěni: vahakani, o ka duwandini: tinakiděni, i ka dubuwěndi 'nyěni:

8. Ikabojana, a uwakě uěhěpi a pahaki-yandi; a vahakě a duwakandi; na, o a tinakidě, i ka dubuwěndi.

9. A lě nja momo-ě a didi 'nyěni-o jadi, a di a běkě mwan' 'aju a uwa mâ pěmbě, na mâ-a vě mâ ilale?

10. Tombe a uwa mâ ejaka, a ka vi mâ mbamba?

11. Opěla 'nyěni, ba di babe, wa yowě lěni ivě ja bana banyu belombo beyam', na kumbakidě Hângw' 'anyu a jad' o Hěvěn, hanga na a ka vi ba uwakě Mâ belombo beyamu wa?

12. Ndi belombo beěhěpi ibeanyu be vahakě bato bapákwe ba haka inyěni, haka tepi bāni nonaně; ikabojana ekae e ndi Elekanako na Basāki.

13. ¶ Ngakiyani o jâmb' ihâlě; ikabojana jâmbě i n' upuju, na njeya e tepě o kena, e valanakidě o iwedo, na baitě ndi ba kěķě ovoně:

14. Ikabojana jâmbě i nd' ihâlě, na njeya e kopya, e valanakidě o 'měňâ, na ba duwakě yâ ba te nyěvâ.

15. ¶ Bandamakiděni na basāki ba 'vela ba vakě o 'nyěni-o jadi na ibâtâ j' udâmbě, ndi o utema njâ ja majake.

16. O ka yowěndi bāni na bebuma beābu. Bato ba pataki ngakya o mbolobonji, na belola o mbângě?

17. Nonaně nd' o, ele eyamu yěhěpi e lāngāki bebuma beyamu ; ndi ele 'be e lāngāki bebuma bebe.

18 Ele 'yamu yaa lānge bebuma bebe, na ele 'be e ibě tepě na ngudi e lāngākě bebuma beyamu.

19. Ele yěhěpi e ha lāngākā bebuma beyamu, e kwělěkwěndi na yā y' uhwě o veyā.

20. Nandi, o ka yowěndi bāni na bebuma beabu.

21. ¶ Hanga na uěhěpi a vākě n' Umba, na, Upangiyi, Upangiyi, nd' a ka pāyě o ipangiya ja Hěvën : ndi kabo a hakě upango mua Paia a jad' o Hěvën.

22. Baitě ba ka vāndi n' Umba o buhwa tēboně, na, Upangiyi, Upangiyi, hwa bu yokwakidě na dina jāvě, na o dina jāvě ho pumakě dēvil, nā o dina jāvě ho haka belombo beitě be mamanakwě ?

23. Vākāna Mbi ka pupi bā, na, Mba 'wě inyěni : věngēměkěni Umbi jadi, 'nyěni ba hakě bobe :

24. ¶ Ndi uěhěpi a yokakě ndaga tē ijamě ekadi, na mā-a haka jā, Mbi ka kwanidi mā moto u' iyowě a longaki ndabo 'aju o ilale ;

25. Mbwiya ja nā, na tonda ja pā, n'

upupě mua vunga, na beâ bea nyëmbělěně o ndabo tě: na yâ e kwe, ikabojana e kâ-mâmâkindi o ilale.

26. Ndi uëhëpi a yokakě ndaga tě ijamě ekadi, na mâ-a haye já, a ka kwanudwěndi eboki ya moto e longakidi ndabo 'aju o ebonda:

27. Mbwiya ja nâ, na tonda ja pâ, n' upupě mua vunga; na beâ bea nyëmbělěně o ndabo tě; ka yâ ya kwa; na ikwa jaju i diyakindi 'nënë.

28. E diyakindi, o Jisus a hukakidě ndaga tēkadi, bato ba mamakindi iyokwanidě jaju.

29. Ikabojana a yowkwakidi bâ panika moto a di n' ipanga, hangâ ka Balěndi.

KAPITA VIII.

1. O Mâ-a hubakidi oviya ukodi, bebimba beněně be vitanakidi Mâ.

2. Ka moto a diyaki na egâłani a viya ka kaliya Mâ, na, Upangiyi, oningě wa panga o te na ngudi e yongakě 'mba.

3. Ka Jisus a hambidě enâ 'aju, ka Mâ-a kupaně mâ, na, Mbi pangindi; yongaka. Elěngiaha, ka egâłan' 'aju ya yongwě.

4. Ka Jisus a vâ na ju, na, Bandamakidě, o langwake moto; ndi kěkě, na nâvě wa levidě nyolo 'âvě prist; wa vě ivě ja Mosěs i sombiyakidě ka tali o bâ-ba jadi:

5. ¶ O Jisus a pākidi o Kapěrneum, sěntyurion e vakindi o Mâ-a jadi, e ka hâhâ-lâkidě Mâ,

6. Na, Upangiyi, uhayi muamě u nd' o mboka bya na ebědi ya nyolo limbelimbe, mehiyo meněně mětě.

7. Ka Jisus a vâ na mâ, na, Mbi ka viyandi ka yongě mâ.

8. Ka sěntyurion a yavwana, na, Upangiyi, mbi 'bě weyango na o pākâ o ibomako ja unyuwa muamě; ndi kalaka ndaga pa, vâkâna moto 'amě a yongindi.

9. Ikabojana mbi ndi moto a pangakudwě, n' umba-mbi pangakiya tepě sâjě: mba vâ na ekaně, na, Kěkě, na mâ-a vala; n' upâkwě, na, Vaka, na mâ-a viya; na moto 'amě, na, Hak' ekae, na mâ-a ha yâ.

10. Jisus a mamakind' o Mâ-a yokakidi, ka Mâ-a vâ na ba vitakidě, na, Mbi vâki n' inyěni pâkwěpâkwě, na, Mbi 'bě duwango ikamidě ka 'kadi, tombe o Isreěl.

11. Ndi Mbi vâki n' inyěni, na, Baitě ba ka viyandi o 'hiki na o manga, ba ka diya-

ndi na Ebrahim', na Aisak, na Jekob o ipangiya ja Hěvën :

12. Ndi bana ba ipangiya ba ka uhwëndi o ivititi via yaviděngo : ovoně, o ka diyi mbembe na ikalidě ja mahonga.

13. Ka Jisus a vâ na sěntyurion, na, Kěķě : ka 'vē o di kamiděngo, e hamake o âvē-o jadi. Na moto 'aju n' a yongaka o iwěla tědině.

14. ¶ O Jisus a vakidi o ndabo 'a Pitě, ka Mâ-a yěně nyangwě ya mwad' 'aju bya na 'bědi ya ivěvu.

15. Ka Mâ-a kupaně ikadu jaju, ka ivěvu ja dika mâ : na mâ-a 'muwa, na mâ-a ka hakiya bâ.

16. ¶ O kolo e pâkidi, ka bâ-ba vana o Mâ-a jadi baitě ba diyaki na děvil : ka Mâ-a duma malina mabe na ndag' 'aju, ka Mâ-a yongě ba diyaki ba běkě běhěpi.

17. Ovaně nd' o ya usâki Iseya e kalakidi e ka timě, na, Mâ mětě a nângi-ndi ikâhâ jahu, ka Mâ-a bapě bebědi beahu.

18. ¶ O Jisus a yěněkidi bebimba beněně ulwaniděngo Mâ, ka Mâ-a sombiyě na ba ķěke o mwid' upâkwě :

19. Ka Ulěndi umbâkâ mu-a viya ka vâ

na ju, na, Uyokwanidi, mbi ka vitënd' ávë
iboko viâvë vi ka valë viëhëpi.

20. Ka Jisus a vâ na ju, na, Mehingi me
na meboboka, na lonâni la oba na mumbu;
ndi Mwana-moto a ibë na iboko via nangidë
molo.

21. Ka 'yokwed' 'aju epâkwë ya vâ na
ju, na, Upangiyi, hulwakidë 'mba, mbi t'
o vala mbi tonge paia tongango.

22. Ndi Jisus a vâki na ju, na, Vitakë
'Mba: bekengo be tongake bekengo beabu.

23. ¶ O Mâ-a vamakidi o elende, ka be-
yokwedi beaju bea vitanë Mâ.

24. Umbwakiyate, ukudi unënë mua vu-
nga o ndalo, kwanga nala o elende e ka
vihamakudwë na mekeba; ndi A diyakindi
o viyâ.

25. Ka beyokwedi beaju bea viya o Mâ-a
jadi, ka bâ-ba 'mudë Mâ, na, Upangiyi, yo-
ngakë hwë: ho kukindi.

26. Ka Mâ-a vâ na bâ, na, O bangaka lë-
ni nande, inyëni ba ikamidë 'hâlë? Ka
Mâ-a 'muwa, na Mâ-a kandidë mepupë na
manga; ka udëmbë unënë mua wa.

27. Ka bato tē ba mama, na, I lë nja jâ-
ngâ-ë ja momo ekadi, i jadi tombekete me-
pupë na manga bea yokiyate Mâ.

28. ¶ O Mâ-a pâkidi o mwid' upâkwě, o ehe ya Gěrgasin, bamo babale ba diyaki na dēvil ba lataki na Mâ, ba vakiya oviya o malonga, na jeku iitě, ovaně nd' o moto a ha yâlâkidě o tomba o njeya těně.

29. Umbwakiyate, ka bâ-ba yama, na, Eahu na nâvě e lě na, Jisus, âvě Mwana-Anyambě? O ma viyandi ono 'kava ka jilě hwě egombe e t' o pâ?

30. Yaviděngo na bâ, o diyaki na bokweya boa ngweya iitě bojaka.

31. Ka dēvil ja hâhâlidě Mâ, na, Bâbâká hwě-ho kěke o bokweya boa ngweya bo ja-di, oningě Wa věngidě hwě.

32. Ka Mâ-a vâ na bâ, na, Kěkěni. O bâ-ba pumakidi, ka bâ-ba vala o bokweya boa ngweya: umbwakiyate, bokweya boěhěpi bo hubakindi umbila nangudi o iboko via mbelenge o manga, ka já-ja pela o miba.

33. Ka ba ma jakidě já ba kweya, ka bâ-ba vala o mboka, ka bâ-ba languwa beěhěpi be hamakidi; na o pělě 'a ba diyakidi na dēvil tepě.

34. Umbwakiyate, mboka yěhěpi ya valanidě ka lata na Jisus: o bâ-ba yěněki Mâ, ba hâhâlâkidi Mâ, na, a věngěměke o betěbe beabu.

KAPITA IX.

1. Ka Mâ-a vama o 'lende, na jabwaka, na vala o mbok' 'aju mětě.

2. Umbwakiyate, ba vanaki Mâ momo a běkě nyolo limbelimbe bya o ikondo: ka Jisus a yěně ikamidě jabu, ka Mâ-a vâ n' ubědi mua nyolo limbelimbe, na, Mwana, yěněkě mbya, mabe mâvě ma 'yidwěnd' âvě.

3. Umbwakiyate, Balěndi bâkâ ba vâki bâ mětě na bâ mětě, na, Momo těkaně a kilakand' Anyambě.

4. Ka Jisus a yowě mapikiliya mabu, ka Mâ-a vâ na, O pikilakiya li bobe o bebumulema beanyu nande ?

5. Eve lě e di bobâbu wa, na o vâ, na, Mabe mâvě ma 'yidwěnd' âvě; na o vâ, na, Umwaka, na nâvě wa tamuwa ?

6. Ovaně nd' o 'nyěni o ka yowě na Mwana-moto a na ipanga o he i 'yacidě bo-be, (jâ ndi jaju ja vâ n' ubědi mua nyolo limbelimbe, na) Umwaka, nângâkâ ikondo jâvě, na nâvě wa vala o ndabo 'âvě.

7. Ka mâ-a 'muwa, na vala o ndabo 'aju.

8. Nd' o bebimba be yěněkidi be mama-

kindi, na bâ-ba ka bendakě Anyambě, e vėki bato ngudi tēně.

9. ¶ O Jisus a valakidi oviya iboko tēvině, ka Mâ-a yěně moto, dina na Matyu, diyango o inângânido via pago; ka Mâ-a vâ na mâ, na, Vitakě 'Mba. Ka mâ-a 'muwa, ka mâ-a vitě Mâ.

10. ¶ E diyakind', o Jisus a diyakid' a jaka o ndabo, umbwakiyate, bayoli-pago baitě na bato babe ba vakindi ka diya na ju na beyokwedi beaju.

11. Nd' o Farisi ba yěněkidi, ka bâ-ba vâ na beyokwedi beaju, na, E lě nde ya Uyokwidi muanyu e jakě na bayoli-pago na bato babe?

12. Nd' o Jisus a yokakidi a vâki na bâ, na, Ba di mepeha ba ibě na mala na nganga, kabo ba běkě.

13. Ndi kěkěni wa 'la ka yokuwani ka yâ e weyakě, na, Mbi vahakandi ngâtâ wa na benambo. Ikajobana Mbu vaka ka ndiya bayamu, ndi kabo babe, na, ba uluake melema.

14. ¶ Jâ ndi ja beyokwedi bea Jân bea viya o Mâ-a jadi, na, E lě nde eahu na Farisi e hindinakě njo iitě, ndi beyokwedi beavě be hindine?

15. Ka Jisus a vâ na bâ, na, Mbweyi j' ubayi i ka yâlête o yënë ngěbě, ulingo mu' ubayi u di na já? Ndi hwi i vakandi j' ubayi u ka nângânwě já, běngě i hindinake?

16. O ibě na moto a vamakě epěhi y' unamba mua kya o ngâi ya vyo, ikabojana e vamakwě eně e nyakandi ngâi, n' ibeko ja kena pě wa.

17. Na bato baa vamakě ivě ja kya o mbute ja vyo, o banga mbute ja tumbiya, na ivě ja hoviya, na mbute ja jongoliya: ndi ba vamakěndi ivě ja kya o mbute ja kya, vâkâna beěhěpi be tatudwěndi.

18. ¶ Umbwakiyate, o Mâ-a diyakid' a kalaka na bâ belombo těkabe, upangi yi umbâkâ u vakindi, ka mâ-a kaliya Mâ, na, Mwan' 'amě ua mwajo a nd' o bowaka; ndi vaka ka kahakidě mâ ikadu jâvě, vâkâna a diyendi.

19. Ka Jisus a 'muwa na vitaně mâ, na beyokwedi beaju tepě.

20. ¶ (Umbwakiyate, mwajo a diyaki na 'bědi y' ulema mua makiya jomu na mepuma me bale a viya o mbuhwa, ka mâ-a kupaně imbunja ja ngâi 'aju.

21. Ikabojana a vâki n' ulema, na, Pagate mba kupaně ngâi 'aju, vâkâna mbi yongindi.

22. Ka Jisus a timbě iběyi, o Mâ-a yěni mâ, ka Mâ-a vâ, na, Mwa-mwajo, yěněkě mbya; ikamidě jâvě i yongiděndi âvě. Ka mwajo tě a yonga o iwěla tědině.)

23. O Jisus a pākidi o ndabo y' upangiyi, ka Mâ-a yěně ba malela na bato ba haka imbunga.

24. Ka Mâ-a vâ na bâ, na, Ta hani; ika-bojana isesa ibě wango, ndi i yakandi. Ka bâ-ba věhě Mâ.

25. Ndi o bato ba pumakudwě, ka Mâ-a ngiya, ka Mâ-a bweya mâ o 'nâ, k' isesa ja 'muwa.

26. Ka kuma těně ya hamana o ehe těně yěhěpi.

27. ¶ O Jisus a kěkidi, pâgu ibale i vitakidi Mâ, i yamaka, na, Mwana ua Devid, yěněkě hwě ngâtâ.

28. O Mâ-a pākidi o ndabo, pâgu tě i vakindi o Mâ-a jadi: ka Jisus a vâ na bâ, na, O kamakiděteni na Mbi na ngudi e hakě ekæ? Ka bâ-ba vâ, na, E, Upangiyi.

29. Jâ ndi jaju ja kupaně mihâ mabu, na, E diyake n' inyěni hohonganěngo n' ikamidě janyu.

30. Ka mihâ mabu ma bumuwa; ka

Jisus a kelevidě bâ, na, Bandamakiděni, na, e yowanake na moto.

31. Ndi bâ, o bâ-ba validi, ka bâ-ba hamanidě kum' 'aju o ehe tēnē yēhēpi.

32. ¶ O bâ-ba diyakidi ba kēkē, umbwakiyate, ba vanaki Mâ emukumuku ya moto a bweyakudwě na dēvil.

33. O dēvil e pumakudwě, ka emukumuku ya kala: ka bebimba bea mama-na, na, Ekae e ha-yēnēnēte n' ivâkwě o Israēl.

34. Ndi Farisi ba vaki, na, A pumakēndi dēvil na ihana ja upolo mua dēvil.

35. Ka Jisus a vala o pělě ja mboka na mabâkâ mēhēpi, a yokwakidě o ndabo jabu ja Anyambě, a kalakiya sango eyamu ya ipangiya, a yongakě mehiyo meēhēpi na be-bēdi beēhēpi be di na bato.

36. ¶ Nd' o Mâ-a yēni bebimba, a yēnēki bâ ngâta, ikabojana ba diyaki bē kâmbâ, na bâ-ba ka vanjanganaka ona medâmbě me ha ibe n' utati.

37. Jâ ndi jaju ja vâ na beyokwedi beaju, na, Juma mētě i ndi iitě, ndi bahayi ba ndi nyěvâ.

38. Ndi kalakiyani Upangiye mua juma, na, a lomake bahayi o juma jaju.

KAPITA X.

1. O Mâ-a bekidi ndiyango jomu jaju`ja beyokwedi na beyokwedi bebale, a vëki bâ ipanga ja malina mabe i vëngëkidě mâ, na i yongakě mehiyo meěhěpi, na bebědi beěhěpi.

2. Ndi mina ma jomu ja metodu na metodu mebale ndi ekama; ua bohoboho ndi Saimon, a tubakwě na Pitě, na mwana-nyangwě Andru; Jems ja Zěbadi, na mwana-nyangwě Jân;

3. Filip, na Barthôlomi; Tomas, na Matyiu ma uyoli-pago; Jems ja Alfios, na Lěbios, a diyaki tepě na dina `pâkwě na Tadios;

4. Saimon ya Kenan, na Judas Iskariot, e kândâkiyi Mâ.

5. Ba jomu na babale ekaba ndi ba Jisus ba lomakidi, ka Mâ-a vâ na bâ, na, O kě-keni o njiya ya Betomba, n' inyěni o pâkeni o mamboka ma ba Samaria;

6. Ndi valakangěni o medâmbě mea nyangango mea ndabo ya Israěl me jadi.

7. Nd' inyěni-o kěkě, o ka kalakiyani, na, Ipangiya ja Hěvën ja bě ndi o mata.

8. Yongaki mebědi, tanaki begâlani, pu-

mbwakidi bekengo, vëngëkidëni dëvil; o ndini pahiyango bovëkwë, vëkë tepëni bovëkë.

9. O kenjakeni hika ya veyiveyi tombe na etano, tombe nyënyë, o belandi beanyu;

10. Tombe 'landi ya kola o 'këndâ 'anyu, na ngâi ibale, na makogo, na metumbe: (ikabojana ua 'havu a weyango beja beaju.)

11. O mbok' 'anyu tombe ibâkâ janyu i ka pâyë jëhëpi, batakeni a didi omë weyango; o ka diyakani omë diya, kwanga n' inyëni o ka valëni.

12. O pângëni o ndabo, homaki yâni.

13. Oningë ndabo të e didi weyango, jonga janyu i diyak' omë; nd' oningë e diye weyango, jonga janyu i timbake n' inyëni.

14. A ka mëndë a ngidë 'nyëni, na mâ-a yoke ndaga janyu, o inyëni-o ka vëngëmëni o ndabo tënë na ba mboka tënë, pupwaki mahë ma beko beanyu.

15. Mbi vâki n' inyëni pâkwëpâkwë, na, E ka diyandi bobâbu wa na ehe ya Sodom na Gomâra o buhwa boa yëkë, wa na ya mboka tënë.

16. ¶ Umbwakiyate, Mbi lomakandi 'nyë-

ni panika medâmbě o ngalakabo ya njâ; diyakani na bokele ka mbamba, hwěyi ona mbenga.

17. Ndi bandamakiděni opěla bato; ikabojana ba ka vëndi 'nyěni o behoka, na bâ-ba ka bomaka 'nyěni o ndabo jabu ja Anyambě;

18. O ka vanwëndini o meoho mea Gâ-ven na mepolo, o nyang' 'amě, ka tali o bâ na Betomba be jadi.

19. Nd' o nakakeni nyanga ya tombe eanyu e ka kalě, o bâ-ba ka vë 'nyěni; ikabojana nyang' 'anyu e ka kalě e ka vëwëndi 'nyěni o iwěla tědině.

20. Ikabojana, ba 'bě inyěni o kalakě, ndi Ilina ja Hangw' 'anyu nd' i kalakě o 'nyěni o jadi.

21. Ba nyangwě-pâkâ ba ka vënëndi ka weywě, na hangwě a vëkě mwana; na bana ba ka těmiyi ba hangwě na ba nyangwě na ba weyakwě.

22. O ka binwëndini na bēhěpi o nyanga ya dina jamě: nd' a ka lilimidě nala ihuku mâ nd' a ka hunginwě.

23. Oningě ba ha inyěni njuke o mboka tēkaně, kweyakani o epâkwě: ikabojana Mbi vâki n' inyěni pâkwépâkwě, Wa ma-

děni ivala o mamboka ma Israēl, ndi Mwana-moto a pāye.

24. O ibě na eyokwedi e di wa na uyokwidi muaju, tombe uhayi wa na a pangakě mǎ.

25. E twětwe na eyokwedi e diyaka ka uyokwidi muaju, na uhayi ka a pangakiyě mǎ. O pě lě ba tuba lě hangwe ya ndabo, na, Biělsibub, ndi na kumbakidě ibaju ba ndabo.

26. Nandi, o bangaki bǎni: ikabojana o ibě n' elombo e di vihamango e ka měndě e saliye; na ya kutamango, e ka měndě e yowaně.

27. Nyang' 'amě e langwakiyě 'nyěni o ivititi, kalaki yǎni o bwe: na nyang' 'anyu e yokakě o ditǎ, kalaki yǎni o menyuwa.

28. O bangakeni ba weyakě nyolo, ndi ba yǎlě o weya ilina; ndi bangakani a didi a yǎlǎkě o weya n' ilina na nyolo ta o Hěl.

29. Těmbělěmbě ibale ja hambakwě farthing pǎkǎ? ndi na ya pǎkǎ ya kwe o he Hangw' 'anyu aa diye.

30. Ndi, na howe janyu ja molo jěhěpi i langwěngo.

31. O bangakeni, o ndini ihambe wa na těmbělěmbě iitě.

32. Uěhěpi a ka mēmē 'Mba o boho boa bato mâ tepě uamě a ka mēmiyě o boho boa Paia a jad' o Hěvěn.

33. Ndi uěhěpi a ka hâhiyě 'Mba o boho boa bato, mâ tepě uamě a ka hâhiyě o boho boa Paia a jad' o Hěvěn.

34. O piviyakeni na Mbi viyi ka vě jonga o he; Mbu vaka ka vě jonga, kabo ukwala mu'ibâta.

35. Ikabojana Mbi pândi ka hihidě momo na hangwě, na mwa-mwajo na nyangwě, na ubâmbi na nyangwě ya ua momo.

36. Baloni ba moto ba te ba ndabo 'aju mětě.

37. A tândâkě ba hangwě na ba nyangwě wa n' Umba a 'bě weyango o diya uamě; na a tândâkě ba mwa-momo na ba mwa-mwajo wa n' Umba a 'bě weyango o diya uamě.

38. Tepě a ka mëndě a nânge krâs 'aju, na mâ-a vitě 'Mba, a 'bě weyango o diya uamě.

39. A duwakě eměná 'aju a ka nyangi yâ; ndi a nyangakě eměná 'aju o nyang, 'amě a ka duwi yâ.

40. ¶ A vĕhĕlĕkidě 'nyĕni, a vĕhĕlĕkidi 'Mba; a vĕhĕlĕkidě 'Mba a vĕhĕlĕkidĕndi a lomaki 'Mba.

41. A věhělěkidě usâki na dina ja usâki a ka pahiyi mahomano ma usâki; a věhělěkidě mot' uyamu na dina ja mot' uyamu a ka pahiyi mahomano ma mot' uyamu.

42. Tepě, uěhěpi a ka mâtidě ua bahâlě ekaba umbâkâ imâgi ja miba ma vâdu pa, o dina ja eyokwedi, Mbi vâki n' inyěni na pâkwěpâkwě, na, A nyange mahomano maju na vilolombo.

KAPITA XI.

1. E diyakindi, o Jisus a běki hukiděngo isombiya ja jomu na beyokwedi beaju bebale, ka Mâ-a věngěmě omě ka yokudě na ka kaliya, o mamboka mabu.

2. O Jon a yokakidi o ndabo ya ntyogo kuma ya behavu bea Kraist, a lomaki beyokwedi beaju bebale, .

3. Ka mâ a vâ na ju, na, Avě i Mâ-a vakě, ipě ho umbwakiye pě upâkwě?

4. Jisus a yavwanakindi ka Mâ-a vâ na bâ, na, Kěkěni, n' inyěni-wa languwani Jon beanyu be yokakě na be yěněkě:

5. Pâgu i yěněkě pě, bebokě be tamwaka, begâlani be yongakwě, poke i yokaka, be-

kengo be pumbwakudwě, mekuge me pakwakudwě sango eyamu.

6. Nd' ibâtâ na uěhěpi a ka diyě a kâbe n' Umba.

7. ¶ O ba diyaki ba kěķě, ka Jisus a yalě o vâ na bebimba o pělě ya Jon, na, O kěķi lěni o nginga ka yěně nde? Tuka e ninga-nakě n' upupě?

8. Nd' e lě nd' eanyu e kěķidi ka yěně? Momo bātāngo n' ibâtâ ibâbu? Ba bātākě ibâtâ ibâbu ba nd' o ndabo ja mepolo.

9. Nd' e lě nd' eanyu e kěķidi ka yěně? Usâki? E! Mbi vâki n' inyěni, na, wa n' usaki.

10. Ikabojana mâ nd' ekaně a di lěndwěngo, na, Umbwakiya, Mbi lomindi utodu muamě o boho boâvě ka kenjě njeya 'vě o boho na nâvě.

11. Mbi vâki n' inyěni pâkwěpâkwě na, O ba jakwě na bajo o ha pumiye usâki u di boněně wa na Jon ja Baptist; nd' a di yěviyěngo o 'pangiya ja Hěvěn a boněně wa na mâ.

12. Oviya hwi ja Jon Baptist na pâ kya tēkaně ipangiya ja Hěvěn i viyedi ka janjwě, na ba janjakě ba nângâ jâ na bwayě.

13. Ikabojana Basâki bēhēpi na Beleka-
nako be sâkâkindi kwanga nala o Jon.

14. Oningě wa bâbâni inângâ, Ilaias nd'
ekaně a diyakidi a vaka.

15. A di na matâ ma yokakě, a yokake.

16. ¶ Ndi Mbi kwanakidě lě okava igona
těkadi nde? I kwanaki bana ba didi o
ihambanido diyediye ba ndanakiya mega-
ngano meabu,

17. Na, Ho lāngindi 'nyēni mabeka, nd' o
yembeni; *ho* diyendi 'nyēni o jěbâ, nd' o
hilweni.

18. Ikabojana, o Jon a vakindi aa je na
mâ-a mâte, na bâ na, A na dēvil.

19. Mwana-moto ka vake A jaka na Mâ-a
mâtâkâ, na bâ na, Umbwakiya, savulaka,
n' umâti-maku, mbweyi ya bayoli-pago na
bato babe. Nd' iyowě i huwudwěngo na
bana baju.

20. ¶ Jâ nd' ijaju ja yalě ihembiya ja
mamboka ma belemba beaju be di hamango
wa, ikabojana b' uluwaka:

21. Maguga na nâvē, Koresin! Maguga
na nâvē, Bethseda! Ikabojana, belemba be
di hamang' o inyēni-o jadi be jaka na be
hamakindi o Tair na Saidon, te ba diyaki
ba bamba na 'luwa o bangisi na jubu.

22. Ndi Mbi vâki n' inyëni, na, Ya Tair na Saidon ndi e ka hukaniyě, wa na e anyu, o buhwa boa yěkě.

23. Na nâvě, Kapěrnaum, e didi betudwěngo oba, o ka hubwënd' o Hěl. Ikabojana belemba be di hamang' o âvě-o jadi be jaka na be hamakindi o Sâdom, t' a ngite na buhwa tēkabo.

24. Ndi Mbi vâki n' inyëni, na, Ya ehe ya Sâdom nd' e ka hukaniyě o buhwa boa yěkě wa na e âvě.

25. ¶ Jisus a yavwakindi o 'gombe tēnē, ka Mâ-a vâ, na, Paia, Upangiyi muâ oba na he, Mbi vėkënd' âvě akeva, ikabojana o kutiyango b' iyowě na ba bokeli belombo tēkabe, na nâvě wa sala bea mekěkě.

26. E nonaně, Paia: ikabojana kakana nd' o yâ e yēnēnēki bwain' opěl' âvě.

27. Paia a i 'Mba věngo belombo beēhēpi: o ibě na moto a yowudě Mwana, kabo Hangwě: o ibě tepě na a yowudě Hangwě, kabo Mwana, na uēhēpi wa Mwana a ka levidě Mâ.

28. ¶ Ba hakě na ba di na maumba madilo bēhēpi, vakani o 'Mb'-i jadi, n' Umba-Mbi ka yajidēndi 'nyëni.

29. Nāngākāni panga 'amě o inyëni-o jadi,

n' inyëni-o ka yokwakani o pël' 'amě; ika-bojana Mbi hwěi na ulema ubâbu: o ka duwandini 'yâjâ o malina manyu.

30. Ikabojana pang' 'amě e ndi ebâbu, na jumba jamě i bohadi.

KAPITA XII.

1. Jisus a pudunganaki mwanga mua poti o 'gombe tēnē o buhwa boa Iyâjâ; na beyokwedi beaju na yokaka nja, na bâ-ba yalē ibuka ja poti n' ija.

2. Nd' o Farisi ba yēnēkidi, ba vâki na ju, na, Umbwakiyate, beyokwedi beâvê be hakandi e ha ibě hohonganěngo n' iha o buhwa boa Iyâjâ.

3. Ndi ka Mâ-a vâ na bâ, na, O ha langeteni ya Devid e hakidi, o mâ-a yokaki nja na ba diyaki na ju,

4. Nyang' 'aju e ngakiyedi o ndabo y' Anyambě, na jaka pēmbě y' ilevudwě e ha diyaki hohonganěngo na mâ-a jaka, na ba diyaki na ju, kabo prist dipâ?

5. Ipě, o ha langeteni o belekanako nyanga ya prist, o hwi j' Iyâjâ, e jongolakidě buhwa boa Iyâjâ o tēmpěl, ndi ba diye na njēnji?

6. Ndi Mbi vâki n' inyëni, na, Okava, o na A di bonënë wa na tēmpël.

7. Nd' o jaka o yowakëni nyanga ya 'kae e weyakë, Mbi vahakandi ngâtâ ndi hanga benambo, wa diyeni wa kwehë a ha 'bë kobango.

8. Ikabojanâ Mwana-moto A te Upangiyi tombe mua buhwa boa Iyâjâ.

9. O Mâ-a békidi valango oviy' omë, A këkind' o sunegâgi 'abu.

10. ¶ Omë o diyaki na momo enâ eyomi vivilaniyango. Ka bâ-b' uwa Mâ, na, E te hohonganëngo na o yongë o hwi ja Iyâjâ? na ovanë nd' o bâ-ba ka hënjë Mâ.

11. Ka Mâ-a vâ na bâ, na, A lë nja moto-ë a didi 'nyëni-o jadi ovanë a ka bë udâmbë 'mbâkâ, oningë mua kwa o epududu o buhwa boa Iyâjâ aa bweye mâ, na mâ-a hoduwa mâ?

12. Na kumbakidë moto a di wa n' udâmbë? Ovanë nd' o yâ e di hohonganëngo na iha ja bwam' o hwi j' Iyâjâ.

13. Jâ ndi 'jaju ja vâ na momo tē, na, Hambakidë enâ 'âvë. Ka mâ-a hambidë: ka yâ-ya timba upëha panika epâkwë.

14. ¶ Jâ ndi ja Farisi ja puma ka lata ehoka ya nyanga 'bu e ka weyanë Mâ.

15. O Jisus a yowakidě, ka Mâ-a vëngě-mě omě: ka bebimba beněně bea vitě Mâ, ka Mâ-a yongě bēhēpi:

16. Ka Mâ-a pakuwa bâ, na, ba pangake Mâ-a yowanakě,

17. Ovaně nd' o yâ e ka timě ya usâki Iseas e kalakidi, na,

18. Umbwakiya uhayi muamě, uamě a di pânângo, uamě a tândâkě, na u' Ilina jamě i tândânâkě: Mbi ka vaměndi Ilina jamě o Mâ-a jadi, na Mâ-a ka leviděndi Betomba yěkě.

19. Aa yomane, na Mâ-aa yame; na moto aa yoke tepě joyi jaju o mehěngě.

20. Aa buke tuka ya nyingiyango, na Mâ-aa dime tepě bevudi be tutakě, kabo A loma yěkě o ibala.

21. Dina jaju ndi ja Betomba i ka pitidě.

22. ¶ Jâ nd' ijaju ja vanwě moto a bwe-yakwě na dēvil ya emukumuku na pāgu: ka Mâ-a yongě mâ, ka emukumuku ya kala, na pāgu ya yēně.

23. Ka ebumbu yēhēpi ya mama, na, A ibě Mwana-Devid ekaně?

24. Nd' o Farisi na yokakidi, ba vâki, na, Ekaně aa vëngěkidě dēvil, ndi kabo na Biělsibub upolo mua dēvil.

25. Ka Jisus a yowě mapikiliya mabu, ka Mâ-a vâ na bâ, na, Ipangiya jěhěpi i pěhěkě na já mětě i ka jiliyandi; na ba mboka na ba ndabo yěhěpi e pěhěkě na yâ mětě, yaa tême.

26. Ndi oningě Setan a věngěkidě Setan, vâkâna a pěhěki na má mětě: nandi ipangiya jaju i ka tême lě na-e?

27. Nd' oningě na Mbi věngěkidi dēvil na Biělsibub, aja ua bana banyu a věngě-někidě? ovaně nd' o bâ-ba ka diyě bayě-kidi banyu.

28. Ndi oningě Mbi věngěkidě dēvil n' Ilina j' Anyambě, vâkâna ipangiya j' Anyambě i pândi o inyěni-o jadi.

29. Moto a ka yâlě lě o ngiya o ndabo ya moto ukolo ka jongolidě jumba jaju na-e, kabo a t' o kata ukolo katango? běngě a jongolakidě ndabo 'aju.

30. A ha 'bě n' Umba, a 'bě o pěl' 'amě: na a ha yolakě n' Umba, a pajangana-kěndi.

31. ¶ Ovaně nd' Umba-Mbi vâki n' inyěni, na, Mabe měhěpi na, ikila j' Anyambě be te be iyakudwě bato; ndi 'kila ja Ilina Iyamu jaa 'yiudwě bato.

32. Uěhěpi a ka kalě ndaga o pělě ya

Mwana-moto, e ka yidwi mâ: ndi a ka kalě o pělě ya Ilina Iyamu uěhěpi, ya 'yiudwě nâ, tombete o eměnâ tēkae, na o e vakě.

33. Nyěvēkid' ele, na bebuma beaju; tombe wa bevě ele na bebuma beaju: ikabojana ele a yowanaki na bebuma.

34. A! igona ja mbamba, o lě o kala-kani belombo beyamu na-e, inyěni-o jadini babe? ikabojana o bwinge boa 'bumulema ndi boa udumbu bo kalakě.

35. Mot' uyam' o ngumba eyamu ya 'bumulema a běkěkidi beyamu; na mot' ube o ngumba ebe a běkěkidi bebe.

36. Ndi Mbi vâki n' inyěni, na, Bato ba ka vi tango o buhwa boa yěkě o ndaga yěhěpi eabu e ka kalě e diye n' itinga.

37. Ikabojana ndaga jâvě t' ijâvě i ka huwanudwě, na ndaga jâvě te ijâvě i ka kwehanwě.

38. ¶ Jâ ndi ja Balěndi bākâ na Farisi ba yavwuwa, na, Uyokwidi, ho vahakandi o yěně-ndembo o âvě-o jadi.

39. Ndi a yavwanaki bâ, na, Igona j' ihonde na bobe i vahakandi ndembo; nd' o 'bě na ndembo e ka věwě jâ kabo ndembo ya usâki Jonas:

40. Panika Jonas a diyaki meehe melalo na mebulu melalo o ihuhu ja nyambimbi, nonaně tepě o Mwana-moto a ka diyě meehe melalo na mebulu melalo o ulemà mua he.

41. Bato ba Niniva ba ka 'muwi na igona tēkadi o yēkě na bâ-ba ka kwehi jâ: ikabojana ba ulwakindi n' ipakuwedi ja Jonas: ndi, umbwakiyate, uněně wa na Jonas a nd' okava.

42. Konde ya diko a ka tēmēndi n' igona tēkadi o yēkě, ka kwehě jâ; 'kabojana a vakiyendi o mahuku ma he ka yoka iyowě ja Solomon: ndi, umbwakiyate, uněně wa na Solomon a nd' okava.

43. Oningě ilina ibe ja vĕngēmě na moto, a tamwakand' o loboko la yaheyahe, a vahaka iyâjâ, nd' a duwe.

44. Jâ nd' ijaju ja vâ, na, Mbi ka timband' o ndabo 'amě o umb'-'i vakiyedi: o mâ-a pâdi, ka mâ-a kâbidě yâ ebobolo viyâ-wĕngo, na kembwĕngo.

45. Jâ nd' ijaju ja vala ka nāngâ na mâ mētě malina mapâkwě hĕmbwĕdi bobe wa na mâ mētě, ka mâ-ma ngiya ka diya omě: madikanido ma moto tĕně ma bobe wa na bohoboho. Nonaně tepě o yâ e ka diyě n' igona tē ibe ekadi.

46. ¶ O Mâ-a diyakidi A kalaka na ebi-mba, bana ba nyangwě na nyangwě ba tě-měkindi o bwebwe, ba vahaka o kala na ju.

47. Jâ ndi ja moto n' uhuhu ja vâ na ju, na, Umbwakiyate, nyângwě na bana ba nyângwě ba nd' o bwebwe těmetěme, ba vahaka o kala na nâvě.

48. Nd' A yavwakindi ka Mâ-a vâ na a langwakiya Mâ, na, Jaie a lě-a nja? na bana-b' ina lě ba nja?

49. Ka Mâ-a hambid' enâ 'aju o beyo-kwedi beaju be jadi, na, Yěněkěte jaie na bana-b' ina.

50. Ikabojana uěhěpi a ka hayě upango mua Paia a jad' o Hěvěn, mâ tepě mwan'-ina, n' iluku, na jaie.

KAPITA XIII.

1. Buhwa tě te boa Jisus bo pumakidi o ndabo, ka Mâ-a diya baka na manga.

2. Ka bebimba beněně bea yolăně o Mâ-a jadi, ka Mâ-a vala ka diya o elende; ka ebimba yěhěpi ya těmě o kindiki.

3. Ka Mâ-a kaliya na bâ belombo beitě

na mekanakâdi, na, Umbwakiyate, uliyi u këkë ka liya;

4. O mâ-a mwanjidi, jâkâ i kwakindi o pëpëkë ya njeya, ka lonâni la viya ka sâsâ já.

5. Jâkâ i kwakindi o beëngë o mahë ma ha diyakidi maitë; ka já-ja hungana o puma, ikabojana ju diyaka na ndiba ya mahë.

6. Ka já-ja bâmbâlâniya o joba i puma-kidi; i vivilanakiyendi 'kabojana ju diyaka na metamba.

7. Ka jâkâ ja kwa o mekanda; ka mekanda mea tombuwa na meâ-meâ ha já kâlu;

8. Ndi ipâkwë i kwakind' o mahë mayamu, ka já-ja yëkëmë bebuma, jâkâ kama, jâkâ mab' utoba, jâkâ mabo malalo.

9. A di na matâ ma yokakë; a yokake.

10. Ka beyokwedi bea viya, ka vâ na ju, na, E lë nd' eâvë e kalakë na bâ na mekanakâdi?

11. A yavwanaki bâ, na, Ikabojana inyëni nd' o didini vëwëngo iyowë ja mahâwë m' ipangiya ja Hëvën, ndi bâ-ba ibë vëwëngo.

12. Ikabojana a janidi uëhëpi nd' a ka vëwë, na mâ-a ka diyaka na beitë: ndi a

ha ibě ně uěhěpi, a ka nângânwěndi tombe na eaju a janidi.

13. Ovaně nd' Umba-mbi kalakě na bâ na mekanakâdi; ikabojana boyěněkě, baa yěněkě; boyokaka, baa yokaka; na bâ-baa bandamakidě.

14. Na bâ, isâkâ ja Iseas i hohonganidě. ndi i vâkě, na, N' iyoka nd' ijanyu i ka yokě, ndi wa bandamiděni; iyěně tepě ijanju i ka yěně, ndi wa bweyiděni.

15. Ikabojana bebumulema bea bato tēkaba be vulindi, na matâ mabu ma tuni n' iyoka, na bâ-ba dibi mihâ mabu; na o banga ba yěně na mâ, na bâ-ba yoka na matâ mabu, na bâ-ba bandamidě na bebumulema, na bâ-ba 'luwa, Mba yongě bâ.

16. Ndi, ibâtâ na mihâ manyu, 'kabojana ma yěněkěndi; na matâ manyu, 'kabojana ma yokakandi.

17. Ikabojana, Mbi vâki n' inyěni pâkwěpâkwě, Basâki baitě na bato bayamu ba vahakind' o yěně beanyu be yěněkě, ndi bu yěněkě bea; na o yoka ibeanyu be yokaka, ndi bu yokaka bea.

18. ¶ Yokakani nandi ukanakâdi mu'liyi.

19. Oningě moto a yoka ndaga ya ipa-

ngiya, na mâ-a bandamidě yâ, vakâna Ube a vakandi ka nângânâ mâ i mwanjakudwě o ebumulem' 'aju. A pahakiyedi 'bângâ o pěpěkě ya njeya nd' ekaně.

20. Ndi a pahakiyedi 'bângâ o beěngě, nd' a běkě ndaga yokango, na mâ-a hungana o nângâ yâ na mbya;

21. A diye na metamba mâ mětě, a diya-kate ukili; kwěyi, o betuniya na njuke be ka pâyě o nyanga ya ndaga, na mâ-a kâbâ.

22. A pahakiyedi 'bângâ o mekanda nd' a běkě ndaga yokango; n' inaka ja eměná tēkae, n' iyabana ja boněně be ka haka ndaga kâlu, na mâ-a bě ekomba.

23. Nd' a pahakiyedi ibângâ o mahě mayamu, ndi a běkě ndaga yokango, na mâ-a yâ bandamiděngo; mâ nd' a yěkēměkě bebuma, umbâkâ kama, upâkwě mab' utoba, upakwě mabo malalo.

24. ¶ A kanakiyi bâ ukanakâdi upâkwě, na, Ipangiya ja Hěvěn i kwanaki moto a mwanja ibângâ iyam' o mwanga muaju:

25. O bato ba diyaki ba yaka, k' uloni muaju mâ-a viya ka mwanja ters o hwit; ka mâ-a vala.

26. Nd' o bekai be pumidě, ka ja-ja ja bebuma, jâ ndi ja ters ja pumě tepě.

27. Ka bahayi ba hangwě-ndabo ba viya ka vâ na ju, na, Upangiyi, wu mwanjaka ibângâ iyam' o mwanga muâvê? nd' u pahiyē lě ters na nja pělě?

28. Ka mâ-a vâ na bâ, na, Moto a lonakě nd' a had' ekae. Ka bahayi ba vâ na ju, na, O ka bâbate ho kěķě ka kuwa jâ?

29. A vâki, na, Nyawě; o bang' inyēni-o ka kuwēni ters, wa hoduwa tepēni hwit.

30. Dikakani beēhēpi be tombwake ta kwanga n' 'al' o juma: mbi ka vwi na babenji o 'gombe ya juma, na, Ta ka yolēni ters, na inyēni wa kati jâni o mebâmbâ ovaně nd' o j'-i ka tumbwi: nd' o yolakēni hwit o kundu 'amě.

31. ¶ A kanakiyi bâ ukanakâdi upâkwě, na, Ipangiya ja Hěvën i kwanakandi uto-nga mua 'buma ya mutard, mua momo u nângâkidi, na mâ-a liya o mwanga muaju.

32. E di mětě yěviyěngo o bolo bebuma beēhēpi; yâ ndi e diyakě ya bě eněně wa o bolo bele behâlě, oningě ya tombuwa, na lonani la oba lo ka vaka ka diya o melabe meaju.

33. ¶ A kalakiyi bâ ukanakâdi upâkwě, na, Ipangiya ja Hěvën i kwanaki lěvën ya mwajo e nângâkidi, na mâ-a hâbě yâ o

beyějâ bea pëmbě belalo, kabo yěhěpi ya landa.

34. Jisus a kalaki na bebimba belombo tēkabe beēhěpi na mekanakâdi; Au kalaka na bâ A kaniye bâ ukanakâdi.

35. Ovaně nd' o ya usâki e kalakidi e ka timwě, na, Mbi ka bumuděndi udumbu muamě na mekanakâdi, Mbi ka pumi belombo be di kutwengo oviya jali ja he.

36. Jâ ndi ja Jisus ja validě bebimba, ka Mâ-a vala o ndabo: ka beyokwedi beaju bea viya o Mâ-a jadi, na, Pakwakiya hwě ukanakâdi mua ters ja mwanga.

37. A yavwakindi ka Mâ-a vâ na bâ, na, Mwana-moto nd' a mwanjakě ibângâ iyamu;

38. Mwanga ndi he; bebuma beyamu ndi bana ba ipangiya; ndi ters ndi bana ba Ube;

39. Uloni u mwanjaki jâ ndi dēvil; juma ndi 'huku ja he; babenji ndi enjěl.

40. Pani te ka ters i yolakwě na jâ-ja tumbwě o veyā; nonaně tepě o ihuku ja he tēkaně e ka diyě.

41. Mwana-moto a ka lomandi enjěl jaju ka vëngidě belombo beēhěpi be kâbânâkě, na be hakě bobe, oviya ipangiya jaju.

42. Be ka 'hwěndi o ebekě ya veyā ; omě o ka diyandi na mbembe na ikalidě ja mahonga.

43. Běngě bato bayamu ba panyake panika joba o ipangiya ja Hangw' 'abu. A di na matâ ma yokakě, a yokake.

44. ¶ Ipangiya ja Hěvěn i kwanaki pě hika e di kutwěngo o 'hiki, ya moto a běkě duwango, na mâ yâ kutango, na mâ-a 'la ka hambidě belombo beaju be janidi beěhěpi, na mâ-a hamba ehiki těně.

45. Ipangiya jâ Hěvěn i kwanaki pě maseni ma vahaka perls iyamu :

46. Ma běkě oningě mâ duwango perl pākâ y' ihambe iněně, na mâ-a 'la ka hambidě belombo beaju be diyanakidi beěhěpi, na mâ-a hamba yâ.

47. ¶ Ipangiya ja Hěvěn i kwana i pě elâba, e 'hwakwě o manga, na yâ-ya yolě mangâ měhěpi :

48. E dulakwě o he, oningě yâ londango, na bâ diya iyola ja beyamu o melega, ndi ba uhwaka bebe.

49. Nonaně tepě o yâ e ka diya o ihuku ja he : enjěl i ka viyi ka paludě babe oviya bayamu ba jadi,

50. Na jâ i ka uhwi bâ o ebeke ya veyā : .

omě o ka diyi mbembe na ikalidě ja mahonga.

51. Jisus a vâki na bâ, na, O bandamakiděteni belombo tēkabe beēhēpi? Ba vâki na ju, na, E, Upangiyi.

52. Jâ nd' ijaju ja vâ na bâ, na, Ulēndi muēhēpi u yokwakudwě o ipangiya ja Hēvën u kwanaki moto a di hangwě-ndabo, a bēkēkidě o ngumb' 'aju belombo bea kya na belombo bea vyo.

53. ¶ E diyaki nonaně, o Jisus a bēkidi hânjâbiděngo mekanakâdi tēkaine, ka Mâ-a vēngēmě omě.

54. A yokwanakiděndi o ndabo 'abu y' Anyambě, o Mâ-a pâkidi o wabu mětě, ka bâ-ba mama, na, Momo tēkaně a vaniye lě iyowě tēkadi na behavu tē beněně ekabe o nja pělě?

55. A ibě mwana ukēkēngě ekaně? A ibě nyangwě a tubakwě na Meri? ba ibě bana ba nyangwě Jems, na Josēs, na Saimon, na Judas?

56. Maluku maju mēhēpi ma ibě na hwě? Ndi ekaně a vaniye lě belombo tēkabe beēhēpi o nja pělě?

57. Ka bâ-ba numba na ju. Ndi Jisus a vâki na bâ, na, Usâki aa pēnēkě ihe-

kudwě kabo o wabu, na o ndabo 'aju mětě.

58. Au haka omě behavu beněně beité, ikabojana b' u diyaka n' ikamidě.

KAPITA XIV.

1. O 'gombe těně ndi ya Hěrod ya titrark e yokaki kuma ya Jisus.

2. Ka mâ-a vâ na bato baju, na, Ekaně ndi Jon Baptist; a pumbuwendí; ovaně nd' o behavu beněně be levakudwě o mâ-a jadi.

3. ¶ Ikabojana Hěrod a bweyaki Jon, ka mâ-a kata mâ, na vamě mâ o ntyogo na tina ya Herodias, mwad' 'a mwana-nya-ngwě Filip.

4. Ikabojana Jon a vâki na ju, na, E ibě hohonganěngo na nâvě o baka mâ.

5. A bangakindi ebimba ya bato, o mâ-a 'mbakidi o weya mâ, 'kabojana ba ma langaki mâ k' usâki.

6. Ndi, o buhwa boa Hěrod bo jakudwě bo tatakudwě, mwana ua Hěrodias ua mwajo a yembakindi o boho boabu, ka yâ-ya tândidi Hěrod.

7. Ovaně nd' o mâ-a yohanakidě mâ n' ikana, na, a ka viyi mâ eaju e ka uwě yě-
hěpi.

8. A diyakindi a ta kelevudwě na nya-
ngwě, ka mâ-a vâ, na, Věkě 'mba okava
molo mua Jon Baptist o epěle-bwalo.

9. K' upolo mâ-a yěně ngěbě ; nd' o nya-
nga y' ikana, na ba diyaki na ju o ija, a
sombiyakidi na u věkwě mâ.

10. Ka mâ-a lomidě ka lena molo mua
Jon o ntyogo.

11. Ka molo muaju mfua vanwě o 'pěle-
bwalo, ka muâ-mua věwě isesa ; ka viâ-
via valaňa muâ nyangwě.

12. Ka beyokwedi beaju bea viya ka nâ-
ngâ ukuku, na tongaka muâ, ka bâ-ba vala
ka languwa Jisus.

13. ¶ O Mâ-a yokaki yâ, Jisus a věngě-
měkindi omě na elende ikutakuta ; ka bato,
o bâ-ba yokakidi, ba viya o mamboka ba
vitě Mâ na ja he.

14. Ka Jisus a jabuwa, na Mâ n' a yě-
někě ebimba ya bato eněně, ka Mâ-a 'muwa
na ngâtâ o pěl' 'abu, ka Mâ-a yongě mebědi
meabu.

15. ¶ Ka beyokwedi beaju bea viya o
Mâ-a jadi, o yâ diyaki ya bě kolo, na,

Ekavi vi ndi 'boko via nginga, na egombe e tombi tepě; valakidě ebimba ya bato, ba vale o mbok' ihâlě ka hambiya beja beabu.

16. Jisus a vâki na bâ, na, Ba ibě na mala ba kěkě; inyěni, věki bâni beja.

17. Ka bâ-ba vâ na ju, na, Ho nd' okava kabo membunda mea pěmbě metano, na bejaka bebale.

18. A vâki na bâ, na, Vanaki beâni okava Umb'-i jadi.

19. Ka Mâ-a sombiya ebimba ya bato na ba diyake o mbwisanga, ka Mâ-a nângâ membunda mea pěmbě metano, na bejaka bebale, ka Mâ-a umbuwa oba, ka Mâ-a vambiya ibâtâ, o Mâ-a bukakidi, ka Mâ-a vě membunda mea pěmbě o beyokwedi beaju bejadi ka beyokwedi bea vě ebimba ya bato.

20. Běhěpi ba janakiděndi, ka bâ-ba vula; ka bâ-ba tâlidě nguħ i dikanakidi jomu na belinga bebale ti.

21. Ba jakidi ba diyaki ba tâjen ja bamo itano, tepě na bajo na bana.

22. ¶ Elěngiaha tepě ka Jisus a tundudě beyokwedi beaju na ba vamahe o elende, na bâ-ba ta vala o mwidi upâkwě, o ulingo muaju u valakidě bebimba bea bato.

23. O Mâ-a bëki bebinba validëngo, ka Mâ-a beta ukodi o pëpëkë ka kaliya; a diyakite omë dipâ, o kolo e pâkidi.

24. Ndi elende e diyaki ya bë o etima o hanganë, e bolonganaka na mekeba; 'kabo-jana upupë u diyaki bobe.

25. O 'lahe ya benai na bulu ndi ya Jisus e këkidi o bâ-ba jadi, a tamwaka o etima.

26. O bâ-ba yënëki Mâ-a tamwaka o etima, ka beyokwedi beaju bea juka ipiki-liya, na bâ-ba yamaka na jângâ, na, U ndi ukuku!

27. Ndi Jisus a hunganakindi o kala na bâ, na, Yâdâkâni; a t' Umba; o bangakeni.

28. Ka Pitë a yavwana Mâ, na, Upangiyi, ipë a nd' Âvë, langwakiya 'mba, na mbi vake o Âvë-o jadi o miba.

29. Ka Mâ-a vâ, na, Vaka. Ka Pitë a huba oviya elende itamuwa ja miba ivala o Jisus a jadi.

30. Ndi a bangakindi, o mâ-a yënëkidi upupë ukolo; na mâ-a ka yalakë igilindâ-ndâ, ka mâ-a yama, na, Upangiyi, hunginaka 'mba.

31. Elëngiaha tepë Jisus a hambakid' enâ,

ka Mâ-a bweya mâ, ka Mâ-a vâ na ju, na, Âvë, u' ikamidë ihâlë, e lë nd' eävë e ma boma penda?

32. K' upupë mua wa, o bâ-ba vamakidi o elende.

33. Já ndi ja ba diyakidi o elende ja viya ka kaliya Mâ, na, E! pâkwëpâkwë, O i Mwana-Anyambë.

34. ¶ Ka bâ-ba pâ o ehe ya Jënësarët, o bâ-ba békidi jabuwango.

35. O bamo b' iboko tëvinë ba yowakidë Mâ, ba lomidë magende o etëbë tënë yëhëpi uluanidëngo, ka bâ-ba vana o Mâ-a jadi ba diyaki ba békë bëhëpi;

36. Ka bâ-ba hâhâlidë Mâ na ba kupana-ke tombekete ugunde mua ngâi 'aju pa: ndi tango e kupanakidë e yongakudwëndi.

KAPITA XV.

1. Já ndi ja Balëndi na Farisi ba Jërusalëm, ba viya o Jisus a jadi, na,

2. E lë nde ya beyokwedi beävë be pulakë epepa ya batodu? 'kabojana baa tukaka benâ beabu o bâ ba jakë beja.

3. Nd' a yavwakindi, ka Mâ-a vâ na bâ,

na, E lě nd' eanyu tepě e pulakě élananako y' Anyambě na bepepa beanyu ?

4. Ikabojana Anyambě a sombiyakidi, na, Hekakidě nyângwě na hângwě ; nd' a ka hâkě hangwě na ba nyangwě, a wake bowaka.

5. Ndi 'nyěni mâ, na, Uěhěpi a ka vâ na hangwě na ba nyangwě, E ndi ya bověkwě eávě e didi o kovaka n' umba ;

6. Na mâ-a hekidě hangwě na ba nyangwě. Nonaně nd' inyěni-o hadivakiděni elekanako y' Anyambě na bepepa beanyu.

7. Inyěni menoki, Iseas â huwakite o sâ-kâ inyěni, na,

8. Bato těkaba ba bengakiyate Umb'.'i jadi na medumbu meabu, na bâ-ba hekakidě 'Mba na belěbu beabu ; ndi melema meabu me ndi yavaniděngo n' Umba.

9. Ndi, ba kalakiyate 'Mba o naně, ba yokwakidě iyokwanidi ja belekanako bea bato.

10. ¶ Ka Mâ-a ndiya ebimba, ka Mâ-a vâ na bâ, na, Yokakani, n' inyěni na bwe-yiděni ;

11. E ibě e kěkě o udumbu e bevakě moto ; ndi e pumakě udumbu, yâ nd' e bevakě moto.

12. Já ndi ja beyokwedi beaju bea viya ka vâ na ju, na, O yowudête na Farisi ba ma numbandi, o bâ-ba ma yoka ndaga tēkanē?

13. Ndi A yavwakindi, na, Iliya jēhēpi ja Paia ya oba i ha liyakidi, i ka kuwēndi.

14. Dikaki bâni mbwe, ba ndi batu-mbwani ba pâgu na pâgu. Ndi oningē pâgu na pâgu i tumbwanaka jâ jēhēpi i ka kwand' o epupudu.

15. Já ndi ja Pitē ja yavwuwa, ka mâ-a vâ na ju, na, Pakwakiya hwē ukanakâdi tēkamu.

16. Ka Jisus a vâ, na, Inyēni-o ibē tepēni n' ibweyidē?

17. O ha bweyidēteni na e ngakiyē o udumbu yēhēpi e kēkēndi o ihuhu, na yâ ya pumwē o pēpēkē?

18. Ndi belombo be pumakē o udumbu be vakiyandi o ebumulema; beâ ndi be bevakē moto.

19. Ikabojana oviya ebumulema be pumakiyandi mapikiliya mabe, iweyana, inanganiya, na ihonde, iyiba, ilanguwa ja 'vela, ikila j' Anyambē:

20. Be bevakē moto nd' ekabe: ndi ija na benâ be tukwē ya bevakē moto.

21. ¶ Já ndi ja Jisus ja vëngëmë omě, ka Mâ-a vala o betěbě bea Tair na Saidon.

22. Umbwakiyate, mwajo ua Kenan a vakiyed' o betěbě tě, a yamakindi o Mâ-a jadi, na, Upangiyi, Mwana ua Devid, yoka-kiya 'mba ngâtâ; mwan' 'amě ua mwajo a na mehiyo mětě mea dëvil.

23. Ndi au yavwanaka mâ ndaga. Ka beyokwedi beaju bea viya ka hâhâlidě Mâ, na, Valakidě mâ; 'kabojana a yamakiyi hwě.

24. Ndi A yavwakindi ka Mâ-â vâ, na Mbu lomakwě kabo o medâmbě me nyangango mea ndabo ya Israël.

25. Já nd' ijaju ja viya ka kaliya Mâ, na, Upangiyi, hanaka 'mba.

26. Ndi A yavwanakindi ka Mâ-a vâ, na, E ibě lukango na o nângâ beja bea bana, na o 'hwa beâ mbwa.

27. Ka mâ-a vâ, na, E! Upangiyi, ndi mbwa i jaki nguhu i kwakě o tagulu ya hangw' 'abu.

28. Já ndi ja Jisus ja yavwana, ka Mâ-a vâ na ju, na, Mwajo! ikamidě jávě i ndi 'něně; e diyake o âvě o jadi nyanga 'vě e di vahango. Ka mwan' 'aju ua mwajo a yonga oviya iwěla tědině.

29. Ka Jisus a vëngëmë omë, na valaka pyëlë na etima ya Galili; ka Mâ-a diya omë, o Mâ-a betakidi ukodi oba.

30. Ka bebimba benënë bea viya o Mâ-a jadi ba diyaki na bebokë, na pâgu, na mambuke, na bekëhë, na bapâkwë baitë, ka bâ-ba nangidë bâ o beko bea Jisus; ka Mâ-a yongë bâ;

31. Nana ebimba ya mama, o bâ-ba yënëki mambuke ma kalaka, bekëhë be yongaka, bebokë be tamwaka, pâgu i yënëkë: ka bâ-ba bendë Anyambë ya Israël.

32. ¶ Já ndi ja Jisus ja ndiya beyokwedi beaju o Mâ-a jadi, ka Mâ-a vâ, na, Mbi yë-nindi ebimba ngâtâ, 'kabojana ba bi n' Umba hwi 'lalo okava, ba diye na 'lombo e jakë: n' Umba Mba vahaka o validë bâ tepë baa je, obanga ba hoviya na nja o njeya.

33. Ka beyokwedi beaju bea vâ na ju, na, Ho lë ho pahakiya beja beité o nja pëlë on' okava o nginga, be vulakë ebimba tē 'nënë 'kae?

34. Ka Jisus a vâ na bâ na, O lëni membunda meningë? Ka bâ-ba vâ, na, Hëmbwëdi, na lojajaka lohâlë.

• 35. Ka Mâ-a sombiyë bebimba na be diyake o he.

36. Ka Mâ-a nângâ membunda tě hěmbwědi na bejaka, ka Mâ-a vě akeva, ka Mâ-a buka bea, ka Mâ-a vě beyokwedi beaju, ka beyokwedi bea vě ebimba.

37. Na bâ běhěpi na jaka, ka bâ-ba vula: ka bâ-ba tâlidě belinga hěmbwědi ti bea nguhu i dikanakidi.

38. Ba jakidi ba diyaki tâjen ja bamo inai, tepě na bajo na bana.

39. Na Mâ na valakidě ebimba, ka Mâ-a vama o elendě, na pâkâ o betěbě bea Magdala.

KAPITA XVI.

1. Farisi na Sajusi ba pâki tepě, ba ka yějěkiyě Mâ, ba vahaka Mâ na A levakidě bâ elembo oviya Hěvĕn.

2. A yavwakindi ka Mâ-a vâ na bâ, na, O ya bě kolo, 'nyĕni mâ na, E ka diyandi epedi eyamu; 'kabojana oba e veyu.

3. Ndi, ubwa, E ka diyandi epedi ya lâmbulâmbu o buhwa: 'kabojana oba e ndi veyu na bevindi. A! 'menoki, o t' o yowakĕni boho boa oba; nd' o 'běni na ngudi ya 'yowě ja belombo bea 'gombe.

4. Igona ja bobe n' ihonde i vahakand'

elembo ndi o 'bě na elembo e ka vëwě já kabo ya usáki Jonas. Ka Mâ-a dika bâ na kěkě.

5. Ka beyokwedi beaju bea behalidě inângâ ja beja, o bâ-ba pâkidi o mwidi upâkwě.

6. ¶ Já ndi ja Jisus ja vâ na bâ, na, Bándamakiděni, 'nyěni o ka kelivakani na lěvën ya Farisi na Sajusi.

7. Ka bâ-ba totongana bâ mětě, na, E ndi 'kabojana hu vana beja.

8. O Jisus a-yowakidě, A vâki na bâ, na, Inyěni ba ikamidě ihâlě, e lě nde 'anyu e totonganakě inyi mětě, 'kabojana wu vanani beja?

9. O ha bweyiděteni, n' inyěni wa yongakiděni membunda metano o tâjeni itano, na nyang' 'anyu e tâlâkidi belinga beité?

10. Na membunda hëmbwëdi o tâjen' inai, na nyang' 'anyu e tâlâkidi belinga beité?

11. Ndi e lě nde 'anyu e ha bweyiděteni na Mbu kala n' inyěni o pělě ya beja, na, o ka kelevakani na lěvën ya Farisi na Sajusi?

12. Já ndi jabu ja bweyidě na Au kala

na bâ na ba kelevake na lěvën ya beja, kabo n' iyokwanidě ja Farisi na Sajusi.

13. ¶ Jisus a u'waki beyokwedi beaju o Mâ-a pâkidi o betěbě bea Sēsaria Filipai, na, Bato ba vâkâ lě 'Mba Mwana-moto na Mbi lě nja ?

14. Ka bâ-ba vâ, na, Bâkâ na, Jon ja Baptist; bâkâ na, Ilaias; bapâkwě mâ na Jěrimaia, na ba usâki umbâkâ.

15. A vâki na bâ, na, Ndi inyëni-o vâkâ lě na Mbi lě nja ?

16. Ka Saimon Pětě a yavwana, na, Ávë ndi Kraist, Mwana-Anyambě ya eměná.

17. Ka Jisus a yavwana, ka Mâ-a vâ na ju, na, Ibâtâ na nâvě, Saimon Bar-Jona; 'kabojana me ibě mehoni na makiya be ma levid' âvě yâ, ndi kabo Paia a jad' o Hěvën.

18. Mbi vâkâ tepě na nâvě, na, Ávë ndi Pitě; na o ilale těkadi nd' Umba-mbi ka longě tyâtyi 'amě: na mambě ma Hěl maa bale yâ.

19. Mbi ka vënd' âvě benunguna bea ipangiya ja Hěvën: eâvě e ka kombiyě o he yěhěpi e ka kombwě tepě o Hěvën; na eâvě e ka 'njuwě o he yěhěpi e ka 'njwě tepě o Hěvën.

20. Já ndi jaju ja pakuwa beyokwedi beaju, na baa langwake moto na a ndi Jisus ja Kraist mětě.

21. ¶ Ka Jisus a yalě ilevidě ja beyokwedi beaju oviya 'gombe těně, nyang' 'aju e ka valě o Jěrusalem, na ka yěně belombo beitě na batodu na prist ja meolo na Balěndi, na Mâ-a weyudwě, na Mâ-a pumbudwě pě o buhwa boa hwi 'lalo.

22. Já ndi ja Pitě ja nāngâ Mâ o pěpěkě, na mâ-a ka yalakě ikandidě jaju, na, E diyake yaviděngo na nāvě, Upangiyi; ekae yaa diye o Ávě-o jadi.

23. Ndi A tiimbakiděndi iběi, ka Mâ-a vâ na Pitě, na, Setan, věngěměkě 'Mba o mbuhwa, o numbakidi 'Mba: 'kabojana wa pikilakiya belombo bea Anyambě, ndi kabo bea bato.

24. ¶ Já ndi ja Jisus ja vâ na beyokwedi beaju, na, Oningě moto a pangaka ivitě jamě, a hâhâkiye nyol' 'aju, na mâ-a bapě krâs 'aju, na mâ-a ka vilinganakě 'Mba.

25. Ikabojana uěhěpi a ka tândě o yongě eměná 'aju a ka nyangi yâ: ndi uěhěpi a ka nyangi eměná 'aju o nyang' 'amě a ka duwi yâ.

26. E lě nja 'lombo-ě ya moto e di kova-

ngo, oningě a jaya he yěhěpi na mâ-a 'hwa ilina jaju? e lě ba nja 'lombo-ě ya moto e ka vangwaně ilina jaju.

27. Ikabojana Mwana-moto a ka viyi n' ivenda ja Hangwě na enjěl jaju; běngě a homanake moto uěhěpi hohonganěngo na behavu beaju.

28. Mbi langwakiyandi 'nyěni pākwěpākwě, O na bâkâ ba jad' okava tēmetēme, ba ka diyě baa veke iwedo, kabo ba ta yěně Mwana-moto a vaka o ipangiya jaju.

KAPITA XVII.

1. Hw' utoba tombango ka Jisus a nāngâ Pitě, Jems, na mwana-nyangwě Jon, ka Mâ-a valana bâ o ukodi mua udomba, o pēpěkě,

2. Ka nyol' 'aju ya 'luwa o pwanj' 'abu: boho beaju bo panyaka ka joba, na ibâtâ jaju ja bě botano ka bwe.

3. Umbwakiyate, ka omě wa pumiya Mosēs na Ilaias o bâ-ba jadi, ba kalaka na ju.

4. Jâ ndi ja Pitě ja yavwuwa, ka mâ-a vâ na Jisus, na, Upangiya, e ndi bwam' na

ho diyaka okava: na hwa ha okava meâkâ melalo, oningě wa bâbâ: Âvě umbâkâ, Mosës umbâkâ, n' umbâkâ mua Ilaias.

5. Umbwakiyate, evindi ya bwē e yambakiyi bâ, o mâ-a diyakidi a kalaka: na, umbwakiyate, joyi oviya evindi, i vâki, na, Ekaně a Mwan' 'amě a tândâkwě, a tândâkidě 'Mba bwam'; yokakiyi Mâni.

6. Ka beyokwedi bea kwa na meoho meabu, o bâ-ba yokakidi, na bâ-ba ka bangaka jângâ iitě

7. Ka Jisus a viya ka kupaně bâ, na, Umwakani, o bangaka tepěni.

8. O bâ-ba běki betěngo mihâ inabu, bu yěněkě pě moto, kabo Jisus dipâ.

9. Ka Jisus a pakuwa bâ, o bâ-ba diyakidi ba hubaka ukodi, na, O langwakeni ehihila tēkae moto, kabo Mwana-moto a pumbuwa pě oviya bāwewe.

10. Ka beyokwedi beaju bea uwa Mâ, na, E lě nde ya Balěndi e vâkě na Ilaias nd' a ka t' o pâ?

11. Ka Jisus a yavwana ka Mâ-a vâ na bâ, na, Pâkwěpâkwě Ilaias nd' a ka t' o viya, ka timbě belombo beěhěpi.

12. Ndi Mbi vâki n' inyěni, na, Ilaias a žěndi a pâ, ndi bu yowakě mâ, ba hakite

mâ kabo nyang' 'abu e vahakidi. Nonaně tepě nd' o Mwana-moto a ka yěně na bâ.

13. Já ndi ja beyokwedi ja yowě na A kalaki na bâ o pělě 'a Jon Baptist.

14. ¶ O bâ-ba pâkidi o ebimba e jadi, moto a vakindi a vaka a humaka mabângâ o Mâ-a jadi, na,

15. Upangiyi, yokakiya 'mba mwan' 'amě wa momo ngâtâ: 'kabajana a potwakandi, na mâ-a yokaki mehiyo mětě: 'kabajana e kwehaki mâ 'gombe eitě o vey a na egombe eitě o miba.

16. K' umba-mba valana mâ o beyokwedi beâvě be jadi, ndi bu yâlâkě o yongě mâ.

17. Já ndi ja Jisus ja yavwana, na, E! igona ja belenganango na ipuhwa j' ika-midě, Mbi ka diya lě n' inyěni nj' ulingo-ě? Mbi ka 'yika lě 'nyěni nj' ulingo-ě? Vana-ki mâni Umba-mbi jadi okava.

18. Ka Jisus a kandidě děvil; na yâ na věngěměkě o mâ-a jadi; ka mwana a yonga oviya iwěla tědině.

19. Já ndi ja beyokwedi bea viya o Jisus a jadi o pěpěkě, na, E lě nd' eahu e diyaki ho yâlě o věngidě yâ?

20. Ka Jisus a vâ na bâ, na, Na tina ya

ipuhwa janyu j' ikamidě; ikabojana Mbi vâki n' inyëni, o pâkwěpâkwě, oningě o di-yingëni n' ikamidě ona utonga mua 'buma ya mutard o ka vateni n' ukodi tēkamu, na, Emwaka okava nal' iboko tēkavině, u ka 'muwate; o ibě na 'lombo e ka diyě e haniye n' inyëni.

21. Ndi jângâ tēkadi jaa vëngēmēkě kabo n' ikaliya n' ihindina.

22. ¶ Jisus a vâki na bâ, ukili muabu u diyakidi o Galili, na, Mwana-moto a ka bweyudwëndi o benâ bea bato:

23. Ba ka weyi Mâ, ndi A ka pumbudwëndi o buhwa bo' ilalo. Ka bâ-ba yënë ngěbě eitě.

24. ¶ Ba ma yolakě pago ba vâki na Pitě, o bâ-ba pâkidi o Kapěrnaum, na, Uyokwidi muanyu aa vëke pago-e?

25. A vâki, na, E. Ka Jisus a takindi o kala na mâ, o mâ-a ngakiyedi o ndabo, na, O piviyaka lě na Saimon? ba lě ba nja ba mepolo mea he me nângânâk' ivě na ba pago? bana babu mětě, ipě bangi?

26. Pitě a vâki na Mâ, na, Bangi. Ka Jisus a vâ na ju, na, Hângě na bana ba te hulamango.

27. Nandi, obanga hoa numbidě bâ, kěkě

o etima, na nâvē w' uhwa jábâ, na nâvē oa
 bweya ejaka e ka t' o pâ: na nâvē-o ka
 duwandi epuhu ya dâlě o udumbu muaju
 o âvē-o ka bumudě muâ: wa nângâ eně,
 o ka věkě bâ o nyang' 'ahu na nâvē.

KAPITA XVIII.

1. O yâ egombe tēeně te ya beyokwedi
 be vakidi o Jisus a jadi, na, Nj' uněně wa
 o ipangiya ja Hěvěn?

2. Ka Jisus a ndiya etumbě o Mâ-a jadi,
 ka Mâ-a tědě yâ o hanganě 'abu,

3. Ka Mâ-a vâ, na, Mbi vâki n' inyěni
 pâkwěpâkwě, Wa ngiyeni o ipangiya ja
 Hěvěn kabo wa 'luwani, n' inyěni wa běni
 ka betumbě.

4. A di boněně wa o ipangiya ja Hěvěn
 ndi a ka yěvidě nyol' 'aju uěhěpi ona etu-
 mbě tēkae.

5. A ka věhělidě etumbě ka 'kae yâ-
 kâ uěhěpi na dina jamě a věhělěkidi
 'Mba.

6. Na uěhěpi a ka bevě etumbě yâkâ o
 betumbě tě be kamakidě 'Mba ekabe, e ndi
 tâmângo na mâ na a tingakwě ilale i kâ-

kânâkwě o ibâlu jaju, na mâ-a ngilindâ-ndwě o ndiba ya manga.

7. ¶ Maguga na he o nyanga ya ibevidě ! 'kabojana e ndi na ibevidě i ka pândi : ndi maguga na moto u' ibevidě i vakiyě !

8. Vakana, oningě ikadu jávě na ba itambi jávě ja bevidě ávě, lenaka mâ, na nâvě wa 'hwa mâ ; e ndi bwam' o pěl' 'ávě na nâvě o ngakiya o 'mënâ o dēhimaka na ba yěmě, wa na o diya na makadu mabale na ba matambi mabale na nâvě wa uhwě o veyā via 'gombe yěhěpi.

9. Ndi tongwaka dihâ jávě, na nâvě uhwa já, oningě i bevidě ávě : e bwam' na nâvě o ngakiya o 'mënâ na dihâ jákâ wa na o diya na mihâ mabale na nâvě wa 'hwě o Hěl ya veyā.

10. Bandamakiděni o pějěkeni na yâkâ o betumbě tě behálě ekabě ; 'kabojana Mbi vâki n' inyěni, na, O Hěvěn enjěl jabu i 'mbwakiyi boho boa Paia a jad' oba, egombe yěhěpi.

11. Ikabojana Mwana-moto a vaki ka hungina e diyaki nyangango.

12. O piviyaka lě na ? Oningě moto a na kama ya medâmbě, n' umbákâ o tango 'abu mu-a lenga, aa dikanaka mabo ibuwa

n' ibuwa na mâ-a ka kěķě o mekodi, ka vaha u di lengango?

13. Mbi vâki n' inyëni pâkwěpâkwě, oningě ya diya nonaně na mâ-a duwa muâ, a ka peyi na muâ wa na mabo ibuwa n' ibuwa ma ha lengakidi.

14. Nonaně tepě u ibě upango mua Hāngw' 'anyu a jad' o Hěvën, na behâlě ekabe be pelake na yâkâ.

15. ¶ Tepě, kěķě ka langwakiya mwana-nyāngwě bobe boaju inyi na ju babale, oningě a beviy' âvē; oningě a yokiye âvē, vâkâna o pahiyi mwana-nyāngwě.

16. Ndi oningě aa yokiye, nāngākâ na nâvē metě umbākâ na babale, na ovaně nd' o ndaga yěhěpi e ka kāmāmě o udumbu mua tali ibale na ba ilalo.

17. Na, oningě aa yokiye bâ, langwakiya ba tyâtyi; nd' oningě aa yokiye ba tyâtyi, a ka diyaka panika moto a ha 'wě Anyambě na uyoli-pago.

18. Mbi vâki n' inyëni pâkwěpâkwě, Eanyu e ka kombiyě o he yěhěpi e ka kombwě tepě o Hěvën: na eanyu e ka unjuwě o he yěhěpi, e ka unjuwě tepě o Hěvën.

19. Mbi vâki pě n' inyëni, na, Oningě babale o tango 'anyu ba latingě o he opěla

elombo yěhěpi eabu e ka uwě, e ka hawu-dwi bâ na Paia a jadi o Hěvĕn.

20. Ikabojana o babale na ba balalo ba di lataniyango ta o dina jamě, ovoně Mbi tepě o ngalakabo 'abu.

21. ¶ Jâ ndi ja Pitě ja viya o Mâ-a jadi, ka mâ-a vâ, na, Upangiyi, mwanina a ka bevě lě 'mba nj' iningě, n' umba-mba 'yidě mâ? nala njo hěmbwědi?

22. Jisus a vâki na ju, na, Mba vâkâ na nâvĕ, na, Nala njo hěmbwědi; ndi, Kwannga nala mabo hěmbwědi njo hěmbwědi.

23. ¶ Ovaně nd' o ipangiya ja Hěvĕn e kwanakudwě upolo umbâkâ, u 'mbakidi o nângâ tango o bahayi baju ba jadi.

24. O mâ-a yalakidě o langa tango, k' umbâkâ a vanwě o mâ-a jadi a diyaki mâ nuwanango jomu ja tâjen ja talĕnt.

25. Ndi, o mâ-a ha diyakidi na elombo e timbakě, upangiyi muaju a sombiyakidi na a hambakwĕ, na mwad' 'aju, na bana baju, na beaju be diyanakidi beěhěpi, na beâ-bea vĕwĕ.

26. Ka uhayi tĕ a kwa o he, na kalakiya mâ, na, Upangiyi, ta yika 'mba, mbi ka timbĕte âvĕ beěhěpi.

27. Jâ ndi ja upangiyi mua uhayi tĕ mâ-a

'muwa na ngâtâ, ka mâ-a unjuwa mâ, na 'yakidě mâ inwana tědině.

28. Ndi uhayi těmuně a kěkindi, ka mâ-a duwa uhayi na ju umbâkâ, a diyaki mâ nuwanango kama ya děsu; ka mâ-a bweya mâ o kingâ, na, O i 'mba nuwanango, věkě 'mba.

29. Ka uhayi-na-ju a kwa o matambi maju, na mâ-a ka hâhâlâkidě mâ, na, Ta yika 'mba, mbi ka timběte âvě beěhěpi.

30. Ndi au bâbâkâ, nd' a kěkindi, ka mî-a 'hwa mâ o ntyogo kabo a ta vě.

31. Bahayi-na-bâ bapâkwě ba yěněki ngěbě eitě, o bâ-ba yěněkidi nyanga ya e hamakidě, na bâ na vaka ka languwa upangiyi muabu nyanga ya e hamakidi yěhěpi. yěhěpi.

32. Jâ ndi ja upangiyi muabu ja ndiya mâ, ka mî-a vâ na mâ, na, E! mot' ube, mbi 'yakiděnd' âvě inwana tě jěhěpi, 'kabo-jana o hâhâlâkidi 'mba;

33. Wu lukaka o yěně uhayi-na-nâvě upâkwě ngâtâ, panika umba-mbi yěněkid' âvě?

34. Ka upangiyi muaju a linguwa, n' a věkě mâ bavomwanidi kabo a ta vě e di mâ nuwanango yěhěpi.

35. Nonaně tepě o Paia a jad' o Hěvăn e

ka hayě inyěni oningě o yiděni moto uě-
hěpi mabe ma bana ba nyangwě banyu
oviya melema meanyu.

KAPITA XIX.

1. E diyaki nonaně o Jisus a makidě
ndaga tēkadi, ka Mâ-a vengēmě oviya
Galili, na kēkě o betěbě bea Judia o mwidi
'pākwě mua Jordan.

2. Ka bebimba beněně be vitakidě Mâ,
ka Mâ-a yongě beâ omě.

3. ¶ Ka Farisi ja viya o Mâ-a jadi, o bo-
yějěkiyě Mâ, na, E te hohonganěngo na
moto a valakidě mwad' 'aju na tina yěhěpi ?

4. A yavwanakindi, ka Mâ-a vâ na bâ
na, O 'běni langango, na, A velakidi bâ o
jali A velaki bâ momi na mwadi,

5. Ka Mâ-a vâ, na, Yâ tina tēkaně ndi
ya moto e ka dikě hangwě na nyangwě, na
mâ-a ka kangalanaka na mwad' 'aju ; na bâ
babale ba ka diyaka uhoni umbākâ ?

6. Ovaně vākâna ba 'bě pě babale, kabo
uhoni umbākâ. Moto aa palwakidě pě ya
Anyambě e di latěngo ta.

7. Ka bâ-ba vâ na Ju, na, Nd' e lě nde

ya Mosēs e langwakidi na a vëkwě ejanganangobo y' ivëngidě, na mâ-a valudwě.

8. Ka Mâ-a vâ na bâ, na, Mosēs a bâbâ-kindi o valakidi bajo banyu ikabojana be-bumulema beanyu be jadi bekolo; ndi yu diyaka nonaně oviya jali.

9. Ndi Mbi vâki n' inyěni, na, Uěhěpi a ka validě mwad' 'aju, oningě e diya kabo n' inanganudwě, na mâ-a 'la ka baya upâkwě, a hakand' ihonde; na uěhěpi tepě a ka bayě a di valudwěngo ně a hakand' ihonde.

10. ¶ Beyokwedi beaju be vâki na Ju, na, E ibě bwamu na o ba, oningě moto na mwad' 'aju ba jadi nonaně.

11. Ndi A vâki na bâ, na, Bato běhěpi baa nânge ndaga tēkaně, kabo ba di yâ vëwěngo.

12. Ikabojana o na metonga meâkâ me jakudwě oviya memi ma ba nyangwě; na meâkâ me tongakwě na bato; na meâkâ me tongakě nyolo jabu mětě o nyanga ya ipangiya ja Hěvën. A didi a yâlâkě o nâ-ngâ; a nângâke.

13. ¶ Jâ ndi ja ba-nděmbě ja vanwě omě o Mâ- jadi, nana a kahakidě makadu maju o bâ-ba jadi na Mâ-a kaliya; na beyokwedi beaju na kandakidě bâ.

14. Ndi Jisus a vâki, na, Dikakani bandëmbë ba vake o Umb'-i jadi, o kandakidi bâni; 'kabojana já jângâ tédinë ndi ja ipangiya ja Hëvën.

15. Ka Mâ-a kahidë bâ makadu maju na vëngëmëkë omë.

16. ¶ Umbwakiyate, umbâkâ a vakindi o Mâ-a jadi ka vâ na Ju, na, Uyokwidi uyamu, mbi ka ha lë nja 'lombo-ë eyamu nana mbi diye na emënâ ya egombe yëhëpi?

17. Ka Mâ-a vâ na ju, na, E lë nd' eâvë e tubakë 'Mba na uyamu? o 'be na uyamu kabo 'mbâkâ, mâ ndi Anyambë. Ndi tataka belekanako, oningë o vahaka o ngiya o emënâ.

18. Ka mâ-a vâ na Ju, na, Beve lë? Ka Jisus a vâ na ju, na, O weyake moto, O hake ihonde, O ibake, O langwanakiye evela,

19. Hekakidë nyângwë na hângwë, na Nâvë o ka tândâkâ moto a bakakë na nâvë pani-ka nyol' 'âvë mëtë.

20. Iwanja tē i vâki na Ju, na, Mbi tatite ekabe beëhëpi oviya ndëmbë 'amë; e lë pë ndi eamë e nyamakë?

21. Jisus a vâki na ju, na, Këkë ka

hambidě belombo beâvě be di duwango, oningě o vahaka o diya hânjâbiyěngo, na nâvě wa vě mekuge, o ka diyi na hika o Hěvën : na nâvě wa viya ka vitě 'Mba.

22. Nd' iwanja tēdině i kēkindi na ngěbě eitě, o mâ-a yokaki ndaga tēně : 'kabojana a diyaki na jumba iněně.

23. ¶ Já ndi ja Jisus ja vâ na beyokwedi beaju, na, Mbi vâki n' inyěni pâkwěpâkwě, na, E ka diyi bokolo na moto a di kenango a ngakiya o ipangiya ja Hěvën.

24. Mbi vâki pě n' inyěni, na, E bobâbu na kaměl e pudunganaka ubana mua to-mbo wa na moto a di kenango a ngakiya o ipangiya j' Anyambě.

25. Beyokwedi beaju be mamakindi ima-ma iněně, o bâ-ba yokakidi, na, Nandi nja ka yâlě o yonga?

26. Ndi Jisus a 'mbwakiyi bâ, ka Mâ-a. vâ na bâ, na, Ekae yaa haniye na bato; ndi belombo beěhěpi be ka haniyate n' Anyambě.

27. ¶ Já ndi ja Pitě ja yavwuwa ka mâ-a vâ na Ju, na, Umbwakiyate, ho senji beěhěpi na vitě Âvě; e lě nja 'lombo-ě eahu e ka pahiyě?

28. Ka Jisus a vâ na bâ, na, Mbi vâki

n' inyëni pâkwěpâkwě, na, Inyëni ba di 'Mba vitěngo o ijawě iyânâ, o Mwana-moto a ka viya ka diya o eka ya ivenda jaju; 'nyëni o ka diyate pëni o jomu na beka bebale, o yěkěkiděni jom' na iniyâ mabale ma Israël.

29. Tepě moto uěhěpi a di senjango ndabo, tombe bana ba-nyangwě, tombe maluku, tombe hangwě, tombe nyangwě, tombe mwajo, tombe bana, tombe behiki, o nyanga ya dina jamě, a ka pahiyi pě kama, na mâ-a ka jiga tepě eměná ya 'gombe yěhěpi.

30. Ndi baitě ba jadi ba bohoboho ba ka diyi pě o mbuhwa; na ba mbuhwa ba ka diyi pě o bohoboho.

KAPITA XX.

1. Ikabojana ipangiya ja Hěvën i kwanaki momo a di hangwě-'a-ndabo a pundaki n' ubwa ka kâlâ bahayi ba hakiyě o mwanga muaju.

2. O mâ-a panganakidě bahayi fura ka buhwa, ka mâ-a loma bâ o mwanga muaju.

3. Ka mâ-a vala o epedi ya nawěla ibu-

wa, ka mâ-a yěně bākâ tēmetēme o ihambanido baa haye elombo.

4. Ka mâ-a vâ na bâ, na, Kěķě tepēni o mwanga, mbi ka vět' inyěni o yěhěpi e di hohonganěngo. Ka bâ-ba vala.

5. Ka mâ-a ha pě nyanga tē, o mâ-a ķěkidi o epedi ya jomu na mawěla mabale, na ya malalo.

6. Ka mâ-a duwa pě bapâkwě tēmetēme baa haye elombo, o mâ-a ķěkidi o epedi ya mawěla matano, ka mâ-a vâ na bâ, na, E lě ndi eanyu e tēměķě okava buhwa boěhěpi o hayeni elombo.

7. Ka bâ-ba va na ju, na, 'Kabojana moto a ibě hwě kâlāngo. Ka mâ-a vâ na bâ, na, Kěķě tepēni o mwanga; e di hohonganěngo yěhěpi ndi eanyu e ka pahiyě.

8. Ka upangiyi mua mwanga mâ-a vâ na yongo 'aju, o kolo pākidi, Ka ndakiye bahayi, na nâvē wa vē bâ ivě jabu, yalakě na ba madikanido na vala ka bweya ba bohoboho.

9. O ba kâlâkudwě o mawěla matano ba pākidi, ba pahaki moto moto eaju fura.

10. Ndi o ba bohoboho ba pākidi ba pivi-yaki n' ipě ba ka pahiyi wa; ka bâ-ba pahiya tepě moto moto eaju fura.

11. O bâ-ba bëki pahiyango, ka bâ-ba hâkâlâniyě moto tě a duwě ndabo ně,

12. Na, Ba madikanido ekaba ba ma hate iwěla jâkâ, na nâvě o ka věkě hwě ba' ma bapě jumba ja yomu ya buhwa nyanga pâkâ na bâ.

13. Ndi a yavwanakindi umbâkâ, na, Mbweyi 'amě, mbu ha 'vě bobe: wu panga naka n' umba fura?

14. Nângâkâ eâvě, na nâvě wa vala, mbi ka vi ua madikanido ekaně pani te ka 'vě.

15. E 'bě hohonganěngo n' umba-mbi ha-ka nyang' 'amě e ka vahě n' ibeamě mětě? Dihâ jâvě i nd' o 'beva, 'kabojana mbi did' o nyěvě?

16. Nonaně nd' o ba mbuhwa ba ka diyě o bohoboho, na ba bohoboho ba ka diyě o mbuhwa: 'kabojana baitě ndi ba ndakudwě, ndi nyěvá te e pânákwě.

17. ¶ Ka Jisus a nânga jomu na beyo-kwedi beaju bebale o njeya o přěpeke, o Mâ-a diyakidi a betaka o Jěrusalěm, ka Mâ-a vâ na bâ, na,

18. Umbwakiyate, ho betakandi o Jěrusalěm; na Mwana-moto a ka kândâkudwě-ndi o prist ja meolo na Balěndi ba jadi, na bâ-ba ka kwehi Mâ na A wake,

19. Na bá-ba ka bweyidi Má ka věhwě na Betomba, na ka bomwě, na ka kâmidě Má o 'le: nd' A ka pumbuwi pě o buhwa boa ilalo.

20. ¶ Já ndi ja nyangwě 'a bana ba Zěbědi na bana baju ja viya o Mâ-a jadi, ba kalakiya Mâ, na bá-ba ka yombwaka elombo n' ehuhu o Mâ-a jadi.

21. Ka Mâ-a vâ na ju, na, E lě nd' eâvě e vahakě? Ka mâ-a vâ na Ju, na, Vâkâ na ba tě ibamě babale ekaba, na, ba diyake umbâkâ o en' 'âvě eyomi, na umbâkâ o enâ ya 'měngwě, o ipangiya jávě.

22. Ndi Jisus a yavwanakindi ka Mâ-a vâ, na, Wa 'wěni nyang' 'anyu e uwakě. O t' o yâlâkěni imâtânâ j' imâgi jamě i ka mâtâně, na o baptaiswě na baptisma 'amě e ka baptaiswě? Ka bá-ba vâ na Ju, na, Ho ka yâlěte.

23. Ka Mâ-a vâ na bâ, na, Pâkwěpâkwě o ka mâtâteni imâgi jamě, n' inyěni-o ka baptaiswě tepěni na baptisma 'amě e ka baptaiswě: nd' ivě ja idiya ja 'nâ 'amě eyomi, na ya 'měngwě e 'bě 'amě, ndi e ka věwi ba Paia ba kanjakidě yâ.

24. O jomu i yokakidi i lingwaki na ba nyangwě pâkâ babale.

25. Ndi Jisus a ndakiyi bâ, ka Mâ-a vâ, na, O yowudëteni na mepolo mea Betomba me pangakiyi bâ, na banënë ba pangakiya bâ na ngudi.

26. Ndi yaa diye n' inyëni nonanë, ndi uëhëpi a ka vahë o diya unënë o inyëni-o jadi a diyake udili muanyu ;

27. Na uëhëpi a ka vahë o diya o molo o 'nyëni-o jadi, a diyake uhayi muanyu :

28. Pani te ka Mwana-moto a ha vakidi ka hadwë, kabo ka hana, na ka vë emënâ 'aju ivango ja baitë.

29. Ka ebimba ya bato enënë ya vitë Mâ, o Mâ-a vëngëmëkidi o Jëriko.

30. ¶ Pâgu ibale i diyaki diya o pëpëké ya njeya i yamakindi, o já i yokakiyi na Jisus a tombakandi, na, Yokakiya hwë ngâtâ, Upangiyi, Mwana-Devid.

31. Ka ebimba ya kandidë bâ nana ba diyake dâ : ndi ba yamaki pë wa, na, Yoka-kiya hwë ngâtâ, Upangiyi, Mwana-Devid.

32. Na Jisus na tëmëké de, ka Mâ-a ndiya bâ, ka Mâ-a va, na, O vahaka li Mbi hake 'nyi nde ?

33. Ba vâki na Ju, na, Upangiyi, mihâ mahu ma bumwakwë.

34. Ka Jisus a yokiya bâ ngâtâ, na Mâ

na kupanakě mihá mabu: na elěngiaha
tepe mihá mabu ma pahakiyendi 'yěně, ka
bâ-ba vitě MA.

KAPITA XXI.

1. Ka bâ-ba pâ o Běthpaje o ukodi mua
Álivěs, o bâ-ba bakami na Jěrusalěm, já
ndi ja Jisus ja loma beyokwedi bebale;

2. Mâ na bâ, na, Kěkěni o ibâkâ i jadi o
boho boanyu, o ka hunganandini o duwa
buru tingwěngo na mwana na yâ; unjuwaki
jâni, n' inyěni wa vanani o Umba-mbi jadi.

3. Oningě moto a vâ n' inyěni elombo, o
ka vâki, na, Upangiyi a na mala na já;
vâkâna a hunganindi o loma já.

4. Ekae yěhěpi e hamakindi, na ovaně
nd' o ya usaki e kalakidi e ka timwě, na,

5. Langwakiyani mwa-mwajo ua Zaion,
na, Umbwakiya, Upolo muávě u vakand' o
ávě-o jadi hwěi, diyango o buru na o etu-
mbě ya mwana ua buru.

6. Ka beyokwedi bea vala, na bâ na
haka ka Jisus a langwaki bâ.

7. Kâ bâ-ba vana buru na mwana, ka
bâ-ba nangidě já menamba meabu, ka bâ-
ba diyidě Mâ omě.

8. Ka ebimba eněně ya wanja menamba meabu o njeya: bâkâ ba lenaka paha ja bele, na bâ-ba ka takidě já o njeya.

9. Ka bebimba be kěkidi o bohoboho, na be vitakidě be yama, na, Hosana na Mwana-Devid! Ibâtâ na a vakě na dina ja Upangiyi; Hosana oba mětě!

10. Ka mboka yěhěpi ya 'muwa, o Mâ-a pâkidi o Jěrusalěm, na, Ekaně a lě nja?

11. Ka bebimba bea vâ, na, Ekaně a Jisus, usâki mua Nazarěth ya Galili.

12. ¶ Ka Jisus a vala o těmpěl ya Anyambě, ka Mâ-a pumě ba hambakidě na ba ma hambak' omě běhěpi, na Mâ-a ka hova tagulu ja bapepengani ba dâlě, na bediya bea ba hambakidě mbenga;

13. Ka Mâ-a vâ na bâ, na, E lěndwěngo na, Ndabo 'amě e ka tubwi na ndabo y' ikaliya; nd' o ndi yâni pangango eboboka ya meyibi.

14. Pâgu na bebokě be vakindi o Mâ-a jadi o těmpěl, ka Mâ-a yongě bâ.

15. Ka prist ja meolo na Balěndi ba bina nangudi, o bâ-ba yěněkidi belombo beaju be hakidi be mamanakwě, na bana ba yamanakidě o těmpěl, na, Hosana na Mwana-Devid

16. Ka bâ-ba vâ na Ju, na, O yokakate ka 'kaba ba vâkě? Na Jisus na vâkâ na bâ, na, E; o 'bëni langango, Oviya ndaga i vakiyě o medumbu mea mekěkě na ba nya-ngakě, o hânjâbiděngo ibendwě?

17. ¶ Na Mâ na dikaka bâ, ka Mâ-a vëngëmě o mboka na vala o Bëthani; na Mâ na yëngëkidě omě.

18. Nd' o Mâ-a timbakidi o mboka n' ubwa, A yokaki nja.

19. Ka Mâ-a viya o ele ya itâlâ, o Mâ-a yënëki yâ o njeya, ndi Au duwaka elombo 'më, kabo bekai dipâ, na Mâ na vâki na yâ, na, Wa jaye pë bebuma oviya egombe tēkae na vala egombe yēhēpi. Ka ele tē ya itâlâ ya hungana o vivilaniya.

20. O beyokwedi be yënëkidi, ka bâ-ba mama, na, Ele ya itâlâ e vivilaniyete piělě!

21. Jisus a yavwanakindi, ka Mâ-a vâ na bâ, na, Mbi vâki n' inyëni pâkwëpâkwë, Oningě o diyingëni n' ikamidě, n' inyëni-o bomeni penda, wa hayeni kabo e ma hama na ele ya itâlâ ekae, nd' o ka vâteni n' ukodi tēkamu, na, Vëngëmëkě, wa 'la ka kwa o manga, e ka hamate.

22. Tepě o ka pahiyati belombo beēhēpi

ibeanyu be k' uwě n' ikaliya, o kamakiděni.

23. ¶ O Mâ-a ngakiyedi o těmpěl, ka prist ja meolo na batodu ba bato ba viya o Mâ-a jadi, o Mâ-a diyakidi a yokwanakidě, na, I lě nja ipang' ě ijâvě i hanakě belombo těkabe? tepě nj' a věkid' âvě ipanga těkadi ?

24. Jisus a yavwana, ka Mâ-a vâ na bâ, na, Mbi k' uwa tepě 'nyěni ndaga yâkâ, e jadi oningě wa languwi 'Mbani vâkâna Mbi languwa tepě 'nyěni ipanga jamě i hanakě belombo těkabe.

25. Baptisma ya Jon, e vaki e lě nja pělě? oviya Hěvěn, ipě o bato ba jadi? Ka bâ-ba hokolani bâ mětě na bâ mětě, na, Oningě hwa vâ, na, Oviya Hěvěn, A ka vwi na hwě, na, E lě nd' eanyu e 'nyakidě o kamidě mâ?

26. Nd' oningě hoa vâ, na, Oviya bato; ho bangaki ebimba; 'kabojana běhěpi ba yěněki Jon na a usâki.

27. Ba yavwanaki ka bâ-ba vâ na Jisus, na, Hoa yâlě o languwa. Ka Jisus a vâ na bâ, na, N' Umba-mba languwe tepě inyěni ipanga jamě i hanakě belombo těkabe.

28. ¶ Nd' o piviyaka li na-e? Moto n' uhuhu a diyi bana babale; ka mâ-a viya o ua bohoboho a jadi, na, Mwana, o kěķě ka ha o mwanga muamě o buhwa.

29. A yavwanaki, ka mâ-a vâ na mâ, na, Mba vale: nd' o kwěi, o mâ-a viyi ka 'luwa ulema, a kěkindi.

30. Ka mâ-a viya ka vâ na ua babale tepě nyanga tě. Ka mâ-a yavwana, na, Mb' 'alandi, Paia. Nd' a vale.

31. A lě nja o babale baně a di hango upango mua hangwě? Ba vâki na Ju, na, Ua bohoboho. Jisus a vâki na bâ, na, Mbi vâki n' inyěni pâkwěpâkwě, Bayoli-pago na bevove ba taki na vala o ipangiya j' Anya-mbě n' inyěni.

32. Ikabojana Jon a vakindi' o inyěni-o jadi na njeja ya bwamu, ndi wu kamakidi mâni: kabo bayoli-pago na bevove ndi ba kamakidě mâ; ndi 'nyěni w' ulwaka pě ni, o 'nyěni běkidi yěněngo, na ovaně nd' inyěni-o ka kamidě mâ.

33. ¶ Yokakani ukanakâdi upâkwě: O diyaki na hangwě-ndabo pâkâ, e liyaki mwanga, ka mâ-a ha muâ ugoimba ulwaniděngo, na mâ-a puduwa ibabo j' ivě omě, ka mâ-a longo elongo, na mâ-a di-

kiya muâ baliyi, ka mâ-a vala o 'hiki ya yaviděngo.

34. Ka mâ-a loma bahayi baju o baliyi ba jadi, o 'gombe ya bebuma e pâki piělě, ka nângâ bebuma bea omě.

35. Ka baliyi ba bweya bahayi baju, ba bomi 'mbâkâ, na bâ-ba weya 'mbâkâ, na bâ-ba yanguwa upakwě malale.

36. Ka mâ-a loma pě bahayi bapâkwě wa na ba bohoboho: na bâ na haka tepě bâ nyanga tě.

37. Nd' o madikanido a lomaki mwan' 'aju o bâ-ba jadi, na, Ba ka dili mwan' 'amě.

38. Ndi baliyi ba vâki bâ mětě na bâ mětě, o bâ-ba yěněki mwana, na, Ujigi nd' ekamu: vakani, ho weyaki mâni, na hwě-hwa patuwa ekuh' 'aju.

39. Ka bâ-ba bweya mâ, na uhwa mâ o mwanga, na weyaka mâ.

40. Upangiyi mua mwanga a ka ha lě baliyi tēbaně na, o mâ-a ka viyě?

41. Ba vâki na Ju, na, A ka jilidi boji-lakidě bato tě babe baně, na mâ-a dikiya mwanga o baliyi bapâkwě ba ka věyě mâ bebuma o hongodi jabu.

42. Jisus a vâki na bâ, na, O ha langeteni o Malěndwě, Ilale ja balongi i kiyakidi já

ndi diyaki ja bě molo mu' itududu: ekavi vi ndi 'hadi via Upangiya, na viâ vi ndi vi mamanakwě o mihâ mahu;

43. Ovaně nd' Umba-mbi vâki n' inyěni, na, Ipangiya j' Anyambě i ka nângânwěndi n' inyěni na já ja věwě etomba e ka bėkidě bebuma bea omě.

44. Ndi a ka kwě o ilale tēkadi a ka bukiyandi; ndi u' ilale tēkadi i ka kwě i ka nyingi mǎ.

45. O prist ja meolo na Farisi ba yokakidi mekanakâdi meaju, ka bâ-ba yěně na A kalaki o pěl' 'abu.

46. Ba bangakindi bebimba, o bâ-ba butakidi o bweya Mâ, 'kabojana ba yěněki Mâ na A ndi usâki.

KAPITA XXII.

1. Ka Jisus a yavwuwa ka Mâ-a kala pě na bâ na mekanakâdi, na,

2. Ipangiya ja Hěvěn i te ona upolo mua inomo u hakidi diba ja mwan' 'aju.

3. Ka mâ-a loma bahayi baju ka ndiya ba langwakudwě na ba vak' o diba: ndi baa vahe o viya.

4. Ka mâ-a loma pě bahayi bapakwě, na,

Langwakiyani ba langwakudwi, na, Mbi kenjidi huma 'amě; nyati jamě na tito j' ivāngu i weyudwěndi, belombo beěhěpi be kokindi: Vakani o diba.

5. Ndi ba pějěkindi, ka bâ-ba 'la pělě n' ijabu, 'mbâkâ o mwanga muaju, upâkwě o ihamba jaju:

6. Ndi bapâkwě ba bweya bahayi baju, ba ka jongolakidě bâ, ka bâ-ba weya bâ.

7. Nd' upolo a yoki yâ, ka mâ-a linguwa: ka mâ-a loma ndumb' 'aju, ka jilidě baweyani tēbaně, na tumba mbok' 'abu.

8. Jâ nd' ijaju ja vâ na bahayi baju, na, Diba i kokindi, ndi ba ndakudwě bu diyaka weyango.

9. Ndi kěkěni o njej' iněně, ibanyu ba ka duwa ndakiyani o diba.

10. Ka bato tēbaně ba vala o njej' iněně, ka bâ-ba yolě ibabu ba duwakidi bēhěpi ta, na babe na bayamu: ka diba ja koka na bangi.

11. ¶ Upolo a viyi ka yěně bangi, ka mâ-a yěně omě moto a ha bâtâkudwě ibâtâ ja diba:

12. Ka mâ-a vâ na mâ, na, Mbweyi 'amě, o ma viya lě okava o diye n' ibâtâ ja diba, na-e? Au diyaka na ndaga.

13. Já ndi j' upolo ja vâ na bato, na, Katakí mâni makadu na beko, wa 'lani mâni, wa 'hwi mâni o ivititi via yaviděngo; omě o ka diyi mbembe n' ikalidě ja mahonga.

14. Ikabojana baitě ndi ba ndakudwě, ndi nyěvâ te pânâkwě.

15. ¶ Já ndi ja Farisi ja vala ka lata 'hoka ya nyang' 'abu e ka jukě Mâ o ndaga jaju.

16. Ka bâ-ba loma beyokwedi beabu o Mâ-a jadi na Hěrodian, na, Uyokwidi, ho yowuděte na O ndi pâkwěpâkwě, na nâvě o yokwakidě njeya ya Anyambě pâkwě-pâkwě, o 'bě tepě n' isâlâ na moto: 'kabojana wa yěněkě meoho mea bato pivi.

17. Langwakiya hwě nandi ka âvě-o pikilakiyě, E ndi hohonganěngo na ho věkě Sisar pago, ipě e 'bě?

18. Ka Jisus a yowě bobe boabu, ka Mâ-a vâ, na, O yějěkiyě li Mbi nande, inyěni menqki?

19. Levakidi 'Mbani hika ya pago, ka bâ-ba vana Mâ fura.

20. Ka Mâ-a vâ na bâ, na, U lě uvela na dina ja nja 'kadi?

21. Ka bâ-ba vâ na Mâ, na, Ja Sisar. Já

ndi jaju ja vâ na bâ, na, Věkëni Sisar belo-
mbo be jadi beaju: vëkë tepëni Anyambë
be jadi ibeaju.

22. Ba mamakindi o bâ-ba yoki ndaga
tëkadi, ka bâ-ba dika Mâ, ka bâ-ba 'la
pëlë n' ijabu.

23. ¶ Sajusi ba pâkindi o Mâ-a jadi
buhwa tē, i vâkâ na o 'bë n' ipumbuwa, ka
bâ-ba uwa Mâ,

24. Na, Uyokwidi, Mosës a vâki, na,
Oningë moto a wa aa diye na bana, mwana-
nyangwë a baki mwad' 'aju, na mâ-a ka
tëkidë mwana-nyangwë ibângâ.

25. Ba diyaki na hwë nyangwë-pâkâ
hëmbwëdi: ua bohoboho, o mâ-a bëkidi
mwajo bango, ka mâ-a wa au diyaka na
ibângâ, ka mâ-a dika mwad' 'aju na
mwana-nyangwë.

26. Yâ nyanga tē tepë ya ua babale,
yâ tepë ya ua balalo, kwanga na ua hë-
mbwëdi.

27. Na mbuhëmbuhë ka mwajo a wa
tepë.

28. Ndi o 'pumbuwa, a ka diya lë mwada
'a nja o hëmbwëdi tēkanë? 'kabojana bâ
bëhëpi ba bakite mâ.

29. Ka Jisus a timbwana ka Mâ-a vâ na

bâ, na, O lemakëndini, wa 'wëni Malëndwë, tombe na ngudi ya Anyambë.

30. Ikabojana o ipumbuwa baa baye, na bâ-ba vëwë pë o maba, ndi ba ka diyate ona enjël ja Anyambë i jadi o Hëvën.

31. O pëlë ya ipumbuwa ja ba wewe, o ha langeteni ka Anyambë a kalaki n' inyëni, na,

32. Umba ndi Anyambë ya Ebrahim, na Anyambë ya Aisak, na Anyambë ya Jakob? Anyambë e 'bë Anyambë ya ba wewe, ndi ya ba di mihâ.

33. O bebimba be yokidi ekae, ba mama-kindi iyokwanidi viaju.

34. ¶ Nd' o Farisi ba yokidi na A kubidi Sajusi, ka bâ-ba lataniya ta.

35. Jâ ndi j' umbâkâ a diyakidi uyowi mua belekanako, a kâtâ Mâ, boyëjëkiyë, na,

36. Uyokwidi, elekanako enënë o belekanako e lë nde?

37. Ka Jisus a vâ na mâ, na, Tândâkâ Upangiyi Anyambë 'âvë n' ulema muâvë muëhëpi, n' ilina jâvë jëhëpi, n' ipikiliya jâvë jëhëpi.

38. Elekanako ya bohoboho na 'nënë nd' ekae.

39. Ya bebale e tepě ona ekae, Tândâka bato bapâkwě ka 'vě mětě.

40. Belekanako bečhěpi na basâki ba yâ-dâki na bebale ekabe.

41. ¶ O Farisi ba diyaki ba lataniya, Jisus a uwaki bâ,

42. Na, O pikilakiya li na-e, o pělě ya Kraist? A lě mwan' 'a nja? Ka bâ-ba vâ na Mâ, na, Ua Devid.

43. Ka Mâ-a vâ na bâ, na, E lě nde ya Devid e tubakě Má n' Ilina, na, Upangiyi, na,

44. Jěhova a vâki na Upangiyi muamě, na, Diyaka o 'nâ 'amě 'yomi, kačo Mba ta panga baloni bávě ebong' 'ávě e pita-kiyě?

45. Oningě Devid a tubaka Mâ, na Upangiyi, nd' A lě mwan' 'aju na-e?

46. U diyaka na moto a yâlâkidě o timbwana Mâ ndaga; na moto ka moto au jijakiya pě o uwa Mâ nyuwe 'pâkwě oviya buhwa těboně.

KAPITA XXIII.

1. Já ndi ja Jisus ja kala na bebimba, na beyokwedi beaju,

2. Na, Balëndi na Farisi ba diyakandi o diya ya Mosës :

3. Elombo yěhěpi eabu e ka languwě 'nyěni na, tatakani, tatakani na o ka haki yâni; nd' o vilinganakeni behadi beabu : 'kabojana ba vâkândi ndi baa haye.

4. Ikabojana ba kataki maumba madilo makolo n' ibapwě, ba ka nangakidě mâ o maběkě ma bato; ndi bâ mětě baa vahe o ninganě mâ tombe n' upenjo muabu 'mbâka.

5. Ndi ba haki behavu beabu beěhěpi na ovaně nd' o ba ka yěněně na bato, ba haki failaktiri jabu upuju, na bâ-ba ka kenakě sai ja ngâi jabu,

6. Ba tândâkândi loboko la betiyango o masango, na bediya beněně o sinegâg,

7. Na mahomu o mahambanido, na ka tubwě na bato, na, Rabbai, Rabbai.

8. Ndi o tubakwěni, na, Rabbai: 'kabojana Utumbwani muanyu u te umbakâ kabo Kraist: 'nyěni běhěpi o ndini nya-ngwě pâkâ.

9. O tubakeni moto o he na Hangwě 'anyu; 'kabojana Hangwě 'anyu e te pâkâ, Mâ-a jad' o Hěvăn.

10. N' inyěni o tubakwě tepěni, na, Ba-

tumbwani; 'kabajana Utumbwani muanyu u t' umbâkâ, kabo Kraist.

11. Ndi a did' uněně wa o njamb' 'anyu, mâ nd' a ka diyě uhani muanyu.

12. Uěhěpi a ka betidě nyolo 'aju mětě a ka hubudwěndi; uěhěpi a ka hubidě nyolo 'aju mětě a ka betudwěndi.

13. ¶ Ndi maguga n' inyěni Balěndi na Farisi, inyěni menoki, 'kabajana o diba-kiyandini bato ipangiya ja Hěvěn: inyěni mětě wa kěkěni omě, n' inyěni wa bâbâ-kâni ba 'mbaka o vala na ba kěkě omě.

14. Maguga n' inyěni, Balěndi na Farisi, inyěni menoki! 'kabajana o pukulakandini ndabo ja mealika, na o hakani makaliya mayaba o iyaba ja bato: na tina těkaně o ka duwandini ivomudwě iněně wa.

15. Maguga n' inyěni, Balěndi na Farisi, inyěni menoki! 'kabajana o 'luanakidě-ndimi manga na ehiki ipanga j' umbâkâ a uluaka; o mâ-a 'luwedi, wa pangi mâ-ni nj' ibale mwan' 'a Hěl wa n' inyěni mětě.

16. Maguga n' inyěni batumbwani ba pâgu, ba vâkě, na, A ka kaniyě těmpěl, i te naně; ndi a ka kaniyě gold ya těmpěl a kwango!

17. Inyěni beboki na pâgu! eve lě eněně wa, gold, ipě těmpěl e nyěvěkidě gold?

18. Na, A ka kaniyě âltar, i te naně; nd' a ka kaniyě ivěwě i jad' omě, a kwa-ngo.

19. Inyěni beboki na pâgu! eve lě eněně wa, ivěwě, ipě âltar e nyěvěkidě ivěwě?

20. Uěhěpi a ka kaniyě âltar, a kanakiyě yâ na belombo be jad' omě beěhěpi.

21. Na a ka kaniyě těmpěl, a kanakiyi yâ, na A diyakě omě.

22. Na a kaniyě Hěvën, a kanakiyandi eka y' Anyambě, na A diyakě omě.

23. Maguga n' inyěni, Balëndi na Farisi, inyěni menoki! 'kabojana o vėkëndini ya jomu ja mint na anis na kummin, nd' o dikakani belombo beněně bea belekanako, ihohonganě, ngâtâ, n' ikamidě; ekabe ndi beanyu be lukakidi o ha, ndi o dika tepě ni bepâkwě be hawě.

24. Inyěni batumbwani ba pâgu, ba lěngěkě ipihi, ndi o miyakani kainěl.

25. Maguga n' inyěni Balëndi na Farisi, inyěni menoki! o tanakëndini sěngě na 'pělě o bwebwe, nd' o 'tema u jadi ti na mbabo na bobe:

26. Âvě pâgu ngâvě ya Farisi! ta taně e

jadi o 'tema mua sěngě na 'pělě, ovaně vâ-kâna bwebwe 'abu e tani tepě.

27. Maguga n' inyěni Balěndi na Farisi, inyěni menoki! 'kabojana o kwanakandini ka ndabo ja malonga itano i yěněněkě bwam' o bwebwe, nd' utema u jadi ti na bevehe bea bawewe na sěkě yěhěpi.

28. Nonaně tepě 'nyěni o yěněněkěni honganěngo o bato ba jadi, o bwebwe, ndi o jadi ni utema ti na melango na bobe.

29. Maguga n' inyěni Balěndi na Farisi, inyěni menoki! 'kabojana o longakandini malonga ma basáki, n' inyěni o lukakěni ndabo ja njama ja bato bayamu,

30. N' inyěni má, na, Ho jaka o hwi ja bahangwě bahu, te hu hâbâkâ na bâ o iweya ja basáki.

31. Inyěni mětě o langwakiyandini na o ndini bana ba ma weyaka basáki.

32. Londakěni yějâ ya bahangwě banyu.

33. Inyěni mbamba, inyěni igona ja pe, o ka věngěmě lě ni yěkě ya Hěl na-e?

34. ¶ Yěněkěteni k' Umba-mbi lomakě 'nyěni basáki na bato b' iyowě na Balěndi; o ka weyandini na o ka kâmákidi bâkâ o krâs; bâkâ, o ka bomandi bâ ni o sinigág

janyu, na o ngongolakidi bâ ni oviya mboka nala mboka :

35. Makiya ma bato bayamu ma tâkudwě o he mēhēpi ma ka kahamandi o 'nyēni o jadi, oviya ma moto uyamu Eběl nala ma Sakaraias mwan' 'a Barakaias uanyu o weyakidi o hanganě ya tēmpěl na âltar.

36. Pâkwěpâkwě Mbi vâki n' inyēni, na, Belombo tēkabe beēhēpi be ka kahamandi o igona tēkadi.

37. Jērusalēm ! Jērusalēm ! âvē o weyakě basâki, na nâvē o bweyaka ba lomakwě o âvē-o jadi malale, nj' iitě ndi jamě i vahakidi o yolě bana bâvē ta, panika mwadi mua kuba u yolakě bana baju o mapěpu, ndi wu vahakani !

38. Yēnēkěte, ka ndabo 'anyu ya dikana o inyēni-o jadi ebâbâ.

39. Ikabojana Mbi vâki n' inyēni, na, Oviya 'gombe tēkae, wa yēne pi 'Mbani, kabo 'nyēni o ka vâyēni, na, Ibâtâ na A vakě na dina ja Upangiyi.

KAPITA XXIV.

1. Ka Jisus a vengēmě, ka Mâ-a putaa o tēmpěl ; ka beyokwedi beaju bea viya

o Mâ-a jadi, ka levidě Mâ-a ilongidi ja tēmpěl.

2. Ka Jisus a vâ na bâ, na, Wa yēnēkēni belombo tēkabe beēhēpi? Pâkwēpâkwē, Mbi vâki n' inyēni, na, Wa dikani okava ilale kahamango ipâkwē, i ka mēndě i sajwē.

3. ¶ O Mâ-a diyakidi diya o ukodi mua Alives, ka beyokwedi bea viya o Mâ-a jadi ikutakuta, na, Langwakiya hwē, egombe ya belombo tēkabe e ka diyē? na ndembo y' iviya jāvē, na ya ihuku ja he e ka diya lē na-e?

4. Ka Jisus a timbwana bâ, na, Banda-makidēni o banga moto a temidě inyēni.

5. Ikabojana baitē ba ka viyi na dina jamē, na, Umba ndi Kraist; vâkâna ba ka temidi baitē.

6. O ka yokandini beduka na sango ja beduka: yēnēkēteni wa vaveni: 'kabojana belombo tēkabe beēhēpi be ka hamandi, ndi ihuku i ha pâye.

7. Yenē 'tomba e ka yani na epâkwē, dinē ipangiya na ipâkwē; usalâku, na bevuvu, be ka diyandi, na he ninganakē o loboko lâkâ.

8. Belombo tēkabe beēhēpi ndi jali ja ngēbē.

9. Vâkâna ba ka kândândi 'nyēni ka

yěnudwě majili, na bâ-ba ka weyaka 'nyě-ni: o ka binakwěni na betomba beěhěpi o nyanga ya dina jamě.

10. Baitě ba ka kâbândi, na bâ-ba ka kândânâkâ, na bâ-ba ka binanaka.

11. Basâki ba bojowa baitě ba ka tēmē-ndi, na bâ-ba ka temakidě baitě.

12. N' ikabojana bobe bo ka diyi boitě, itândě ja baitě i ka vâtândi.

13. Ndi a ka lilimidě kwanga nal' ihuku, mâ tepě a ka yongě.

14. Sango tē eyamu ya ipangiya ja Hěvën ekaně e ka hamanudwēndi o he yěhěpi, ilanguwa ja betomba beěhěpi; vâkâna ihuku i pândi.

15. Nandi 'nyěni o ka yěněni elombo e binakwě ya ujilo (ya usâki Danyěl e kalakidi) de o iboko via hole (a langakě, a bweyakidě,)

16. Nandi ba jadi o Judia ba kweyake o inekodi;

17. A jad' o ndabo oba a hubake pě ka nângâ elombo o ndabo 'aju:

18. Tombe na, a jad' o mwanga aa timbake o mbuhwa ka nângâ ngâi jaju.

19. Majili na ba ka diyě na memi, na ba ka diyě ba nyangakě o hwi tēdině.

20. Kalakiyani na ikweya janyu i diyake o 'gombe y' ivěvu, tombo na buhwa boa Iyâjá.

21. Ikabojana etuniya eněně e ka diya-ndi, e ha diyete oviya jali ja he na pâ kya tēkaně ; e ! ya diye tepě epâkwě njo.

22. Kabo hwi tēdině ja vuvudwě, ya diye na moto a ka yongwě : ndi hwi tēdině i ka vuvudwěndi o nyanga ya bato ba di pânwěngo.

23. Nandi, oningě moto a vâ n' inyěni, na, Yěněkěteni, Kraist a nd' okava, na ba 'kavaně : o kamakiděni.

24. Ikabojana Kraist ja bojowa i ka pândi, na basâki ba vela ba ka levidi ndembo na megoma ; e jaka na e na ngudi e hamakě, te ba ka temiděndi ba pânwěngo.

25. Yěněkěteni, Mbi tind' o languwa 'nyěni.

26. Oningě ba vâ n' inyěni, na, Yěněkěteni, a nd' o nginga ; O valaken' ovoně : Yěněkěteni, a nd' o ilika via 'kutakuta ; O kamakiděni.

27. Ikabojana ka epělupělu e vakiya o mbuhwa, na yâ e panyaka na 'la ulânga : nonaně tepě iviya ja Mwana-moto i ka diyě.

28. Ikabojana iboko via ubimba vi jadi viâ ndi via mbela vi ka diyě kotakota.

29. ¶ Elëngiaha etuniya ya hwi tēdině ya tomba vâkâna joba i vindindi, ngândě ya vëye unanga muaju, nyētēti i ka kwandi oviya oba, ngudi ja oba i ka ninganēndi.

30. Bëngě nandi ndēmbo ya Mwana-moto e pumakiyě oba: bëngě makaka mēhēpi ma he ma yakě, ba ka yēni Mwana-moto a vaka na bevindi bea oba na ngudi na ivend' inēnē.

31. Vâkâna A lomindi enjël jaju na joyi inēnē ja heba, na bâ-ba ka yolakě ibaju ba pânwēngo oviya mahuku ma he manai, oviya pělě ya oba pâkâ na-'la 'pâkwě.

32. Yokwakani, ukanakâdi mua ele ya itâlâ: Oningě mekilibanjo meaju me ngite mebâbu, na meâ me pumakě bekai, o yowudēteni na egombe ya viohi ya bi piělě;

33. Yâ nyanga tē te 'anyu, o inyēni-o ka yēnēni belombo tēkabe beēhēpi, yowakēni, na, ya bēndi piělě o mebiyâ.

34. Igona tēkadi ja tombe, mbambayě Mbi langwakiyandi 'nyēni, kabo belombo tēkabe beēhēpi bea hama.

35. Oba na he be ka tombandi, ndi ndaga jamě ja tombe.

36. ¶ Ndi buhwa tēboně n' iwěla tēdině bea 'wane na moto, tombe na enjěl ja Hě-věn, kabo Hangwě 'amě pa.

37. Pani-ka hwi ja Noa i diyakidi, nyinga ya Mwana-moto e ka viyě, e ka diya tepě nonaně.

38. Ikabojana o hwi ja tonda e t' o pá, ba diyakite ba jaka, ba mâtákâ, ba baka, na bâ-ba vĕněkě o maba, kwanga na-'la o buhwa boa Noa bo ngakiyedi o Ark,

39. Bu yowakě, kabo tonda e pākidi, na nāngâ bâ bĕhĕpi; iviya ja Mwana-moto i ka diya tepě nonaně.

40. Babale ba ka diyandi o mwanga; 'mbákâ a ka nāngwĕndi, n' umbákâ a dikana.

41. Bajo babale ba nyingaka o ilale i kākānākě; 'mbákâ a ka nāngwĕndi, n' upākwě a dikana.

42. ¶ Nandi pepwakani: 'kabojana wa 'wĕni iwěla ja Upangiyi muanyu i vakě.

43. Ndi yowakĕni ekae, hangwě-ndabo a jak' a yowakě elae na 'huhu ya mwibi e ka viyě, t' a pepwakite, t' au bâbákâ ndabo 'aju na e tubakwě.

44. Ndi diyakani tepě kokěngo ; 'kabojana iwěla janyu i ha pikilakiya jâ ndi ja Mwana-moto i pākě.

45. Nj' a jadi uhayi mu' ikěngě n' iyowě, ua upangiyi muaju a di tēděngo oba ya ndabo 'aju, o ivě jabu beja o hongodi ?

46. Ibâtâ n' uhayi tēmune u ka bē o upangiyi muaju u ka pâyě, na mâ-a kâbidě mâ a haka nonaně.

47. Mbambayě Mbi vâki n' inyěni, na, A ka tēdi mâ oba ya eaju e janidi yěhěpi.

48. Nd' oningě uhayi t' ube muně u pikiliyingě, na, Upangiyi muamě u bembakandi ipâ ;

49. Na mâ-a ka yalakě iboma ja bahayi na ju, n' ija, n' imâtâ na beyânga ;

50. Upangiyi mua uhayi tēmune a ka pândi na buhwa boaju bo ha 'mbwakiyi mâ, n' iwěla jaju i ha 'wě,

51. A ka leni mâ bolenaka na mâ-a vě mâ mběi 'aju o njamba ya menoki ; ovoně o ka diyi mbembe n' ikalidě ja mahonga.

KAPITA XXV.

1. Ipangiya ja Hěvën i ka kwanudwě-ndi jomu ja behila be nângâkidi litwa labu, na puma ka lata n' ubayi.

2. Betano be diyaki na bokeli, betano betiketike.

3. Be diyakidi betiketike be nangâki litwa labu, ndi be nânge mavulě na bâ:

4. Ndi be diyaki na bokeli be nângâki mavulě o beva beabu na lampi labu.

5. O ubayi a bembakidi, ka bâ-ba tika na bâ-ba ka yaka.

6. O bulu-'tema ka ukenyu mua yamwě, na, Umbwakiyani, ubayi u vakandi; pumakani, ka bonganakiyi mâ ni.

7. Ka behila tēbeně bēhēpi bea 'muwa, ka bâ-ba bonguwa lampi labu.

8. Ka be diyaki betiketike bea vâ na bea bokeli, na, Věki hwě ni mavulě manyu; 'kabojana lampi lahu lo dimindi.

9. Ndi ka bea bokeli bea timbwana, na, Hanga nonaně; o banga ma koke na hwě n' inyěni; ndi tāmâkâ o valani o ba hama-kidě, wa hambani manyu mětě.

10. O bâ-ba kěkidi ka hamba, k' ubayi

mâ-a pâ ; ba diyaki kokěngo, ka bâ-ba ngiya
na mâ o diba ; ka jâmbě ja dibwě.

11. Kwěi, ka behila bepâkwě bea pâ tepě,
na, Upangiyi, Upangiyi, dubwakiya hwě.

12. Ndi ka mâ-a yavwana, na, Pâkwěpâ-
kwě Mbi vâki n' inyěni, na, Mba 'wě inyěni.

13. Nandi, pepwakani, 'kabojana wa
'wěni buhwa na b' iwěla ja Mwana-moto
i ka pâyě.

14. ¶ Ipangiya ja Hěvěn i t' ona moto a
vala ekěndâ o 'tomba ya bo, a ndakiyi ba-
hayi baju, ka mâ-a vě bâ jumba jaju.

15. Ka mâ-a vě umbâkâ talěnt itano,
upâkwě ibale, upâkwě pâkâ ; moto uěhěpi
hohonganěngo na ngud' 'aju : ka mâ-a pa-
niya o vala o 'kěndâ.

16. A věkudwě talěnt itano, o mâ-a vali
ka hamba na jâ, ka mâ-a kova ipâkwě itano.

17. Yâ nyanga tě te ya a věkudwě ibale,
ka mâ-a kova tepě ipâkwě ibale.

18. Ndi a věkudwě pâkâ, a kěkindi ka
tonga o he, ka mâ-a kuta dâlě ja upangiyi
muaju.

19. Ulingo uyaba tombango ka upangiyi
mua bahayi těbaně a pâ ka hohonganě
na bâ.

20. A věkěkudwě talěnt itano, a viya ka

mâ-a vana talënt ipâkwě itano, na, Upangiyi, o věki 'mba talënt itano: yěněkěte, mbi kovango ipâkwě itano na já.

21. Ka upangiyi muaju a vâ na mâ, na, O hi bwam' 'âvě uhayi uyamu mu' ikěngě; o viyi ka diya n' ikěngě o belombo behâlě, mbi ka těděnd' âvě oba ya belombo beité: ngakiya o mbya ya upangiyi muâvě.

22. A věkudwě tepě talënt ibale, ka mâ-a viya, na, Upangiyi, o věki 'mba talënt ibale; yěněkěte, mbi kovindi ipâkwě tepě ibale na já.

23. Ka upangiyi muaju a vâ na mâ, na, O hi bwamu, âvě uhayi mu' ikěngě; o viyi ka diya n' ikěngě o belombo behâlě, mbi ka těděnd' âvě oba ya belombo beité. ngakiya o mbya ya upangiyi mwâvě.

24. A věkudwě talënt pâkâ ka mâ-a viya, na, Upangiyi, mbi yowakiděte na o mto ukolo, o benjaka o âvě-o ha liyakidi, na o yolakě o âvě-o ha mwanjidi:

25. Ovaně nd' umba-mbi bangakidi, k' umba-mba vala ka kuta talënt 'âvě o he; yěněkěte, o nāngindi eâvě mětě.

26. Upangiyi muaju a timbwana mâ, na, Âvě uhayi ube na mua henga! o yowakiděte na mbi benjakandi o 'mba-mbi ha liya-

kidi, n' umba-mbi yolakě o umba-mbi ha mwanjidi :

27. O lukakindi o vě dâlě jamě o bapepengani, te mbi ka timbwěndi eamě na nyeno o ipá jamě.

28. Nandi nāngānāki mǎ ni talěnt tēnē, n' inyēni wa vi yā ni o a jadi jomu ja talěnt.

29. Ikabojana uěhěpi a janidi a ka věwěndi, na mǎ-a bě na beité ; nd' a ha 'bě ně a ka nāngānwěndi tombe n' ibeaju be janidi.

30. Uhwakani uhayi u ha 'bě n' itinga o ivititi via yaviděngo ; ovoně o ka diyi mbe-mbe n' ikalidě ja mahonga.

31. ¶ O Mwana-moto a ka viyě n' ivenda jaju, na enjěl ja hole jěhěpi i ka diyi na Ju, vākāna A diyendi o 'ka y' ivenda jaju.

32. Betomba beěhěpi be ka yolaněndi o boho boaju : na Mǎ-a ka palwakidě bǎ, pani-ka utati u palwakidě medāmbě meaju o mbodi 'jaju.

33. A ka tědi medāmbě o 'nǎ 'aju eyomi, ndi mbodi o ya 'měngwě.

34. Vākāna Upolo a vwi na ba jadi o 'nǎ 'aju eyomi, na, B' ibâtá ja Paia, vakani, jigakani ipangiya i kenjakudwě 'nyēni oviya jali ja he ;

35. Ikabojana Mbi diyaki na nja, k'

inyěni wa jedi 'Mba ni; Mbi diyaki na 'vėlě, k' inyěni wa mâtidi 'Mba ni; Mbi diyaki mwěngi, k' inyěni wa ngidi 'Mba ni;

36. Mbi diyakind' uhamba, k' inyěni wa bâtidi 'Mba ni; Mbi diyaki Mbi běkě, k' inyěni wa lumbiyi 'Mba; Mbi diyakindi o ntyogo, k' inyěni wa pâni o 'Mbambi jadi.

37. Vâkâna bayamu ba timbwani Mâ, na, Upangiyi ho yěněki l' Ávě na nja, ka hwě-hwa jed' Ávě ove? na ba evělě, ka hwě-hwa mâtidě Ávě ove?

38. Ho yěněki l' Ávě mwěngi, ka hwě-hwa ngid' Ávě ove? na b' uhamba, ka hwě-hwa bâtid' Ávě ove?

39. Nja 'gombe eahu e yěněkid' Ávě běkě, na o ntyogo, ka hwě-hwa viya Ávě-o jadi?

40. Nd' Upolo u ka timbwani bâ, na, Pakwěpâkwě Mbi vâki n' inyěni, na, Bwěsě k' inyěni o hakidini 'mbâkâ uhâlě wa ba tě b'-ina ekaba, o hakiyendi Mbi yâ.

41. Ndi A ka vâ tepě na ba 'nâ eměngwě, na, Věngěměkěni o 'Mbambi jadi, inyěni ba di hâkwěngo, o veyá via 'gombe yěhěpi, vi kenjakudwě děvil na enjěl jaju.

42. Ikabojana Mbi diyaki na nja, nd' o vëyi 'Mba ni beja : Mbi diyaki na evëlë, nd' o matidi 'Mba ni :

43. Mbi diyaki mwëngi, ndi wu ngakidi 'Mba ni ; uhamba, ndi wu bâtákidi 'Mba ni : Mbi békë, na o ntyogo, nd' o lumbackiyi 'Mba ni.

44. Ndi ba ka timbwana tepë Mâ, na, Upangiyi, ho yënëki l' Âvë na nja ove, na ba 'vëlë, na ba mwëngi, na b' uhamba, na b' ibë, na ba ntyogo, ndi ho hane Âvë ove?

45. Ndi A ka yavwani bâ, na, Pâkwë-pâkwë, Mbi vâki n' inyëni, na, Bwësë k' inyëni o ha hakidini 'mbâkâ uhâlë ekanë wu hakiyi 'Mba ni.

46. Ekaba ba ka 'landi o ivomudwë ja 'gombe yëhëpi, ndi bayam' o 'mënâ ya 'gombe yëhëpi.

KAPITA XXVI.

1. E diyakindi, o Jisus a békidi mepako tékame meëhëpi pa, ka Mâ-a vâ na beyokwedi beaju, na,

2. Wa dimbakiyani na, hwi 'bale tombango i ndi 'sango ja Ikunduwa : Mwa-

na-moto a ka kândudwëndi ka wewě o krâs.

3. Jâ ndi ja prist ja meolo, na balëndi, na batodu ba bato, ja yolaně o ikenga ja prist eněně, a ma tubakwě na Kaiefas,

4. Ba ka hohonganakě ugono muabu u ka nângâně Jisus, na bâ-ba weya Mâ.

5. Ka bâ-ba vâ, na, Hanga o buhwa bo' isango, o banga etoko ya diya bato omě.

6. ¶ O Jisus a diyakidi o Bethani, o ndabo 'a Saimon ya 'gâlani,

7. Mwajo a vakind' o Mâ-a jadi, a diyi na egala ya alabastěr ya mavulě ma kango m' ihambe ikolo, ka mâ-a hovidě mâ o molo muaju o Mâ-a diyakidi diyango a jaka.

8. Nd' o beyokwedi beaju be yěni nonaně, be numbakindi, na, Imbaniya těkadi i lě ja nde?

9. Ikabojana mavulě tě ma kango ekama ma ma diyate ma hambakudwě ihambe iněně, na mâ ma věwě mekuge.

10. O Jisus a yowakidě yâ, ka Mâ-a vâ na bâ, na, O haka li mwajo njuke nande? a hi 'Mba ehavu eyamu.

11. Ikabojana mekuge me te n' inyěni egombe yěhěpi; ndi Mba diye n' inyěni egombe yěhěpi.

12. Ikabojana o yeně a hoviděngo mavulě tě ma kango ekama o nyolo 'amě, a hi yâ itongwě jamě.

13. Pâkwěpâkwě, Mbi vâki n' inyěni, na, Iboko viěhěpi via sango tě 'yam' ekaně vi ka hamanudwě o he yěhěpi, ovoně ekae tepě ya mwajo těkaně e di hango, e ka languěndi iyongidě jaju.

14. ¶ Já ndi j' umbâkâ wa jomu na be bale, a tubakwě na Judas Iskariot, a vala o prist iněně i jadi,

15. Ka mâ-a vâ na bâ, na, O ka vě li mbi nde, vâkâna mbi věndi 'nyěni Mâ? Ka bâ-ba panga na mâ mabo ma dâlě malalo.

16. A 'mbwakiyendi egombe e kândâkě Mâ oviya 'gombe těně.

17. Buhwa boa bohoboho bo' isango ja pěmbě e ha 'bě na ilanda, ka beyokwedi bea viya o Jisus a jadi, na, O ka vaha lě hwě-ho kenjakě Ávě iboko vi jakě isango j' Ikunduwa ove?

18. Ka Mâ-a vâ, na, Kěkěni o mboka 'něně o moto ua giligili, wa vwi na mâ, na, Uyokwidi a ma vwi, na, Egombe 'amě ya bě ndi piělě; Mbi ka tatandi isango j' Ikunduwa o ndabo 'ávě na beyokwedi beamě.

19. Ka beyokwedi bea ha ka Jisus a le-vaki bâ; ka bâ-ba kenjë isango.

20. O kolo e diyaki ya pâ, ka Mâ-a diya na jomu na bebale.

21. O bâ-ba diyakidi ba jaka, ka Mâ-a vâ, na, Pâkwěpâkwě, Mbi vâki n' inyěni, na, 'mbâkâ ua njamba 'anyu a ka kândi 'Mba.

22. Ba yěněki ngěbě 'něně, ka bâ-ba yalě o vâ o Mâ-a jadi, moto moto, na, Upangiyi, a i 'mba?

23. Ka Mâ-a timbwana na bâ, na, A du-bakě n' Umba ikadu o sěngě, mâ nd' a ka kândě 'Mba.

24. Mwana-moto a 'landi, pani-ka. yâ e di lěndwěngo Mâ: ndi maguga na moto těně ua Mwana-moto a ka kâ-ndwě! e diyakindi bwamu na moto těně t' au jakwě.

25. Jâ ndi ja Judas, a kândâkiyi Mâ, a timbwana, na, Paia-o, a nd' umba? Ka Mâ-a vâ na mâ, na, O vâki nonaně.

26. ¶ O bâ-ba diyakidi ba jaka, ka Jisus a nângâ pěmbě, ka Mâ-a vambiya yâ ibâtâ, ka Mâ-a buka yâ, ka Mâ-a vě yâ be-yokwedi beaju, na, Nângâkâni, jakani; ekaně e nyolo 'amě.

27. Ka Mâ-a nângâ sêngě ya kâpi, ka Mâ-a vě akeva, ka Mâ-a vě bâ yâ, na, Mâtâki yâni 'nyěni běhěpi;

28. Ikabojana ekama ndi makiya mamě ma panga ya kya ma hoviyesi iyidě ja bobe boa baitě.

29. Ndi Mbi vâki n' inyěni, na, Mba mâte pě njo 'pâkwě ebuma tě ya ukâdi ekae, kabo buhwa těboně o 'Mba-mbi ka mâtě yâ ya kya n' inyěni o ipangiya ja Paia.

30. O bâ-ba běkidi viembo tumbuděngo, ka bâ-ba puma nala o ukodi mua Alivi.

31. Já ndi ja Jisus ja vâ na bâ, na, Inyěni běhěpi o ka kâbândini o nyanga 'amě na bulu těkabo, 'kabojana e lěndwěngo, na, Mbi ka bweyandi Utati, na medâmbě mea mwanga me ka pajanganaka.

32. Ndi Umba-mbi ka pumbuwě pě, Mbi ka 'landi o bohoboho n' inyěni o Galili.

33. Ka Pitě a timbwana na vâ na Mâ, na, Tombekete běhěpi ba kâbâkâte o nyanga 'vě, ndi mbi 'bě na ngudi mbi kâbâkě.

34. Jisus a vâ na mâ, na, Pâkwěpâkwě Mbi vâki na nâvě, na, Na bulu těkabo, na

kuba na kâkâlâkâ, o ka hâhiyi 'Mba nj' ilalo.

35. Ka Pitě a vâ na Ju, na, Tombete na hwě na nâvē nd' o ka wě, mba hâhiy' Âvē. Yâ nyanga tě te ya beyokwedi bē-hěpi e vâkidi.

36. ¶ Jâ ndi ja Jisus ja viya na bâ o mwanga u ma tubakwě, na, Gěthsěmani, ka Mâ-a vâ na beyokwedi, na, Diyakani okava, o 'Mba-mb' 'ala ka kaliya okaoně.

37. Ka Mâ-a nângâ Pitě, na bana ba Zě-hadi babale, ka Mâ-a yalě ngěbě 'něně na nyolo vâhâ mětě.

38. Jâ ndi jaju ja vâ na bâ, na, Ilina jamě i yěněkě ngěbě 'něně mětě piělě n' iwedo; vengakiděni okava, o ka pepwanaki 'Mba ni.

39. Ka Mâ-a piya kwěi, ka Mâ-a kwa na boho boaju, a ka kalakiya, na, Paia-o, oningě na e t' e hamaka, ndi sěngě tě ya kâpi ekaně e tombake 'Mba; ndi hanga nyang' 'amě e vahakě, ndi ka 'vē o pangakě.

40. Ka Mâ-a vala o beyokwedi be jadi, ka Mâ-a kâbidě bâ ba yaka viyâ, ka Mâ-a vâ na Pitě, na, E lě nde! wa yâlěni o pepuwi n' Umba iwěla jâkâ-ě?

41. Pepwakani n' inyěni o ka kalaki-

yani, o banga wa ngiyani o iyëjudwě: ilina mětě i kokěngo ndi nyolo e ibě na ngudi.

42. Ka Mâ-a vala pě njo ibale, ka Mâ-a kaliya, na, Paia-o, ipě sěngě tě ya kâpi ekaně e ibě na ngudi e tombakě 'Mba, kabo Mba mâtâ yâ, upango muâvě u hamake.

43. Ka Mâ-a viya, ka Mâ-a kâbidě pě bâ-ba yaka viyâ; 'kabojana mihâ mabu ma diyaki ma bě bodilo.

44. Ka Mâ-a dika bâ, ka Mâ-a vala pě, ka kaliya njo ilalo, ka Mâ-a vâte yâ ndağa tě.

45. Ka Mâ-a viya o beyokwedi beaju be jadi, ka Mâ-a vâ na bâ, na, Yakani nandi, yâjâkâni; umbwakiyateni, iwěla ja bě ndi piělě, Mwana-moto a kândudwěndi o benâ bea bato babe.

46. Umwakani, ho kěkeni: a kândâkě 'Mba a běndi piělě.

47. ¶ O Mâ-a diyakidi a kalaka, Judas, umbâkâ ua jomu na babale, a viya na 'bumbu eněně na mekwala na metumbe oviya prist iněně na batodu ba bato.

48. Nandi a kândâkiyi Mâ, a věki bâ ndembo, na, Uamě a ka pyâpyě vâkâna mâ ndi Mâ ně; bweyaki Mâ ni ndu.

49. Ka mâ-a hungana o vala o Jisus a

jadi, na, Mbolo, Paia: ka mâ-a pyâpyâ Mâ.

50. Ka Jisus a vâ na mâ, na, Nwëla, o ma viya lě ka ha nde? Jâ ndi jabu ja nangidě makadu o Jisus a jadi, ka bâ-ba nângâ Mâ.

51. Umbwakiyate, umbâkâ ua ba diyaki na Jisus a hambid' enâ 'aju, ka mâ-a hodu-wa ukwala muaju, na kokaka uhayi mua prist eněně, ka mâ-a lena mâ ditâ jaju.

52. Jâ ndi ja Jisus ja vâ na mâ, na, Timbakě ukwala muâvě o iboko vîaju: 'kabojana ba nângâkě mekwala běhěpi ba ka nyangi na mekwala.

53. O piviyaki na Mbi 'bě na ngudi Mbi kalakiyě Paia, na Mâ-a vě 'Mba wâwâ jomu ja ligion na ligion ibale ja enjěl?

54. Ndi Malěndwě ma Anyambě ma ka timwě lě na-e, nana e ka diyě nonaně?

55. Ka Jisus a vâ na bebumbu o iwëla tědině, na, O ma viyandini o 'Mba-mbi jadi na mekwala na beposa ka nângâ 'Mba ona mwibi? Mbi ma diyaki diya Mbi yokwanakidě o těmpěl buhwa ka buhwa, o bweyi 'Mba ni.

56. Ndi yěhěpi ekae e hamakindi na ovaně nd' o Malěndwě ma basâki ma ka

timwě. Já ndi ja beyokwedi běhěpi ja dika Mâ, ka bâ-ba kweya.

57. ¶ Ba bweyakiyi Jisus ba valanaki Mâ o Kaiefas prist eněně a jadi, o balěndi na batodu ba diyaki yolaněngo.

58. Ndi Pitě a vitanaki Mâ yaviděngo o ikenga ja prist eněně, ka mâ-a ngiya ovoně, ka mâ-a diya na benami iyěně ja bea madikanido.

59. Prist iněně, na batodu, na ba 'hoka běhěpi, ba butakindi ndaga ja bovelaka opěla Jisus, na ovaně nd' o bâ-ba ka weyě Mâ.

60. Ndi bu duwaka; tombekete tali ja bojowa iitě i vakidi, bu duwaka. Nd' o madikanido ka ibale ja viya, tali ja bojowa,

61. Ka jâ-ja vâ, na, Ekaně a vâki, na, Mbi te na ngudi o buludě těmpěl y' Anyambě, n' Umbâ-mba longa yâ na hwi 'lalo.

62. Ka prist eněně a těmě, ka mâ-a vâ na Ju, na, Wa timbwanaka 'lombo? E lě nde ya 'kaba e pakwaka o pěl' 'ávě?

63. Ka Jisus a diya dâ. Ka prist eněně a vâ na Ju, na, Mbi kanakiyand' ávě na Anyambě ya eměná, na, langwakiya hwě ipě o ndi Kraist Mwana ua Anyambě.

64. Ka Jisus a vâ na ju, na, O vâkâ-ndi nonaně: Mbi vâki n' inyěni tepě, O

ka yěněndi Mwana-moto diyango o 'nâ eyomi ya ngudi, okava kělěbě, A vaka na bevindi bea oba.

65. Jâ ndi ja prist eněně ja nya ngâi jaju, na, A kilind' Anyambě; ho lě pi na nja mala-ě ma tali? Yěněkěteni, o yokinđini kya ikila jaju ja Anyambě.

66. O pikilakiya li na-e? Ka bâ-ba timbwana, na, A n' inyanga n' iwedo.

67. Jâ ndi jabu ja tuwa malě o boho boaju, ba ka bomaka Mâ; bâkâ ba bweyaka Mâ mabanjo.

68. Na, Âvě Kraist, sâkâkâ hwě, Nja a bweyaki Âvě?

69. ¶ Ndi Pitě a diyakindi o ipumaido j' ikenga; k' itângâ ja viya o mâ-a jadi, na, Âvě tepě o diyaki na Jisus ya Galili.

70. Ndi a hâkâki o boho boabu boa běhěpi, na, Mba 'wě ka 'vě o vâkě.

71. O mâ-a valakidi o 'lěmbě, k' itângâ ipâkwě ja yěně mâ, ka jâ-ja vâ na ba diyakid' omě, na, Ekaně tepě a ma diyaki na Jisus ya Nazarěth.

72. Ka mâ-a hâhâ pě n' ikana, na, Mba 'wě momo těně.

73. Kwěi ka ba tēměkidi piělě ba viya o

Pitě a jadi, na, Pâkwěpâkwě, âvě tepě uabu, 'kabojana mbâhi 'âvě ya dimbana-kiya.

74. Jâ ndi jaju ja yalě o kila na o kana, na, Mba 'wě momo těně. Elěngiaha tepě kuba e kâkâlâkâ.

75. Ka Pitě a yongidě ndaga ya Jisus e vâki na ju, na, Na kuba na kâkâlâkâ, o ka hâhi 'Mba nj' ilalo. Ka mâ-a puma o uhěngě, a ka yaka nangudi.

KAPITA XXVII.

1. O mu diyaki ubwa, prist iněně jěhěpi na batodu ba bato ba hakindi ehoka ya Jisus nyang' abu e ka weyě Mâ.

2. O bâ-ba běki Mâ katango ba valanaki Mâ, ka bâ-ba vě Mâ Gâven Pontius Pailat.

3. ¶ Jâ ndi ja Judas e kândâkiyi Mâ, o mâ-a yěněkidi na A kwendi, ja yěně ngěbě, ka mâ-a timbwana pě mabo ma dâlě malalo o prist iněně na batodu ba jadi,

4. Na, Mbi hango bobe o 'mbi kândâkidi makiya ma ha 'bě kobango. Ka bâ-ba vâ, na, Elombo e nd' ovaně o hwě-ho jadi? Yeně nd' eâvě.

5. A ngombwakidi dâlě o těmpěl, ka mâ-a puma; a kěkindi, ka mâ-a kělidě nyolo 'aju.

6. Ka prist iněně ja nângâ dâlě, ka bâ-ba vâ, na, E 'bě bwamu na i vamakwě o ngu-mba, 'kabajana i ndi 'hambe ja makiya.

7. Ka bâ-ba ha 'hoka, ka bâ-ba hamba ehiki ya uměyi e tongakě bangi.

8. Ovaně nd' o 'hiki těně e tubakudwě, na, Ehiki ya makiya, na boa buhwa těkabo.

9. Já ndi ja ya Jěrimaia usaki e kalakidi ya hama, na, Ka bâ-ba nângâ mabo ma dâlě malalo, ihambe ja nyang' 'aju e weyakidi, ua bana ba Israěl a tubakidi 'hambe;

10. Ka bâ-ba vě já o pělě ya 'hiki ya uměyi, ka Upangiyi a lenakidi n' umba.

11. Ka Jisus a těmě o boho boa Gâven: ka Gâven a uwa Mâ, na, Ávě nd' Upolo mua Jiu? Ka Jisus a vâ, na, O vâki yâ.

12. O Mâ-a bakakudwě na prist iněně na batodu au yavwanaka 'lombo.

13. Já ndi ja Pailat ja vâ na Mâ, na, Wa yokaka belombo beité ibeabu be pakwakě opěl' Ávě?

14. Au timbwanaka mâ ndaga na ya pâ-kâ; já ndi ja Gâven ja mamana nangudi.

15. Nandi o isango tědině Gâven a ma

hulakidi mběmbě o ebimba e jadi mbwedi pākâ eabu e ma vahaka.

16. O 'gombe tēnē ba diyaki na mbwedi ya kuma e tubakwě na Barabas.

17. O bâ-ba diyakidi yolanēngo ta, ka Pailat a vâ na bâ, na, A lě nja uanyu a vahakě na mbi hulakidě inyěni? Barabas, ipě Jisus, a tubakwě na Kraist?

18. Ikabojana a yowakiděndi na ivina ndi jabu i věni Mâ.

19. ¶ O mâ-a diyakidi o 'diya ya yěkě, ka mwad' 'aju a bandidě mâ, na, O diyake na 'lombo 'âvě e ka hayě moto tē uyamu nē, 'kabojana mbi ma yěněndi etuniya o ndâtâ eamě e ma yâtâ Mâ o buhwa.

20. Ndi prist iněně na batodu ba sombi-yakiděndi bebimba na ba jombake Barabas, na bâ-ba weya Jisus.

21. Ka Gâven ya timbwana, ka mâ-a vâ, na, Ua babale ekaba o vahaka lě ni na mbi hulakidě 'nyěni nja? Ka bâ-ba vâ, na, Barabas.

22. Ka Pailat a vâ na bâ, na, Nandi, mbi ka ha lě Jisus a tubakwě na Kraist na-e? Ba bēhēpi mâ, na, A weyakwě o krâs.

23. Ka Gâven a vâ, na, Nande lě, A ma

ha lě nja bobe? Ndi ba yamaki pě nangudi wa, na, A weyakwě o krâs.

24. ¶ O Pailat o yěni na a yâle elombo, ndi kabo edungu e ka pangwěndi, ka mâ-a nângâ miba, ka mâ-a tuka makadu maju o boho boa 'bumbu, na, Mbi 'bě na makwa ma makiya ma moto tě uyamu ekaně: yeně nd' eanyu.

25. Jâ ndi ja bato bēhēpi ja vâ, na, Ma-kiya maju ma diyake na hwě na bana bahu.

26. ¶ Jâ ndi jaju ja huludě bâ Barabas: o mâ-a bēkidi Jisus bomango, ka mâ-a vě Mâ ka kâmudwě o krâs.

27. Ka sâjě ja Gâven ja nângâ Jisus o ikenga iněně, ka bâ-ba yolě njamba 'abu yēhēpi o Mâ-a jadi.

28. Ka bâ-ba duwa Mâ ngâi jaju, ka bâ-ba batidě Mâ ngâi j' ingâla.

29. ¶ O bâ-ba longakidi korowa ya mayà, ka bâ-ba tēdě yâ o molo muaju, n' utumbe o ikadu jaju iyomi: ka bâ-ba huma mabâ-ngâ o boho boaju, ba věhěkě Mâ, na, Mbolo, Upolo mua Jiu!

30. Ba tuwakiya Mâ malě, ka bâ-ba nâ-ngâ utumbe, ba ka bweyaka Mâ o molo.

31. O bâ-ba bēki Mâ věhěngo, ka bâ-ba vēngidě Mâ ngâi, ka bâ-ba batidě Mâ ngâi

jaju mětě, ka bâ-ba 'lana Mâ ka weya
Mâ o krâs.

32. O bâ-ba pumakidi o bwebwe, ka bâ-ba duwa moto ua Sairini dina na Saimon: mâ nd' uabu a pangakidi na a bapake krâs 'aju.

33. O bâ-ba pâkidi o iboko vi tubakwě na Gâlgâtha, vi vânakwě, na, Iboko via mbombo,

34. Ka bâ-ba vě Mâ vinegar e mâtákě, hâbwěngo na bwayě: Mâ yâ vekango, au bâbâkâ o mâtâ.

35. Ka bâ-ba kâmidě Mâ o krâs, ka bâ-ba kaba ngâi jaju, ba hodwaka kwayi: na ova-ně nd' o e kalakudwě na usâki e ka timwě, na, Ba kabanaki ibâtâ jamě bâ mětě na bâ mětě, ba hodwaka koto 'amě kwayi.

36. Bâ 'mě diyediye, ba pepwaka Mâ;

37. Ka bâ-ba panidě ebuke 'aju lëndwěngo oba ya molo muaju, EKANĚ NDI JISUS UPOLO MUA JIU.

38. Jâ ndi ja meibi mebale ja kâmudwě na Ju, 'mbâkâ o 'nâ eyomi, 'mbâkâ o 'nâ ya 'měngwě.

39. ¶ Ba ma tombaka baka, ba ma kilaki Mâ, ba vugumakidě meolo meabu,

40. Na, Âvě o ka buludě těmpěl, na nâvě

wa longa yâ na hwi 'lalo, yongakě nyol'âvé. Oningě na o ndi Mwana-Anyambě, hubaka oviya krâs.

41. Yâ nyanga tě te ya prist iněně i vâkidi, ba vĕhĕkě Mâ, na balěndi na batodu, na,

42. A ma yongaki bapâkwě; nd' A ibě na ngudi e yongakě Mâ mětě. Oningě na A ndi Upolo mua Israěl, A hubake oviya krâs, nandi vâkâna ho kamidi Mâ.

43. A ma pitakiděndi Anyambě; ndi a vĕngĕkidě Mâ nandi, ipě a ka vahate Mâ: 'kabojana A vâki, na, Mbi ndi Mwana-Anyambě.

44. Meibi tepě me kâmakudwě na Ju, ba timbaki Mâ ndaga tĕně.

45. Nandi oviya joba meolo, ivititi i diya-kindi o he yĕhĕpi kwanġa nala mawĕra malalo.

46. O 'gombe ya mawĕra malalo ka Jisus a yama na joyi oba, na, Eloï, Eloï, lama sabakthenae? yeně ndi, na, Anyambě 'amě, Anyambě 'amě, e lě nd' eâvé e senji 'Mba'?

47. Bâka ba diyakid' omě tĕmetĕme o bâ-ba yoki nonaně, ba vâki, na, Ekaně a ndakiyandi Elaias.

48. Elĕngiaha tepě umbâkâ uabu a vala

umbila, ka mâ-a nânga nyândâ, a ka londa-kě yâ vinegar, ka mâ-a kahidě yâ utumbe, ka mâ-a mâtidě Mâ.

49. Bapâkwě ba vâki, na, Dikaka, ho t' o yeně ipě Elaias a ka viyandi ka yongě Mâ.

50. ¶ Jisus o Mâ-a yami pě na joyi oba, ka Mâ-a dika ilina.

51. Na, umbwakiyate, unamba uněně mua těmpěl u pěhěkiyendi bepěhi oviya oba kwanga nala he: he e ka ninganaka, mala-le ma pěhěkiyě;

52. Malonga ma ka dubwanakiya, beken-go beité bea bato bayamu be diyaki wewe be pumbwaka,

53. Ba ka pumaka o malonga, ipumbuwa jaju tombango, ka bâ-ba vala o mboka-hole, ka bâ-ba yěněně o bato baitě ba jadi.

54. O Sěnturion na ba diyaki na mâ ba pepwaka Jisus, ba yěně he e ninganakě, na belombo tě be hamakidi beně, ba bangaki jângâ iněně, na, Mbambayě, ekaně A diya-ki Mwana-Anyambě.

55. Bajo baitě ba diyakind' omě (ba hila-kě na masěyi) ba vitakidi Jisus oviya Gahili, ba hakiya Mâ;

56. Bâkâ ndi ba Meri Magdalini na Meri

nyangwě ya Jems na Josēs, na nyangwě ya bana ba Zěbadi.

57. O kolo e pādi, o pākind' omě enami ya momo ya Arimathia, dina na Josěf, mâ mětě a diyaki tepě eyokwedi ya Jisus ;

58. Ekaně a kēkindi o Pailat a jadi, a ka jombaka ekengo ya Jisus. Jā ndi ja Pailat ja sombiya na ekěngo e vėkwě.

59. O Josěf a nāngākidi ekengo, ka mâ-a dinga yâ n' unamba mu' ivěla utano,

60. Ka mâ-a nangidě yâ o malonga maju mětě ma kya imaju ma pudwakidi o ilale ; ka mâ-a vungulidě ilale iněně o 'biyâ mua malonga ; ka mâ-a vala.

61. Meri Magalini na Meri mepâkwě ba diyakind' omě diyango, hohonganěngo na njama.

62. ¶ Buhwa bopâkwě bo vitakidě buhwa boa ikenjě, ka prist iněně na Farisi ba yolanakindi o Pailat a jadi,

63. Na, Pa, ho yongiděndi, na uyabani tēmuně a vākindi, o mâ-a diyakidi mihâ, na, Hwi 'lalo tombango, vākâna mbi pumbu-wendi.

64. Nandi vākâ na njama e sulakwě kwanga nala hwi 'lalo, o banga beyokwedi beaju bea viya na bulu ka iba Mâ, na bâ-ba

vâ na bato, na, A pumbuwendi oviya bawe-we, vâkâna iyaba ja madikanido i ka diyi bobe wa na ja bohoboho.

65. Ka Pailat a vâ na bâ, na, O teni na bavengidi; kĕkĕni, wa sulĕni nyanga 'anyu e ka yowĕ.

66. Ka bâ-ba vala, ka bâ-ba sulidĕ njama, ba ka yembakidĕ ilale, ba ka tĕkidĕ bavengi.

KAPITA XXVIII.

1. O ihuku ja Iyâjâ o majenjina ma bu-hwa boa wik boa bohoboho, ka Meri Magdalini na Meri mepâkwĕ ba viya ka hilĕ njama.

2. Na, umbwakiyate, he e ninganakĕ nangudi, 'kabojana enjĕl ya Upangiyi e hubaka oviya Hĕvĕn, ka yâ ya viya ka vungulidĕ ilale oviya ubiyâ, ka yâ ya diya o jâ.

3. Boho boaju bo diyakind' ona epĕlu-pĕlu, ngâi jaju botano ona snow:

4. Jângâ jaju ndi ja bapepuwi i likimanakidi, ba bi ona bekengo.

5. Ndi enjĕl e ka yavwanaka, ka yâ ya vâ na bajo, na, O bangake 'nyĕni: 'kabojana

mbi yowuděte na o butakandini Jisus, a weyakudwě o krâs.

6. A 'bě okava, 'kabojana A pumbuwendí, ka Mâ-a vâkidi. 'Ka, yěněkeni iboko via Upangiyi vi ma nangiya.

7. Kěkěni wâwâ, ka langwakeni beyokwedi beaju, na, A pumbuwendí oviya bawewe; ndi, umbwakiyate, a 'landi o bôho n' inyěni o Galili; ovoně nd' inyěni o ka yěni Mâ ni: umbwakiyate, mbi languwendí 'nyěni.

8. Ka bâ-ba puma wâwâ oviya malonga na jângâ na mbya 'něně: ka bâ-ba vala umbila ka pādě sango o beyokwedi beaju be jadi.

9. ¶ O bâ-ba kěkidi ka pādě beyokwedi beaju sango, umbwakiyate, ka Jisus a lata na bâ, na, Mbolani. Ba ka bengakiya, ka bâ-ba kupaně Mâ o beko beaju, ba ka kala-kiya Mâ.

10. Ka Jisus a vâ na bâ, na, O bangakeni: valakani, o ka pâkiděni bana-bina sango, ovaně nd' o bâ-ba ka 'lě o Galili, ovoně nd' o bâ-ba ka yěně 'Mba.

11. ¶ O bâ-ba diyakidi ba kěkě, ka bave-
ngi bâkâ ba viya o mboka, ka bâ-ba levidě
prist iněně belombo beěhěpi be ma hama.

12. O bâ-ba yolanakidě na batodu, ka bâ-ba lata 'hoka, ka bâ-ba vě sâjě hika eitě,

13. Na, Vâki, na, Beyokwedi beaju be vaki na bulu, ka bâ-ba iba Mâ, o hwě-ho diyakidi ho yaka.

14. Oningě ekae ya pá o matâ ma Gaven, ho ka tundudi mâ, na hwě-hwa huludě njě-nji 'anyu.

15. Ka bâ-ba nângâ hika, ka bâ-ba ha ka ba ma levwě: ndaga tēkaně e ngite langwakwě o Jiu ba jadi na boa buhwa.

16. ¶ Jâ ndi ja jomu ja beyokwedi na eyokwedi yâkâ ja vala o Galili o ukodi mua Jisus u levakiyi bâ.

17. O bâ-ba yěněki Mâ, ba ka kalakiya Mâ: ndi bâkâ ba bomaka penda.

18. Ka Jisus a viya ka kala na bâ, na, Ipanga jěhěpi i věwěngo 'Mba o Hěvën na o he.

19. ¶ Kěkěni nandi, o ka levakiděni be-tomba beěhěpi, o baptisaki bâ ni na dina ja Hangwě na ja Mwana, na j' Ilina Iyamu.

20. O ka yokwakidi bâ ni o tata belombo beěhěpi ibeamě be jadi 'nyěni languwango. Umbwakiyatani, Mbi n' inyěni buhwa ka buhwa kwanga nala ihuku ja he.

0 Bible House, 100 20.

SANGO EYAMU

YA MARK E LĒNDĚKIDI.

THE GOSPEL ACCORDING TO
MARK,

TRANSLATED INTO THE BENGAL LANGUAGE

BY THE LATE REV. JAMES L. MACKEY, AND WITH THE OTHER
GOSPELS REVISED AND HARMONIZED BY REV. R. H. NASSAU.

GABOON AND CORISCO MISSION, WEST AFRICA.

NEW YORK:
AMERICAN BIBLE SOCIETY,
INSTITUTED IN THE YEAR MDCCCLVI.

1881.

[Benga, 16mo.]

SANGO EYAM'

YA MARK E LĚNDĚKIDI.

KAPITA I.

1. Jali ja sango eyamu ya Jisus Kraist mwana ua Anyambe.

2. E lěndwěngo o basaki, na, Mbi loma-ngo utodu muamě o boho boāvě, u ka bo-
nguwě njeya 'vě o boho.

3. Joyi j' umbâkâ i yamaka o nginga, na, Kenjakěni megâmbâ mea Upangiyi, panga-
kani njeya jaju de.

4. Jân a ma baptaisakandi o nginga, na mâ-a kalakiya baptisma ya iluwa ja melema o ivěngidě ja bobe.

5. Bato ba 'he ya Judia, na ba Jěrusalěm, ba kěkind' o mâ-a jadi, bâ běhěpi ba ma ba-
ptaisakwěndi na mâ o viho Jordan, ba měměkě mabe mabu.

6. Jân a ma bâtakândi ngâi ja mevâtâ mea kaměl, n' utumba mu' ekato tingango; a jaka lohěnjěnjě na boyi boa 'hiki.

7. A kalakiya, na, O vakand' Umbâkâ o mbuhw' 'amě, ngudi wa n' umba, uHINGA mua makogo maju umuamě u ha ibě weyango n' ibalama n' umba-mba 'njuwa mâ.

8. Mbi baptaisango 'nyěni mbambayě na miba, ndi A ka baptaisandi 'nyěni n' Ilina Iyamu.

9. E diyakindi o hwi tědině ka Jisus a viya oviya Nazarěth ya Galili, ka Mâ-a baptaiswě na mâ o Jordan.

10. A jabwakate o kindiki, ka Mâ-a yěně oba e jadi bwe, Ilina ona mbenga i hubaka o Mâ-a jadi :

11. Ka joyi ja viya oviya oba, na, O Mwan' 'amě a tândâkě, a tândâkidě 'Mba bwamu.

12. Ka Ilina ja validě Mâ o nginga, o njo pâkâ.

13. A diyakindi o nginga ovoně mabo ma hwi manai, A yějěkudwě na Setan : A diyakindi na tito : ka enjěl ja haya Mâ.

14. O Jân a běkidi vamwěngo o ntyogo, ka Jisus a viya o Galili, A langwaka sango-eyamu ya ipangiya ja Anyambě,

15. Na, Egombe e pândi, ipangiya ja Anyambě ja bě ndi piělě : uluakani melema, n' inyěni o ka kamakidi sango-eyamu.

16. O Mâ-a diyakidi a tamwaka baka na etima ya Galili, ka Mâ-a yěně Saimon, na mwana-nyangwě Andru, ba dulaka 'lâba o 'tima, ba diyaki mehombwedi.

17. Ka Jisus a vâ na bâ, na, Vitanaki 'Mba ni, vâkâna Mbi pangindi 'nyěni mehombwedi mea bato.

18. Ka bâ-ba dika belâba beabu njo tẽ ya pâkâ, ka bâ-ba vitẽ Mâ.

19. O Mâ-a bẽkidi yaviděngo kwěi, ka Mâ-a yěně Jems mwana Zěbědi, na mwana-nyangwě Jân, ba diyaki tepě o elende, ba hângâkâ belâba beabu.

20. Ka Mâ-a ndiya bâ njo tẽ ya pâkâ, ka bâ-ba dika hangw' 'abu Zěbědi o elende na ba ma hakiya mâ, ka bâ-ba vitẽ Mâ.

21. Ka bâ-ba vala o Kapěrnaum; o buhwa boa Iyâjâ, ka Mâ-â ngiya o tyâtyi 'abu, A ka yokwakidě.

22. Ba mamakindi iyokwanidi viaju, 'ka-bojana A yokwakidi bâ bwěšě ona moto a di na ipangiya, ndi hanga ka balěndi.

23. Momo a diyakindi o tyâtyi 'abu n' ilina ibe; ka mâ-a yama,

24. Na, Dikaka hwě mbwe, ho lě na nâvē nande, Âvē Jisus ya Nazarěth? O ma viyi

ka weya hwě? Mbi yowudět' Āvē, Āvē
ndi Umbākā ua Anyambě ua Hole.

25. Ka Jisus a kandidě mā, na, Diyaka
dā, na nāvē wa puma o mā-a jadi.

26. O ilina ibe i njimi mā, ka jā-ja
yama na joyi oba, ka jā-ja puma o mā-a
jadi.

27. Ka bâ bēhēpi ba mama imama i pa-
ngakě bâ uwanaka bâ mētě na bâ mētě,
na, Ekae e lě nja 'lombo-ě? Vilě nj' iyo-
kwanidě via kya ekavi? 'kabojana n' ipa-
ngiya a sombiyakěndi tombete malina mabe
na mā-ma yokiyate mā.

28. Ka kuma 'aju ya hamana wāwā o
hanganě tē ya Galili nē yēhēpi.

29. O bâ-ba pumakidi o tyátyi, ka bâ-ba
ngiya o ndabo ya Saimon na Andru; na
Jems na Jân ba diyakind' omě.

30. Ndi nyangwě ya mwad' 'a Saimon
a diyaki na mehiyo mea ivěvu bya; kwěi
ka bâ-ba languwa Mā o pěl' 'aju.

31. Ka Mā-a viya ka bweya mā na 'nā,
ka Mā-a 'mudě mā; elěngiaha tepě ka
ivěvu ja dika mā, a ka hakiya bâ.

32. O joba i kweyakiyedi, na kolo, ba va-
nakindi mebedi meēhēpi o Mā-a jadi, na ba
diyaki na dēvil.

33. Ka mboka yěhěpi ya yolaně o ubiyâ.

34. Ka Mâ-a yongě baitě ba diyaki na bebědi bea mangâ maitě, ka Mâ-a pumě děvil iitě, Au tândâkâ děvil i kalaka; 'kabo-jana ba yowakidi Mâ.

35. Ka Mâ-a 'muwa n' ubwa-n' ubwa, buhwa bo t' o bumuwa, ka Mâ-a vala o iboko via ikutakuta; A ka kalakiya.

36. Saimon na ba diyaki na ju ba vitakidi Mâ.

37. O bâ-ba běki Mâ duwango, ka bâ-ba vâ na Mâ, na, Bato běhěpi ba vahakand' Âvé.

38. Ka Mâ-a vâ na bâ, na, Ho kekeni o mboka ipâkwě, ovaně nd' Umba-mbi ka kaliy' ovoně tepě, 'kabojana tina 'amě e vanakidi ndi yâně.

39. Ka Mâ-a kaliya o tyâtyi ijabu o Galili yěhěpi, na Mâ-a věngěkidě děvil.

40. Egálani e vakindi o Mâ-a jadi, ka yâ-ya balama, e ka hâhâlakidě Mâ, na, Oningě wa panga o te na ngudi e yongakě 'mba.

41. Ka Jisus a yěně mâ ngâtâ, ka Mâ-a hambid' enâ, ka Mâ-a kupaně mâ, na, Mbi pangindi; yongaka.

42. Elěngiaha A kala, tepě egálani e vě-
ngěměkě, ka mâ-a yongwě.

43. Ka Mâ-a kelevidě mâ, ka Mâ-a timbě
mâ.

44. Ka Mâ-a vâ na mâ, na, Bandama-
kidě o langwake moto, ndi kěkě, levakidě
nyolo 'ávě prist, na nâvě wa vě o pělě ya
iyongwě jâvě belombo bea Mosès be vâkidi,
ka tali o bâ-ba jadi.

45. Ka Mâ-a vala, a ka kenakě yâ n'
iněně mětě, i pangaka Jisus a diye na
ngudi e pâkě o mboka o bwebwe, nd' A
ka diyaka kabo o loboko la nginga; bato
ba ma vakandi o Mâ-a jadi oviya hanganě
yěhěpi.

KAPITA II.

1 Ka Mâ-a vala pě o Kapěrnaum hwi
jâkâ tombango, ka sango ya 'luanidě, na, a
bě nd' o ndabo.

2. Ka bato baitě ba yolaně o njo pâkâ, ba
diye pě na ngudi ba kokakě o ndabo, tombe
n' ubiyâ; A ka kalakiya ndaga o bâ-ba jadi.

3. Ka bâ-ba viya o Mâ-a jadi na moto
a diyakidi na ebědi ya nyolo limbelimbe, a
diyaki bapwěngo na bato banai.

4. O bâ-ba diyakidi ba·diye na ngudi e pakiyě o Mâ-a jadi 'kabojana ebimba, ka bâ-ba tuba unyuwa o ndabo 'aju e diya-kidi; o bâ-ba diyaki mâ tubango, ka bâ-ba hubě ikondo ja ubědi mua nyolo limbelimbe u diyakidi.

5. O Jisus a yěněkidi ikamidě jabu, ka Mâ-a vâ na ubědi mua nyolo limbelimbe, na, Mwana-o, mabe mâvě ma 'yidwěnd' âvě.

6. Ndi balěndi na bahuu ba diyakind' omě diye-diye, ba ka kalaka na melema meabu,

7. Na, E lě nde ya momo tēkaně e kilakě Anyambě kakana? Nja ka 'yidě mabe ka-bo Anyambě dipâ?

8. Elěngiaha o Jisus a yowakidi n' ilina jaju na ba pikilakiyandi bâ mětě na bâ mětě, ka Mâ-a vâ na bâ, na, O pikilakiya li belombo tēkabe o melema meanyu nande?

9. Nana e ndi bobâbu na vâ na ubědi mua nyolo limbelimbe, na, Mabe mâvě ma 'yaku-dw' âvě, na ba vâ, na, Umwaka, na nâvě wa nângâ ikondo jâvě, na nâvě wa tamuwa?

10. Nd' ovaně nd' inyěni o ka yowěni, na, Mwana-moto a na ngudi e 'yakidě mabe o he (ka Mâ-â vâ na ubědi mua nyolo limbelimbe, na),

11. Mbi vwi na nâvě, na, Umwaka, nâ-ngâkâ ikondo jávě, na nâvě wa 'la o ndabo 'âvě.

12. Elěngiaha, tepě ka mâ-a 'muwa, ka mâ-a nângâ ikondo jaju, ka mâ-a vala o boho boabu boa běhěpi; já ndi jabu ja běhěpi ja mama, ba ka bendakě Anyambě, na, Ho ha yěnete yâ kakana.

13. Ka Mâ-a vala pě njo 'pâkwě baka na etima, ka 'bumbu yěhěpi ya kâbidě Mâ, a ka yokwakidě bâ.

14. O Mâ-a diyakidi a tombaka, ka Mâ-a yěně Livai mwan' 'a Alfius diyango o inâ-ngânido via pago, ka Mâ-a vâ na mâ, na, Vitakě 'Mba. Ka mâ-a 'muwa na vitě Mâ.

15. E diyakindi o Jisus a diyakidi a jaka o ndabo 'aju kakana, bayoli-pago na bato babe ba diyaki tepě, na Jisus na beyokwedi beaju ta; 'kabojana ba diyaki baitě, ka bâ-ba vitaně Mâ.

16. O balěndi na Farisi ba yěni Mâ-a jaka na bayoli-pago na bato babe, ka bâ-ba vâ na beyokwedi beaju, na, E lě nde eaju e mâtâ-kě na e jakě na bayoli-pago na bato babe.

17. O Jisus a yoki yâ, ka Mâ-a vâ na bâ, na, Ba di mepeha, ba vahaka uganga; ndi kabo ba běkě: Mbu vaka ka ndiya bato

bayamu, ndi kabo babe na, ba luwake melema.

18. Beyokwedi bea Jân na bea Farisi ba ma diyakandi ba hindinaka njo jâkâ, ka bâ-ba viya, ka bâ-ba uwa Mâ, na, E lě nde ya beyokwedi bea Jân na bea Farisi be diyakě be hindinaka, ndi beâvě be hindine.

19. Ka Jisus a vâ na bâ, na, Mbweyi j' ubayi i ka yâlěte o hindina o ubâmbi u di na jâ? Ulingo 'muabu u di n' ubâmbi i 'bě na ngudi o hindina.

20. Ndi hwi i vakandi j' ubayi u ka nângânwě bâ, nandi běngě ba hindinake o buhwa těboně.

21. O 'bě na moto a ka tumě epěhi y' unamba mua kya o ngâi ya vyo, vâkâna epěhi tě e hângâkwě ně e ka paděndi ya vyo, n' ibeku ja kena.

22. O 'bě tepě na moto a vamakě ivě ja kya o mbute ja vyo, vâkâna ivě ja kya i ka tumbidi mbute na ivě ja hoviya, na mbute ja jongoliya: ndi ivě ja kya i vama kwěndi o mbute ja kya.

23. O buhwa boa Iyâjâ, A diyakindi a tamwaka o meanga mea poti kakana; ka beyokwedi beaju bea yalě ibuka ja poti o bâ-ha diyaki ba kěkě.

24. Ka Farisi bā vā na Mā, na, Yēnēkēte, e lē nde 'abu e hakē, o buhwa boa Iyājā, e ha ibē hohonganēgo ?

25. Ka Mā-a vā na bā, na, O ha langeteni ka Devid a hakidi o mā-a diyakidi na mala, na mā-a yoka nja, mā na ba diyaki na ju ?

26. O mā-a kēkidi o ndabo 'a Anyambē o 'gombe ya Abaiethar prist enēnē, ka mā-a ja pēmbē y' ilevudwē, e ha 'bē hohonganēgo na o ja ndi kabo prist, ka mā-a vē tepē ba diyaki na ju.

27. Ka Mā-a vā na bā, na, Iyājā i vela-kudwi moto, ndi hanga na moto a velakudwi Iyājā.

28. Vākāna Mwana-moto a ndi Upangiyi tepē mua Iyājā.

KAPITA III.

1. Ka Mā-a vala o tyātyi 'abu epākwē njo: moto a diyakind' omē a diyakidi enā vivilaniyango.

2. Ba ka bēmbēkē Mā na ipē A ka yongi mā o buhwa boa Iyājā, ovanē nd' o bā-ba ka hēnjē Mā.

3. Ka Mā-a vā na momo a diyakidi enā vivilaniyango, na, Tēmēkē o hanganē.

4. Ka Mâ-a vâ na bâ, na, E te hohonga-nëngo o ha bwam' o hwi j' Iyâjâ, ipě o ha bobe? ô yongě 'mënâ, ipě o weya? Ka bâ-ba diya dâ.

5. Ka Mâ-a tamuwa bâ na ngambi, A yënëkě ngěbě o melema meabu mekolô, ka Mâ-a vâ na momo, na, Hambakidě enâ 'vě. Ka mâ-a hambidě: ka enâ 'aju ya timba upeha pani-ka epakwě.

6. Ka Farisi ba puma, ka bâ-ba paniya o vala o 'hoka na Herodian o pěl' 'aju, nyang' 'abu o ka weyaně Mâ.

7. Ndi ka Jisus a vëngëmě na beyokwedi beaju na 'la o 'tima : ebumbu enënë e vitakě Mâ oviya Galili na Judia,

8. Na oviya Jërusalēm na oviya Idumia, na o pělě 'pâkwě ya Jordan na ba Tair na Saidon, ebumbu ya bato enënë e vakind' o Mâ-a jadi, o bâ-ba yoki belombo beaju be haki benënë.

9. Ka Mâ-a kala na beyokwedi beaju, na, elende ehâlě e vengakidě Mâ, o banga ebumbu ya dibidě Mâ.

10. Ikabojana a yongakidi bato baitě, ovaně nd' o bâ-ba pinyilakidě o kupaně Mâ, tango e diyaki na bebědi yehěpi.

11. O malina mabe ma yëni Mâ, ma ka

kwaka o boho boaju, ma ka yamaka, na, O i Mwana ua Anyambě.

12. Ka Mâ-a languwa bâ, na, ba pangake Mâ-a yowanakě.

13. Ka Mâ-a beta o ukodi, ka Mâ-a ndiya ibaju ba vahakidi; ka bâ-ba pâ o Mâ-a jadi.

14. Ka Mâ-a kenjě jomu na babale, na ba diyaki na Ju, ovaně nd' o Mâ-a ka lomě bâ ka kaliya,

15. Na bâ-ba bi na ngudi o yonganakě mebědi, na e pumanakě dēvil :

16. Saimon uaju a vangakidě na Pitě ;

17. Jěms ja Zěbědi, na Jân mwan'-a-nyangwě na Jems, ibaju ba vangakidě, na, Boaněrjes, i weyaki, na Bana-ba-ngadi :

18. Na Andru, na Filip, na Bartholomiu, na Mathiu, na Thomas, na Jems ja Alfeus, na Thadius, na Saimon ya Kenan,

19. Na Judas Iskariot a kândâkiyi Mâ : ka bâ-ba ngiya o ndabo.

20. Ka ebumbu ya lataniya pě epâkwě njo, ba diye na ngudi e jakě na beja.

21. O mbweyi jaju i yoki yâ, ka bâ-ba vala ka bweya Mâ ; 'kabojana ba vâki, na, A potwakandi.

22. ¶ Ka balěndi ba vakiyedi o Jěrusalēm

ba vâ, na, A na Biëlzibub, A vëngëkidëndi dëvil na ngudi y' upolo mua dëvil.

23. Ka Mâ-a ndiya bâ o Mâ-a jadi, ka Mâ-a vâ na bâ na mekanakâdi, na, Setani a lë a yâlâkë o vëngidë Setani na-e ?

24. Oningë ipangiya ja pëhë jâ mëtë, ipangiya tëdinë ja yâlë o tëmë.

25. Oningë ndabo ya pëhë yâ mëtë, ndabo tënë ya yâlë o tëmë.

26. Ndi oningë Setan a yanaka na mâ mëtë, a di pëhëngo, a yâlë o tëmë, vâkâna a pândi 'huku.

27. O ibë na moto a ka yâlë o ngiya o ndabo ya moto ukolo, na jongolidë jumba jaju, kabo a t' o kata moto ukolo katango, nandi bëngë a jongolakidë ndabo 'aju.

28. Pakwëpâkwë Mbi vâki na inyëni, na, Mabe mëhëpi ma te ma iyakudwë bana ba bato, n'ikila ja Anyambë nyang' 'abu e ka kilë yëhëpi ;

29. Ndi a ka kilë Ilina Iyamu a 'yidwe, ndi a na mahihi ma yëkë ya 'gombe yëhëpi.

30. Ikabojana ba vâki, na, A na ilina ibe.

31. ¶ Nandi ka bana ba nyangwë na

nyangwě ba viya, tēmēngo o bwebwe, ka bâ-ba lomidě Mâ, ba ndakiya Mâ.

32. Ebumbu e diyaki Mâ lungango, ka bâ-ba vâ na Ju, na, Yěněkěte, nyângwě na bana ba nyângwě ba vahakand' Ávě o bwebwe.

33. Ka Mâ-a vâ na bâ, na, Jaie a lě a nja, tombe na bana-b'-ina lě ba nja ?

34. Ka Mâ-a hilě ba diyaki diye-diye, ka Mâ-a vâ, na, Yěněkěte jaie na bana-b'-ina !

35. Uěhěpi a ka hayě upango mua Anyambě, mâ nd' a di mwan'-ina na jaie.

KAPITA IV.

1. Ka Mâ-a yalě pě iyokudě baka na etima ; ka ebumbu eněně ya yolaně o Mâ-a jadi, ka Mâ-a vama o elende, ka Mâ-a diya o etima: ebumbu yěhěpi e diyakindi piěle na etima o uhěkě.

2. Ka Mâ-a yokudě bâ belombo beité na mekanakâdi, ka Mâ-a vâ na bâ o iyokwanidi viaju, na,

3. Yokolakiděni, uliyi u kěki ka liya ibângâ :

4. E diyakindi, o mâ-a mwanjidi, jákâ i kwakindi o pĕpĕkĕ ja njeya, ka lonâni la oba la viya ka sâsâ já.

5. Ka jákâ ja kwa o beĕngĕ, o ha diyaki na mahĕ maitĕ; elĕngiaha tepĕ ka já-ja puma, 'kabajana ju diyaka na ndiba ya mahĕ.

6. O joba i pumidi ka já-ja bâmbâlâniya; 'kabajana ju diyaka na metamba, i vivila-nakiyendi.

7 Ka jákâ ja kwa o mekanda, o mekanda me tombuwedi ka meâ-mea ha já kâlu, i jaye bebuma.

8. Ka jákâ ja kwa o mahĕ mayamu, ka já-ja yĕkĕmĕ bebuma, i ka tombwaka, i ka vuhaka, ka já-ja ja bebuma beitĕ, jákâ mabo malalo, jákâ utoba, jákâ kama.

9. Ka Mâ-a vâ na bâ, na, A di na matâ ma yokakĕ, a yokake.

10. O Mâ-a diyaki dipâ, ba diyaki na Ju na jomu na bebale, ba uwaki Mâ ukana-kâdi tĕ.

11. Ka Mâ-a vâ na bâ, na, Inyĕni nd' o didini vĕwĕngo iyowĕ ja mahâwĕ ma ipangiya ja Anyambĕ: ndi o ba ha 'bĕ omĕ belombo tĕkabe beĕhĕpi be hakwĕ na me-kanakâdi:

12. Boyěněkě ba ka yěněte, ndi ba yowe; boyokaka, ba ka yokate, ndi ba bweyidě; o banga ba 'luwa egombe t' egombe, na mabe mabu ma 'yudwě bâ.

13. Ka Mâ-a vâ na bâ, na, Wa 'wěni ukanakâdi tēkamu? nd' o ka yowě li mekanakâdi mečhěpi na-e?

14. Uliyi a liyakě ndaga.

15. Ekaba ndi ba pěpěkě ya njeya o ndaga i liyakwě, o bâ-ba běkě yokango, na Setan a viya ka nângâ ndaga i liyakudwě o melema meabu.

16. Ekaba tepě ba liyakwě o beěngě, ba běkě ndaga yokango, na bâ-ba hungana o pahiya yâ na mbya :

17. Ndi bâ mětě ba diye na metamba, ovaně nd' o bâ-ba diyakě o 'gombe; kwěi o betuniya na njuke be ka pâyě o nyanga ya ndaga, elěngiaha na bâ-ba kâbâ.

18. Ekaba ndi ba liyakwě o mekanda; ba běkě ba yoka ndaga,

19. Manaka ma eměná tēkae, n' iyabana ja boněně, n' ivaha ja belombo bepâkwě, o beâ be ka ngiyě, vâkâna be weyaki ndaga, na yâ-ya bě ekomba.

20. Ekaba ndi ba liyakwě o mahě mayamu: ba běkě ndaga yokango, na bâ-ba

pahiya yâ, na bâ-ba ka pumakě bebuma, bâkâ mabo malalo, bâkâ mab' utoba, bâkâ kama.

21. ¶ Ka Mâ-a vâ na bâ, na, Vitwa vi vanakwěndi ka vamwě o ibongalo ja kwe, na b' ibongalo j' ikondo? via tědwě o uhângâ?

22. O ibě na 'lombo e di kutamango e ka měndě e yowaně, tombe na jadi ilimbo vâkâna e ka pâdwěte o bwe.

23. A di na matâ ma yokakě, a yokake.

24. Ka Mâ-a vâ na bâ, na, Bandama-kidi nyang' 'anyu e yokakě: nyanga 'anyu e ka yějěně, yâ tepě e ka yějwěně inyěni; o inyěni o jadi ba ka' yokě, bâ te ba ka věwě wa.

25. A janidi mâ t' a ka věwě, a ha 'bě ně a ka nângânwěndi tombe na eaju e duwakě.

26. ¶ Ka Mâ-a vâ, na, Ipangiya ja Anya-mbě i ndi kakana, bwěsě ona moto a mwanjaka ibângâ o he;

27. Na mâ-a ka yaka, a 'mwaka bulu na mwehe, na ibângâ ja puma na já-ja tombuwa, a yowě ka yâ e jadi.

28. Ikabojana he e pumakěte bebuma beaju mětě; o bohoboho nd' utondo, nandi

běngě molo u páke, kwěi běngě mihâ mětě ma pumake o molo.

29. Nd' o ebuma e běkě yádângo, elěngiaha vâkâna a lomakandi ubenji, 'kabajana juma i pândi.

30. ¶ Ka Mâ-a vâ, na, Ipangiya ja Anyambě ho ka kwanidě lě já na nja 'lonbo-ě? na ka yějě lě já na nja ukana-kâdi?

31. E t' ona utonga mua 'buma ya mutard, e jadi, o yâ e liyakwě o he, bohâlě wa na bebuma bepâkwě be jadi o he:

32. Nd' o yâ e běkě liwěngo na yâ-ya tombuwa, na yâ-ya bě eněně wa na bele bepâkwě behâlě, na yâ e ka hambakidě melabe meněně, ovaně nd' o lonâni la oba lo diyakě o edingiha ya yâ.

33. A kalaki na bâ ndaga na mekana-kâdi těkame meitě, nyanga 'abu e diyaki na ngudi e yokakě.

34. Nd' Au kalaka na bâ kabo na ukana-kâdi; o Mâ-a diyakě na beyokwedi beaju dipâ, ka Mâ-a pěhě bâ belombo beěhěpi.

35. Bâ buhwa tě, o yâ e diyaki kolo, ka Mâ-a vâ na bâ, na, Ho jabwakeni o mwidi 'pâkwě.

36. O bâ-ba běkidi ebumbu 'a bato ti-

mběngo, ka bâ-ba nângâ Mâ ka Mâ-a diya-kidi o elende; belende bepâkwě be diyaki tepě na Mâ.

37. Ka ukudikudi mua upupě mua vunga; mekeba me bweyaka elende; e ka 'mbaka o hinga.

38. A diyakindi o mahina bya o epondoma; ka bâ-ba 'mudě Mâ, ka bâ-ba vâ na Mâ, na, Uyokwidi, wa yěněk' isâlâ, na o banga hwa kuga?

39. Ka Mâ-a 'muwa, ka Mâ-a kandidě upupě, ka Mâ-a vâ na etima, na, Běmbělě, hwěměkiyě. Ka upupě mu-a wa, mu-a bě uděmbě uněně.

40. Ka Mâ-a vâ na bâ, na, Jângâ iněně i lě ja nde? E lě nd' eanyu e ha 'bě n' ikamidě?

41. Ka bâ-ba banga jângâ iněně, ba ka himaka bâ mětě na bá mětě, na, Ekaně mcto a lě nja jângâ-ě, tombe upupě na etima bea yokiyate Mâ.

KAPITA V.

1. Ka bâ-ba pâ o mwid' upâkwě mua etima o ehe ya ba Gadara.

2. O Mâ-a hubakidi o elende, elëngiaha tepě ka Mâ-a lata na momo omě a diyaki n' ilina ibe a viya o malonga,

3. A ma diyaka o malonga, o diye na moto a ka hukě mâ, tombe n' uhingana-kano ;

4. Ikabojana a ma bweyakwëndi njo iitě, a vama kwě o meboka na mehinganakano, na mâ-a bukaka mehinganakano, meboka me waka. O diye na moto a ka lumbidě mâ.

5. A ma diyakandi egombe yěhěpi, na bulu na mwehe, o mekodi na malonga, a yamaka, na mâ-a lumaka nyolo 'aju na malale.

6. Nd' o mâ-a yěněki Jisus na masěi maitě, ka mâ-a 'la umbila, ka mâ-a kaliya Mâ,

7. Ka mâ-a yama nangudi, na, Eahu na nâvě 'lě nde, Jisus, Mwana-Anyambě e didi oba mětě. Mbi kanakiyand' âvě na Anyambě, na, o yěněkidě 'mba majili.

8. Ikabojana a vâki na mâ, na, Věngě-měkě o momo těně, âvě, ilina ibe.

9. Ka mâ-a uwa mâ, na, Dina jâv' i lě nja? Ka mâ-a timbwana, na, Dina jamě ndi Lijân, ikabojana ho ndi baitě.

10. Ka mâ-a hâhâlidě Mâ nangudi, na, a dumake bâ o ehe tĕně.

11. Piělě n ukodi omě o diyakindi bo-kweya bonĕně boa ngweya bo jaka.

12. Ka dĕvil jĕhĕpi ja hâhâlidě Mâ, na, Valakidě hwě ọ ngweya, ovaně nd' o hwě-ho ka ngiyě jâ.

13. Ka Jisus a bâbâ, o njo pâkâ. Ka malina mabe ma puma, ka má-ma ngiya o ngweya, ka bokweya boa huba umbila umbâkâ o mbelenge o etima (bo diyakindi pani-ka tâjen ibale) ka boâ-boa lâka o 'tima.

14. Ba ma jakidě ngweya ka bâ-ba kweya, ka bâ-ba languwa yâ o mboka na o 'hiki. Ka bâ-ba valanidě ka yĕně e ma hama yeně.

15. Ka bâ-ba pâ o Jisus a jadi, ka bâ-ba yĕně a diyaki na dĕvil, a diyaki na Lijân, bâtudwĕngo, diya, a bě bwamu; ka bâ-ba banga.

16. Ba yĕněki yâ ka bâ-ba languwa bâ nyanga e ma hama na a diyaki na dĕvil, na o pĕlě ya ngweya tepě.

17. Ka bâ-ba yalě Mâ iuwa ja na A vĕngĕmĕke o betĕbě beabu.

18. O Mâ-a pâkidi o elende, a diyakidi

na děvil 'ně a hâhâlâkidi Mâ, na, a diyake na Ju.

19. Ndi Jisus au bâbâkâ mâ, nd' A vâki na mâ, na, Kěķě o 'anyu o 'tâkâ 'âvē e jadi, o ka langwakiya bâ belombo beněně bea Anyambě be jad' âvē hango, na nyang' 'aju e yěnid' âvē ngâtâ.

20. Ka mâ-a vala, a ka yalakě o hamanidě o Dėkapolis, nyanga ya belombo beněně bea Jisus be hakiyi mâ; ka bato běhěpi ba mama.

21. O Jisus a jabwaki pě na elende o mwidi 'pâkwě, bato baitě ba kumanakidě-ndi o Mâ-a jadi; a diyaki piělě na etima.

22. Ka enami yâkâ ya tyâtyi, dina na Jairus, ya viya omě; o mâ-a yěni Mâ, ka mâ-a kwa o beko beaju,

23. A ka hâhâlâkidě Mâ nangudi, na, Mwan' 'ame ua mwajo ua nděmbě a bowa-ka; pâkâ, ka nangidě makadu mâvē o mâ-a jadi, ovane nd' o mâ-a ka yongě; na mâ-a diya.

24. Ka Jisus a vala na ju: ka bato baitě ba vitaně Mâ, ba ka pambalakidě Mâ.

25. Mwajo n' uhuhu a diyaki n' ulema mua makiya jomu ja mepuma na mepuma mebale,

26. A yěněkě njuke eněně na meganga meitě, ka mâ-a pelidě belombo beaju beěhěpi, ndi a diye na ngudi e yongakě, ndi kabo bololuaka pě wa,

27. O mâ-a yokidi o pělě 'a Jisus, ka mâ-a viya o kopya ovaně o mbuhwa, ka mâ-a kupaně ngâi 'aju.

28. Ikabojana a vâki, na, Pagate 'mba kupaně ngâi jaju, vâkâna mbi yongindi.

29. Elěngiaha tepě ka tongo ya makiya maju ya yaha: ka mâ-a yowě o nyolo na, a yongudwěndi oviya ebědi těně.

30. Elěngiaha ka Jisus mâ mětě a yowě na, ngudi y' iyonganě e pumindi o Mâ-a jadi, ka Mâ-a timbě iběyi o ba sâtaki Mâ ba jadi, na, Nja a kupanakě ngâi jamě?

31. Ka beyokwedi beaju bea vâ na Mâ, na, O yěněkěte ebumbu e pambalakid' Ávě, nd' O ka vâkâ pě, na, Nja a kupaně 'Mba?

32. Ka Mâ-a tamuwa kěběngě-kěběngě iyěně ja a ma ha 'lombo těeně.

33. Ka mwajo a banga, a ka likimaka, 'kabojana a yowakiděte e hamakidi o mâ-a jadi, ka mâ-a viya ka kwa o beko beaju, ka mâ-a languwa Mâ pâkwěpâkwě yěhěpi.

34. Ka Mâ-a vâ na mâ, na, Mwa-mwajo,

ikamidě jâvě i yongiděndi âvě; kěķē na jonga, o ka diyaka upeha oviya eběd' âvě.

35. O Mâ-a diyakidi a kalaka, ka bato ba viya o ndabo ya enami ya tyâtyi, ba vâki, na, Mwan' 'âvě a wendi; e lě nde eâvě e hakě pě Uyokwidi njuke?

36. O Jisus a yoki ndaga t' i kalakudwě dině, ka Mâ-a vâ na enami ya tyâtyi, na, O bangake, kamakidě pa.

37. Au bâbâkâ moto a vitanakě Mâ kabo Pitě, na Jems, na Jon mwana-nyangwě na Jems.

38. Ka Mâ-a pâ o ndabo ya enami ya tyâtyi, ka Mâ-a yěně imbunga, na ba 'yakidi na ba yamanakidě nangudi.

39. O Mâ-a ngakiyedi ka Mâ-a vâ na bâ, na, O haka lě ni imbunga na o 'yakani na nja 'lombo-ě? itângâ i ha weyete, ndi a yakandi.

40. Ba ka vĕhĕķē Mâ. Nd' o Mâ-a bĕķi bâ bĕhĕpi pumĕngo, ka Mâ-a nângâ hangwě na nyangwě ya mwa-mwajo na ba diyaki na Ju, ka bâ-ba ngiya o iboko viya itângâ i diyaki bya.

41. Ka Mâ-a bweya itângâ na 'nâ, ka Mâ-a vâ na mâ, na, Talitha kumai; yeně ndi, na, Isesa, Mbi vwi na nâvě, na, Umwaka.

42. Elëngiahā tepě ka isesa a 'muwa, a ka tamwaka; 'kabojana a diyakindi jomu ja mepuma na mepuma mebale o utodu. Ba mamakindi imam' iněně.

43. Ka Mâ-a languwa bâ omě, na, E yowanake na moto. Ka Mâ-a sombiya na eloimbo e věkwě mâ e jakě.

KAPITA VI.

1. Ka Mâ-a vëngěmě omě, ka Mâ-a vala o wabu, ka beyokwedi beaju bea vitaně Mâ.

2. O buhwa boa Iyâjâ bo pâdi, ka Mâ-a yalě iyokudě o tyátyi; bato ba yokolakidě Mâ baitě ba mamakindi, na, Momo tēkaně a vaniye lě bolombo tēkabe ove? I lě nj' iyowě i věkudwě Mâ ekadi, i jadi na tombe-kete belombo beněně be hamakate o benâ beaju.

3. A 'bě ukěkěngě ekaně, mwan' 'a Meri, mwana-nyangwě na Jems, na Josēs, na Judas, na Saimon? Maluku maju ma 'bě na hwě okava? Ka bâ-ba numba na Ju?

4. Ndi ka Jisus a vâ na bâ, na, Usâki a pěněķě ihekudwě kabo o wabu, na o ikaka jaju, na o diyâ jaju.

5. Au yâlâkě tepě o ha ehavu eněně omě, kabo a kahakidě makadu o tango ehâlě ya mebedi, na Mâ-a yongakě bâ.

6. Ka Mâ-a mama o pělě 'a ipuhwana jabu j' ikamidě. Ka Mâ-a vala, A kěkě, A yokwanakidě o mamboka mahâlě.

7. ¶ Ka Mâ-a ndiya jomu na bebale, A ka yalakě o loma bâ babale-babale, ka Mâ-a vě bâ ipanga ja malina mabe.

8. Ka Mâ pakuwa bâ na, ba nângâke elo-mbo o 'kěndâ, kabo utumbe pa, hanga elandi ya kola, tombe beja, na ba dâlě o belandi beabu.

9. Bâtâkâni sandal o beko: nd' o bâtâke-ni koto ibale.

10. Ka Mâ-a vâ na bâ, na, Iboko vianyu vi ka pâyě o ndabo, diyakani omě, kabo inyěni o ka valěni omě.

11. A ka měndě a pahiye 'nyěni, na o yokolidě tepě inyěni, o inyěni-o ka valěni omě, pupwakani ubulubulu oviya matambi manyu o ilanguwa jabu. Mbi vâki n' inyěni pâkwěpâkwě, e ka diyandi bobabu na ba Sodom na Gomâra o buhwa boa yěkě, wa na mboka těně.

12. Ka bâ-ba vala, ba ka kalakiya na bato ba 'luwake melema.

13. Ka bâ-ba pumě děvil iitě, na bâ-ba ka hakiya mebēdi meitě mavulě, na yongě bâ.

14. Ka upolo Hěrod a yoka o pěl' 'aju ('kabojana dina jaju i diyaki ja hamana); ka mâ-a vâ, na, Jon Baptist a pumbuwendí, ovaně nd' o behavu beněně be levakudwě o mâ-a jadi.

15. Bâkâ mâ, na, A ndi Ilaias, Bapâkwě mâ, na, A ndi usâki, na ba moto a kwanaka usâki.

16. Ndi Hěrod, o mâ-a yoki yâ, ka mâ-a vâ, na, A ndi Jon uamě a lenakidi ibâlu; a pumbuwendí oviya iwedo.

17. Ikabojana Hěrod mâ mětě t' a lomaki bato ka bweyidě Jon, ka mâ-a tiniya mâ meboka o ndabo 'a ntyogo, o nyanga ya Hěrodias, mwad' 'a mwana-nyangwě Filip; ikabojana a bakiyi mâ.

18. Nana Jon a vâki na Hěrod, na, E 'bě hohonganěngo na o nângâkâ mwad' 'a mwana-nyângwě.

19. Ovaně nd' o Hěrodias a yomanaki na mâ, na mâ-a vahaka o weya mâ, nd' au yâlâkě.

20. Ikabojana Hěrod a bangakindi Jon, yowěngo, na, a ndi momo uyamu na hole,

ka mâ-a lala mâ; o mâ-a yokaki mâ a kala-kiya, ka mâ-a ha belombo beité, a yěněki mbya na yoka mâ.

21. O buhwa boa lukango bo pâdi, boa Hěrod bo jakudwě, ka mâ-a hadě mepangiyi meaju, na ngawe iněně, na bato baněně ba Galili, isango.

22. O mwana ua Hěrodias tě ua mwajo a vakidi ka yemba, ka mâ-a tândidě Hěrod na ba diyaki na ju, ka upolo mâ-a vâ n' isesa, na, Uwaka 'mba elombo 'ávě e vahakě, vâkâna mbi vënd' ávě yâ.

23. Ka mâ-a kaniya mâ, na, Eávě e ka uwě 'mba yěhěpi, mbi ka vënd' ávě yâ, tombe e jadi epěhi y' ipangiya jamě.

24. Ka mâ-a puma, ka mâ-a vâ, na, Mbi uwake 'lě nde? Ka mâ-a vâ, na, Molo mua Jon Baptist.

25. Elěngiaha, ka mâ-a timba o upolo a jadi ngwambe, ka mâ-a uwa mâ, na, Mbi vahakandi o vėkě 'mba kwěi molo mua Jon Baptist o 'pělě-bwalo.

26. Ndi upolo a yěněki ngěbě eité, ndi o nyanga ya ikana na ba diyaki na ju ija, au vahaka o lěvě mâ.

27. Elěngiaha tepě k' upolo a loma uweyi, ka mâ-a vâ na molo muaju u vana-

kwě; ka mâ-a vala ka lena mâ ibâlu o ndabo ya ntyogo.

28. Ka mâ-a vana, molo muaju o 'pële-bwalo, ka mâ-a vě muâ isesa, ka isesa ja vě muâ nyangwě.

29. O beyokwedi beaju be yoki yâ, ka bâ-ba viya ka nângâ ekengo 'aju, ka bâ-ba nangidě yâ o malonga.

30. Ka metodu ba yolaně ta o Jisus a jadi, ka bâ-ba languwa Mâ belombo beě-hěpi ibeabu be hakidi, n' ibeabu be yolkwakidi.

31. Ka Mâ-a vâ na bâ, na, Vakani, inyěni mětě, o iboko via nginga dipâ, na wa ta yâjâni kwěi; 'kabojana ba vakidi na ba kěkidi, ba diyaki baitě, bu diyaka na epedi e jakě.

32. Ka bâ-ba vala o iboko via nginga, na elende, ikutakuta.

33. Ka bato ba yěně bâ-ba kěkě, ka baitě ba yemba Mâ, ka bâ-ba 'la umbila na ja he omě, bopumaka o mboka jěhěpi, ka bâ-ba tombě bâ, ka bâ-ba yolaně o Mâ-a jadi.

34. O Jisus a jabwakidi ka Mâ-a yěně bato baitě, ka Mâ-a 'muwa na ngátâ o pěl' 'abu, 'kabojana ba diyakindi pani-ka

medâmbě me diye n' utati, ka Mâ-a yalě bâ iyokudě ja belombo beité.

35. O buhwa bo diyakidi boa vala, ka beyokwedi beaju bea via o Mâ-a jadi, na, Ekavi vi ndi iboko via nginga, egombe tepě e tombindi.

36. Valakidě bâ, ovaně nd' o bâ-ba ka 'lě boulwanakidě o 'hiki na o mamboka, na bâ-ba ka hambaka pěmbě jabu, 'kabojana ba 'bě na elombo e jakě.

37. Ka Mâ-a yavwana bâ, na, Inyěni, věki bâ ni beja. Ka bâ-ba vâ na Mâ, na, Ho kěke ka hamba pěmbě i weyakě kama ja fura ibale, na hwa vě bâ na ba jake?

38. Ka Mâ-a vâ na bâ, na, O li membunda meningě? ka t' o 'mbuwani. O bâ-ba yěněkidi, ka bâ-ba vâ, na, Metano, na bejaka bebale.

39. Ka Mâ-a sombiya bâ na ba pangake běhěpi na ba diyake njamba-njamba o mbwisanga ja mihâ.

40. Ka bâ-ba diya megândâ, meâkâ kama, meâkâ mabo matano.

41. O Mâ-a diyakidi membunda metano na bejaka bebale nângângo, ka Mâ-a buwa oba, ka Mâ-a vambiya ibâtâ, ka
u

Mâ-a buka membunda, ka Mâ-a vë meâ beyokwedi beaju na ba tēkidē o bâ-ba jadi; a ka kabaka bejaka tē bebale na bâ bēhēpi.

42. Ka bâ-ba bēhēpi janidē, ka bâ-ba vula. ●

43. Ka bâ-ba tâlidē jomu ja belinga na belinga bebale ti bea nguhu, na bea bejaka tepē.

44. Ba jaki membunda mea pēmbē ba diyakindi ba tâjen ja bamo itano.

45. Elēngiaha tepē ka Mâ-a tundudē beyokwedi beaju na ba vamahe o elende, na bâ-ba vala o mwidi 'pâkwē, o Bēthseda, o bohoboho, ulingo muaju u valakidē ebimba ya bato.

46. O Mâ-a timbakidē bâ, ka Mâ-a vala o ukodi ka kaliya.

47. O kolo e pâdi, elende e diyakindi o hanganē ya etima, a dikana o he dipâ.

48. Ka Mâ-a yēnē bâ-ba pēpēnēkē n' iduka; 'kabojana upupē u diyakindi banjanidēngo na bâ; o 'gombe ya elahe ya benai ya bulu, ka Mâ-a viya o bâ-ba jadi a tamwaka o etima, ona a vahaka o bambuwa bâ.

49. Nd' o bâ-ba yëni Mâ-a tamwaka o etima, ba piviyaki na, ipě u nd' ukuku, ba ka yamaka ;

50. Ikabojana bâ bēhēpi ba yēnēki Mâ, ka bâ-ba juka ipikiliya. Ka Mâ-a hungana o kala na bâ, ka Mâ-a vâ ŋa bâ, na, Yâdâkâni ; a te 'Mba ; o bangakeni.

51. Ka Mâ-a beta o bâ-ba jadi o elende, ka upupě mu-a wa ; ka bâ-ba mama nangu-di eitě mětě, ba ka utuwaka.

52. Ndi bu yongakidě pě elembo ya pēmbě ; 'kabojana melema meabu me diyaki bokolo.

53. O bâ-ba jabwakidi, ka bâ-ba pâ o ehe ya Jēnēsarēth, ka bâ-ba bakama na he.

54. O bâ-ba pumakidi o elende, elengiaha tepě ka bâ-ba yowě Mâ,

55. Ka bâ-ba vala umbila uluaniděngo o etěbě tēnē yēhēpi, ka bâ-ba yalě ibapě ja ba diyaki na bebēdi o makondo, o iboko viabu vi yokaka na A iwě.

56. Iboko viaju vi pākidi viēhēpi o ba mabākâ, na ba mboka, na ba 'hiki, vākâna ba nangakidi mebēdi o mehēngě, na bâ-ba ka hâhâlâkidě Mâ, na ba kupanake tombe-kete ihuku ja ngâi 'aju ; tango e ma kupanake Mâ yēhēpi e te ma yongaka.

KAPITA VII.

1. Já ndi ja Farisi na balëndi na bahuu ba vakiyedi o Jérusalēm, ba lataniya o Mâ-a jadi.

2. O bâ-ba yënidi beyokwedi beaju beâkâ be jaka beja na ndindo, yeně ndi na ba tuke benâ, ka bâ-ba duwa ponda.

3. Ikabojana Farisi na Jiu bēhēpi, kabo ba t' o tuka benâ njo iitě, ba jaka, itata ja epepa ya batodu.

4. Oningě ba viya o ihambanido ba jaka kabo ba t' o tuka. Na belombo bepâkwě beité be jadi ibeabu be di nāngāngo na ba tataka, pani-ka ituka ja kâpi na mbeya, na melombo, na tagulu.

5. Já ndi ja Farisi na balëndi ba uwa Mâ, na, E lě nde ya beyokwedi beavě be ha tamwaka na bepepa bea batodu, ndi ba jaka beja ba tuke benâ.

6. Ka Mâ-a timbwana bâ, na, Isaia a huwakite o sâkâ 'nyěni menoki pani-ka yâ di lëndwěngo, na, Bato tēkaba ba hekakidi 'Mba na belěbu beabu, ndi melema meabu me yavaniděngo n' Umba.

7. Kakana ba kalakiyate 'Mba o naně, ba yokwakidě iyokwanidi via belekanako bea bato.

8. O bakakiděni belekanako bea Anyambě, ndi o tatakani bepepa bea bato, panika ituka ja mbeya na sěngě ja kâpi, na bea jângâ tědině bepâkwě beité ibeanyu be hakě.

9. Ka Mâ-a vâ na bâ, na, O hakandi bwamu mětě! n' isenja ja elekanako ya Anyambě, na ovaně nd' inyěni o ka tatě bepepa beanyu.

10. Ikabojana Mosěs a vâki, na, Hekakidě hângwě na nyângwě; tepě, A ka hâkě hangwě na ba nyangwě, a wake bowaka.

11. Ndi 'nyěni mâ na, Oningě moto a vâkâ na hangwě na ba nyangwě, E ndi Kârbān (ekae ndi, na, Bověkwě) elombo 'anyu e ka pahaniyě o 'mba-mbi jadi, vâkâna a bi pwenjavwenja.

12. Vâkâna wa bâbâkâni na a hake pě hangwě na ba nyangwě elombo;

13. O hadivakiděni ndaga ja Anyambě na bepepa beanyu be hadi; na bea jângâ tědině beité ibeanyu be hakě.

14. ¶ O Mâ-a běki ebimba yěhěpi ndi-yango, ka Mâ-a vâ na bâ, na, Inyěni běhěpi yokaki 'Mbani, o ka bweyakiděni:

15. O 'bě na elombo o bwebwe ya moto e ngakiyě o mâ-a jadi e ka yâlě o bevě mâ,

ndi belombo be pumakě oviya o mâ-a jadi, ekabe ndi be bevakě moto.

16. Oningě moto a di na matâ ma yokakě, a yokakě.

17. O Mâ-a vakiyedi oviya ebimba, ka Mâ-a ngiya o ndabo, ka beyokwedi beaju bea uwa Mâ o pělě ya ukanakâdi.

18. Ka Mâ vâ na bâ, na, O ibě tepě ni n' ibweyidě? Wa 'wěni na elombo yěhěpi e jadi o bwebwe e ngakiyě o moto, e 'bě na ngudi e bevakě mâ;

19. Ikabojana ya ngakiya o 'bumulema 'aju, ndi o ihuhu, na yâ ya pumwě o pěpěkě e vovolaki na beja beěhěpi?

20. Ka Mâ-a vâ, na, E vakiyě o ulema, yâ ndi e bevakě moto.

21. Ikabojana ovoně, o melema mea bato, nd' o pumakiyě ipikiliya ibe, inanganiya, ihonde, iweyana,

22. Iyiba, itângina, bebe, ijowa, uhâ, dihá ibe, ikila ja Anyambě, maměmě, behayě-hayě:

23. Belombo tě bebe 'kabe beěhěpi, be vakiyandi oviya utema, na beâ bea bevě moto.

24. ¶ Oviya 'vaně ka Mâ-a 'muwa nala o mapěpěkě ma Tair na Saidon, ka Mâ-a

ngiya o ndabo, Au vahaka moto a yowakě, nd' Au diyaka na ngudi e kutamakě.

25. Mwajo a diyaki na mwa-mwajo ua nděmbě a diyaki na ilina ibe, o mâ-a yoki sango 'aju, ka mâ-a viya ka kwa o beko beaju :

26. Mwajo těně a diyakindi ua Grik, etomba na Surofinisia, ka mâ-a hâhâlidě Mâ, na, a pumake mwana 'aju ua mwajo děvēl těně.

27. Ka Jisus a vâ na ju, na, Bana ba take na vula vulango, 'kabojana e 'bě lukango na o nângâ beja bea bana na o 'hwa beâ mbwa.

28. Ka mâ-a yavwana Mâ, na, E, Upa-ngiyi, ndi mbwa tě o ibongalo ja tagulu i jaka nguhu ja bana.

29. Ka Mâ-a vâ na mâ, na, O nyanga ya ndaga těkadi, kěkě; děvil e věngěmi mwan' 'ávě ua mwajo.

30. O mâ-a pâkidi o ndabo 'aju, ka mâ-a kâbidě děvil ya věngěmě, mwan' 'aju ua mwajo a diyi nangudwěngo o ikondo.

31. ¶ Ka Mâ-a věngěmě pě o tungu ya Tair na Saidon, ka Mâ-a pâ o etima' ya Galili, a pudunganaki hanganě ya tungu ya Dėkapolis.

32. Ka bâ-ba vana o Mâ-a jadi moto ua poke n' imbuke, ka bâ-ba hâhâlidě Mâ na A kahakidě mâ ikadu jaju.

33. Ka Mâ-a nângâ mâ o pĕpĕkě ya ebumbu, ka Mâ-a vamě mepenjo meaju o matâ maju, ka Mâ-a tuwa malě, ka Mâ-a kupaně emi 'aju ;

34. Ka Mâ-a tamuwa hĕvĕn oba, ka Mâ-a veguma, ka Mâ-a vâ na mâ, na, Efa-tha, yeně ndi, na, Bumwanakiya.

35. Elĕngiaha tepě ka matâ maju ma bumuwa, ka ukato mua emi 'aju mu-a 'nju-waniya, a ka kalaka hohonganĕngo.

36. Ka Mâ-a sombiyě bâ, na, ba langwake moto; nd' ulingo muaju u langwakiyě nangu-di, yâ nyanga tĕ te 'abu e hamanakidě yâ :

37. Ba ka mamaka bomamaka, na, A hi belombo beĕhĕpi bwam' ; A pangakate poke i yokaka na mambuke ma kalaka.

KAPITA VIII.

1. O hwi tĕdině ebumbu e diyakindi enĕ-ně mĕtĕ, bu diyaka na 'lombo e jakě; ka Jisus a ndiya beyokwedi beaju, ka Mâ-a vâ na bâ, na,

2. Mbi yĕnindi ebumbu ngâtâ, 'kabojana ba bi n' Umba okava hwi 'lalo, ba diye na elombo e jakĕ :

3. Oningĕ 'Mba validĕ bâ o ndabo jabu ba je, ba ka hoviyandi na nja o njeya, 'kabojana bâkâ ba vakiyendi yavidĕngo.

4. Ka beyokwedi beaju bea yavwana Mâ, na, Moto a ka vulĕ lĕ ekaba na beja o nginga ono na ove ?

5. Ka Mâ-a uwa bâ, na, O li membunda meningĕ ? Ka bâ-ba vâ, na, Hĕmbwĕdi.

6. Ka Mâ-a vâ na ebimba e diyake o he, ka Mâ-a nângâ membunda hĕmbwĕdi, ka Mâ-a vĕ akeva, ka Mâ-a buka, ka Mâ-a vĕ beyokwedi beaju na ba tĕkidĕ o boho boabu ; ka bâ-ba tĕdĕ beâ o boho boa ebimba.

7. Ba diyaki na lojajaka lohâlĕ ; ka Mâ-a vambiya ibâtâ, ka Mâ-a vâ na lo tĕkudwĕ tepĕ o boho boabu.

8. Kakana ndi bâ-ba jakidi, ka bâ-ba vula, ka bâ-ba tâlidĕ nguhu i dikanakidi belinga hĕmbwĕdi.

9. Ba jakidi ba diyakindi ba tâjen inai ; ka Mâ-a validĕ bâ.

10. ¶ Elĕngiaha tepĕ ka Mâ-a vama o 'lende na beyokwedi beaju, ka Mâ-a pâ o pĕlĕ ja Dalmanutha.

11. Ka Farisi ja viya, ka bâ-ba yalé o boma penda na Mâ, ba vahaka na A hake bâ elembo ya viya oba, ba yějě-kiyě Mâ.

12. A ka vegumaka n' iněně, o ilina jaju, ka Mâ-a vâ, na, E lě nde ya igona těkadi e vahakě elembo? Mbi vâki n' inyěni pâkwěpâkwě, O 'bě na elembo e ka věwě igona těkadi.

13. A ka věngěměkě na bâ, ka Mâ vama pě o 'lende, ka Mâ-a 'la o mwidi 'pâkwě.

14. ¶ Ndi beyokwedi ba behalakiděndi o nângâ beja, bu diyanaka o elende wa n' umbund' umbâkâ.

15. Ka Mâ-a languwa bâ, na, Bandamakiděni, dikakani lěvăn ya Farisi na lěvăn ya Hěrad.

16. Ba ka totonganaka bâ mětě na bâ mětě, na, E ndi 'kabojana o hwě-ho ha 'bě na beja.

17. O Jisus a yowakidě yâ, ka Mâ-a vâ na bâ, na, E lě nde 'anyu e totonganakě, 'kabojana o 'běni na beja? O ha yoweteni, tombe wa bweyiděni? O ndini melema meanyu yâdiděngo?

18. Inyěni na mihâ, wa yěněkěni?

Mark.

Inyëni na matâ, wa yokakani? Wa yongakidëni?

19. O 'Mba-mbi bukakidi membunda metano o tâjen itano, o tâlâkidë li belinga bea nguhu ti beningë? Ka bâ-ba vâ na Mâ, na, Jomu na bebale.

20. Tepë na hëmbwëdi o tâjen inai, o tâlâkidë li belingë bea nguhu ti beningë? Ka bâ-ba vâ na Mâ, na, Hëmbwëdi.

21. Ka Mâ-a vâ na bâ, na, E lë nd' eanyu e ha bweyakidë?

22. ¶ Ka Mâ-a pâ o Bëthseda, ka bâ-ba vana Mâ momo ua pâgu, ka bâ-ba hâ-hâlidë Mâ na A kupanake mâ.

23. Ka Mâ-a bweya pâgu o 'nâ, ka Mâ-a pumana mâ o mboka, o Mâ-a bë-kidi malë tuwango o mihâ maju, ka Mâ-a kahidë benâ beaju o mâ-a jadi, ka Mâ-a uwa mâ na ipë a yëni elombo.

24. Ka mâ-a tamuwa oba, ka mâ-a vâ, na, Mbi yënëki bato ona bele ba tamwaka.

25. Ka Mâ-a timbiya pë o kahidë benâ beaju o mihâ maju, ka Mâ-a panga mâ a tamwakiya oba, ka mâ-a yongwë, ka mâ-a yënë bato bëhëpi bwebwe.

26. Ka Mâ-a timbë mâ o ndabo 'aju, na,

O valake o mboka, o langwaka tepě yâ moto o mboka.

27. ¶ Ka Jisus na beyokwedi beaju ba vala o mboka ja Sësaria Filipai; o njeja, ka Mâ-a uwa beyokwedi beaju, a vâki na bâ, na, Bato ba vâkâ lě, na, Umba lě a nja?

28. Ka bâ-ba yavwana Mâ, na, Jon Baptist, ndi bâkâ mâ, na, Ilaias, na bapâ-kwě mâ, na, Ua basâki umbâkâ.

29. Ka Mâ-a vâ na bâ, na, Nd' o vâkâ li na Mbi lě a nja? Ka Pitěr a yavwuwa, ka mâ-a vâ na Mâ, na, Ávě ndi Kraist.

30. Ka Mâ-a kelevidě bâ na, ba langwake moto o pěl' 'aju.

31. Ka Mâ-a yalě bâ iyokudě na, Mwana-moto a ka yěni belombo beité; batodu na prist iněně na balěndi ba ka kiyi Mâ, na, bâ-ba ka weya Mâ; nd' o na hwi 'lalo A ka pumbuwa pě.

32. Ekae nd' eaju e kalakidi o bwebwe. Ka Pitěr a a nângâ Mâ o pěpěké na mâ-a ka yalakě ikandidě jaju.

33. O Mâ-a bėkidi iběi timbėngo, ka Mâ-a tamuwa beyokwedi beaju, A ka ka-ndakidě Pitěr, na, Věngěmėkě 'Mba o mbu-

hwa Setan, 'kabojana wa pikilakiya belo-
mbo bea Anyambě, ndi kabo bea bato.

34. ¶ Ka Mâ-a běkidi ebimba ndiyango
na beyokwedi beaju, ka Mâ-a vâ na bâ, na,
A ka vitě 'Mba uěhěpi a binake nyolo 'aju,
na Mâ-a bapě krâs 'aju, na mâ-a ka vilinga-
nakě 'Mba.

35. Ikabojana uěhěpi a ka tândě o yo-
ngě eměná 'aju a ka nyangi yâ, ndi uě-
hěpi a ka nyangi eměná 'aju o nyang' amě
na sango eyamu, mâ tepě a ka yongě yâ.

36. Ikabojana e ka kova lě moto nde,
oningě a jeya he yěhěpi, na mâ-a 'hwa ilina
jaju?

37. E lě ba nja 'lombo-ě ya moto e ka
vangwaně ilina jaju?

38. Ikabojana a ka yěně 'Mba ndaga
jamě ihâni o igona tě j' ihonde na bobe
ekadi, mâ tepě ua Mwana-moto a ka yěně
ihâni o Mâ-a ka viyě n' ivenda ja Hangwě
na enjěl iyamu.

KAPITA IX.

1. Ka Mâ-a vâ na bâ, na, Pâkwěpâkwě,
Mbi langwakiyandi 'nyěni, na, o na bâkâ
ba tēměkě okava ba veke iwedo kabo ba

ta yënë ipangiya ja Anyambě pāngo na ngudi.

2. ¶ Hwi 'toba tombango, ka Jisus a nāngā Pitěr na Jems na Jān, ka Mā-a valana bâ o ukodi mua udomba o pēpēkě bâ dipā, ka nyolo 'aju ya 'luwa o pwanj' 'abu.

3. Ibâtâ jaju i diyaki ngěningěni botano mětě ka sno, o diye pě na moto o he a di na ngudi e tanakě jâ wa.

4. Ka Ilaias na Mosēs ba pumiya bâ, ba diyaki ba kalaka na Jisus.

5. Ka Pitěr a yavwuwa, ka mâ-a languwa Jisus, na, Uyokwidi, e ndi bwamu na ho diyaka okava, na hwa ha meâkâ melalo, Āvē 'mbâkâ, Mosēs 'mbâkâ, Ilaias tepě 'mbâkâ.

6. Ikobojana au yowaka eaju e ka kala, 'kabojana ba diyaki ba bangaka.

7. Ka omě o diyaki na evindi e yambakiyi bâ, ka joyi ja viya o 'vindi, na, Ekaně a Mwan' 'amě a tândâkwě, yokakiyi Mâ ni.

8. O bâ-ba tamuwe kěběngě-kěběngě, elěngiaha tepě, ba yěne pě moto, kabo Jisus, na bâ mětě, pa.

9. A pakuwa bâ na, ba langwake moto belombo beabu be ma yënë, o bâ-ba diyakidi

ba hubaka ukodi, kabo o Mwana-moto a ka pumbuwa oviya bawewe.

10. Ka bâ-ba tata ndaga tēdinē bâ mētē, ba ka uwanaka bâ metē na bâ mētē, na, ipumbuwa oviya bawewe i lē na.

11. ¶ Ka bâ-ba uwa Mâ, na, E lē nde ya Balēndi e vâkē, na, Ilaias nd' a ka t' o pâ?

12. Ka Mâ-a yavwana, ka Mâ-a vâ na bâ, na, Ilaias pâkwēpâkwē nd' a takē na viya, na Mâ-a timbē belombo beēhēpi; na nyanga ya e di lēndwēngo o pēlē ya Mwana-moto nana a ka yēni majili maitē, na Mâ-a pējwē.

13. Mbi vâki n' inyēni, na, Ilaias pâkwē-pâkwē a pândi, ndi ba hakite mâ kabo nyanga 'abu e vahakidi bwēsē e di lēndwēngo mâ.

14. ¶ O Mâ-a pâkidi o beyokwedi beaju a yēnēkindi ebumbu enēnē bâ ulwanidēngo, Balēndi ba uwanaka na bâ.

15. Elēngiaha o ebimba yēhēpi e yēni Mâ, ba mamakindi imama inēnē, ka bâ-ba vala o Mâ-a jadi mbila, ba ka homaka 'Mâ.

16. Ka Mâ-a uwa Balēndi, na, O uwaka li bâ-i nande?

17. Ka 'mbâkâ ua ebumbu a yavwana

ka mâ-a vâ na Ju, na, Uyokwidi, mbi ma vanandi mwan' 'amě ua momo o Ávě-o jadi, a di na ilina j' imbuke.

18. Iboko viaju vi valanakě mâ viěhěpi, vâkâna i hunjaki mâ, a ka pumakě mavudi, a ka kalakidě mahonga, na mâ-a ka kângâkâ; ndi mbi ma kali na beyokwedi beavě, na ba pumakě já, ndi bu yâlâkě.

19. Ka Mâ-a yavwana mâ, na, A! igona i ha 'bě na ikamidě, Mbi ka diya lě n' inyěni nj' ulingo-ě? Mbi ka hingina lě 'nyěni nj' ulingo-ě? Vanaki mâ ni o 'Mbambi jadi.

20. Ka bâ-ba pâdě mâ o Mâ-a jadi: o mâ-a yěni Mâ, k' ilina ja hunja mâ: ka mâ-a kwa o he, a ka yangalaka, a pumakě mavudi.

21. Ka Mâ-a uwa hangwě, na, Ulingo na mua ekae u di diyango o mâ-a jadi? Ka mâ-a vâ, na, Oviya ukěkě.

22. Njo jákâ e 'hwaka mâ o veyâ na o miba nana e weye mâ: ndi ipě O ka hate, yěněkě hwě ngâtâ, na Ávě wa hana hwě.

23. Ka Jisus a vâ na mâ, na, Oningě o yâliděngě o kamidě, belombo beěhěpi be te be hamaka na ba kamakidě.

24. Hangwě-mwana ka mâ-a yama na

manyângádiba, na, Upangiyi, mbi kamakiděndi; hanaka 'mba n' ipuhwa jamě j' ikamidě.

25. O Jisus a yěnidi na bato ba vakidi membila, ka Mâ-a kandidě ilina tě ibe, na, Ávě ilina j' imbuke na poke, Mbi langwakiyand' ávě, věngěměkě o mâ-a jadi, o ngakiye pě o mâ-a jadi njo 'pâkwě.

26. K' ilina ja yama, ka já-ja hunja pě mâ, ka já-ja věngěmě; a bi ona ekengo: baitě ba ka vâkâ na, A wendi.

27. Ka Jisus a bweya mâ o 'nâ, ka Mâ-a hěhě mâ; ka mâ-a těmě.

28. O Mâ-a vakid' o ndabo, ka beyokwedi beaju bea uwa Mâ o pěpěkě, na, E lě nd' eahu e ha yâlâkidě o věngidě já.

29. Ka Mâ-a vâ na bâ, na, Jângâ těkadi ja yâlě o puma na vilolombo kabo na ikaliya na ihindina.

30 ¶ Ka bâ-ba věngěmě omě, ka bâ-ba pudungana Galili; Au vahaka na moto a yowakě.

31. Ikabojana A, yokwakidi beyokwedi beaju, ka Mâ-a vâ na bâ na, Mwana-moto a bweyudwěndi o benâ bea bato, na ba ka weyi Mâ; o Mâ-a ka bě weyuwěngo, A ka pumbuwandí o buhwa bo' ilalo.

32. Ndi bu yowakě ndaga tědině, ba ka bangaka o uwa Mâ.

33. ¶ Ka Mâ-a pá o Kapěrneum; o ndabo ka Mâ-a uwa bâ, na, E lě nd' eanyu e ma sâjaka o njeja, inyěni n' inyěni?

34. Ndi bâ dâ; 'kabojana o njeja ba ma sâjakandi bâ mětě na bâ mětě, na, ja di wa.

35. Ka Mâ-a diya, ka Mâ-a ndiya jomu na babale, ka Mâ-a vâ na bâ, na, Oningě moto te moto a vahaka o diya o bohoboho mâ nd' a ka diyě ua mbuhwa ya běhěpi, na uhayi mua běhěpi.

36. Ka Mâ-a nângâ etumbě, ka Mâ-a tědě yâ o hangan' 'abu; o Mâ-a nângi mâ na benâ beaju, ka Mâ-a vâ na bâ, na,

37. Uěhěpi a ka věhělidě umbâkâ ua betumbě ka ekabe na dina jamě vâkâna a věhělidi 'Mba; a věhělěkidi 'Mba uěhěpi a věhělěkidě 'Mba dipâ, ndi na a lomaki 'Mba.

38. ¶ Ka Jân a yavwana Mâ, na, Uyo kwidi, ho yěněkindi 'mbâkâ a věngěkidě děvil na dina jâvě, ndi a vitaně hwě, ka hwa kandidě mâ, 'kabojana a vitakě hwě.

39. Ndi ka Jisus a vâ, na, O kandakidi mâ ni, 'kabojana o 'bě na moto a ka haye

elemba o dina jamě, a ka tândě o kala bobě o pěl' 'amě.

40. Ikabojana a ha hingaka na hwě a nd' o pěl' 'ahu.

41. Uěhěpi a ka mâtidě inyěni sěngě ya kapi ya miba o dina jamě, 'kabojana o ndini ba Kraist, mbambaye, Mbi vâki n' inyěni, a nyange mahomano maju.

42. Ndi uěhěpī a ka bevě yākā ya betumbě be kamakidě 'Mba, e ndi bwamu wa o pěl' 'aju n' ilale iněně i tingakwě o ibálu jaju, na mâ-a 'hwě o manga.

43. Oningě ikadu jâvě ja bevidě âvě, lenaka jâ; e ndi bwam' o pěl' 'âvě na nâvě o ngakiya o 'mēnâ yēmě wa na o diya na makadu mabale na nâvě wa 'la o Hěl, o veyā vi ka mēndě vi dime:

44. O ukuju muabu u ha waka, na veyā vi hiniye.

45. Tepě, oningě itambi jâvě ja bevidě âvě, lenaka jâ: e ndi bwam' opěl' âvě na nâvě o ngakiya o 'mēnâ o dēhimaka wa na o diya na matambi mabale na nâvě o 'hwě o Hěl, o veyā vi ka mēndě vi dime:

46. O ukuju muabu u ha waka, na veyā vi hiniye.

47. Na, oningě dihâ jâvě ja bevidě âvě,

tongwaka já : e ndi bwam' opěl' ávĕ na nâ-
vĕ ngakiya o ipangiya ja Anyambĕ na dihâ
já kâ wa na o diya mihâ mabale, na nâvĕ o
uhwĕ o Hĕl ya veyá :

48. O ukuju muabu u ha waka, na veyá
vi hiniye.

49. Ikabojana uĕhĕpi a ka mwahudwi
na veyá, na mwambo muĕhĕpi u ka mwa-
hudwi na vianga.

50. Vianga ndi bwam' ; nd' oningĕ via-
nga vi diya uju hambe, o ka timbĕ lĕ pi
viâ ni uju na ? Diyakani na vianga inyĕni
mĕtĕ, o ka diyakani jonga inyi mĕtĕ n' inyi
mĕtĕ.

KAPITA X.

1. Ka Mâ-a 'muwa oviya ovanĕ, ka Mâ-a
pâ o betĕbĕ bea Judia baka na mwidi 'pâ-
kwĕ mua Jordan : ka bebimba bea yolanĕ
pĕ o Mâ-a jadi, ka Mâ-a yokudĕ pĕ bâ ka
mbĕmbĕ.

2. Ka Farisi ja viya o Mâ-a jadi, ka bâ-
ba uwa Mâ, na, E te hohonganĕngo na mo-
mo a valakidĕ mwad' 'aju ? boyĕjĕkiyĕ Mâ.

3. A yavwanakindi, ka Mâ-a vâ na bâ,
na, Mosĕs a sombiyaki lĕ n' inyĕni na ?

4. Ka bâ-ba vâ, na, Mosës a bâbâkindi na ho lënděke ejanganangobo ya ivěngidě, na mâ-a valudwě.

5. Ka Jisus a yavwana, ka Mâ-a vâ na bâ, na, Melema meanyu mekolo meâ ndi meaju me lënděnekidi 'nyěni ndaga těkaně :

6. Ndi, oviya jali ja ivelwě, Anyambě a velaki bâ momi na mwadi.

7. Yâ tina těkaně ndi ya moto e ka dikě hangwě na nyangwě, na mâ-a kangalanaka na mwad' 'aju ;

8. Na bâ babale ba ka diyaka uhoni umbâkâ ; ovaně vâkâna ba 'bě pě babale kabo uhoni umbâkâ.

9. Moto a palwakidě pě ya Anyambě e di latěngo ta.

16. O ndabo ka beyokwedi beaju ba uwa pě Mâ upako těmuně.

11. Ka Mâ-a vâ na bâ, na, A ka validě mwad' 'aju na mâ-a ba upâkwě, a handi . 'honde opěl' aju.

12. Oningě mwajo a validě momi 'aju, na mâ-a ba upâkwě, vâkâna a handi 'honde.

13. ¶ Ka bâ-ba vana ba-nděmbě o Mâ-a jadi nana A kupanakě bâ ; ka beyokwedi bea kandidě ba ma vanaka bâ.

14. Ndi Jisus, o Mâ-a yëni nonaně, a numbaki nangudi, ka Mâ-a vâ na bâ, na, Dikakani ba-nděmbě, o kandakidi bâ ni ba vake o 'Mba-mbi jadi, 'kabojana já jângâ tēdině ndi ja ipangiya ja Anyambě.

15. Pâkwěpâkwě Mbi vâki n' inyëni, na, A ka mēndě a vėhėlidě ipangiya ja Anyambě ona mwa-nděmbě à ngiye omě na vilo-lombo.

16. Ka Mâ-a nângâ bâ na benâ beaju, ka Mâ-a kahidě bâ makadu maju, ka Mâ-a vambiya bâ ibâtâ.

17. ¶ O Mâ-a diyakidi a vala o njeya, k' umbâkâ a viya umbila, ka mâ-a bala-miya Mâ, ka mâ-a uwa Mâ, na, Uyo-kwidi uyamu, mbi ka ha lě nja 'lombo-ě eamě e ka jiga eměnâ ya 'gombe yěhěpi ?

18. Ka Jisus a vâ na mâ, na, E lě nde 'âvě e tubakě 'Mba, na, Uyamu ? O 'bě na uyamu kabo 'mbâkâ, mâ ndi Anyambě.

19. O te yowěngo belekanako, O di-yake n' ihonde, O weyake moto, O ibake O langwanakiye evela, O balanake, Hekakidě hângwě na nyângwě.

20. A yavwanakindi, ka mâ vâ na Mâ, na, Uyokwidi, mbi tatite ekabe beěhěpi oviya nděmbě 'amě.

21. Já ndi ja Jisus ja hilě mâ, A tândákâ mâ, ka Mâ-a vâ na mâ, na, Ndi o na elo-mbo yâkâ eâvě e di dikanango; kěkě, wa 'la ka hambidě ibeâvě be janidi, wa vě beâ mekuge, vâkâna wa bi na hika o Hěvën; na nâvě wa viya ka nângâ krâs, o ka vitě 'Mba.

22. A yěněki ndaga tědině njuke, ka mâ-a vala na ngěbě: 'kabojana a diyaki na jumba iněně.

23. ¶ Ka Jisus a tamuwa kěběngě-kě-běngě, ka Mâ-a vâ na beyokwedi beaju, na, Bokolo boitě nde boa ba di na hika eitě, ba ngakiya o ipangiya ja Anyambě!

24. Ka beyokwedi bea mamana ndaga jaju. Ndi ka Jisus a yavwana pě, ka Mâ-a vâ na bâ, na, Bana, bokolo nde boa ba pitakidě hika, ba ngakiya o ipangiya ja Anyambě!

25. E ndi bobâbu na kaměl e pudu-nganaka ubana mua tombo wa na moto a di kenango a ngakiya o ipangiya ja Hěvën.

26. Ka bâ-ba mama nangudi, ba vâkâ bâ mětě na bâ mětě, na, Ndi nja, ka yâlě o yonga?

27. Ka Jisus a tamuwa bâ, ka Mâ-a

vâ, na, Na bato e 'bë na ngudi e ha-
make, ndi hanga na Anyambë, 'kabojana
belombo beëhëpi be ka haniyate na Anya-
mbë,

28. ¶ Já ndi ja Pitër ja yalë o vâ
na Mâ, na, Ho senji beëhëpi na vitë Ávë.

29. Jisus a yavwanakindi, ka Mâ-a vâ,
na, Pâkwëpâkwë, Mbi vâki n' inyëni, na,
O 'bë na moto a di senjango ndabo, tombe
bana ba nyangwë, tombe maluku, tombe
hangwë, tombe nyangwë, tombe mwajo,
tombe bana, tombe 'hiki o nyang' 'amë na
sango-'yamu,

30. Ndi a ka pahiyandi kama ya njo kya
tëkanë okava, mandabo, na bana ba nya-
ngwë, na maluku, na nyangwë, na bana, na
'hiki, na ingongoludwë ta; nd' o 'hiki e yakë
emënë ya 'gombe yëhëpi.

31. Ndi, baitë ba jadi ba bohoboho ba ka
di pë o mbuhwa; na ba mbuhwa ba ka
diyi pë o bohoboho.

32. ¶ Ba diyakind' o njeya ba betaka
nala Jërusalëm; ka Jisus a vala o bohobo-
ho; ka bâ-ba mama; ba ma bangakandi o
bâ-ba vitanaki Mâ. Ka Mâ-a nângákâ pë
jomu na babale, ka Mâ-a yalë bâ ilanguwa
ja be ka hamë o Mâ-a jadi,

33. Na, Umbwakiyate, ho betakandi o Jěrusalěm; Mwana-moto a ka kândudwě-ndi o prist ja meolo na Balěndi ba jadi, na bâ-ba ka kwehi Mâ na A wake, na bâ-ba bweyidě Mâ Jěntail;

34. Ba ka věhi Mâ, na bâ-ba ka bomaka Mâ, ba ka tuwakiya Mâ malě, na bâ-ba weya Mâ; o buhwa boa ilalo na Mâ-a pumbuwa pě.

35. ¶ Ndi Jems na Jân bana ba Zěbědi ba kěkindi o Mâ-a jadi, na, Uyokwidi, ho vahakand' Ávě-o haka hwě elombo 'ahu e ka yombuwa.

36. Ka Mâ-a vâ na bâ, na, O vahaka li 'Mba ni, Mbi hak' inyěni nja 'lombo-ě?

37. Ka bâ-ba vâ na Mâ, na, Věķě hwě nana ho diyake, 'mbâkâ o 'nâ 'âvě eyomi, 'mbâkâ o en' 'âvě ya 'měngwě o ivenda jávě.

38. Ndi ka Jisus a vâ na bâ, na, Wa 'wě-ni eanyu e uwakě, o t' o yâlâķěni o mâtâni sěngě 'amě e mâtânâķě? na o baptaiswě na baptisma 'amě e ka baptaiswě?

39. Ka bâ-ba vâ na Mâ, na, Ho ka yâlěte. Ka Jisus a va na bâ, na, O ka mâtateni sěngě 'amě e mâtâķě mbambaye, na baptisma eamě e ka baptaiswě yâ tepě eanyu e ka baptaiswě:

40. Ndi, o diya o 'nâ 'amě eyomi, na o 'nâ 'amě ya 'mëngwě, e 'bě 'amě e věkě; nd' e ka věwi bâ-ba di yâ kenjwěngo.

41. Nd' o jom' i yoki yâ, ka bâ-ba yalě inumba iitě na Jemś na Jân.

42. Ndi ka Jisus a ndiya bâ, ka Mâ-a vâ na bâ, na, O yowuděteni na ba tēkudwě mepolo mea Jěntail ba pangakiyi bâ; na baněně ibabu ba pangakiya bâ na ngudi.

43. Nd' e diyake nonaně n' inyěni; ndi uěhěpi a ka vahě o diya uněně o inyěni o jadi, t' a ka diyi udili muanyu:

44. Ndi uanyu uěhěpi a ka vahě o diya o molo, t' a ka diyi uhayi mua běhěpi.

45. Pě lě Mwana-moto au vaka ka hadwě ndi ka hana, na ka vě eměná 'aju ivango ja baitě.

46. ¶ Ka ba pâ o Jěriko; o Mâ-a diya-kidi a vëngěmě o Jěriko na beyokwedi beaju na ebimba eněně, pâgu Bartimeus, mwana ua Timeus, a diyaki diya o pēpěkě ya njeya a jombanaka.

47. O mâ-a yoki na A Jisus ya Nazarěth, ka mâ-a yalě o yama, na, Jisus, Mwana David, yokakiya 'mba ngâtâ.

48. Ka bato baitě ba kandidě mâ nana

a diyake dâ, ndi ka mâ-a yama pě na-ngudi, na, Mwana-David, yokakiya 'mba ngâtâ.

49. Ka Jisus a tēmē de, ka Mâ-a vâ na a ndakudwě; ka bâ-ba ndiya pâgu tě, na bâ, na, Yěněkě mbya, umwaka; A ndakiya-nd' âvě.

50. Ka mâ-a 'hwa ngâi 'aju, ka mâ-a 'muwa nala Jisus a jadi.

51. Jisus a yavwanakindi ka Mâ-a vâ, na, O vahaka lě na Mbi hake âvě nja 'lo-mbo-e? .Ka pâgu ya vâ na má, na, Paia-o, mbi pahakiye iyěně.

52. Ka Jisus a vâ na mâ, na, Kěkě, ikamidě jâvě i yongiděnd' âvě. Ele-ngiaha tepě ka mâ-a pahiya iyěně, ka mâ-a vitaně Jisus o njeya.

KAPITA XI.

1. O bâ-ba bakamidi na Jěrusalēm, o Běthfaje na Běthane, o 'kodi mua Álive, ka Mâ-a loma beyokwedi beaju bebale.

2. Ka Mâ-a vâ na bâ, na, Kěkěni o ibâkâ i jad' o boho boanyu, o betakateni omě, o ka hunganandini o duwa mwana

buru tingamango, o moto a ha diyete; unjuwaki yâ ni, wa vanani.

3. Oningě moto a vâ n' inyëni, na, E lě nde eanyu e hakě ekae? o ka vâki, na, Upangiyi a na yâ na mala; vâkâna a hungani tepě o huludě yâ.

4. Ka bâ-ba vala, ka bâ-ba duwa mwana-buru tingamango piělě n' ubiyâ, o mani ma njeya, ka bâ-ba 'njuwâ yâ.

5. Bâkâ ba diyakid' omě tēmetēme, ka bâ-ba vâ, na, E lě nde eanyu e 'njuwakě mwana-buru?

6. Ka bâ-ba vâ na bâ ka Jisus a langwaki bâ; ka bâ-ba hulidě bâ.

7. Ka bâ-ba vana mwana-buru o Jisus a jadi, ka bâ-ba puga yâ ngâi jabu, ka Mâ-a diya o yâ.

8. Baitě ba wanjaka ngâi jabu o njeya; bâkâ ba lenaka paha ja bele, ba takidě ja o njeya.

9. Ba kěkid' o bohoboho, na ba vitakidě ka bâ-ba yama, na, Hosana, Ibâtâ na A vakě na dina ja Upangiyi.

10. Ibâtâ na ipangiya ja hangw' 'ahu David i vakě na dina ja Upangiyi, Hosana oba mětě.

11. Ka Jisus a pâkidi o Jěrusalēm, na o

těmpěl; o Mâ-a běkidi belombo beěhěpi hilěngo, ndi egombe ya kolo e ka vaka, ka Mâ-a vala o Běthane na jomu na babale.

12. ¶ Mwehe upâkwě o Mâ-a timbakidi oviya Běthane, ka Mâ-a yoka nja.

13. Ka Mâ-a yěně ele ya itâlâ yaviděngo e di na bekai, ka Mâ-a 'la ovoně n' ipě a ka duwandi elombo omě; o Mâ-a pākidi o tina, au duwaka elombo kabo bekai; 'kabajana egombe ya fig e diyakite e t' o pā.

14. Ka Jisus a vâ na yâ, na, Moto a je pě bebuma o âvě-o jadi oviya 'kava nala egombe yěhěpi. Ka beyokwedi beaju bea yoka yâ.

15. ¶ Ka bâ-ba pā o Jěrusalēm; ka Jisus a vala o těmpěl, ka Mâ-a yalě ipumě ja ba ma hambaka na ba hambakidě o těmpěl; A ka hovaka tagulu ja bapepengani ba dâlě na bediya bea ba ma hambakidě mbenga;

16. A bâbe na moto a pudunganake těmpěl na eva.

17. Ka Mâ-a yokudě bâ, na, E 'bě lě-ndwěngo, na, Ndabo 'amě e ka tubwi na betomba beěhěpi na Ndabo y' Ikaliya? ndi o pangindi yâ ni ndabo 'a meyibi.

18. Ka Balëndi na prist inënë ja yoka yâ, ba ka butaka nyang' 'abu e ka we-yanë Mâ; ba ma bangaki Mâ, 'kabojana ebimba yëhëpi e mamakindi iyokwanidi viaju.

19. O kolo e pâdi ka Mâ-a vëngëmë mboka tē.

20. ¶ N' ubwa, o bâ-ba diyaki ba tomba-ka, ka bâ-ba yënë ele ya itâlâ vivilaniyango 'viya metamba.

21. Ka Pitër a yongidë, ka mâ-a vâ na Mâ, na, Paia-o, yënëkëte ele ya fig eâvë e hâkâkidi e vivilaniyendi.

22. Jisus a yavwanaki ka Mâ-a vâ na bâ, na, Diyakani n' ikamidë o Anyambë a jadi.

23. Ikabojana Mbi vâki n' inyëni mba-mbaye, na, A ka vâyë n' ukodi tēkamu, Vëngëmëkë, wa 'la ka kwa o manga, à bome penda n' ulema, ndi mâ-a kamakidi na belombo beaju be ma vâ be ka hamandi, a ka pahiyandi eaju e ka vâyë.

24. Ovanë nd' o 'mba-mbi vâkë n' inyëni, na, Belombo beanyu be uwakë, oni-ngë o kalakiyani, kamakidëni na o pahakiyandi beâ ni, vâkâna be ka diyandi o inyëni o jadi.

25. Oningě o jadini de o kalakiyani, iya-kiděni oningě o jadini na moto na 'lo-mbo; na ovaně nd' o Hangw' 'anyu a jad o Hěvën a ka 'yid' inyěni mabe manyu.

26. Nd' oningě ò 'yiděni, Hangwě 'anyu a jad o Hěvën à 'yide 'nyěni mabe manyu.

27. ¶ Ka bâ-ba pâ pě o Jěrusalēm; o Mâ-a diyakidi a tamwaka o těmpěl kakana ka prist ja meolo na Balěndi na batodu ba viya o Mâ-a jadi,

28. Ka bâ-ba vâ na Mâ, na, I lě nja ipanga ijâvě i hanakě belombo těkabe? Nja věkid' âvě ipanga těkadi o ha belombo těkabe?

29. Jisus a yavwanakindi ka Mâ-a vâ na bâ, na, Mbi ka uwa tepě inyěni ndaga pâkâ, wa yavwani 'Mba ni, vâkâna Mbi languwendi 'nyěni ipanga jamě i hanakě belombo těkabe.

30. Baptisma ya Jân e vakiyendi oviya Hěvën, ipě o bato ba jadi? yavwanaki 'Mba ni.

31. Ka bâ-ba hokolani bâ mětě na bâ mětě, na, Oningě hwa vâ, na, Oviya oba, A ka vwi, na, Nd' e lě nde 'anyu e ha kama-kidě Mâ?

32. Nd' oningě hwa vâ, na, Ya bato ;
ba bangaki bato, 'kabojana bēhēpi ba
ma yēnēki Jân na a ndi usâki mba-
mbaye.

33. Ba yavwanaki ka bâ-ba vâ na Jisus,
na, Hoa languwe, Jisus a yavwanaki
ka Mâ-a vâ na bâ, na, Mba languwe tepě
inyēni ipanga jamě i hanakě belombo
těkabe.

KAPITA XII.

1. Ka Mâ-a yalě na bâ na mekanakâdi.
Momo n' uhuhu a liyaki mwanga, ka mâ-a
lungidě muâ ugomba, ka mâ-a puduwa
ibabo vi hovakě ivě, ka mâ-a longa elongo,
ka mâ-a vě muâ baliyi, ka mâ-a vala o
ehe ya yaviděngo.

2. O hongodi ka mâ-a loma uhayi o
baliyi ba jadi nana a pahakiye bebuma bea
mwanga oviya baliyi ba jadi.

3. Ka bâ-ba bweya mâ, ka bâ-ba boma
mâ, ka bâ-ba timbě mâ naně.

4. Ka mâ-a loma pě bâ uhayi upâkwě ;
ka bâ-ba yanguwa mâ malale, ka bâ-ba
luma mâ o molo, ka bâ-ba timbě mâ yoki-
děngo ihâni.

5. Ka mâ-a loma pě upakwě, ka bâ-ba weya mâ na bapâkwě baitě; ba bomaka bâkâ, ba weyaka bâkâ.

6. A diyakite mwan' umbâkâ uaju a tâ-ndâkidi, ka mâ-a loma mâ na mbuhwěmbu-hwě tepě o bâ-ba jadi, na, Ba ka dili mwan' 'amě.

7. Ndi baliyi tēbaně ba kalaki bâ mětě na bâ mětě, na, Ekaně nd' ujigi; vakani, ho weyaki mâ ni, ovaně nd' ekuha e ka diyě ya bě 'ahu.

8. Ka bâ-ba bweya mâ, ka bâ-ba weya mâ, ka bâ-ba uhwa mâ o pěpěkě ya mwanga.

9. Ndi, upangiyi mua mwanga a ka ha lě na? A ka viyi ka jilidě baliyi, na mâ-a vě mwanga o bapâkwě.

10. O ha langeteni Ilěndwě tēkadi, Ilale ja balongi i kiyakidi ja bě ndi molo mu' itudúdu:

11. Ekavi vi diyaki ihadi vi' Upangiyi; viâ tepě vi mamanakwě o mihâ mahu?

12. Ba butakind' o bweya Mâ, ndi ba bangakindi ebimba; 'kabojana ba yěněki-ndi na, a kalaki o pěl' 'abu ukanakâdi tēmuně; ka bâ-ba dika Mâ, ka bâ-ba vala.

13. ¶ Ka bâ-ba loma Farisi na Hěrodian

n' ihuhu o Mâ-a jadi nana ba hilakě ndaga jaju..

14. O bâ-ba vakidi, ka bâ-ba vâ na Mâ, na, Uyokwidi, ho te yowěngo na O ndi pâ-kwěpâkwě, O 'bě tepě na moto n' isâlâ; na nâvě wa yěněkě tepě meoho mea bato pivi, nd' O yokwakidě njeya ya Anyambě na pâkwěpâkwě. E ndi hohonganěngo na ho vėkě Sisar pago, ipě e ibě ?

15. Ho vėkě, ipě hò vėkě ? Ka Mâ-a yowě inoka jabu, ka Mâ-a vâ na bâ, na, E lě nde 'anyu e yějěkiyě 'Mba ? Vanaki 'Mba ni fura, Mbi yěně yâ.

16. Ka bâ-ba vana yâ. Ka Mâ-a vâ na bâ, na, Ekamu uvela na dina be lě bea nja ? Ka bâ-ba vâ na Mâ, na, Bea Sisar.

17. Jisus a yavwanaki ka Mâ-a vâ na bâ, na, Vėkěni Sisar belombo be jadi beaju, o Anyambě be jadi ibeaju tepě. Ka bâ-ba mama na Mâ.

18. ¶ Ka Sajusi ja viya o Mâ-a jadi i vâkâ na o ibě na ipumbuwa ; ka bâ-ba uwa Mâ, na,

19. Uyokwidi, Mosěs a lěnděkiyi hwě, na, Oningě mwa-nyangwě na moto a wa, na mâ-a dika mwajo à dike bana, na mwana-

nyangwě a baki mwad' 'aju, na mâ-a ka tēkidě mwana-nyangwě ibângâ.

20. Ba diyakindi nyangwě pākâ hěmbwě-di; ka ua bohoboho a ba mwajo, ka mâ-a wa à dike ibângâ.

21. Ka ua balalo a ba mâ, ka mâ-a wa, au dikaka tepě ibângâ; ka ua balalo nyanga tē.

22. Ka ua hěmbwědi a ba mâ, ba dike ibângâ; na mbuhwa ya bēhēpi ka mwajo a wa tepě.

23. Ndi o ipumbuwa, o bâ-ba ka pumbuwa, a ka diya lě mwad' 'a nja o bâ-ba jadi? 'kabojana bâ bēhēpi hěmbwědi te ba baki mâ.

24. Ndi Jisus a timbwanaki, ka Mâ-a vâ na bâ, na, Wa lemakěni, 'kabojana wa 'wěni Malěndwě tombe na ngudi ya Anyambě?

25. Ikabojana o bâ-ba ka pumbuwa oviya iwedo, ba baye, na bâ-ba banudwě; ndi ba ka diyandi ona enjěl i jad' o Hěvën.

26. O pělě 'a bawewe, nana ba ka pumbuwandī, o 'bēni langango o 'janganango-bo ya Mosēs nyanga ya Anyambě e kalaki na ju o ele, na, Umba ndi Anyambě ya Ebrahim, na Anyambě ya Aisak, na Anyambě ya Jekâb?

27. A 'bě Anyambě ya bawewe, ndi ya ba di mihâ. O dimbakiyandini n' iněně.

28. ¶ Ka ulěndi umbâkâ mâ-a viya, ka mâ-a yoka bâ-ba kalaka, ka mâ-a yěně na, A ma yavwani bâ bwamu, ka mâ-a uwa Mâ, na, Elekanako ya boboboho mět' e lě nde?

29. Ka Jisus a yavwani mâ, na, Elekanako ya bohoboho e ndi, na, Israēl, yokakani; Jěhova, Anyambě 'ahu u ndi umbâkâ Upangiyi.

30. Na, tândâkâ Jěhova Anyambě 'âvě n' ulema muâvě muěhěpi, n' ilina jâvě jěhěpi, n' ipikiliya jâvě jěhěpi, na ngud' 'âvě yěhěpi; elekanako ya bohoboho nd' ekae.

31. Ya babale e tepě ona 'kae, Tândâkâ bato bapâkwě ka 'vě mětě. O 'hě na 'lekanako epâkwě eněně wa na 'kabe.

32. Ka ulěndi mâ-a vâ na Mâ, na, Bwamu, Uyokwidě, o languwi pâkwěpâkwě; 'kabajana Anyambě e te yâkâ; o 'bě pě na epâkwě kabo yâ dipâ;

33. O tândâ Mâ n' ulema muěhěpi, n' ibweyidě jěhěpi, n' ilina jěhěpi, na ngudi yěhěpi, na o tândâ bato bapâkwě panika 'vě mětě, e ndi wa na bova bo ma tumbakwě na meambo meěhěpi.

34. O Jisus a yěni na a ma yavwani n'

iyowě, ka Mâ-a vâ na mâ, na, O 'be yavidě-ngo na ipangiya ja Anyambě. Oviya 'vaně o diye pě na moto a uwakě Mâ nyuwe.

35. ¶ O Jisus a diyakidi a yokwakidě o těmpěl ka Mâ-a yavwana bâ, na, Nd' e lě nde ya Balendi ba vâki na Kraist a ndi Mwana-David ?

36. David mâ mětě a vâkindi k' Ilina Iyamu a vâki na ju, na, Jěhova a vâki Upangiyi muamě, na, Diyaka 'vě o 'nâ 'amě eyomi, kabo 'Mba ta panga baloni bâvě ebo-nga 'vě e pitakiyě.

37. David mâ mětě a ma tubaki Mâ na Upangiyi, nd' a bě lě mwan' 'aju na ? Ka ebimba yěhěpi ya yoka Mâ a kalaka, na mbya.

38. ¶ Ka Mâ-a vâ na bâ n' iyokwanidi viaju, na, Kelevakani na Balěndi ba vahakě o tamwaka na ngâi iyaba na bâ-ba tândâkâ mahomwě o mahambanido,

39. Na bediya beněně o ndabo ja Anya-mbě, na loboko la betiyango o masango :

40. Ba pukulakě ndabo ja mealika, na bâ-ba ka temakidě bato na makaliya maya-ba ; ekaba ndi ba ka duwě ivomudwě iněně wa.

41. ¶ Ka Jisus a diya o pělě ya egala ya

ungumba, a yěněkě ka bato ba kutwakidě hika o egala tě; ba diyakidi benami ba kutwakidi eitě.

42. Ka mwalika n' uhuhu, mâ-a viya oně u diyakidi sâmiyěngo, ka mâ-a kutudě mait ibale i weyakě farthing.

43. Ka Mâ-a ndiya beyokwedi beaju, ka Mâ-a vâ na bâ, na, Pâkwěpâkwě, Mbi vâki n' inyěni, na, Mwalika tě mua ukuge muně u ma vaměndi wa na bato běhěpi ba ma kutudě o 'gala-ya ungumba.

44. Ikabojana bâ běhěpi ba kutudi oviya bwinge boabu; ndi a kutwakiděndi oviya bonyamo boaju eaju yěhěpi e diyanakidi, eaju e ma bikinaka.

KAPITA XIII.

1. O Mâ-a diyakidi a pumaka těmpěl, ka eyokwedi 'aju yâkâ ya vâ na Mâ, na, Uyo-kwidi yěněkěte itingidi tě ja malale na ja ilongidi ekadi!

2. Jisus a yavwanaki, ka Mâ-a vâ na mâ, na, O yěněkěte ndabo t' iněně ekadi? wa dikan' okava ilale kahaniděngo n' ipâkwě i ka měndě i sajwe.

3. O Mâ-a diyakidi diya o ukodi mua Ālive, hohonganěngo na těmpěl, Pitěr na Jems na Jân na Andru ba uwaki Mâ ilimbo.

4. Langwakiya hwě egombe ya belombo těkabe e ka diyě? na e ka diya lě nja ndembo o belombo těkabe beěhěpi be ka timě?

5. Ka Jisus a yavwana A ka yalakě o vâ na bâ, na, Bandamakiděni o banga moto a temidě inyěni.

6. Ikabojana baitě ba ka viyi na dina jamě, na, Umba ndi Mâ, na bâ-ba ka temakidě baitě.

7. Ndi o inyěni-o ka yokěni beduka na sango ja beduka, o papolanakeni, 'kabojana belombo bea jângâ tědině be ka hamandi, ndi ihuku i ha pâyete.

8. Yeně 'tomba e ka yani na epâkwě, din' ipangiya na ipâkwě; he e ka ninganěndi o loboko lâkâ, mesalâķu na njuke be ka diyandi; ekabe ndi bea jali ja ngěbě.

9. ¶ Ndi kelevakani inyi mětě; 'kabojana ba ka kândândi 'nyěni o behoka; o ndabo ja Anyambě o ka bomwěndini; o ka vawwěndini o meoho mea mepangiysi na mepollo o nyang' 'amě, ilanguwa o pěl' 'abu.

10. Sango eyam' e ka tand' o hamana o betomba beěhěpi.

11. Nd' o bâ-ba ka valakidě 'nyěni, na bâ-ba kândâ tepě inyěni, o take o nakani eanyu e ka kalě, o pikilakiyeni tepě egombe e t' o pâ: ijanyu i ka vëwě o iwěla tēdině jā ndi 'janyu i ka kalě, 'kabojana ba 'bē inyěni o ka kala, ndi Ilina Iyamu.

12. Nandi vâkâna ba nyangwě pākâ ba ka kândânâkândi o iwedo, na ua hangwě na mwana; na bana ba ka 'mwanidēndi, na bâ-ba bēkēleniya ba jakidi bâ, na bâ-ba weyidě bâ.

13. O ka binwëndini na bato bēhēpi o nyanga ya dina jamě: nd' a ka lilimidě nal' ihuku, mâ t' a ka yongě.

14. ¶ Nd' o 'nyěni o ka yěněni elombo e binakwě y' ujilo (ya Danyěl usâki e kalakidi) de o yâ e ha lukakidi o tēmě (a langakě a bweyakidě) nandi ba jad' o Judia ba ka kweyaka o mekodi.

15. A ka diyě o ndabo oba a hubake pě o ndabo tombe o ngiya ovoně ka nāngâ elombo o ndabo 'aju.

16. A ka diyě o mwanga a timbake o bea mbuhwa ka nāngâ ngâi 'aju.

17. Ndi majili na ba ka diyě na me-mi, na ba ka diyě ba nyangakě o hwi tēdině!

18. Ndi kalakiyani na ikweya janyu i diyake o 'gombe y' ivěvu.

19. Ikabojana o hwi tēdině o ka diyi na etuniya e ha diyete oviya jali j' ivela j' Anyambě i velakidi na pā kya tēkaně, na yā ya diye pē.

20. Tepě kabo Upangiyi a vuvidě hwi tēdině, vākāna o 'bě na moto a ka yongwě; nd' o nyanga ya ba pānwěngo, ibaju ba di pānāngo, a vuvidi hwi.

21. Nandi oningě moto ka moto a vā n' inyěni, na, Yěněkěte, Kraist nd' ekaně; tombe, na, Yěněkěte, A nd' ovoně; o kama-kidi mā ni.

22. Ikabojana Kraist ja 'vela na basāki ba bojowa i ka pāndi, na j' i ka levidi ndembo na megoma be ka 'mbaki o kweyidě tombe na ba pānwěngo, e jaka na e ndi e hamaka.

23. Ndi kelevakani; yěněkěte, Mbi tind' o languwa 'nyěni belombo beēhēpi.

24. ¶ Oningě betuniya bea hwi tēdině tombango, joba i ka vindandi, ngāndě ya veye unanga muaju.

25. Nyětėti ja oba i ka kwandi, na ngudi i jad' oba i ka ninganaka.

26. Nandi vākāna ba yěnindi Mwana-

moto a vaka o bevindi na ngudi eněně n' ivenda.

27. Nandi vákâna a lomindi enjěl jaju, na bâ-ba ka yolakě ibaju ba pânwěngo oviya mahuku ma he manai, oviya pělě ya he ya bo na kwanga pělě ya bo ya oba.

28. Nandi yokwakani ukanakâdi mua 'le ya itâlâ; Oningě mekilibanjo meaju me ngite mebâbu, na me ka pumakě bekai, o yowuděteni na bokâ boa běndi piěle.

29. Yâ nyanga tě, te 'anyu o inyěni-o ka yěněni belombo těkabe be hamaka, yowakěni na ya bě ndi piěle, o mebiyâ.

30. Mbambayě, Mbi langwakiyandi 'nyěni, Igona těkadi ja tombe, belombo těkabe beěhěpi be t' o hama.

31. He na oba be ka tombandi, ndi ndaga jamě jà tombe.

32. ¶ Ndi buhwa těboně, n' iwěla tědině beà 'wane na moto, tombe na enjěl i jad' o Hěvěn, tombe na Mwana, ndi kabo Hangwě.

33. Kelevakani, pepwakani, kalakiyani tepě; 'kabojana wa 'wěni o egombe e ka pâyě.

34. Ikabojana Mwana-moto a ndi ona moto a vala o 'tomba ya yaviděngo, a di-

kakidi ndabo 'aju, ka mâ-a vë bahayi baju ipanga, moto uëhëpi eaju 'havu; ka mâ-a vâ na utatî mua ubiyâ na a pepwake.

35. Nandi pepwakani; 'kabojana wa 'wëni egombe ya upangiyi mua ndabo e ka payë, ipë na ba kolo, ipë na ba bulutema, ipë na ba yakako, ipë n' ubwa:

36. Banga a pâ matota, na mâ-a kâbidë 'nyëni o yakani.

37. Nyang' 'amë e vâkë n' inyëni, yâ te 'amë e vâkë na bëhëpi, na, Pepwakani.

KAPITA XIV.

1. Isango ja 'kunduwa na ja pëmbë e ha 'bë na ilanda i hakudwëndi hwi 'bale tombango; prist ja meolo na Balëndi ba ka vahaka ugono muabu u ka nângânë Mâ, na bâ-ba weya Mâ.

2. Ndi ba vâki, na, Hanga o buhwa boa isango, banga etoko ya bë o bato ba jadi.

3. ¶ O Mâ-a diyakid' o Bethane, o ndabo ya Saimôn, e diyaki na 'gâlani, o Mâ-a diyakidi a jaka, ka mwajo a viya omë na

'gala ya alabastěr ya mavulě ma kango ma spiknard ma tâ mětě, ka mâ-a dubu-wa 'gala, ka mâ-a hovidě mâ molo muaju.

4. Bâkâ ba diyakind' omě ba numbakindi bâ mětě na bâ mětě, na, Imbaniya tě ja mavulě ma kango ekama i hawudwě nande?

5. Ikabojana ma ma diyate ma hambakudwě wa na kama ja fura ilalo na já-ja věwě mekuge. Ba ka hěnjěkě mâ.

6. Ka Jisus a vâ, na, Dikaki mâ ni mbwe; e lě nd' eanyu e hakě mâ njuke? a hi 'Mba ehavu eyamu.

7. Ikabojana mekuge me i n' inyěni egombe yěhěpi, oningě o vahingěni o ka hati meâ ni bwam'; nd' o'běni n' Umba egombe yěhěpi.

8. A handi nyang' 'aju e ka yâlě; a viyendi pàni ka hiya mavulě o nyol' 'amě opěla itongwě.

9. Pâkwěpâkwě Mbi vâki n' inyěni, na, Iboko viěhěpi via sango t' eyam' ekaně vi ka hamanudwě o he těkaně yěhěpi, elombo tě eaju e di hango ekae, e ka langwěndi iyongidě jaju.

10. ¶ Ka Judas Iskariot, umbâkâ ua jomu na bebale, a vala o prist ja meolo i jadi ka kândâ Mâ o bâ-ba jadi.

11. Ba yěněki mbya o bâ-ba yokaki nonaně, ka bâ-ba yohaně mâ na ba ka vi mâ dâlě. Ka mâ-a vaha pěl' 'aju e ka kândâně Mâ swě.

12. ¶ Buhwa boa pěmbě e ha 'bě na ilanda boa bohoboho, o bâ-ba weyakiyedi ikunduwa, ka beyokwedi beaju bea vâ na Mâ, na, O vahaka lě na ho kěke ka kenjě iboko ovaně nd' Ávě o ka jě isango ja Iku-nduwa ove ?

13. Ka Mâ-a loma beyokwedi beaju bebale, ka Mâ-a vâ na bâ, na, Kěkěni o mboka, o ka latandi na moto ovoně bapěngo imâgi ja miba; vitaki mâ ni.

14. Iboko viaju vi ka ngiyě vâki na hangwě-ndabo, na, Uyokwidi a ma vwi, na, Ikenga ja bangi i l' ove o 'Mba-mbi ka jě isango ja bokundwaka na beyokwedi beamě?

15. A ka leviděndi 'nyěni ilika iněně oba, bonguěngo kenwěngo: kenjakeni o pěl' 'ahu ovoně.

16. Ka beyokwedi beaju bea kěkě ka bâ-ba vala o mboka, ka bâ-ba kâbidě ka Mâ-a vâki na bâ; ka bâ-ba kenjě isango.

17. O yâ e diyaki kolo ka Mâ-a viya na jomu na bebale.

18. O bâ-ba diyakidi diya, ba jaka, ka

Jisus a vâ, na, Pâkwěpâkwě, Mbi vâki n' inyëni, na, Umbâkâ ua njamb' 'anyu a jaka n' Umba a ka kândi 'Mba.

19. Ka bâ-ba yalě ngěbě, na vâ na Mâ umbâkâ umbâkâ, na, A nd' umba? upâ-kwě, na, A i 'inba?

20. Ka Mâ-a timbwana na vâ na bâ, na, A ndi ua njamba ya jomu na bebale, a dubakě n' Umba o 'pělě-bwalo.

21. Mwana-moto a 'landi, ka yâ e di lëndwěngo o pěl' 'aju, ndi maguga na moto tē ua Mwana-moto a ka kândwě, bwamu ndi na moto tēnē t' au jakwě.

22. ¶ O bâ-ba yalakidě ija, ka Jisus a nângâ pěmbě, ka Mâ-a vambiya ibâtâ, ka Mâ-a pěhě yâ, ka Mâ-a vě bâ yâ, na, Nângâ-kâni, jakani, nyalo 'amě nd' ekaně.

23. O Mâ-a běkidi akeva věngo, ka Mâ-a nângâ sěngě, ka Mâ-a vě bâ yâ: ka bâ bēhēpi ba mâtānidě.

24. Ka Mâ-a vâ na bâ, na, Makiya mamě nd' ekama ma panga ya kya ma hovi-yedi o pělě 'a baitě.

25. Mbambayě mětě, Mba mâte pě bebu-ma bea ukâdi epâkwě njo, kabo o buhwa boamě bo ka mâtě bea bea kya o ipangiya j' Anyambě.

26. ¶ O bâ-ba běkidi viembo tumbuděngo, ka bâ-ba puma nala o 'kodi mua Ālive.

27. Ka Jisus a vâ na bâ, na, Inyěni běhěpi o ka kâbândini o nyang' 'amě na bulu těkabo, 'kabajana e lëndwěngo, na, Mbi ka bweyandi utati na medâmbě mea pajangana.

28. Nd' o 'Mba-mbi ka pumbuwě, Mbi ka 'land o Galili o bohoboko.

29. Ndi ka Pitěr a vâ na Mâ, na, Tombe-kete běhěpi ba kâbâte, ndi mba yâlě.

30. Ka Jisus a vâ na Mâ, na, Mbambai, Mbi vâki na nâvě, na, O buhwa těkabo, mětě bulu těkabo, na kuba na kâkâlâkâ nj' ibale, o ka hâhiyi 'Mba nj' ilalo.

31. Ka mâ-a kala pě nangudi, na, Oningě mba wa na nâvě, mba hâhiy' Āvě na vilolombo. Yâ nyanga tě te ya běhěpi e vâkidi.

32. Ka bâ-ba pâ o mwanga u ma tubakwě na Gěthsěmane, ka Mâ-a vâ na beyokwedi beaju, na, Diyakani okava ulingo muamě u kalakiyě.

33. Ka Mâ-a nângâ Pitěr na Jems na Jân, ka Mâ-a yalě imama nangudi, na nyolo vâhâ mětě;

34. Ka Mâ-a vâ na bâ, na Ilina jamě i

yěněkě ngěbě eněně piěle na iwedo ; vengakiděni, pepwakani.

35. Ka Mâ-a piya kwěi, ka Mâ-a kwa o he, ka Mâ-a kaliya nana iwěla i tombake Mâ, oningě na e te e hamakě.

36. Ka Mâ-a vâ, na, Abba, Paia, belombo beěhěpi be ka hamate Ávě o jadi ; věngěkidě 'Mba sěngě ya kâpi ekaně ; ndi hanga nyang' 'amě e vahakě, ndi ka 'vě o pangakě.

37. Ka Mâ-a viya, ka Mâ-a kâbidě bâ-ba yaka viyâ, ka Mâ-a vâ na Pitě, na, Saimon, o yaka tepě ? Wa yâlě o pepuwa iwěla jâkâ ?

38. Pepwakani, o ka kalakiyani, o banga wa ngiyani iyějudwě. Ilina mětě i kokěngo, ndi nyolo e ibě na ngudi.

39. Ka Mâ-a vala pě, ka Mâ-a kaliya, A ka kalaka jâ ndaga tě tě.

40. O Mâ-a timbakidi, ka Mâ-a kâbidě pě bâ ba yaka viyâ ('kabojana mihâ mabu ma diyaki bodilo) na bâ-bu yowakě tepě eabu e ka yavwaně Mâ.

41. Ka Mâ-a 'la pě njo ilalo, ka Mâ-a vâ na bâ, na, Yakani nandi, yâjâkâni ; ya bě ndi twětwě, iwěla i pândi ; umbwakiyateni, Mwana-moto a kândudwěndi o benâ bea bato babe.

42. Umwakani, ho kekeni; umbwakiyani, a kândâkě 'Mba a bě ndi piělě.

43. ¶ O Mâ-a diyakidi a kalaka, elěngiaha tepě ka Judas a viya, ua njamba ya jomu na babale, ebumbu eněně e diyaki na ju na mekwala na metumbe, ba viya o prist ja meolo na balěndi na batodu.

44. A kândâkiyi Mâ a věki bâ nde-mbo, na, Uamě a ka pyâpyě, Mâ ndi Mâně; bweyaki Mâ ni, ka valanaki Mâ ni na bokeli.

45. O mâ-a pâkidi, ka mâ-a paniya o vala bokěkě o Mâ-a jadi, ka mâ-a vâ, na, Paia-o! Paia-o!; ka mâ-a pyâpyâ Mâ.

46. ¶ Ka bâ-ba nangidě makadu o Mâ-a jadi, ka bâ-ba bweya Mâ.

47. Umbâkâ ua njamb' 'abu a diyakidi bakamango, ka mâ-a hoduwa ukwala, ka mâ-a koka uhayi mua prist eněně, ka mâ-a leniya ditâ jaju.

48. Ka Jisus a vâ na bâ, na, O ma viya-ndini o 'Mba-mbi jadi, ona mwibi, na mekwala na beposa ka nângâ 'Mba?

49. Mbi diyakindi buhwa boěhěpi n' inyěni o ndabo ya Anyambě Mbi yokwakidě, o bweyi 'Mba ni; ndi Malěndwě ma ka timwě.

50. Ka bâ bēhēpi ba dika Mâ, ka bâ-ba kweya.

51. K' iwanja n' ihuhu ja vitaně Mâ, unamba mu' ivěla pugang' o nyolo; ka mawanja ma bweya mâ;

52. Ka mâ-a dika unamba mu' ivěla, ka mâ-a kweya na bâ uhamba.

53. ¶ Ka bâ-ba valana Jisus o prist eněně e jadi; prist iněně na batodu na balěndi ba yolanakiděndi o mâ-a jadi.

54. Ka Pitěr a vitaně Mâ yaviděngo, kwanga nala ikenga ja prist eněně; ka mâ-a diya na benami, a yokaka vey.

55. Ka prist iněně na ba ehoka bēhēpi ba butaka ndaga ja bovelaka opěla Jisus ijabu i ka weyaně Mâ; ndi bu duwaka.

56. Ikabojana bato baitě ba pakwaki bea bojowa o pěl' 'aju, ndi mepako meabu meu hohonganakě.

57. Ka bato bâkà ba tēmě ka veliya o pěl' 'aju, na,

58. Ho yokaki Mâ-a vâkâ, na, Těmpěl tě e longakudwě na benâ ekaně, Mbi ka buludi yâ, ndi na hwi 'lalo vâkâna Mbi longi pě 'pâkwě e longwě na benâ.

59. Ndi tombe kakana mepako meabu meu hohonganakě.

60. Ka prist eněně ya těmě o hanganě, ka mâ-a uwa Jisus, na, Wa timbwanaka elombo? E lě nde ya ekaba e pakwaka opěl' Ávě?

61. Ka Mâ-a diya dâ, Au yavwanaka 'lombo. Ka prist eněně ya uwa pě Mâ, na mâ, na, Ávě ndi Kraist mwana w' Ibâtâ?

62. Ka Jisus a vâ, na, Umb' i Mâ; tepě, o ka yěněndini Mwana-moto diyango o 'nâ eyomi ya ngudi, A vaka na bevindi bea oba.

63. Jâ ndi ja prist eněně ja nya ngâi jaju, na, Ho lě pi na nja mal'-ě ma tali?

64. O yokindini ikila jaju j' Anyambě; o yěněkě li na? Ka bâ běhěpi ba hubě Mâ na A n' inyanga n' iwedo.

65. Ka bâkâ ba yalě Mâ ituwa ja malě, na diba boho boaju, na bâ-ba ka bweyaka Mâ bebodi, na o vâ na Mâ, na, Sâkâkâ; bahayi tepě ba ka bweyaka Mâ mabanjo.

66. ¶ O Pitěr a diyakidi o ikenga o he, k' umbâkâ ua lotângâ la prist eněně mâ-a viya;

67. Ka mâ-a yěně Pitěr a lâlâkâ veyâ, ka mâ-a tamuwa mâ, na, Ávě tepě o diyaki na Jisus ya Nazarěth.

68. Ka mâ-a hâhâ, na, Mba 'wě, n' umbâ.

mba bweyakidě tepě ka 'vě o vâkě. Ka mâ-a vala o 'lěmbě; ka kuba ya kâkâlâ.

69. Ka itângâ ja yěně pě mâ, ka jâ-ja yalě o vâ na ba diyaki tēmetēme, na, Ekaně nd' uabu.

70. Ka mâ-a hâhâ pě. Kwěi, ka ba diyaki tēmetēme ba vâ pě na Pitěr, na, Mba-mbayě, âvě nd' uabu; 'kabojana o ndi ua Galili, na mbâhi 'âvě tepě e kwanakandi.

71. Ka mâ-a yalě o kila na o kana, na, Mba 'wě moto t' uanyu a vâkě ně.

72. Ka kuba ja kâkâlâ njo y' ibale. Ka Pitěr a yongidě ndaga ya Jisus e vâki na mâ, na, Kuba na kâkâkâlâ njo y' ibale, o ka hâhiyi 'Mba njo y' ilalo. O mâ-a bē-kidi nonaně pikiliyango, ka mâ-a e ya.

KAPITA XV.

1. N' ubwa, elěngiaha, ka prist iněně ja ha ehoka na batodu na balěndi na njamba yěhěpi, ka bâ-ba kata Jisus, ka bâ-ba 'la ka vě Mâ o Pailat a jadi.

2. Ka Pailat a uwa Mâ, na, Âvě nd' Upolo mua Jiu-e? A ka yavwanaka mâ ka Mâ-a va, na, O vâki yâ.

3. Ka prist iněně ba bakidě Mâ belombo beité; ndi A timbwane elombo.

4. Ka Pailat a uwa pě Mâ, na, Wa yavwanaka 'lombo? yěněkěte, belombo beité ibeabu be pakwakě opěl' âvě.

5. Ndi Jisus au timbwanaka pě elombo, ovaně nd' o Pailat a mamakindi.

6. Nandi o isango tědině a ma hulakidi bâ mbwedi pākâ eabu e jombakidi yěhěpi.

7. Nd' omě o diyakindi n' umbākâ a ma tubakwě na Barabas, a diyakidi katwěngo na ba logwakidi na mâ, ba diyakidi ba weyana n' ulogo.

8. Ka ebumbu ya yama nangudi, e ka yalakě o jomba mâ na a haka ka mâ-a hakě bâ mběmbě.

9. Ka Pailat a yavwana na bâ, na, O vahakandi 'mba ni mbi hulakidi 'nyěni Upolo mua Jiu-e?

10. Ikabojana a diyakite yowěngo na prist iněně ba věki Mâ n' ivina.

11. Ndi ka prist iněně ja hākâ ebimba nana a ta o huludě bâ Barabas.

12. Pailat a timbwanaki pě, ka mâ-a vâ na bâ, na, Nandi, o vahaka lě ni mbi haka uanyu a tubakě na Upolo mua Jiu na?

13. Ka bâ-ba yama pě, na, Kâmâkidě Mâ o krâs.

14. Jâ ndi ja Pailat ja vâ na bâ, na, Na nja 'lombo-ě, a ma ha lě nja bobe? Ka bâ-ba yama pě nangudi, na, Kâmâkidě Mâ o krâs.

15. ¶ Ndi Pailat a pangaka o hwěmidě ebimba melema, ka Mâ-a hulidě bâ Barabas, ka mâ-a vě Jisus, o mâ-a běki Mâ bomiděngo, ka weywě o krâs.

16. Ka sâjě ba valana Mâ o ikenga i tubakwě na Pritorium; ka bâ-ba ndiya njamba 'abu yěhěpi ta.

17. Ka bâ-ba bâtidě Mâ iveyu, ka bâ-ba longa korowa ya mayâ, ka bâ-ba bâtidě Mâ yâ,

18. Ka bâ-ba yalě Mâ ihoma, na, Mbolo, Upolo mua Jiu.

19. Ka bâ-ba bweya Mâ o molo n' utumbe, ka bâ-ba tuwa Mâ malě, ba kalakiya Mâ mabângâ humehume.

20. O bâ-ba běki Mâ věhěngo, ka bâ-ba věngidě Mâ ibâtâ iveyu, ka bâ-ba bâtidě Mâ ngâi jaju mětě, ka bâ-ba valana Mâ ka weywě o krâs.

21. Ka bâ-ba panga Saimon ua Sairini a tombakidi baka, a viya o 'hiki, hangwě

ya Alëxandër na Rufus, na a bapakě krás 'aju.

22. Ka bâ-ba valana Mâ o iboko via Golgotha vi jadi, na, oningě via 'ludwě, Iboko via Mbombo.

23. Ka bâ-ba vě Mâ ivě, hâbwěngo na myrrh: nd' au nângâkâ já.

24. O bâ-ba běki Mâ kâmiděngo o krás, ka bâ-ba kabaniya ngâi jaju, ba nângâkiyě já lât, ya moto uěhěpi e ka nângě.

25. E diyaki egombe ya mawěra ibuwa, ka bâ-ba kâmidě Mâ o krás.

26. Ka ilěndě ja ebuke 'aju i diyaki lěndwěngo oba, na, UPOLO MUA JIU.

27. Ba kâmâkidi na Ju meibi mebale; 'mbâkâ o 'nâ 'aju eyomi, 'mbâkâ o 'nâ ya 'měngwě.

28. Kâ Ilěndwě ja hohonganě i vâkě, na, A langakudwi na baweyi ba belekanako.

29. Ba ma tombaka baka ba ma kilaki Mâ, ba vugumakidě meolo meabu, na, Ěhě! Ávě o bulwakidě těmpěl na nâvě wa longa yâ na hwi 'lalo,

30. Yongakě nyolo 'ávě, na nâvě wa huba oviya krás.

31. Yâ nyanga tē te ya prist inēnē e vâkidi na balēndi bâ mētē na bâ mētē bovēhēkē, na, A ma yongaki bapâkwē; ndi A 'bē na ngudi e yongakē Mâ mētē.

32. Nandi, Kraist, Upolo mua Israēl, a hubake oviya krâs, ovanē nd' o ho ka yē-nē na hwē-hwa kamidē. Ba kâmâkudwē na Ju, ba ka timbakē Mâ ndaga tē.

33. O jâ i diyaki joba meolo ka ivititi ja diya o he yēhēpi kwanga nala mawēra malalo.

34. O mawēra malalo ka Jisus a yama na joyi oba, na, Ěloi, Ěloi, l' ma sabakthe-nai? Yenē ndi, oningē ya 'ludwē, na, Anyambē 'amē, Anyambē 'amē, e lē nde 'avē e senji 'Mba?

35. Bâkâ ba diyaki tēmetēme, o bâ-ba yoki nonanē, ka bâ-ba vâ, na, Umbwa-kiyate, A ndakiyandi Elaias.

36. K' umbâkâ a val' umbila, ka mâ-a londa nyândâ na vinigar, a ka kahakidē yâ o utumbe, ka mâ-a mâtidē Mâ, na, Dikaki Mâ ni mbwe; ho t' o yēnē. ipē Elaias a ka viyi ka hubē Mâ.

37. O Jisus a diyaki yamango joyi oba, ka Mâ-a dība.

38. Ka unamba unēnē mua tēmpēl mua

pěhěniyě bepěhi bebale oviya oba kwanga nala he.

39. ¶ O Sěnturiân e diyaki tēměngo hohonganěngo na Ju e yěněki Ma-a ya-maka na dibaka, a vâki, na, Mbambayě, moto těkaně a diyaki Mwana-Anyambě.

40. Bajo ba diyaki tepě ba hilakě na ma-sěyi, ibabu bâkâ ndi Meri Magdaline, na Meri nyangwě ya Jems ehâlě na Josěs, na Salome ;

41. (Ba vitakidi Mâ o Mâ-a diyakidi o Galili, na haya Mâ) na bajo bapâkwě baitě ba betaki na Ju o Jěrusalēm.

42. ¶ O kolo pâdi, 'kabojana bo diyakindi buhwa boa ikenjě, boně ndi, buhwa bo takě na Iyâjâ,

43. Josěf ya Arimathia, umbâkâ ua 'hoka na moto ua kuma eyam', a ma vengakidě tepě ipangiya ja Anyambě, ka mâ-a viya, ka mâ-a ngiya na evemba o Pailat a jadi, ka mâ-a jomba ekengo ya Jisus.

44. Ka Pailat a mama n' ipě A we pâni ; ka mâ-a ndiya ua sěnturiân ka mâ-a uwa mâ, na, ipě A bi na wa n' ukili.

45. O mâ-a yowudě na ua sěnturiân, ka mâ-a vě Josěf ekengo.

46. Ka mâ-a hamba mavěla mayamu, ka

mâ-a hubě Mâ, ka mâ-a dinga Mâ na mavêla tẽ, ka mâ-a nangidě Mâ o malonga ma pudwakudwě o malale, ka mâ-a vungulidě ilale o ubiyâ mua malonga.

47. Meñ Magdaline, na Meri nyangwě ya Josěs, ba yěně o Mâ-a nangudwě.

KAPITA XVI.

1. O Iyâjâ i bėkidi tombango, Meri Magdaline, na Meri nyangwě ya Jems, na Salome, ba diyaki ba hamba belombo bea kango beyamu, ovaně nd' o bâ-ba ka viya ka hiya Mâ beâ.

2. O buhwa boa wiki boa bohoboho, n' ubwa n' ubwa mětě, ba pâkind' o malonga, o 'gombe ya joba e pumakě.

3. Ka bâ-ba vâ bâ mětě na bâ mětě, na, Nja ka vungulidě hwě ilale oviya ubiyâ mua malonga?

4. O bâ-ba tamuvedi ka bâ-ba yěně na ilale i diyaki vungulidwěngo ('kabojana i diyakindi 'něně.)

5. Ka bâ-ba ngiya o malonga, ka bâ-ba yěně iwanja diyango o pělě eyomi pugango na ngâi 'tano eyaba; ka bâ-ba nyânyâviyě.

6. Ka mâ-a vâ na bâ, na, O nyânyâvâki-yeni: o butakandini Jisus ya Nazarëth, e weyakudwë o krâs: A pumbuwendi: A 'bë pë okava; yënëkëteni, iboko viabu vi ma nangidë Mâ.

7. Ndi valakani, langwakiyani beyokwedi beaju na Pitër, na, A valind' o boho n' inyëni o Galili, ovonë nd' o inyëni o ka yëni Mâ ni, ka Mâ-a vâki n' inyëni.

8. Ka bâ-ba puma bokweyaka oviya, malonga 'kabojana ba mamakindi, na bâ-ba ka likimaka; na bâ-ba vâkâ na moto te moto elombo; 'kabojana ba bangakindi.

9. ¶ Ndi o Jisus a pumbwakidi n' ubwa mua buhwa boa wiki boa bohoboho, A pumakiyendi o Meri Magdaline uaju a diyakite a pumë dëvil hëmbwëdi.

10. Ka mâ-a vala ka languwa ba diyakidi na mâ, o bâ-ba diyaki ba yënëkë ngëbë na bâ-ba e yaka.

11. O bâ-ba yoki na A bi mihâ, na na a yënëki Mâ, bu kamakidë.

12. ¶ Yenë tombango, ka Mâ-a pumiya pë itingidi ipâkwë o babale ibabu, o bâ-ba diyakidi ba tamwaka, ba këkë o 'hiki.

13. Ka bâ-ba 'la ka languwa yâ ba ma dikana; ndi bâ-bu kamakidë tepë bâ.

14. ¶ Kwěyi, ka Mâ-a pumiya o jom' n' umbâkâ o bâ-ba diyaki ba jaka, A ka hě-njěkě bâ o nyang' 'abu e ha 'bě na ikamidě, na melema mekolo, 'kabojana bu kamakidě ba yěněkiyi Mâ o Mâ-a diyaki pumbu-wango.

15. Ka Mâ-a vâ na bâ, na, Kěkěni o he yěhěpi, o ka pakwakiyani ekeha yěhěpi sango tě 'yam' ekaně.

16. A kamakidě, na mâ-a baptaiswě a ka yongwěndi; ndi a ha kamakidě a ka kwe-hwěndi.

17. Ndembo těkadi i ka vitani ba kamakidě; ba ka pumaki děvil na dina jamě; ba ka kali beemi bea kya;

18. Ba ka bweyi mbamba; oningě ba mâtâ elombo e weyanakě, ya kokidě bâ; ba ka nangidi mebědi makadu, na meâ mea diya upeha.

19. ¶ Nandi, o Upangiyi a běki na bâ nonaně kalango, ka Mâ-a nângwě o Hěvăn, ka Mâ-a diya o 'nâ y' Anyambě eyomi.

20. Ba kěkě, ka bâ-ba pakuwa o iboko viěhěpi, Upangiyi a haka na bâ, na Mâ-a sulakě ndaga na ndembo i benganakě. Aměn.

IHUKU.

o Bible Luke Benga '88

SANGO EYAMU

EA LUK E LĒNDĒKIDI.

THE GOSPEL ACCORDING TO
LUKE,

TRANSLATED INTO THE BENGAL LANGUAGE

BY THE LATE REV. T. S. OGDEN, REVISED AND WITH THE OTHER
GOSPELS HARMONIZED BY THE REV. R. H. NASSAU.

GABOON AND CORISCO MISSION, WEST AFRICA.

NEW YORK:
AMERICAN BIBLE SOCIETY,
INSTITUTED IN THE YEAR MDCCCLVI.

1881.

[Benga, 16mo.]

SANGO EYAMU

EA LUK E LĚNDĚKIDI.

KAPITA I.

1. O baitě ba nângidi na enâ itědě j' ipakuwa ja belombo tě be kamakudwě pâkwě-pâkwě o hwě-ho jadi,

2. Te pani ka bâ-ba bweyakidě hwě beâ, ba diyakidi oviya jali tali ja mihâ, na bahayi ba ndaga;

3. E yěněněki tepě bwam' o 'mba-mbi jadi, 'kabajana mbi jadi hânjâbiděngo ibweyidě ja belombo bečhěpi oviya jali mětě, ka lěndi y' âvě Tiâfîlus uyamu hohonganěngo,

4. Na ovaně nd' âvě-o ka yowě pâkwěpâkwě ea belombo tě ibeâvě be yokwakudwě ekabe.

5. O diyaki na prist pâkâ, o hwi ja Hěrod y' upolo mua Judia, dina na Sakaraias, na njamba ea Abaia: mwad' 'aju a diyakindi ua bana ba Erân, dina jaju i diyakindi Ilisebět.

6. Na bâ babale ba diyaki bayam' o boho boa Anyambě, ba tamwaka na belekanako na sale ja Upangiyi jěhěpi ba diye na njěnji.

7. Bu diyaka na mwana, 'kabojana Ilisebět a diyakindi ekomba; na bâ běhěpi ba diyakindi batodu.

8. E diyakindi, o mâ-a haki ebano 'aju ya prist o boho boa Anyambě hohonganěngo na njamb' 'aju,

9. Hohonganěngo na ihadi via ebano ya prist mběi 'aju e diyakindi itumba ja uyâmbâ o mâ-a ngakiyedi o těmpěl ya Upangiyi.

10. Ka ebimba ya bato yěhěpi ya diya e kalakiya o bwebwe o 'gombe y' uyâmbâ.

11. Ka enjěl ya Upangiyi ya 'pumiya mâ tēměngo o pělě 'a 'nâ 'yomi ya âlta y' uyâmbâ.

12. O Sakaraias a yěni mâ, a yěněki njuke, ka jângâ ja bweya mâ.

13. Ndi enjěl e vâki na ju, na, O bangake, Sakaraias: ikabojana ikaliya jâvě i yokani-ndi; na mwad' 'âvě Ilisebět a ka jand' âvě mwa' momo, na nâvě oa vangidě mâ dina jaju na Jân.

14. O ka diyi na mbya n' upeyo; baitě ba ka peyandi n' ijawě jaju.

15. Ikabojana a ka diyi boněně o boho boa Upangiyi, a mâte ivě na ba maku makolo; a ka diyi londango n' Ilina Iyam', oviya ihuhu ja nyangwě.

16. A ka 'ludi bana ba Isreël baitě o Upangiyi Anyambě 'abu a jadi.

17. A ka 'land' o boho boaju n' ilina na ngudi ya Ilaias, ka 'ludě melema mea ba hangwě o bana ba jadi, na ba ha yokakiya o iyowě ja hohonganěngo; ka kenjě bato kokěngo na Upangiyi.

18. Ka Sakaraias a vâ na enjěl, na, Mbi ka yowě lě ekae na ove? 'kabojana mba běndi utodu na mwad' 'amě a toduwendi na hwi jaju.

19. Ka enjěl ya yavwana ka mâ-a vâ na ju, na, Umba ndi Gebriël e tēměkě o pwanja ya Anyambě; mbi ma lomwi ka kala na nâvē, na ka levid' âvē sango t' iyam' ekadi.

20. Ndi, hilakěte, o ka diyandi emukumuku, o diye na ngudi ya kala, kabo buhwa boa belombo těkabe bo ka hamě, 'kabojana ou kamidě ndaga jamě, i ka hamě o 'gombe 'abu.

21. Ka bato ba venga Sakaraias, ba ka mamaka eaju e bembanakidi o těmpěl.

22. O má-a pumidi, a yálě o kala na bâ: ka bâ-ba yowě na a yěnindi ehihila o těmpěl; ikabojana a pěpěkidi bâ, na a kale.

23. E diyakindi, o hwi ja ehavu 'aju i diyakidi i makiyate, ka má-a timba o ndabo 'aju mětě.

24. Hwi tēdině kělěbě ka mwad' 'aju Ilisebět a kaha, ka má-a kutamiya ngândě itano, na,

25. Kakana ndi ka Upangiyi a hadi n' umba o hwi jaju i 'mbuwi 'mba, ivě-ngidě j' ihubiya jamě o bato ba jadi.

26. ¶ O ngândě y' utoba ka enjěl Gabriěl ya lomwě oviya Anyambě a jadi o mboka ya Galili, dina, na, Nasarět,

27. O itângâ ja ndabo ya Devid i jadi, i diyakidi nyimwěngo na momo dina ja Josěf; dina j' itângâ i diyaki na Meri.

28. Ka enjěl ya pâ o j' i jadi, na vâ, na, Mbolo, âvě o jadi hekudwěngo nangu-di, Upangiyi a na nâvě: o n' ibâtâ o bajo ba jadi.

29. O j' i yěni má, ka já-ja yěně njuko na ndaga jaju, ka má-a pikiliya na jángâ tě ja mbolo ekadi i ka diya lě na.

30. Ka enjěl ya vâ na já, na, O banga-

ke, Meri: 'kabojana o duwindi ehekwě o Anyambě a jadi.

31. Ndi hilakěte, o ka kahandi jemi, na năvē oa ja mwa' momo, o ka vangakidě dina jaju, na, JISUS.

32. A ka diyandi boněně, a ka tubwi, na, Mwana ua A did' oba mětě; Upangiyi Anyambě a ka vi mâ eka ya hangwě Devid:

33. A ka pangiyi ndabo ya Jekab ego-mbe yěhěpi; ipangiya jaju ja diye n' ihuku.

34. Já ndi ja Meri ja vá na enjěl, na, Ekae e ka diya lě na, o mbi ha yowěte momo?

35. Ka enjěl ya yawwana ka yâ-ya vá na ju, na, Ilina Iyam' i ka pândi ávě-o jadi, na ngudi ya A did' oba mětě e ka pugand' ávě: ovaně nd' o elombo tě ya holi eávě e ka jayě yeně e ka tubwi, na, Mwana ua Anyambě.

36. Ndi hilakěte, mwan' 'a 'kad' 'ávě Ilisebět, a kahindi mwa' momo o utodu muaju; ekaně ndi ngândě y' utoba na a ma tubakwě na ekomba.

37. Ikabojana o' 'bě na 'lombo e ka mě-ndě e hame na Anyambě.

38. Ka Meri a vâ, na, Hilakête uhayi mua Upangiyi mua mwajo; e diyake n' umba hohonganengo na ndaga 'vê. Ka enjël ya vëngëmë o mâ-a diyakidi.

39. ¶ O jâ hwi tedinë ndi ja Meri i umwakidi, ka mâ-a hadividë o vala o 'hiki y' ukodi, o mboka ya Juda;

40. Ka mâ-a ngiya o ndabo ya Sakaraias, ka mâ-a homa Ilisebët.

41. E diyakindi, o Ilisebët a yoki ihoma ja Meri, ukêkë u ka sodaka mâ o ihuhu; ka Ilisebët a londa na Ilina Iyamu.

42. Ka mâ-a kala na joi kehëngo, na vâ, na, O n' ibâtâ o bajo ba jadi, ibâtâ na ebuma e jad' o ihuhu jâvë.

43. Ekae e viye lë 'mba na ove, ya nyangwë y' Upangiyi muamë e pâdi o 'mba-mbi jadi ekae?

44. Ikabojana hilakête, joi ja mbolo 'âvë ja bête i yokanaka o matâ mamë, ukêkë u ka sodaka 'mba o ihuhu na mbya.

45. Ibâtâ na mâ-a kamakidë: 'kabojana ihama ja belombo tē i ka diyandi be langwakudwë mâ oviya Anyambë a jadi.

46. Ka Meri a vâ, na, Ilina jamë i kenakë Upangiyi,

47. N' ilina jamě i peyaki na Anyambě Uhungini muamě.

48. Ikabojana A tanginindi ihubiya j' uhayi muaju mua mwajo: 'kabojana, hila-kěte, oviya okava magona mēhēpi ma ka tubě 'mba, na, ibâtā.

49. Jambojana A di na ngudi A 'mba hango belombo beněně; na dina jaju i ndi holi.

50. Ngâtā 'aju e nd' o ba bangakě Mâ oviya mbamba nala mbamba.

51. A levidi ngudi na enâ 'aju; A vanjananiděndi b' iduba na iyebiyedi via melema meabu.

52. A hubidi ba ngudi oviya bediya beabu, ka mâ-a betidě ba hubiyango.

53. A vulidi ba nja na belombo beyam'; A timbakě benami naně.

54. A hanindi uhayi muaju Isreěl, iyo-ngidě ja ngâtā 'aju;

55. Ka Mâ-a kalaki na ba hangwě bahu, na Ebrahim, n' ibângā jaju egombe yēhēpi.

56. Ka Meri a diya na mâ ba ngândě ilalo, ka mâ-a timba o ndabo 'aju mětě.

57. ¶ Nandi egombe ya Ilisebět y' ijadi ya hohonganěngo e diyaki ya pâ; ka mâ-a ja mwa' momo.

58. Ka ba ma bakaka na mâ, na bana ba 'kadi baju ba yoka nyanga ya Upangiyi e levakidě mâ ngâtâ 'aju 'nënë; ka bâ ba peya na mâ.

59. E diyakindi, o buhwa boa lowambi, ka bâ-ba pâ ka hěbě mwana; ka bâ-ba vangidě mâ dina ja hangwě, na, Sakaraias.

60. Ka nyangwě a yavwana ka mâ-a vâ, na, Hanga nonaně; ndi a ka tubwi, na, Jân.

61. Ka bâ-ba vâ na ju, na, O 'bě na ija-wě jâvě i di vangamango dina těkadi.

62. Ka bâ-ba ha hangwě ndembo, na, a vahaka lě mâ a tubakwě na.

63. Ka mâ-a uwa elombo e lënděnkwe, ka mâ-a lëndě, na, Dina jaju ndi Jân. Ka bâ běhěpi ba mama.

64. Ka udumbu muaju mu-a bumuwa o mbenjě pâkâ, ka emi 'aju ya hulama, ka mâ-a kala, ka mâ-a bendě Anyambě.

65. Ka jângâ ja bweya ba diyakidi ulwaniděngo běhěpi: k' ivâdi těkadi jěhěpi ja hamana o 'hiki y' ukodi ya Judia yěhěpi.

66. Ba yokaki jâ běhěpi ba nangakidi jâ o melema meabu, na, Mwa tēkaně a ka diya lě nja jângâ-ě! Enâ ya Upangiyi e diyaki na mâ.

67. ¶ Ka hangwě Sakaraias a londa n' Ilina Iyamu, ka mâ-a sâkâ, na,

68. Ibâtâ na Upangiyi Anyambě ya Isreël; ikabojana a lumbiyendi, ka Mâ-a vanguwa bato baju,

69. A umudi hwě ibomba j' iyonga o ndabo y' uhayi muaju David;

70. Pani-ka Mâ-a kalakidi n' udumbu mua basâki baju ba holi, ba diyakidi oviya jali ja he:

71. Na ovaně nd' o hwě-ho ka yongě oviya ndoba jahu, na oviya enâ ya ba lonakě hwě bēhēpi;

72. Ihaya ja ngâtâ e yohanakudwě ba hangwě bahu, na o iyongidě ja panga 'aju e di holi;

73. Ikana jaju i kanaki na hangw' 'ahu Ebrahim,

74. Na, A ka vi hwě, oningě hwě vë-ngēmēngo o 'nâ ya ndoba jahu, ho ka hakiya Mâ ho bange,

75. Na holi na bwam' o boho boaju, hwi ja emēnâ 'ahu jēhēpi.

76. Na nâvē mwana, o ka tubwi, na, usâki mua A did' oba mētě: 'kabojana o ka 'landi o boho boa Upangiyi ikenjě ja njeya jaju;

77. Ivě ja bato baju iyowě j' iyonga na ivěngidě ja bobe boabu,

78. Na ngâtâ ya Anyambě 'ahu ebâbu ; yâ ndi ya majenjina ma buhwa e lumbi hwě oviya 'ba,

79. Ivě ja ba didi o ivitit' na 'dingihě y' iwedo bwe, itumbwana ja matambi mahu o njeya ya jonga.

80. Ka mwana a tombuwa, a ka yâdâ-kiyě n' ilina, a diyakind' o nginga kab' o buhwa boaju bo levakudwě Isreěl.

KAPITA II.

1. E diyakindi o hwi tēdině, ka eleka-nako ya viya oviya Sisa Augustus a jadi, na, he yěhěpi e langakwe tango.

2. Tango tēkaně e takind' o hawě o 'gombe ya Sairinius e diyakidi gâven ya Siria.

3. Ka bēhěpi ba 'la ka langwě, moto uě-hěpi o mboka 'aju mětě.

4. Ka Josěf a viya o Galili, o mboka ya Nasarēt, na 'la o Judia, o mboka ya David, e tubakwě, na, Bětlihěm, (ikabojana a diyakindi ua ndabo na diyâ ja David,)

5. Ka langwě na mwad' 'aju a dīyaki nyi-mango, Meri, a bě boněně na mwana.

6. E diyakindi, o bâ-ba diyakid' omě, ka hwi j' ijadi ja maya.

7. Ka mâ-a ja njad' 'aju ya momo, ka mâ-a dinga mâ menamba bodingaka, ka mâ-a nangidě mâ o ilika via honji; 'kabojana bu diyaka na iboko o ndabo 'a bangi.

8. O yâ 'hiki tě o diyaki na batati ba me-dâmbě ba diyaka o 'hiki, ba tataka meanga meabu na bulu.

9. Na umbwakiyate, enjěl ya Upangiyi ya viya o bâ-ba jadi, ka ivenda ja Upangiyi ja panya ulwaniděngo o bâ-ba jadi, ka bâ-ba banga nangudi.

10. Ka enjěl ya vâ na bâ, na, O bangakeni: 'kabojana mbi vanindi inyěni sango eyam' ya mbya 'něně, e ka diyě ya bato běhěpi.

11. Ikabojana A ndi jawěngo inyěni o buhwa těkabo o mboka ya David, Uhungini, a jadi Kraist Upangiyi.

12. Ndembo e ka diyě o inyěni-o jadi nd' ekaně; O ka kâbiděndini ukěkě dingwěngo na menamba, bya o ilika via honji.

13. O mbenjě pākâ ndumba ya ebumbu ya oba ba bě na enjěl, ba bendakě Anya-mbě, na,

14. Ivenda na Anyambě oba mětě, o he jonga, upango uyamu na bato.

15. ¶ E diyakindi, o enjěl i diyakidi i kěkětě oviya o bâ-ba jadi na 'la oba, ka batati ba medâmbě ba vâ bâ mětě na bâ mětě, na, Ho t' o valani o Bětlihěm, ka yěně elo-mbo tě e di hamango, ya Anyambě e di hwě yowuděngo.

16. Ka bâ-ba hungana o pâ, ka bâ-ba kâ-bidě Meri na Josěf, n' ukěkě bya o ilika via honji.

17. O bâ-ba yěnidi, ka bâ-ba yowudě ilango tě i langwakudwě bâ o pělě 'a mwa těkaně.

18. Ba yokaki běhěpi ba mamakindi belombo tě bea batati ba medâmbě be langwakiyi bâ.

19. Ndi Meri a tataki belombo těkabe beěhěpi, na mâ-a pikilakiya *beâ* n' ulema muaju.

20. Ka batati ba medâmbě ba timbanidě, ba kěkě ba věkě Anyambě ivenda n' ibendě o pělě 'a belombo beabu be yokakidi n' ibeabu be yěněkidi beěhěpi, hohonganěngo na nyanga e langwakudwě bâ.

21. ¶ O hwi logwambi i hânjâbiyedi j' ihěbě ja mwana, a vangakudwi dina, na,

JISUS, dina ja enjël i vangakidě mâ ovaně a t' o kaḥwě jemi.

22. O hwi jaju j' ibonguwě hohonganěngo na elekanako ya Mosēs i hânjâbiyedi, ka bâ-ba vana mâ o Jëruselēm, ka levidě mâ Upangiyi;

23. (Pani ka yâ e di lëndwěngo o elekanako ya Upangiyi, na, Momo uěhěpi a bumwakidě ihuhu a ka tubwi, na, holi o Upangiyi A jadi;)

24. Na ka vē mwambo hohonganěngo na e di vānwěngo o elekanako ya Upangiyi, na, Lobembe lobale tombe bana ba mbe-nga babale.

25. Umbwakiyate, o diyaki na momo o Jëruselēm, dina, na, Simiān; momo tē a diyakindi ua hânjâbiyěngo uyam', a vengaka ipeyudwě ja Isreěl; Ilina Iyamu i diyaki na mâ.

26. E levakudwi mâ, n' Ilin' Iyamu na, a yěne iwedo, kabo a ta yěně Kraist ya Upangiyi.

27. Ka mâ-a pâ o tēmpěl n' Ilina Iyam': o hangwě na nyangwě ba vanidi ukěķě mua Jisus, ka ha yâ mběmbâ ya elekanako,

28. Ka mâ-a nāngâ mâ o benâ beaju, ka mâ-a bendě Anyambě, na,

29. Nandi Jěhova, hulwakidě uhayi muâ-
vě u kěķě na jonga, hohonganěngo na
ndaga 'vě :

30. Ikabojana mihâ mamě ma yěnindi
iyonga jâvě,

31. Ijâvě i kenjidě o boho boa bato
běhěpi ;

32. Bwe e panyakiye betomba bepâkwě,
na ivenda ja bato bâvě Isreěl.

33. Ka Josěf na nyangwě ba mama belo-
mbo tě be kalakudwě o pěl' 'aju.

34. Ka Simiân a vambiya bâ ibâtâ, ka
mâ-a vâ na nyangwě Meri, na, Hilakěte,
mwa těkaně a ndi tědwěngo o ikwa n' iumu-
wa ja baitě o Isreěl ; na ndembo e ka kala-
kudwě bobe ;

35. E, ukwala mu' ibâtâ u ka tubě tepě
ilina jâvě mětě ; na ovaně nd' o mapikiliya
ma melema meitě ma ka saliyě.

36. ¶ O diyaki na Ana pâkâ, usâki mua
mwajo, mwan' 'a Fanuěl, ua diyâ ja Asěr :
a diyakindi a bě utodu uitě, na mâ-a di-
yaki na momo mepuma hěmbwědi oviya
itângâ ;

37. A diyaki mwalika mabo ma mepuma
lowambi na mepuma menai, a věngěme
oviya těmpěl, ndi a ma dilakěndi Anyambě

na ihindina ja nja na makaliya bulu na mwehe.

38. O mâ-a ngiyedi o 'gombe tēnē ka mâ-a vē tepē Upangiyi akeva, ka mâ-a kala na ba diyakidi ba vahaka ivango o Jēruselēm bēhēpi o pēl' 'aju.

39. O bâ-ba hadi belombo beēhēpi hohonganēngo na elekanako ya Uyangiyi, ka bâ-ba timba o Galili, o mboka 'abu mētē Nasarēt.

40. Ka mwana A tombuwa, ka Mâ-a yâdiyē n' ilina, londango n' iyowē; na ehēkwē ya Anyambē e diyaki o Mâ-a jadi.

41. ¶ Nandi hangwē na nyangwē ba ma kēkēndi o Jēruselēm upuma k' upuma muēhēpi o isango j' Ikunduwa.

42. O Mâ-a diyakidi a bē jomu ja mepuma na mepuma mebale utodu, ka bâ-ba beta na 'la o Jēruselēm ibenga ja behadi be' isango.

43. O bâ-ba timakidē hwi tē, ka bâ-ba timba, ka etumbē ya Jisus ya dikana o mbuhwa o Jēruselēm; ndi Josēf na nyangwē bu yowakē yâ.

44. Ndi ba piviyaki na a t' o njamba, ka bâ-ba tamuwa ekēndā ya buhwa bâkā; ka

bâ-ba vaha Mâ o majawě mabu na o badiya babu ba jadi.

45. O bâ-ba ha duwaki Mâ, ka bâ-ba timba pě o Jěruselěm, ba kěķě ba vahaka Mâ.

46. E diyakindi, o hwi 'lalo ka bâ-ba duwa Mâ o těmpěl, diyang' o ibemba ja ba yokwidě, a yokolakidě bâ, na Mâ na uwaka bâ nyuwe.

47. Ba yokakidi běhěpi ba mamakindi ibweyidě n' iyavwanidi viaju.

48. O bâ-ba yěni Mâ, ka bâ-ba ma-ma: ka nyangwě a vâ na Ju, na, Mwana 'amě, o lě hwě hango kakana na? hila-kěte hwě na hângwě ho vahind' âvě na ngěbě.

49. Ka Mâ-a vâ na bâ, na, O ma vaha li 'Mba ni nande? oa 'wěni na Mbi vahakand' o diya o ehavu ya Paia?

50. Ndi bu bweyakidě ilango jaju i kalaki na bâ.

51. Ka Mâ-a huba na bâ, na 'la o Nasarět, a ma dilaki bâ: ndi nyangwě a ma tataki ndaga těkadi jěhěpi o ebumu-
lema 'aju.

52. Ka Jisus a tomuwa n' iyowě n' utě, n' itândě ja Anyambě na bato.

KAPITA III.

1. O upuma mua jomu na metano mu' ipangiya ja Taibirius Sisa, Pântius Pailat gâven ya Judia, Hěrod titrak ya Galili, mwana nyangwě Filip titrak ya Ituria n' indendandenda via Trakonaitis, Lisanias titrak ya Abilini,

2. Anas na Kaiafas prist ja meolo, ka ndaga ja Anyambě ja pâ o Jân mwana ua Sakaraias a jadi o nginga.

3. Ka mâ-a viya o indendandenda via Jâdan viěhěpi, a vaka a kalakiya baptisma y' iluwa ja melema o ivěngidě ja bobe;

4. Panika yâ di lěndwěngo o ejangana-ngobo ya ndaga j' usâki Iseas, na, Joyi j' umbâkâ i yamaka o nginga, na, Kenjakěni megâmbâ mea Jěhova, tēkiděni njeya jaju.

5. Itaba jěhěpi i ka londwěndi, ukodi na ekandangolo yěhěpi e ka hubudwěndi; bea lěngēměngo be ka tědwěndi, njeya ja potapota i ka pangwěndi věvėlě;

6. Mehoni meěhěpi me ka yěněndi iyo-nga ja Anyambě.

7. Ka mâ-a vâ na bebimba be vakidi ka baptaiswě na, mâ, na, A ! igona ja mbamba,

nja a kelevidě inyěni na kweyakiyani malingwa ma vakě?

8. Nandi lāngākāni bebuma be di lukango iluwa j' ulema, n' inyěni o yalakěni o vā o melema meanyu, na, Ho na hangw' *ahu* Ebrahim: ikabojana mbi vāki n' inyěni, na, Anyambě a te a yālākě o 'mudě malale tēkama ma bē bana ba Ebrahim.

9. Nandi ubāki u tepě nangudwěngo o tina ya bele: ovaně vākāna ele yēhēpi e ha lāngākā bebuma beyam' e kwělēkwēndi, na yā-y' uhwě o veyā.

10. Ka bato ba uwa mā, na, Ho hake lē nde?

11. A yavwanaki ka mā-a vā na bā, na, A di na ngāi 'bale, a kabake na a ha 'bē na; a di na beja, a haki tepě nyanga tē.

12. Ka bayoli pago ba viya ka baptai-swě, ka bā ba vā na ju, na, Paia, ho hake lē nde?

13. Ka mā-a vā na bā, na, O nāngākeni wa na nyanga 'anyu e di langudwěngo.

14. Ka sājě ja uwa tepě mā, na, Hwě ho hake lē nde? Ka mā-a vā na bā, na, O hakeni moto njuke, n' inyěni o bakana-kiděni *moto elombo* o naně, n' inyěni o ka diyaki hwěmiyěngo n' ivě janyu.

15. O bato ba diyaki n' ipepuwa, na bēhēpi ba diyaki ba pikilakiya o melema meabu o pēlē ya Jân, n' ipē mâ ndi Kraist, ipē a ibē ;

16. Jân a yavwanakindi ka mâ-a vâ na bâ bēhēpi, na, Pâkwēpâkwē mbi baptaisa-kandi inyēni na miba ; nd' Umbâkâ a di ngudi wa n' umba a vakandi, mbi 'bē weyango n' injuwa j' ukâdi mua makogo maju : Mâ nd' a ka baptaisē inyēni n' Ilina Iyamu na veyā :

17. A na epepa o 'nâ 'aju, A ka viyâ-ndi ndēk 'aju, na Mâ-a yolē hwit o ndabo 'aju ; nd' A ka dikidi behavu na veyā vi ha dimaka.

18. A kalakiyi bato belombo bepâkwē beitē bea ihâhâlidē jaju.

19. Nd' o mâ-a kandakidē Hērod titrak, o pēlē ya Hērodias mwad' 'a mwana-nyangwē Filip, na o pēlē ya mabe ma Hērod ma hakidi mēhēpi,

20. A badaki ekabo wa na meēhēpi, iva-mē ja Jân o ndabo 'a ntyogo.

21. E diyakindi, o bato bēhēpi ba diyaki baptaiswēngo, na Jisus tepē na baptisakwē A ka kalakiya, oba e dubwana-kiyendi,

22. Ilina Iyam' i hubakind' o Mâ-a jadi na ehini ya nyolo ka mbenga, ka joyi ja viya oviya 'ba, na, O Mwan' 'amě a tândâkě; o tândâkidi 'mba bwamu.

23. Jisus mětě a diyakindi a ka 'mba-ka o pâ mabo ma mepuma malalo uto-du, (pani ka yâ e piviyakudwě, na,) a diyaki mwan' 'a Josěf, a diyaki *mwan' 'a Hilai*,

24. A diyaki *mwan' 'a Matat*, a diyaki *mwan' 'a Livai*, a diyaki *mwan' 'a Mělkai*, a diyaki *mwan' 'a Jana*, a diyaki *mwan' 'a Josěf*,

25. A diyaki *mwan' 'a Matataias*, a diyaki *mwan' 'a Emăs*, a diyaki *mwan' 'a Neum*, a diyaki *mwan' 'a Eslai*, a diyaki *mwan' 'a Nagi*,

26. A diyaki *mwan' 'a Maat*, a diyaki *mwan' 'a Matataias*, a diyaki *mwan' 'a Sěmiai*, a diyaki *mwan' 'a Josěf*, a diyaki *mwan' 'a Juda*,

27. A diyaki *mwan' 'a Joana*, a diyaki *mwan' 'a Risa*, a diyaki *mwan' 'a Sorobaběl*, a diyaki *mwan' 'a Salatiěl*, a diyaki *mwan' 'a Nirai*,

28. A diyaki *mwan' 'a Mělkai*, a diyaki *mwan' 'a Adai*, a diyaki *mwan' 'a Kosam*,

a diyaki *mwan'* 'a Elmodam, a diyaki *mwan'* 'a Ĕr,

29. A diyaki *mwan'* 'a Josi, a diyaki *mwan'* 'a Eliisër, a diyaki *mwan'* 'a Jorim, a diyaki *mwan'* 'a Matat, a diyaki *mwan'* 'a Livai,

30. A diyaki *mwan'* 'a Simiân, a diyaki *mwan'* 'a Juda, a diyaki *mwan'* 'a Josëf, a diyaki *mwan'* 'a Jonan, a diyaki *mwan'* 'a Eliekim,

31. A diyaki *mwan'* 'a Milia, a diyaki *mwan'* 'a Minan, a diyaki *mwan'* 'a Matata, a diyaki *mwan'* 'a Netan, a diyaki *mwan'* 'a David.

32. A diyaki *mwan'* 'a Jësi, a diyaki *mwan'* 'a Obëd, a diyaki *mwan'* 'a Boos, a diyaki *mwan'* 'a Salmân, a diyaki *mwan'* 'a Neasân,

33. A diyaki *mwan'* 'a Aminadab, a diyaki *mwan'* 'a Eram, a diyaki *mwan'* 'a Esrâm, a diyaki *mwan'* 'a Ferës, a diyaki *mwan'* 'a Juda,

34. A diyaki *mwan'* 'a Jekâb, a diyaki *mwan'* 'a Aisak, a diyaki *mwan'* 'a Ebraham, a diyaki *mwan'* 'a Tera, a diyaki *mwan'* 'a Nekâr,

35. A diyaki *mwan'* 'a Seruk, a diyaki

mwan' 'a Regâ, a diyaki *mwan' 'a* Fêlêk, a diyaki *mwan' 'a* Hibir, a diyaki *mwan' 'a* Sala,

36. A diyaki *mwan' 'a* Kainan, a diyaki *mwan' 'a* Arfaksad, a diyaki *mwan' 'a* Syëm, a diyaki *mwan' 'a* Noi, a diyaki *mwan' 'a* Lemêk,

37. A diyaki *mwan' 'a* Matusela, a diyaki *mwan' 'a* Inâk, a diyaki *mwan' 'a* Jerêd, a diyaki *mwan' 'a* Malilil, a diyaki *mwan' 'a* Kainan,

38. A diyaki *mwan' 'a* Inâs, a diyaki *mwan' 'a* Sêt, a diyaki *mwan' 'a* Adam, a diyaki *mwan' 'a* Anyambê.

KAPITA IV.

1. Ka Jisus a viya oviya Jâdan ti na Ilina Iyamu, ka Mâ-a valanwê na Ilina o nginga,

2. A diyakindi mabo ma hwi manai A yêjêkudwê na dêvil. Au jaka o hwi tê-dinê: o jâ-i makiyedi, ka Mâ-a yoka nja.

3. Ka dêvil ya vâ na Ju, na, Oningê na o Mwana ua Anyambê, sombiyakê ilale tê-kadi na i diyake beja.

4. Ka Jisus a yavwana mâ, na, E lëndwěngo, na, Moto a diye kabo na beja pa, ndi tēpě na ndaga ya Anyambě eēhēpi.

5. Ka dēvil ya betana Mâ o ukodi mu' udomba, ka mâ-a levidě Mâ mapangiya ma he mēhēpi o vililingo vihâlě.

6. Ka dēvil ya vâ na Ju, na, Ngudi tēkaně eēhēpi n' ivenda jabu, nd' ibeamě be kâ vě âvě: 'kabojana be věwěngo 'mba; na moto uēhēpi uamě a ka pangě o vě beâ, mba vě.

7. Oningě o bâbingě o kaliya 'mba, vâ-kâna beēhēpi be ka diyi bea bě ibeâvě.

8. Ka Jisus a yavwana, ka Mâ-a vâ n' aju, na, Věngēměkě 'Mba mbuhwa, Setan, 'kabojana e lëndwěngo, na, Kalakiya Upangiye Anyambě 'âvě, o ka dilakě Mâ dipâ.

9. Ka mâ-a pādě Mâ o Jěruselēm, ka mâ-a tēdě Mâ o hâkâ ya tēmpěl, ka mâ-a vâ na Ju, na, Oningě na o Mwana ua Anyambě pukwaka oviya ovaně:

10. Ikabojana e lëndwěngo, na, A ka sombiyěndi enjěl jaju n' i tatake âvě:

11. Na jâ i ka huka nd' âvě o benâ beabu, o banga egombe te 'gombe oa tudiya eko o ilale.

12. Jisus a yavwanaka ka Mâ-a vâ na ju,

na, E vânwěngo, na, O yějěkiye Jěhova Anyambě 'ávě.

13. O děvil e diyaki ya madě iyějiyě jě-
hěpi, ka yâ ya dika Mâ ukili.

14. ¶ Ka Jisus a timba o Galili na ngudi
y' Ilina: ka kum' 'aju ya hamana indenda-
ndenda tėvině viěhěpi.

15. Ka Mâ-a yokudě o sinegâg jabu, bě-
hěpi ba bendakě Mâ.

16. ¶ Ka Mâ-a pâ o Nasarět, o Mâ-a to-
mbwakidi: na hohonganěngo n' ihadi viaju
vi diyakidi, A ngakiyendi o sinegâg o bu-
hwa bo' Iyâjâ, ka Mâ-a tēmě o ilanga.

17. Ka ejanganangobo ya usâki Iseas ya
bweyudwě Mâ. O Mâ-a běkidi ejangana-
ngobo bumuděngo, A duwakindi iboko vi
diyaki lěndwěngo, na,

18. Ilina ja Jěhova i n' umba, 'kabojana
a i 'mba hoviděngo mavulě ka pakuwa me-
kuge sango eyam'; a i 'mba lomango ka
yongě ba melema bukiyango, ka pakuwa
mbwedi ihuludwě, ka timbě pâgu mihâ, ka
huludě ba di nyingiyango,

19. Ka pakuwa upuma u věhělěkudwě
mua Jěhova.

20. Ka Mâ-a diba ejanganangobo, ka
Mâ-a timbě yâ yongo, ka Mâ-a diya diya.

Ka mihâ ma ba diyakidi o sinegâg bēhēpi ma vonguwa o Mâ-a jadi.

21. Ka mâ-a yalē o vâ na bâ, na, Buhwa tēkabo ndi boa ilēndē tēkadi bo hohonganidē o matâ manyu.

22. Ka bâ bēhēpi ba languwa o pēl' 'aju, ba ka mamaka ndaga ja 'hekwē i pumakidi o udumbu muaju. Ka bâ ba vâ, na, A 'bē mwan' 'a Josēf ekanē?

23. Ka Mâ-a vâ na bâ, na, O ka kaniyandi 'Mba ni ukanakâdi tēkamu mbambyē, Nganga, yongakē nyol' 'avē: ibeahu be di yokango na be di hamango o Kapērnaum, haka tepē beâ okava o ehe 'âvē.

24. Ka Mâ-a vâ, na, pâkwēpâkwē Mbi vâki n' inyēni, na, Usâki a vēhēlēkudwē o 'hiki 'aju mētē.

25. Ndi Mbi langwakiyandi inyēni mbambaē, mealika meitē me diyakite o Isreēl o hwi ja Ilaias, o oba e diyakidi dibamango mepuma melalo na ngândē utoba, o nja 'nēnē e diyakidi o 'hiki yēhēpi;

26. Ndi Ilaias au lomakwē o bâ-ba jadi, kabo o Sarēpta, *mboka* ya Saidân, o mwajo *a diyaki* mualika a jadi.

27. Na begâlani beitē be diyaki o Isreēl

o 'gombe ya usâki Ilisius; bu yongaka n' umbâkâ, kabo Neman ua Siria.

28. Ba diyakidi o sinegâg bēhēpi, ba londa-ki na jeku, o bâ-ba yokaki belombo tēkabe,

29. Ka *bâ-ba* 'muwa, ka *bâ-ba* tindiya Mâ o mboka o bwebwe, ka *bâ-ba* valana Mâ o matângě m' ukodi mua mboka 'abu e longa-kudwě, na ovaně nd' o bâ ba ka yanguwě Mâ o he molo na he.

30. Nd' A tombakind' o hanganě 'abu, ka Mâ-a vala pělě na eaju.

31. Ka Mâ-a huba o Kapěrnaum, mboka ya Galili, ka Mâ-a yokudě bâ o hwi j' Iyâjâ,

32. Ka bâ-ba mama iyokwanidě viaju: 'kabajana ndaga 'aju e diyaki na ngudi.

33. ¶ O sinegâg o diyaki na momo, a diyaki n' ilina ja dēvil ibe, ka mâ-a yama joyi oba,

34. Na, dikaka hwě mbwe Jisus ya Nasarēt, *ho* lě na nâvē nande? O ma viyi ka weya hwě? Mbi yowudět' âvē; âvē nd' Umbâkâ ua Anyambě ua Holi.

35. Ka Jisus a kandidě mâ, na, Diyaka dâ, na nâvē oa puma o mâ-a jadi. O dēvil e bi mâ yanguwango o hanganě, e vĕngēmě-kind' o mâ-a jadi, e yokidě mâ mehiyo.

36. Ka bâ bēhēpi ba mama, ba ka kalaka bâ mětě na bâ mětě, na, E lě nja ndaga ekaně! 'kabojana a sombiyakēndi malina mabe n' ipangiya na ngudi, na ma mâ vë-ngēmě.

37. Ka kuma o pěl' 'aju ya vala iboko viēhēpi via 'hiki tēně ulwanidēngo.

38. ¶ Ka mâ-a 'muwa o sinegâg, ka mâ-a ngiya o ndabo 'a Saimân. Ka nyangwě ya mwad' 'a Saimân a bweywě n' ivěvu iněně; ka bâ-ba hâhâlidě Mâ o pěl' 'aju.

39. Ka Mâ-a tēmě baka na mâ, ka Mâ-a kandidě ivěvu; ka jâ ja dika mâ: ka mâ-a 'muwa o njamba pākâ na mâ-a haya bâ.

40. ¶ Nandi o joba i diyakidi i ka kweya-kiya, ba diyaki na mebedi 'mea bebedi bea mangâ maitě bēhēpi ba vanaki meâ o Mâ-a jadi; ka Mâ-a kahidě benâ beaju o meâ-mea jadi meēhēpi, ka Mâ-a yongě bâ.

41. Ka dēvil ja vëngēmě o baitě ba jadi, i yamaka, na, Avě ndi Kraist Mwan' 'a Anyambě. Ka Mâ-a kandidě jâ, Au bâbâkâ jâ-i kalaka: 'kabojana i yowakidi na Mâ ndi Kraist.

42. O mu diyaki mu-a bě mwehe, a umwa-kindi ka Mâ-a vala o iboko via ikutakuta: ka bato ba vaha Mâ, ka bâ-ba pâ o Mâ-a

jadi, ka bâ-ba himbidě Mâ, na a dikakě bâ.

43. Ka Mâ-a vâ na bâ, na, Mbi kalakiye ipangiya ja Anyambě o mamboka mapâkwě tepě : 'kabojana yâ ndi eamě e lomakudwě.

44. Ka Mâ-a kaliya o sinegâg ja Galili.

KAPITA V.

1. E diyakindi, o bato ba pinyilakidě Mâ o iyoka ja ndaga ja Amyambě, ka Mâ-a těmě o manga ma Jěněsarět,

2. Ka Mâ-a yěně belende bebale o manga kubu : bahombwedi ba diyaki ba huba, ba tukaka belâba *béabu*.

3. Ka Mâ-a vama o elende eâkâ, e diyaki ea Saimân, ka Mâ-a hâhâlidě mâ na a jě-njuwěkidě na he kwěi. Ka Mâ-a diya diya, ka Mâ-a yokudě bato o elende.

4. O Mâ-a mad' ikala, ka Mâ-a vâ na Saimân, na, Jěnjuwěkidě na 'la ndiba, oa huběni belâba beanyu uhombo.

5. Ka Saimân a yavwana Mâ, na, Paia, ho janjango bulu tēkabo boěhěpi, ho bwe-yidě elombo : nd' Ávě o ma vâ, mbi ka hu-běte elâba.

6. O bâ-ba hi nonaně, ba dibakiděndi ikinda ja bejaka iněně: elába e ka nya-kiya.

7. Ka bâ-ba pěpidě *ibabu* ba njamba, ba diyakidi o elende epâkwě, na ba vake ka hana bâ. Ka bâ-ba viya, ka bâ-ba londě belende beěhěpi bebale, be ka 'mbaka o hinga.

8. O Saimân Pite a yěnidi, ka mâ-a kwa o beko bea Jisus, na, O Upangiyi, věngěměkě o 'mba-mbi jadi; 'kabojana mbi mot' ube.

9. Ikabojana mâ, n' ibaju ba diyanakidi, ba mamakindi o ikinda ja bejaka i jabu i weyakidi:

10. Yâ nyanga tě te ya Jems, na Jân, bana ba Sěbidi, ba diyaki na Saimân o njamba. Ka Jisus a vâ na Saimân, na, O bangake; o ka bweyi bato oviya ego-mbe tēkae.

11. O bâ-ba pādě belende beabu o he, ba dikaki beěhěpi, na vitakě Mâ.

12. ¶ E diyakindi, o Mâ-a diyakidi o mboka n' ehuhu, umbwakiyate moto a diyaki na egâlani ti; a yěněkětě Jisus ka mâ-a kwa o boho *boaju*, ka mâ-a hâhâlidě Mâ, na, Upangiyi, oningě oa panga, o te na ngudi e yongakě 'mba.

13. Ka Mâ-a hambidě enâ 'aju, ka Mâ-a kupaně mâ, na, Mbi pangindi: yongaka. Ka egâlani ya vëngëmě o mâ-a jadi o njo pâkâ.

14. Ka Mâ-a sombiyě mâ, na, a langwa-ke moto: ndi kěķě, na nâvē oa levidě nyol' 'âvē prist, oa vē opěla iyongwě jâvē, ka Mosěs a sombiyakidě, ka tali o bâ-ba jadi.

15. Ndi kum' 'aju e hamanaki pě n' ině-ně: ka bebimba beněně bea yolaně ka yoka, na ka yongwě bebědi beabu o Mâ-a jadi.

16. ¶ Ka Mâ-a timbiya o nginga, ka Mâ-a kaliya.

17. E diyakindi, o buhwa na bohuhu, o Mâ-a diyakidi a yokwakidě, ka Farisi na bayokwidi ba belekanako ba vakiyedi o mboka ja Galili, na Judia, na Jěruselěm jěhěpi, bâ diya diya: ngudi y' Upangiyi e diyakindi *omě* iyongě jabu.

18. ¶ Umbwakiyate, bato ba vanaka momo a diyaki na ebědi 'a nyolo limbelimbe o ikondo: ka bâ-ba vaha *pělē* ea ngakidě mâ, ka nangidě *mâ* o boho boaju.

19. O bâ-ba diyakidi ba diye na ngudi e pahakiyě *pělē* 'a ngidě. mâ 'kabojana ebimba, ka bâ-ba beta o ndabo oba, ka bâ-

ba hubě mâ o unyuwa na enangi o boho
boa Jisus.

20. O Mâ-a yënidi ikamidě jabu, ka
Mâ-a vâ na ju, na, Momo, mabe mâvě ma
'yidwënd' âvě.

21. Ka balěndi na Farisi ba yalě ipiki-
liya, na, Nj' a kilakě Anyambě ekaně?
Nja ka 'yidě mabe, hanga Anyambě dipâ?

22. O Jisus a yowakidě mapikiliya ma-
bu ka Mâ-a yavwana bâ, na, O pikilakiya
li nde o melema meanyu?

23. Eve lě e di bobâbu wa, na o vâ, na,
Mabe mâvě ma 'yidwënd' âvě; ipě o vâ, na,
Umwaka, oa tamuwa?

24. Ovaně nd' inyěni o ka yowě na Mwa-
na-moto A na ngudi o he e iyakidi bobe, (ka
Mâ-a vâ n' ubědi mua nyolo limbelimbe,
na,) Mbi vâki na nâvě, na, Umwaka, na
nâvě oa nângâ enangi 'âvě, oa vala o ndabo
'âvě.

25. Ka mâ-a 'muwa o njo pâkâ o boho
boabu, ka mâ-a nângâ eaju e nangakiyedi,
ka mâ-a vala o ndabo 'aju mětě, a kěķě a
bendakě Anyambě.

26. Ka bâ bēhēpi ba mama, ka bâ-ba be-
ndě Anyambě, londango na jângâ, na, Ho
yěněngo belombo be mamanakwě o buhwa.

27. ¶ O ekabe be diyakidi bea maya A kēkindi, ka Mâ-a yěně uyoli-pago, dina na Livai, diyango o inângânido via pago: ka Mâ-a vâ na ju, na, Vitakě 'Mba.

28. Ka mâ-a dika beěhěpi, ka mâ-a 'mu-wa, na vitě Mâ.

29. Ka Livai a hadě Mâ isango iněně o ndabo 'aju mětě: omě o diyaki na ndumba ea bayoli-pago na bapâkwě ba diyaki diya o *beja* na bâ.

30. Ndi balěndi babu na Farisi ba hâkâ-lânâkiyendi na beyokwedi beaju, na, E lě nd' eanyu e jakě n' inyěni o mâtâkâni na bayoli-pago na bato babe?

31. Ka Jisus a yavwana bâ, na, Ba di mepeha ba vahaka nganga; kabo ba běkě.

32. Mbu vaka ka ndiya bato bayamu, kabo babe, o iluwa ja melema.

33. ¶ Ka bâ-ba vâ na Ju, na, E lě nde'a beyokwedi bea Jân e hindinake njo iitě, na bâ-ba haka makaliya, eâ nyanga tě 'a bea Farisi; ndi ibeávě be jaka be mâtâkâ?

34. Ka Mâ-a vâ na bâ, na, O t' o panga-kani ba ilika vi' ubâmbi ba hindinaka ulingo mu' ubayi u di na bâ?

35. Ndi hwi i vakandi, j' ubayi u ka nâ-

ngânwě bá, běngě ba hindinake o hwi tēdině.

36. ¶ Ka Mâ-a kaniya bâ ukanakâdi, na ; O 'bě na moto a vamakě epěhi e' unamba uyânâ o unamba mua vyo ; oningě a hangě, vâkânâ uyânâ u nyakiyandi, na epěhi tē e nângâkwě o mua kya ea hohonganake na mua vyo.

37. O 'bě na moto a vamakě ivě ja kya o mbute ea vyo ; o banga ivě ja kya ja tumba mbute, na já-ja hoviya, na mbute ja umbaniya.

38. Ndi ivě ja kya i vamakwěndi o mbute ja kya ; vâkâna beěhěpi *be* tatudwěndi.

39. O 'bě na moto a běkě *ivě* ja vyo mâ-tângo na mâ-a ka vahakâ pě ja kya o njo tē ea pâkâ ; 'kâbojana a vâki na ja vyo i bwa-mu wa.

KAPITA VI.

1. E diyakindi o buhwa bo' Iyâjâ ja mabale o ja boho i běkě tombango, ka Mâ-a tomba o meanga mea poti ; ka beyokwedi beaju bea buka poti, ba ka jaka, ba hingilaka *jâ* o makadu *mabu*.

2. Ka Farisi jákâ ja vâ na bâ, na, E lě

nd' eanyu e hakë e ha ibě hohonganěngo na o ha o hwi j' Iyâjâ ?

3. Ka Jisus a yavwana bâ, na, O ha langeteni tombete ekae, ea David e hakidi, o mâ na ba diyaki na ju ba yokaki nja ;

4. O mâ-a ngakiyedi o ndabo 'a Anyambě, ka mâ-a ja pěinbě e' ilevudwě, ka mâ-a vě tepě ba diyaki na mâ ; e ha diyaki hohonganěngo na *mâ-a* jaka kabo prist dipâ ?

5. Ka Mâ-a vâ na bâ, na, Mwana-moto a tepě Upangiyi mua buhwa bo' Iyâjâ,

6. E diyakindi tepě o buhwa bo' Iyâjâ bopâkwě, ka Mâ-a ngiya o sinegâg ka Mâ-a yokudě : omě o diyaki na momo a diyakidi enâ eyomi vivilaniyango.

7. Ka balěndi na Farisi ba běmbě Mâ, n' ipě A ka yongěte o buhwa bo' Iyâjâ ; na ovaně nd' o bâ-ba ka pahiyě ponda o Mâ-a jadi.

8. Nd' a diyakite yowěngo ipikiliya jabu, ka Mâ-a vâ na momo a diyakid' enâ vivilaniyango, na, Umwaka, na nâvě oa tēmě o hanganě. Ka mâ-a umuwa ka mâ-a tēmě.

9. Ka Jisus a vâ na bâ, na, Mbi ka uwanđi inyěni elombo ; E te hohonganěngo na

o ha bwam' o buhwa bo' Iyájá, ipě o ha bobe? o yongě 'mėnâ ipě o weya eâ?

10. Ka Mâ-a umbuwa bâ bėhěpi, ka Mâ-a vâ na momo tě, na, Hambakidě enâ 'âvě. Ka mâ-a ha nonaně: ka enâ 'aju ya timba upeha ka epakwě.

11. Ka bâ-ba londa na jeku iitě; ba ka tingaka bâ mětě na bâ mětě nyang' 'abu e ka hayě Jisus.

12. ¶ E diyakindi o hwi tědině, ka Mâ-a vala o ukodi ka kaliya, ka Mâ-a diya o ika-liya ja Anyambě bulu bohuhu.

13. O mu diyaki mu-a bě mwehe, ka Mâ-a ndiya beyokwedi beaju: ka Mâ-a pânâ omě jomu na babale, ibaju ba vangakidě, na, metodu;

14. Saimân, uaju A vangakidě pě, na, Piter, na mwana-nyangwě Andru, Jems na Jân, Filip na Batâlomiu,

15. Matiu na Tâmas, Jems ja Alfius, na Saimân a ma tubakwě, na, Silotěs,

16. Na Judas *mwana*-nyangwě na Jems, na Judas Iskariât, a diyakidi tepě ukândi.

17. ¶ Ka Mâ-a huba na bâ, ka Mâ-a tēmě o itaba, na ndumba ea beyokwedi beaju, na ebimba ea bato eněně e vakiyedi o Judia ečhěpi na Jěruselēm, na oviya be-

těbě bea Tair na Saidân, ka yoka Mâ na ka yongwě bebědi beabu ;

18. Na ba ma yěněkě njuke na malina mabe: ka bâ-ba yongwě.

19. Ka ebimba eěhěpi ya vaha o kupaně Mâ: 'kabojana ngudi e vakiyendi o Mâ-a jadi, ka eâ-ea yongě bâ běhěpi.

20. ¶ Ka Mâ-a betaně beyokwedi beaju mihâ, na, Ibâtâ, *n' inyěni* banyamanani 'kabojana ipangiya ja Anyambě i ndi janyu.

21. Ibâtâ *n' inyěni* ba yokakě nja pâni: 'kabojana o ka vulandini. Ibâtâ *n' inyěni* ba eyakě pâni: 'kabojana o ka yândini.

22. Ibâtâ *n' inyěni*, oningě bato ba lonaka inyěni, na bâ-ba palwakidě inyěni o *njamba jabu*, na bâ-ba kilaka *inyěni*, na bâ-ba ka uhwaka dina janyu pani-ka i ndi bobě, o pělě 'a Mwana-moto.

23. Peyakani o buhwa těboně, *n' inyěni* o ka sodaki na mbya: 'kabojana, hilakěteni mahomano manyu ma *nd'* o kena oba: 'kabojana bahangwě babu ba ma hakate basâki ihadi tě.

24. Ndi maguga *n' inyěni* ba di kenango! 'kabojana o pahiyendini mbya 'anyu.

25. Maguga *n' inyěni* ba di vulango! 'kabojana o ka yokandini nja. Maguga *n'*

inyěni ba yâkě pâni ! 'kabojana o ka yěně-
ndi ngěbě n' inyěni o ka eyakani.

26. Maguga n' inyěni, oningě bato běhěpi
ba kalakě inyěni bwamu ! 'kabojana baha-
ngwě babu ba haki basâki ba menoki
nonaně.

27. ¶ Ndi Mbi vâki n' inyěni ba yokakě,
na, Tândâkâni baloni banyu, hakani ba
binak' inyěni bwamu.

28. Vambakiyani ba hâkâkě inyěni ibâ-
tâ, n' inyěni o ka kalakiyani o pělě 'a ba
ngongolakid' inyěni.

29. Na a ka bweye âvě ibuku *jâká* věkě
mâ ipakwě ; a ka patuwě koto 'avě o kanda-
kidě tepě mâ *inângâ* ja ngâi 'âvě.

30. Věkě a jombakě âvě uěhěpi ; a ka
patuwě belombo beâvě o uwake pě *beâ*.

31. K' inyěni o ka vahě bato ba hak'
inyěni, haka tepi bâ ni nyanga tě.

32. Nd' oningě o tândâkâni ba tândâk'
inyěni, o li na nja akeva ? 'kabojana bato
babe ba tândâkâte ba tândâkě bâ.

33. Nd' oningě o nyěvěkiyěni ba nyěvě-
kiyě inyěni, o li na nja akeva ? 'kabojana
bato babe ba hakate nyanga tě.

34. Nd' oningě o věkěni ibanyu ba pita-
kidě na ba ka timběndi, o li na nja akeva ?

'kabojana bato babe ba věkě tepě bato babe, na ovaně nd' o bâ-ba ka pahiyě pě nyanga tě.

35. Ndi tândâkâni ndoba janyu, nyěvăně-kiyěni, vĕněkĕni, o pitidě pě ni elombo ; vâ-kâna mahomano manyu ma ka kenandi, n' inyěni o ka diyandini bana ba Ua Oba : 'kabojana A ndi kĕngâ na bato babe na bâ-ba ha věkě Mâ akeva.

36. Diyakani tepě na ngâtâ, ka Hângw' anyu A di na ngâtâ.

37. O yĕkĕněkidĕni, vâkâna oa yĕkudwĕni : o kwehanakĕni, vâkâna oa kwehwĕni : iyanakidĕni, vâkâna o 'yidwĕndini.

38. Vĕkĕni, vâkâna o vĕwudwĕndini ; eyĕjâ eyamu, e bandakwĕ, na e ninganakwĕ, na eâ e hovakiya, ndi eabu e ka vĕyĕ o ngonga janyu. Ikabojana eyĕjâ eanyu e yĕjĕněkĕ eâ tepě eanyu e ka yĕjĕnwĕ.

39. Ka Mâ-a kaniya bâ ukanakâdi, na ; Pâgu e ka tumbwanate pâgu ? bâ babale ba kwe o mbela ?

40. Eyokwedi a 'bĕ wa n' uyokwidi muaju, ndi ũĕhĕpi a di hânjâbiyĕngo a ka diyi k' uyokwidi muaju.

41. E lĕ nd' eâvĕ e 'mbwakiyĕ uhâmbâ

u jadi o dihâ ja mwana-nyângwě, nd' o hilě ukâkâ u jadi o dihâ jâvě mětě.

42. Nd' o lě o vâkâ na mwana-nyângwě, na, Mwan'-ina, ta ha, mbi vëngid' uhâmbâ u jadi âvě o dihâ, nd' âvě mětě o hilě ukâkâ u jadi ijâvě dihâ? Âvě unoki, ta vëngidě ukâkâ u jadi o dihâ jâvě, vâkâna o yënindi bwe o ivëngidě j' uhâmbâ u jadi o dihâ ja mwana-nyângwě.

43. Ikabojana ele eyam' ea lângâkâ bebuma bebe; na ele ebe 'a lângâkâ bebuma beyamu.

44. Ikabojana ele eěhěpi e yowanaki na bebuma beaju mětě. Ikabojana bato ba pataka fig o inbângě, na bâ-ba pataka ivě o bombela.

45. Mot' uyamu o ngumba eyam' e' ulema muaju a pumaki belombo beyamu; na mot' ube o ngumba ebe e' ulema muaju a pumakëndi belombo bebe: 'kabojana o bwinge bo' ulema ndi bo' udumbu muaju u kalakě.

46. ¶ Nd' e lě nd' eanyu e tubakě 'Mba, na, Upangiyi, Upangiyi, o hayeni belombo beamě be vâkě?

47. Mbi ka levidëndi inyëni, a vakě o 'Mba-mbi jadi, a yokaka ndaga jamě, na mâ-a haka jâ, ka mâ-a kwanakě:

48. A kwanaki momo a longakě ndabo, a 'la ka tonga dângěngo, na mâ-a 'la ka yalě o ilale: o tonda e pâdi, na miba ma viya ka kumbiya o ndabo těně nangudi, e diye na ngudi o hoka; 'kabojana e kâ-mâmâkindi o ilale.

49. Nd' a yokakě, na mâ-a haye, a kwanaki momo a longakidi ndabo o he oba e diye na jali; ea miba e kumbakiyi na ngudi, ka eâ-ea hungana o kwa; n' ibuluwa ja ndabo těně i diyakindi iněně.

KAPITA VII.

1. O Mâ-a madě ndaga jaju jěhěpi o matâ ma bato, ka Mâ-a ngiya o Kapěrnaum.

2. Uhayi mua sěnturiân pâkâ, u muaju mu-a yěněkě jambo iněně, u diyakindi u běkě, piělě n' iwa.

3. O mâ-a yokidi o pělě 'a Jisus, ka mâ-a loma batodu ba Jiu o Mâ-a jadi, ka hâhâlidě Mâ na A vake ka yongě uhayi muaju.

4. O bâ-ba pâdi o Jisus a jadi, ba hâhâ-lakidi Mâ nangudi, na, Uâvě a ka hayě a weyango:

5. Ikabojana a tândâkândi etomb' 'ahu, na mâ-a i hwě longiyango sinegâg.

6. Kâ Jisus a vala na bâ. O Mâ-a diya-kidi a diye yaviděngo na ndabo, ka sěnturiân ea loma inboi o Mâ-a jadi, ka mâ-a vâ na ju, na, Upangiyi, o hake nyol' 'âvě na njuke; 'kabojana mbi 'bě weyango na o pâkâ o ibomako j' unyuwa muamě:

7. N' umba-mbu pikiliya nyol' 'amě weyango na iviya o âvě-o jadi: ndi kalaka ndaga pa, vâkâna mot' uamě a yongindi.

8. Ikabojana mbi ndi momo a pangakudwě, n' umba-mbi na sâjě i pangakiyě, mba vâ na ekaně, na, Kěkě, na mâ-a 'la; n' upâkwě, na, Vaka, na mâ-a viya; n' uhayi mûaině, na, Haka 'kae, na mâ-a ha.

9. O Jisus a yoki belombo těkabe, ka Mâ-a mama na mâ, ka Mâ-a 'luwa, ka Mâ-a vâ na bato ba vitakidě Mâ, na, Mbi 'bě duwango ikamidě iněně kakana, tombete o Isreěl.

10. Ba lomakudwě, o bâ-ba timbidi o ndabo, ka bâ-ba kâbidě uhayi u diyakidi u běkě mâ-a yonga.

11. ¶ Bia bwe, ka Mâ-a vala o mboka e tubakwě, na, Nen; beyokwedi beaju beité be kěki na Ju, na bato baitě.

12. O Mâ-a diyakidi a bě baka na jâmbě j' ugomba mua mboka, umbwakiyate, eke-ngo 'a moto e pumanakwě, a diyakite mwanua ua nyangwě dipâ, na *nyangwě* a diyaki tepě mwalika: bato ba mboka těně baitě ba diyaki na mâ.

13. O Upangiyi a yěni mâ, ka Mâ-a yěně mâ ngâtâ, ka Mâ-a vâ na ju, na, O eyake pě.

14. Ka Mâ-a pâ ka Mâ-a kupaně ilala *ja 'kengo*: ka babapi ba těmě de. Ka Mâ-a vâ, na, Iwanja, Mbi vâki na nâvě, na, Uinwaka.

15. Ka a diyaki wango a diya diya, a ka kalaka. Ka Mâ-a bweyidě mâ nyangwě.

16. Ka jângâ ja bweya běhěpi: ka bâ-ba bendě Anyambě, na, Usâki uněně u pumiye-ndi o hwě-ho jadi; na Anyambě a lunbiyi bato baju.

17. K' ilango těkadi ja hamana o pěl' 'aju o Judia eěhěpi, n' indendandenda těvině ulwaniděngo.

18. Ka beyokwedi bea Jân bea levidě mâ belombo těkabe beěhěpi.

19. ¶ Ka Jân a ndiya beyokwedi beaju bebale, ka mâ-a loma *beâ* o Jisus a didi, na, Âvě nd' A vakě? ipě ho umbwakiye pě upâkwě?

20. O bamo tě ba pâdi o Mâ-a jadi, ba

vâki, na, Jân Baptist a ma lomi hwě o âvě o jadi, na, Ávě nd' A vakě? ipě ho umbwakiye pě upâkwě?

21. A yongakiděndi iwěla tědině baitě oviya bebědi na bevuva, na malina mabe; ka Mâ-a bumudě iitě pâgu mihâ.

22. Jâ ndi ja Jisus ja yavwana bâ, na, Kěkěni, n' inyěni oa languwani Jân beanyu be yěnidi n' ibeanyu be yokidi; ka pâgu i yěněkě, bebokě be tamwaka, begâlani be yongakwě, poke i yokaka, bekengo be pumbwakudwě, na sango eyam' e pakwakudwě mekuge.

23. Nd' ibâtâ, na, a ka diyě a kâbe n' Umba.

24. ¶ O metodu mea Jân me validi, A yalakiděndi ikala na bato e pělě 'a Jân, na, O kěki lě ni o nginga ka yěně nde? Tuka e ninganakě n' upupě?

25. Nd' o kěki lě ni ka yěně nde? • Mo-mo bātāngo ibâtâ ibābu? Umbwakiyate, ba bātākě mabâtâ m' ivenda, na bâ-ba diyaka n' ulunda, ba nd' o ndabo ja mepolo.

26. Nd' o kěki lě ni ka yěně nde? Usâki? E, Mbi vâki n' inyěni na wa n' usâki.

27. Ekaně ndi a di lěndwěngo, na,

Luke.

Umbwakiyate, mbi lomindi utodu mua-
mě ō boho boâvĕ, ka kenjĕ njeya 'vĕ o boho
boâvĕ.

28. Ndi Mbi vâki n' inyĕni, na, O 'bĕ na
ba di jawĕngo na bajo usâki u di bonĕnĕ
wa na Jân ja Baptist: nd' a di yeviyĕngo
o ipangiya ja Anyambĕ a bonĕnĕ wa
na mâ.

29. Ka bato bĕhĕpi ba yokaki *Mâ-a
kalaka*, na bayoli-pago, ba huwudĕ Anya-
mbĕ, baptaiswĕngo na baptisma ea Jân.

30. Ndi Farisi na bayokwidi ba bele-
kanako ba kiyaki o pĕlĕ 'abu mĕtĕ upa-
ngo mu' Anyambĕ, ba baptaiswĕ o Mâ-a
jadi.

31. ¶ K' Upangiyi a vâ, na, Mbi kwa-
nakidĕ lĕ okava bamo b' igona tĕkadi nde ?
ba kwanakâ lĕ nde ?

32. Ba kwanakandi ba-ndĕmbĕ o iha-
mbanido diye diye, ba ndanakiya, na, Ho
lângindi inyĕni mabeka, nd' o yembeni ;
ho diyendi inyĕni o jĕbâ, nd' o eyeni.

33. Ikabojana Jân Baptist a vakindi a je
pĕmbĕ a mâte ivĕ ; n' inyĕni mâ, na, A na
dĕvil.

34. Mwana-moto a vakindi a jaka na
Mâ-a mâtâkâ ; n' inyĕni mâ, na, Umbwa-

kiyate savulaka, n' umâti ivě, mbweyi ea bayoli ba pago na bato babe!

35. Nd' iyowě i huwudwěngo na bana baju bēhēpi.

36. ¶ Ka Farisi pākâ ea vaha na A jake na mâ. Ka Mâ-a ngiya o ndabo 'a Farisi, ka Mâ-a diya o beja.

37. Umbwakiyate mwajo, ua mboka tē, a diyaki mot' ube, o mâ-a yowudě na *Jisus* a ndi diya o beja o ndabo 'a Farisi, ka mâ-a vana ukâbě mu' alabasta m' uyâmbâ,

38. Ka mâ-a tēmě o beko beaju o mbu-hwa, a eyaka, a ka tukaka beko beaju na manyângâdiba, a titwaka *beâ* na howe ja molo muaju, a pyâpyâkâ matambi maju, a hakiya *meâ* uyâmbâ.

39. O Farisi e ndakiyi Mâ e yēnidi, ka mâ-a kala na nyol' 'aju mētě, na, Momo tē-kaně, a jaka na a nd' usâki, t' a yowuděte mwajo tē a kupanakě Mâ ekaně na nya-ng' 'aju e didi; 'kabojana a mot' ube.

40. Ka *Jisus* a yavwana mâ, na, Saimân, Mbi na 'lombo e kalakě na nâvē. Ka mâ-a vâ, na, Uyokwidi, kalaka.

41. O diyaki na moto a diyaki banwani babale: umbâkâ nuwanango kama ja fula itano, upâkwě mabo matano.

42. O bâ-ba diyaki ba diye na 'lombo e vĕkĕ, a iyakidi bâ bĕhĕpi o nanĕ. Langwakiya 'Mba, oviya bâ babale, nj' a ka tandĕ mâ wa?

43. Ka Saimân a yavwana Mâ, na, Mbi yebakiyi na uaju a iyakidĕ wa. Ka Mâ-a vâ na ju, na, O ma yĕkidĕndi hohonga-nĕngo.

44. Ka Mâ-a 'luwa o mwajo a didi, ka Mâ-a vâ na Saimân, na, O yĕnĕkĕte mwajo tĕkanĕ? Mbi ma ngiyand' o ndabo 'âvĕ, ou vĕ 'Mba miba ina beko beamĕ: nd' a tukango beko beamĕ na manyângâdiba, a titwaka *beâ* na howe ja molo muaju.

45. Ou pyâpyâ 'Mba: ndi mwajo tĕkanĕ, n' Umba na ngiya, a ha yâjete ipyâpyâ ja matambi mamĕ.

46. Oa bu hiya molo muamĕ mavule: ndi mwajo tĕkanĕ a hiyango matambi mamĕ uyâmbâ.

47. Ndi Mbi vâki na nâvĕ, na, Mabe maju ma di maitĕ, ma iyidwĕndi; 'kabojana a tândâki wa: nd' a iyakudwĕ bohâlĕ, a tândâki bohâlĕ.

48. Ka Mâ-a vâ na ju, na, Mabe mâvĕ ma iyidwĕnd' âvĕ.

49. Ba diyaki ba jaka na Ju ba yalaki-

děndi o vâ na melema meabu, na, Nja ka 'yakidě pě mabe ekaně ?

50. Ka Mâ-a vâ na mwajo, na, Ika-midě jâvě i yongiděnd' âvě ; kěķě na jonga.

KAPITA VIII.

1. E diyakindi o mbuhwě mbuhwě, ka Mâ-a ulwanidě mamboka na mabâkâ mēhēpi, A ķěķě A pakwanakiya na Mâ-a levakidě sango 'a mbya ea ipangiya ja Anya-imbě : jomu na babale ba diyaki na Ju,

2. Bajo bâkâ, ba yongakudwě malina mabe na bepulu, Meri a ma tubakwě, na, Magdelin, ua děvil hēmbwēdi a vēngēmēkidi,

3. Na Joana mwad' 'a Tyusa yongo 'a Hěrod, na Susana, na bapâkwě baitě, ba ma hakiya Mâ na ngumb' 'abu.

4. ¶ O bato baitě ba vakiyedi o mamboka mēhēpi, ba latanakiyedi ta, ka Mâ-a kaniya bâ ukanakâdi :

5. Uliyi u ķěķě ka liya ibângâ jaju : o mâ-a mwanjidi, jâkâ i kwakindi o pēpēķě 'a njea ; ka jâ-ja pitwě, ka lonâni la oba la sâsâ jâ.

6. Ka ipâkwě ja kwa o ilale; o j' i kěki-di, ka já-ja vivilaniya, 'kabajana i puhwanaki tâ ea he.

7. Ka ipâkwě ja kwa o hanganě 'a mekanda; ka já na mekanda bea kěkěnidě, ka já-ja bweya kálu.

8. Ka ipâkwě ja kwa o mähě mayamu, ka já-ja kěkě, ka já-ja ja bebuma kama. O Mâ-a vwi belombo těkabe, ka Mâ-a yaima, na, A di na matâ ma yokakě a yokake.

9. Ka beyokwedi beaju bea uwa Mâ, na, Ukanakâdi těkamu u lě ovaně na e?

10. Ka Mâ-a vá, na, Inyěni nd' o didini vėwěngo iyowě ja mahâwě m' ipangiya ja Anyambě: ndi bapâkwě kabo na mekanakâdi; ovaně nd' o boyěněkě ba yâlě o yěně, bo yokaka ba yâlě o bweyidě.

11. Nd' ukanakâdi nd' ekamu: Ibângâ ndi ndaga ja Anyambě.

12. Ba pěpěke ea njea, ndi ba yokakě; vâkâna děvîl e vakandi, na eâ-ea vėngidě ndaga o melema meabu, na banga ba kamidě na bâ-ba yonga.

13. Ba ilale, ndi ba běkě yokango, ba pa-hiya ndaga na mbya; ba diye na metamba, ba kamakiděte ulingo uhâlě, o 'gombe e' iyějudwě ba kwa.'

14. I kwakidi o mekanda, ndi ba bĕkĕ yokango, ba 'la; na inaka na hika na upeyo mua emĕnâ *tĕke* be haki bá kálu, ba jaye bebuma bea hânjâbiyĕngo.

15. Ndi ba mahe mayamu, ndi ba bĕkĕ ndaga yokango n' ulema uyamu mua batango, bâ *jâ* tatango, ba ka jaka bebuma n' iyika.

16. ¶ O 'bĕ na moto a bĕkĕ vitwa yodĕngo, na mâ-a diba viâ o eva, tombete a ngidĕ *viâ* ibomako j' ikondo; ndi a tĕkidi *viâ* o uhângâ, na ovanĕ nd' o ba ngakiyĕ ba ka yĕnĕ bwe.

17. Ikabojana o 'bĕ na 'lombo e didi ikutakuta, e ka diyĕ e puniye; tombete e didi ihâwĕ, e ka diyĕ e yowanĕ na eâ-ea hainana.

18. Bandamakidĕni nyang' 'anyu e yokakĕ: a janidi, a ka vĕwĕndi; a ha 'bĕ nĕ, a ka nângânwĕndi tombe eaju e yĕnĕnĕkĕ na a ndi duwango.

19. ¶ Ka nyangwĕ na bana ba nyangwĕ ba viya o Mâ-a didi, ba diye na ngudi 'a bengiya o Mâ-a jadi o pĕl' 'a ebimba.

20. Ka Mâ-a langudwĕ, na, Nyângwĕ na bana ba nyângwĕ ba nd' uhĕngĕ tĕmetĕme, ba vahakand' o yĕn' âvĕ.

21. Ka Mâ yavwana bâ, na, Jaie na bana

b' ina nd' ekaba ba yokakě ndaga ja Anyambě, na bâ-ba haka já.

22. ¶ E diyakind' o buhwa na bohuhu, ka Mâ na beyokwedi beaju ba vama o elende: ka Mâ-a vâ na bâ, na, Ho jabwakeni o mwi-di mua 'tima upâkwě. Ka bâ-ba tindiya.

23. O bâ-ba diyaki ba tamwaka, ka Mâ-a ya; ka ekudikudi e' upupě ea vunga o 'tima; ba diyaki ba bě ti *na miba*, na ba yěněkě mahihi.

24. Ka bâ-ba viya o Mâ-a jadi, ka bâ-ba 'mudě Mâ, na, Paia-o, Paia-o, ho kugindi. Ka Mâ-a umuwa, ka Mâ-a kandidě upupě na miba ma diyaki ma bumbaka: ka beâ-bea vâtâ, ka omě wa diya uděmbě.

25. Ka Mâ-a vâ na bâ, na, Ikamidě janyui l' ove? Ba bangakindi ba ka mama-ka, ba ka kalaka bâ mětě na bâ mětě, na, I lě nja jângâ-ě ja moto ekadi! 'kabojana A sombiyakěte, tombete mepupě na miba, na beâ-bea yokiyate Mâ.

26. ¶ Ka bâ-ba pâ o ehe 'a ba Gadara, e di banjaniděngo na Galili.

27. O Mâ-a hubakid' o he, ka moto ua mboka n' uhuhu, a diyaki na dēvil uling' uyaba, au bâtâkâ ibâtâ, a diye o ndabo, ka-bo o malonga, a lata na Mâ.

28. O mâ-a yěni Jisus, ka mâ-a yama, ka mâ-a kwa o boho boaju, ka mâ-a kala na joi oba, na, Jisus, Mwan' 'a Anyambě e didi oba mětě, eahu 'na navě e lě na e? Mbi hâhâliděnd' âvě, o yěněkidě 'mba majili.

29. Ikabojana A sombiyakiděndi ilin' ibe na i věngěměke o momo tě a jadi. Jambojana i ma bweyaki mâ njo iitě, a ma tatakwě kâmudwěngo mehinganakano na me-boka; a bukaka meboka, děvil e valakidě mâ o nginga.

30. Ka Jisus a uwa mâ, na, Dina jâv' i lě i nja? Ka mâ-a vâ, na, Lijân: 'kabojana děvil iitě i ngakiyendi o mâ-a jadi.

31. Ka bâ-ba hâhâlidě Mâ na A sombiyake bâ na ba kěķě o ndiba ea hěl.

32. Omě o diyaki na bokweya boa ngweya iitě i jaka o ukodi: ka bâ-ba hâhâlidě Mâ na A hulakidě bâ na ba kěķě o jâ-i didi. Ka Mâ-a kamidě.

33. Ka děvil ja věngěmě o momo tě a jadi, ka jâ-ja ngiya o ngweya: ka bokweya boa huba umbila umbâkâ o iboko via mbelenge o 'tima, ka jâ-ja lâkâ.

34. O ba jakidě jâ ba yěněki nyanga e hamidi, ka bâ-ba kweya, ka bâ-ba 'la ka languwa o mboka na o 'hiki.

35. Ka bâ-ba valanidě ka yěně nyanga e hamidi; ka bâ-ba pâ o Jisus a jadi, ka bâ-ba duwa momo tě, a vëngëkudwě dëvil, diyango o beko bea Jisus, bătângo, n' ipi-kiliya jaju ja hohonganěngo: ka bâ-ba banga.

36. Ba yěněkidi ba langwakiyi bâ nya-nga ea a diyaki na dëvil e yongakudwě.

37. ¶ Já ndi ja ebimba eěhěpi ea ehe 'a ba Gadara ulwaniděngo ja hâhâlidě Mâ na A vëngëměke o bâ-ba jadi; 'kabojana jângâ iněně i bweyaki bâ: ka Mâ-a vama o ele-nde, na timba.

38. Nandi momo tě, a pumakudwě dëvil, a hâhâlâkidě Mâ na ovaně nd' o mâ-a ka diyě na Mâ: ndi Jisus a valakidi mâ, na,

39. Timbaka o ndabo 'âvě mětě, oa levidě belombo bënëně bea Anyambě be had' âvě. Ka mâ-a vala, a kěķě a langwakiya o mboka eěhěpi belombo beněně bea Jisus be haki mâ.

40. E diyakindi, o Jisus a timbidi, ka bato ba vëhělěkidi Mâ na *mbya*; 'kabojana bēhěpi ba diyaki ba vengaka Mâ.

41. ¶ Umbwakiyatě, momo dina na Jai-rus a vakind' o Mâ-a jadi, a diyakidi upa-ngiyi mua sinegâg; a kwakind' o beko bea

Jisus, ka Mâ-a hâhâlidě Mâ na A kěķě o ndabo 'aju :

42. Ikabojana a diyakite mwa-mwajo umbâkâ pa, ba jomu na mepuma mebale utodu, a diyaki bya o bowaka. Nd' o Mâ-a diyakidi A kěķě ka bato ba pinyilidě Mâ.

43. ¶ Ka mwajo a diyaki na ulema mua makiya jomu na mepuma mebale, a makidě ibeaju be janidi beěhěpi na nganga, a diye na ngudi o yonga na jěhěpi,

44. A viya o mbuhw' 'aju, ka ma-a kupaně imbunja ja ngâi 'aju ; ka ulema mua ju mua makiya mu-a lena.

45. Ka Jisus a vâ, na, Nja kupaně 'Mba ? O běhěpi ba hâhidi, ka Piter na ba diyaki na ju ba vâ, na, Paia, ebimba e pinyilakid' âvě na eâ e palakě âvě, nd' o ka vâkâ, na, Nj' a kupaně 'Mba.

46. Ka Jisus a vâ, na, Moto a kupani 'Mba ; 'kabojana Mbi yěněki na ngudi e' iyonga ea pumandi o Umba-mbi jadi.

47. O mwajo a yěnidi na a ibě o kutama, ka Mâ-a viya a likimaka, ka mâ-a kwa o beko beaju, ka mâ-a pakuwa tin' 'aju e ma kupaně Mâ o boho boa bato běhěpi, na nya- ng' 'aju e yongakidi o njo pâkâ.

48. Ka Mâ-a yâ na ju, na, Mwa-mwajo, yěněkě mbya : ikamidě jâvě i yongiděnd' âvě ; kěkě na jonga.

49. ¶ O Mâ-a.diyakidi A kalaka, ka moto a viya oviya *ndabo* 'a upangiyi mua sinegâg, na vâ na mâ, na, Mwan' 'âvě a wendi ; o hake Uyokwidi njuke.

50. O Jisus a yokidi, ka Mâ-a yavwana mâ, na, O bangake : pagate o kamiděngě, vâkâna a yongindi.

51. O Mâ-a pâdi o ndabo, a ib' o ngakidě moto, kabo Piter, na Jems, na Jân, na hangwě na nyangwě e' itângâ.

52. Ka bēhēpi ba diya o kwedi, ba eyaka mâ : nd' A vâki, na, O eyakeni ; a 'bě wango, ndi a yakandi.

53. Ka bâ-ba vĕhĕ Mâ, yowĕngo na a wendi.

54. Ka Mâ-a pumě bâ bēhēpi, ka Mâ-a bweya mâ o 'nâ, ka Mâ-a ndiya mâ, na, Itângâ, umwaka.

55. K' ilina jaju ja timba, ka mâ-a hungana o 'muwa : ka Mâ-a sombiyě na a vĕkwě beja.

56. Ka hangwě na nyangwě ba mama : ndi A langwakiyi bâ na ba pakwake moto nyanga e ma hama.

KAPITA IX.

1. Já ndi jaju ja ndiya jomu ja beyokwedi na beyokwedi beaju bebale o Mâ-a jadi, ka Mâ-a vě beâ ngudi n' ipangiya ja dëvil jëhëpi, n' iyongë ja bebëdi.

2. Ka Mâ-a loma bâ ka pakuwa ipangiya ja Anyambë, na ka yongë mebëdi.

3. Ka Mâ-a vâ na bâ, na, O nângâkeni elombo ea 'këndâ, tombete metumbe, tombe elandi 'a kola, tombe beja, tombe hika; o diyakeni tombe ngâi ibale.

4. Ndabo ka ndabo eanyu e ka ngiyë, diyakani omë, o ka pumaka *tepëni* omë.

5. A ka diyë a ngid' inyëni, o inyëni o ka vëngëmëni o mboka tënë, pupwakani mahë ma beko beanyu o ilanguwa jabu.

6. Ka bâ-ba valanidë, ka bâ-ba ulwanidë mamboka, ba pakwaka sango eyamu, ba yongakë o loboko lëhëpi.

7. ¶ Ndi Hërod titrak a yokidi belombo beaju be hakidi: ka mâ-a yënë njuke, 'kabojana bâkâ ba vâki, na, Jân a pumbuwendi oviya iwedo;

8. Bâkâ, na, Ilaias nd' a pumiyedi; na bepâkwë, na, usâki umbâkâ mua vyo u pumbuwi pë.

9. Ka Hěrod a vâ, na, Jân nd' uamě a lenakidi ibâlu; nd' ekaně lě pě nja, uamě a yokakě belombo těkabe? Ka mâ-a vaha o yěně Mâ.

10. ¶ O metodu me timbidi, ka bâ-ba languwa Mâ belombo beabu be ma ha beěhěpi. Ka Mâ-a vala na bâ o pěpěké ikutakuta, o iboko via nginga via mboka e tubakwě na Bětseda.

11. O bato ba yowakidě, ka bâ-ba vitaně Mâ: ka Mâ-a věhělidě bâ, ka Mâ-a kala na bâ o pělě e' ipangiya ja Anyambě, ka Mâ-a yongě ba diyaki na mala m' iyongwě.

12. O buhwa bo diyaki bo ka hubakiya, ka jomu na babale ba viya o Mâ-a jadi, ka bâ-ba vâ, na, Valakidě ebimba, óvaně nd' o bâ-ba ka valě o mamboka na 'hiki e didi ulwaniděngo, ka yěngidě, na ka vaha beja; 'kabojana ho nd' okava o iboko via nginga.

13. Nd' A vâki na bâ, na, Inyěni vėki bâ ni beja. Ka bâ-ba vâ, na, Ho 'bě wa na membunda metano na bejaka bebale; kabo hwa vala ka hambiya bato těkaba běhěpi beja.

14. Ikabojana ba diyaki ba tâjěn itano ja bamo. Ka Mâ-a vâ na beyokwedi beaju, na, Diyakidi bâ ni mabo matano njamba pākâ.

15. Ka bâ-ba ha nonaně, ka bâ-ba diyidě bâ běhěpi.

16. Já ndi jaju ja nângâ membunda metano na bejaka bebale, o Mâ-a bēdi umbuwango oba, ka Mâ-a vambiya beâ ibâtâ, ka Mâ-a buka, ka Mâ-a vë beyokwedi na ba tēkidě o ebimba e jadi.

17. Ka bâ-ba janidě, ka bâ běhěpi ba vula : ka nguhu jabu i dikakidě ja tâludwě jomu na belinga bebale.

18. ¶ E diyakindi o Mâ-a diyaki dipâ A kalakiya, beyokwedi beaju omě na Mâ ; ka Mâ-a uwa bâ; na, Bebimba be vâkâ lě na Umba lě a nja ?

19. Ba yavwanaki, na, Jân Baptist ; ndi bâkâ bâ, na, Ilaias ; na bapâkwě bâ, na, Usâki umbâkâ mua vyo ndi u pumbuwi pě.

20. Ka Mâ-a vâ na bâ, na, Nd' o vâkâ li na Mbi lě a nja ? Ka Piter a yavwana, na, Kraist ea Anyambě.

21. Ka Mâ-a kelevidě bâ, ka Mâ-a sombiyě bâ na ba langwake moto elombo tēně ;

22. Na, Mwana-moto a ka yēni belombo beité, batodu na prist ja meolo na balēndi ba ka kiyi Mâ, a ka wěyudwěndi, na Mâ-a pumbudwě o buhwa boa hwi 'lalo.

23. ¶ Ka Mâ-a vâ na bâ běhěpi, na, Oni-

ngě *moto* a panga o vitě 'Mba a hâhâkiye nyol' 'aju, na mâ-a bapě krâs 'aju buhwa ka buhwa, na mâ-a ka vilinganakě 'Mba.

24. Ikabojana uěhěpi a ka tândě o yongě eměná 'aju a ka nyangi eâ : nd' a ka nya-ngě eměná 'aju o nyang' 'amě, mâ tepě a ka yongě eâ.

25. Ikabojana *moto* a lě kovango nde, a jeyakě he eěhěpi, na mâ-a nyangě nyol' 'aju mětě, tombete a uhwě vě ?

26. A ka yokiyě 'Mba na ndaga jamě ihâni, mâ tēpě ua Mwana-*moto* a ka yokiyě ihrâni, o Mâ-a ka viyě n' ivenda jaju mětě, na ja Hangwě, na ja enjěl i didi holi.

27. Ndi Mbi langwakiyandi inyěni ea mbambayě, o na bâkâ ba jadi okava tēme-tēme, ba ka diyě ba veke iwedo, kabo ba ta yěně ipangiya ja Anyambě.

28. ¶ E diyaki panika hwi logwambi oviya belombo tēkabe, ka Mâ-a nângâ Pite na Jân na Jems, ka Mâ-a beta o ukodi ka kaliya.

29. Mâ t' ikaliya, ka boho boaju boa ulu-wa itingidi vipakwě, na ibâtâ jaju ja bē botano i panyaka.

30. Umbwakiyate, bato babale ba ka kala-ka na Mâ ovoně, ba diyaki Mosēs na Ilaias :

31. Ba pumakiyedi n' ivenda, ba ka kalaka o pělě e' iwedo jaju i ka hânjâbidě o Jëruselem.

32. Ndi Piter na ba diyaki na mâ ba diyaki ba bě *mihâ* bodilo na viyâ: o bâ-ba umuwedi, ka bâ-ba yěně ivěnda jaju, na bamo tē babale ba tēmēki na Mâ.

33. E diyakindi, o bâ-ba vëngēmidi o Mâ-a jadi, ka Pite a vâ na Jisus, na, Paia, e ndi bwamu na ho diyaka okava: ho longaka meâkâ melalo; umbâkâ umuâvë, umbâkâ mua Mosës, na umbâkâ mua Ilaias: a yowë eaju e kalakidi.

34. A kalakate ekabe, omě o diyaki na evindi, ka eâ-ea yambiya bâ: ka bâ-ba banga o bâ-ba ngakiyedi o evindi.

35. Ka joi i diyakindi oviya evindi, na, Mwan' 'amě a tândâkě nd' ekaně: yokakiyi Mâ ni.

36. O joyi i tombidi, Jisus a duwanakiyete dipâ. Ka bâ-ba kuta jâ, bu langwaku moto o hwi tēdině belombo tē ibeabu be yěnekidi beně.

37. ¶ E diyakindi, o buhwa bopâkwě, o bâ-ba hubidi o ukodi ka ebimba eněně ea lata na Mâ.

38. Umbwakiyate, momo ua njamba a

yamaka na, Uyokwidi, mbi hâhâlidënd'âvê, na umbwakiya 'mba mwan' 'amê ua momo; 'kabojana mbi te mâ mwana umbâkâ.

39. Umbwakiyate, ilina i bweyingê mâ, na mâ-a yamaka matota; i hunjaka mâ, a pumakê ivudi, i nyingaka mâ, manini ma na i vêngême na bovêngêmêkê.

40. K' umba-mba hâhâlidê beyokwedi beâvê nana ba pumakê jâ; ndi ba yâlê.

41. Ka Jisus a yavwana, na, E! igona ja belenganango, na ipuhwa j' ikamidê, Mbi ka diya lê n' inyëni nj' ulingo-ê, n' Umba-mba 'yika inyëni? Pâkidëngê mwan' 'âvê okava.

42. A vakate, ka dëvil ea bweya mâ ubondo, e ka hunjaka mâ. Ka Jisus a kandidê ilina tē ibe, ka Mâ-a yongê mwana, ka Mâ-a bweyidê mâ hangwê.

43. ¶ Ka bâ bēhēpi ba mama ngudi ea Anyambê 'nēnē. O bâ bēhēpi ba diyaki ba mamaka belombo bea Jisus be hakidi bēhēpi, mâ na beyokwedi beaju, na,

44. Ngakidēni ndaga tēkadi o matâ manyu: 'kabojana Mwana-moto a ka bweyudwēndi o benâ bea bato.

45. Bâ ib' o bweyakidê ndaga tēkanê, e

diyaki kutamango o bâ-ba jadi, nana bu yěněke eá: ba bangaki o uwa Mâ opěla ndaga těně.

46. ¶ Ka usâja u betakindi o bâ-ba jadi, na, a lě a nja a ka diyě boněně wa.

47. Jisus a yowakiděte ipikiliya ja melema meabu, ka Mâ-a nāngâ etumbě, ka Mâ-a tědě mâ o boho boaju.

48. Ka Mâ-a vâ na bâ, na, A ka věhělídě etumbě tēkae o dina jamě a ka věhělídě 'Mba; a ka věhělídě 'Mba, a věhělěkiděndi a lomaki 'Mba: 'kabojana a di yěviyěngo wa o inyěni běhěpi, mâ tepě a ka diyě boněně.

49. Ka Jân a yavwana ka mâ-a vâ, na, Paia; ho yěněkindi umbâkâ a věngěkidě děvil na dina jâvě; ka hwě hwa kandidě mâ, 'kabojana a vitanakě hwě.

50. Ka Jisus a vâ na ju, na; O kandakidě *mâ*: 'kabojana a ha hingaka na hwě a nd' o pěl' 'ahu.

51. E diyakindi, o 'gombe e běki pāngo eaju e ka 'mbaka o beta oba, ka Mâ-a vongudě boho boaju n' ivala ja Jěruselěm.

52. Ka Mâ-a loma metodu o boho boaju: ka bâ-ba vala, ka bâ-ba ngiya o mboka ea ba Samaria, ka kokě o pěl' 'aju.

53. Ba ib' o vĕhĕlĕkidĕ Mâ, 'kabojana boho boaju bo' diyakindi ona A kĕkĕ o Jĕruselĕm.

54. O beyokwedi beaju Jemš na Jân ba yĕnidi, ka bâ-ba vâ, na, Upangiyi, o ka kamidĕte ho sombiyakĕ vey a na vi hubake oviya 'ba, na viâ-viâ hinidĕ bâ, panika Ilaias a hakidi?

55. Nd' a ulwakindi, ka Mâ-a hĕnjĕ bâ; ka Mâ-a vâ, na, Oa 'wĕni jângâ ja malina manyu ma jadi.

56. Ikabojana Mwana-moto au vaka ka weya bemĕnâ bea bato, ndi kabo ka yongĕ. Ka bâ-ba 'la o ibâkâ ipâkwĕ.

57. ¶ E diyakindi, o njea o bâ-ba diyaki ba kĕkĕ, ka *moto n' uhuhu* a vâ na Ju, na, Upangiyi, mbi ka vitĕnd' âvĕ iboko viĕhĕpi i viâvĕ vi ka valĕ.

58. Ka Jisus a vâ na ju, na, Mehingi me na meboka, na lonâni la oba *na* mumbu; ndi Mwana-moto a 'bĕ n' iboko via nangidĕ molo.

59. Ka Mâ-a vâ n' upâkwĕ, na, Vitakĕ 'Mba. Nd' a vâki, na, Upangiyi, hulwakidĕ 'mba mbi t' o vala mbi tonge paia tongango.

60. Jisus a vâki na ju, na, Bekengo be tongake bekengo beabu; ndi kĕkĕ ka pakuwa ipangiya ja Anyambĕ.

61. K' upâkwě a vâ pě, na, Upangiyi, mbi ka vitěnd' ávě, ndi mbi t' o vala ka yohaně ba did' o ahy o ndabo 'amě.

62. Ka Jisus a vâ na ju, na, O 'bě na moto a běkě enâ 'aju kahiděngo o plau, a timbakě maběyi a ka diyě kokango n' ipangiya ja Anyambě.

KAPITA X.

1. O helombo těkabe be tombidi ka Upangiyi a pânâ pě bapâkwě mabo hěmbwědi, ka Mâ-a loma bâ babale babale o boho boaju o mamboka n' iboko viěhěpi, i viaju vi ka valě.

2. Ovaně nd' o Mâ-a vâki na bâ, na, Pâkwěpâkwě juma i boněně, ndi bahayi ba nyěvâ: nandi kalakiyani Upangiyi mua juma, na A lomake bahayi o jum' 'aju.

3. Kěkěteni: umbwakiyatěni, Mbi lomakandi inyěni ka bana ba medâmbě o hanganě ea njâ.

4. O bapakěni elandi ea *hika*, tombe ea kola, tombe makogo; o homakeni moto o njea.

5. Ndabo eanyu e ka ngiyě eěhěpi taká vâni, na, Jonga o ndabo těkaně.

6. Oningě mwana ua jonga a diyet omě, jonga janyu i himbake omě: oningě a diye, i timbakete inyěni o jadi :

7. Diyakateni o ndabo tě, o jakani o mâtákâni belombo beabu be ka věyě: 'kabojana uhayi a weyango ivě jaju. O umwakani oviya ndabo pâkâ nala epâkwě.

8. Mboka eěhěpi eanyu e ka betě, na bâba věhělidě inyěni, jakani belombo be tēkudwě o boho boanyu :

9. Yongaki mebědi me did' omě, n' inyi na bâ, na, Ipangiya ja Anyambě i bakami-ndi o inyěni-o jadi.

10. Ndi mboka eanyu e ka betě eěhěpi, ba věhělidě inyěni, kěkěni uhěngě mua omě, oa vwi, na,

11. Ho pupwakiyate inyěni, tombe na mahě ma mbok' 'anyu, ma di hwě natamango o beko : ndi yowakěni ekae pâkwě-pâkwě, na ipangiya ja Anyambě i bakami-ndi o inyěni-o jadi :

12. Ndi Mbi vâki n' inyěni, na, o buhwa tēboně tāmâkâ pě Sâdâm, na mboka tēně.

13. Maguga na nâvě, Koresin! maguga na nâvě, Bětseda! 'kabojana behavu beněně be di hawěngo inyěni, be jaka be hakudwě Tair na Saidân, te ba diyaki ba uluwa, diyango na bangisi na jubu ovyo.

14. Ndi tâmâkâ pě Tair na Saidân o buhwa boa yěkě, n' inyěni.

15. Na nâvě, Kapěrnaum, o diyaki oa betudwě oba, o ka pukudwěndi o hěl.

16. A yokakiyě inyěni a yokakiyi 'Mba; na a pějěkě inyěni a pějěki 'Mba; na a pějěkě 'Mba a pějěkěndi a lomaki 'Mba.

17. ¶ Ka mabo hěmbwědi ba timba na mbya, na, Upangiyi, tombe na děvil i ma yokakiyi hwě o dina jâvě.

18. Ka Mâ-a vâ na bâ, na, Mbi ma hili Setan a kwaka oviya 'ba ona epělupělu.

19. Umbwakiyateni, Mbi věndi inyěni ngudi e pitakě mbamba na makole, wa na ngudi yěhěpi ea ndoba; o 'bě na 'lombo e ka kokidě inyěni.

20. Ndi o peyakeni na ekae, na malina ma ka yokakiyandi inyěni; ndi tâmâkâni o peya, nana mina manyu ma lěndwěngo oba.

21. ¶ Iwěla tědině ndi ja Jisus i peyaki n' ilina, ka Mâ-a vâ, na, Paia, Upangiyi

mua oba na he, Mbi věkěnd' ávě akeva ka ávě-o di kutiyango b' iyowě na ba bokeli belombo těkabe, na nâvě o 'ala ka sala-ka beâ mekěkě; e nonaně Paia; 'kabojana nonaně nd' o eâ e' yěněněki bwam' o mihâ mâvě.

22. Paia a 'Mba věngo belombo beěhěpi: o 'bě na moto a yowudě a di Mwana, kabo Hangwě; o 'bě tepě na moto a yowudě a di Hangwě, kabo Mwana, na ua Mwana a ka pangě o sala.

23. ¶ Ka Mâ-a 'luwa o beyokwedi beaju be jadi, ka Mâ-a vâ *na bâ* ikutakuta, na, Ibâtâ na mihâ ma yěněkě belombo beanyu be yěněkě:

24. Ikabojana Mbi langwakiyandi inyě-ni, na, mesâki na mepolo meitě me vaha-kind' o yěně belombo tě ibeanyu be yěněkě ekabe, ndi bu yěněkě *beâ*; na o yoka ekabe, ndi bu yokaka.

25. ¶ Umbwakiyate, upakuwi mua belekanako umbâkâ a tēměkindi, ka mâ-a yějiyě Mâ, na, Uyokwidi, mbi hake lě na ijiga ja eměná ea 'gombe eěhěpi?

26. Ka Mâ-a vâ na ju, na, E lě lě-ndwěngo o belekanako na? o langaka lě na e?

27. Ka mâ-a yavwana, na, Tândâkâ Upangiye Anyambě 'âvě na ulema muâvě muěhěpi, n' ilina jâvě jěhěpi, na ngud' 'âvě .eěhěpi, n' ipikiliya jâvě jěhěpi; na moto a bakakě na nâvě ka nyol' 'âvě mětě.

28. Ka Mâ-a vâ na ju, na, O yavwani hohonganěgo: o hangě ekae, vâkâna o yongindi.

29. Ndi a vahaka o huwudě nyol' 'aju, ka mâ-a vâ na Jisus, na, Ndi moto a bakakě n' umb' a lě a nja?

30. Ka Jisus a yavwana mâ, na, Moto n' uhuhu a hubaka oviya Jěruselēm na 'la o Jěriko, ka mâ-a lata na meibi, me patwaki mâ ngâi jaju, ka meâ-mea luma mâ mavenge, ka meâ-mea 'lanidě, dikango mâ piělě na bowaka.

31. Ka prist pâkâ ea huba tepě na njea tě ea vale vale; o mâ-a yěni' mâ, ka mâ-a bambuwa o pěpěkě 'pâkwě.

32. Ka ua Livai tepě, o mâ-a diyakidi iboko tě, ka mâ-a pâ ka yěně mâ, ka mâ-a bambuwa o pěpěkě 'pâkwě.

33. Ndi ua Sameria n' uhuhu, o mâ-a tamwakidi ekěndâ 'aju, ka mâ-a pâ o mâ-a jadi; o mâ-a yěni mâ, ka mâ-a yěniyě mâ ngěbě.

34. Ka mâ-a vala o mâ-a jadi; ka mâ-a kata mavenge maju, a hovakidě mavule n' ivě, ka mâ-a diyidě mâ o tito 'aju mětě, ka mâ-a vana mâ o ndabo 'a bangi, a ka bandamakidě mâ.

35. Buhwa bwe, o mâ-a diyakidi a kě-kě, ka mâ-a hoduwa fula ibale, ka mâ-a vě jâ a duwě ndabo, ka mâ-a vâ na ju, na, Bandamakidě mâ: mbi ka timbět' âvě, eâvě e ka pelidě wa, o umba-mbi ka pâyě pě.

36. Nandi, o balalo ekaba, nj' uâvě a piviyakě na, a diyaki moto a bakakě na a lataki na meibi?

37. Ka mâ-a vâ, na, Mâ-a hakidi mâ kě-ngâ. Jâ ndi ja Jisus ja vâ na ju, na, Kě-kě, na nâvě oa ha nyanga tě.

38. ¶ E diyakindi, ba kěkěte, ka Mâ-a ngiya o mboka ehâlě na ehuhu: ka mwajo n' uhuhu, dina na Martha, a věhělěkidě Mâ o ndabo 'aju.

39. A diyaki na iluku a tubakwě na Meri, a diyaki tepě o beko bea Jisus, a yokaka ndaga jaju.

40. Ndi Martha a diyakindi a njěmbělě-někě n' iha, ka mâ-a pâ o Mâ-a jadi, ka mâ-a vâ, na, Upangiyi, oa yěněk' isâlâ ka

iluku jamě a diki 'mba na mbi hake di-pâ? langwakiya mâ ovaně nd' o mâ-a ka haně 'mba.

41. Ka Jisus a yavwana ka Mâ-a vâ na mâ, na, Martha, Martha, o nakakate na nâvě o yěněkětě njuke na belombo beité;

42. Ndi elombo eâkâ ndi e di na mala; Meri nd' a pânidi ngabo eyam', e ka mëndě e nângânwě mâ.

KAPITA XI.

1. E diyakindi, o Mâ-a diyakidi a ka-lakiya o iboko n' ihuhu, Mâ pa, ka eyokwed' 'aju eâkâ ea vâ na Ju, na, Upangiyi, yokwakidě hwě ikaliya, ka Jân a yokwakidě tepě beyokwedi beaju.

2. Ka Mâ-a vâ na bâ, na, O inyěni-o kalakiyěni, vâki, na, Hangw' 'ahu a jad' oba, Dina jâvě i diyake holi. Ipangiya jâvě i vake. Upango muâvě u hamake o he, ka mu jad' oba.

3. Věkě hwě buhwa ka buhwa beja beahu bea buhwa bohuhu.

4. Na nâvě o ka 'yakidě hwě bobe boahu; 'kabojana ho iyakidě tepě ba di hwě

nuwanango běhěpi. O valakidě hwě iyě-judwě; ndi věngěkidě hwě o bobe.

5. Ka Mâ-a vâ na bâ, na, Nja a jadi inyěni o jadi a běkě mâ na mboi, na eâ-ea viya o mâ-a jadi na bulu hanganě, na eâ-ea vâ na ju, na, Mbweyi 'amě, vě 'mba okava membunda melalo;

6. Ikabojana mboi 'amě e viyedi o 'kěndâ e lumbiyi 'mba, mbi 'bě na 'lombo e yambiya mâ:

7. Ua ndabo a ka yavwani o utema, na, Ka nyungudě 'mba: jâmbě i dibamindi, hwě na bana bamě hwa běndi ikondo; mba yâlě o 'muwa n' umba-mba vě âvě.

8. Mbi vâki n' inyěni, na, Tombe a 'muwe na mâ-a vě mâ, o pělě 'a na a mboi 'aju, ndi 'kabojana ililimidě jaju j' iuwa a ka 'muwandi na mâ-a vě mâ nyang' 'aju e ka vahě.

9. N' Umba-mbi vâki n' inyěni, na, Uwakani, e ka věwěndi inyěni; vahakani, o ka duwandini; tinakiděni, i ka dubudwěndi inyěni.

10. Ikabojana a uwakě uěhěpi a pâhakiyandi; a vahakě a ka duwandi; na o a tinakidě i ka dubudwi mâ.

11. Oningě mwa momo a jomba inyi ba

di ba hangwě pěmbě, a ka vi mâ ilale?
tombe ejaka, a ka vi mâ mbamba o pělě 'a
ejaka?

12. Tombe a uwa dikě, a ka vi mà ikole?

13. Pě lě 'nyěni, ba didi bobe, oa yowě lě
ni ivě ja bana banyu belombo beyamu; na
kumbanakidě Hângw' 'anyu a jad' obe ha-
nga na A ka vi ba uwakě Mâ Ilina Iyamu
wa?

14. ¶ A diyakindi a vëngëkidě dëvil, e
diyakidi emukumuku. E diyakind' o dëvil
e vëngëmidi, ka emukumuku ea kala; ka
bato ba mama.

15. Ndi bâkâ o njamb' 'abu ba vâki, na,
A vëngëkidi dëvil na Biëlsibub upolo mua
dëvil.

16. Bapâkwě, ba uwaki Mâ ndembo ovi-
ya 'ba o bo yějěkiyě.

17. Ndi Mâ yowěngo ipiviyedi jabu, A
vâki na bâ, na, Ipangiya jěhěpi i pěhěkě na
jâ mětě i ka jiliyandi; na ndabo ea pěhě na
ndabo e ka kwandi.

18. Oningě tepě Setan a pěhě na mâ
mětě, ipangiya jaju i ka tēmě lě na? 'kabo-
jana o vâkândi na Mbi vëngëkidi dëvil na
Biëlsibub.

19. Ndi nja ua bana banyu a vëngënëkidě

děvil, oningě na Mbi vëngëkidě já na Biëlsibub? ovaně nd' o bâ-ba ka diyě bayëkidi banyu.

20. Nd' oningě na Mbi vëngëkidě děvil n' upenjo mua Anyambě, vâkâna ipangiya ja Anyambě i pândi o inyëni-o jadi.

21. Oningě moto ukolo na bevolani a takata ndabo 'aju, jumba jaju i diyaki hwëi :

22. Nd' oningě ua ngudi wa na mâ a pâ o mâ-a didi, na mâ-a bala mâ, a patwana mâ bevolani beaju be ma pitakidě beëhëpi, bëngě a kabake imano.

23. A ha 'bë n' Uмба a 'bë o pêl' 'amě ; a ha na yolanakě 'Mba a pajanganakëndi.

24. Oningě ilina ibe já vëngëmě na moto, i tamwakandi o loboko la yaheyahe, a vahaka iyâjâ ; a duwe, ka mâ-a vâ, na, Mbi ka timbandi o ndabo 'amě o umb' i vakiyedi.

25. O mâ-a pâdi, ka mâ-a kâbidě eâ viyâwëngo na kembwëngo.

26. Já ndi jaju ja vala ka nângâ na mâ mëtě malina mapâkwě hëmbwëdi bobě wa na mâ mëtě ; ka mâ-ma ngiya, ka diya omě : madikanido ma moto tënë ma bobě wa na o bohoboho.

27. ¶ E diyakindi, o Mâ-a diyakidi a kalaka belombo tëkabe, ka mwajo umbâkâ ua

njamba a betě joyi jaju, ka mâ-a vâ na mâ, na, Ibâtâ n' ihuhu i bapakid' âvě, na mabě mâvě na nyangakidi.

28. Ka Mâ-a vâ, na, E, ibâtâ wa na ba yokakě ndaga ja Anyambě, na bâ-ba tataka já.

29. ¶ O bato ba diyaki ba palaně ta, a yalakiděndi o vâ, na. Ekadi ndi igona ibe: i vahaki ndembo; nd' o 'bě na ndembo e ka věwě já, kabo ndembo ea Jonas e' usâki.

30. Panika Jonas a diyakidi ndembo o ba Niniva ba jadi, nonaně tepě Mwana-moto a ka diyě o igona těkadi.

31. Konde ea diko e ka tēměndi o yěkě na bamo b' igona těkadi, na a kwehě bâ: 'kabojana a vakiyendi o mahuka ma he ka yoka iyowě ja Sâlomân; ndi hilakěteni, uněně wa na Sâlomân a nd' okava.

32. Bato ba Niniva ba ka 'muwi, ka kwehě igona těkadi o yěkě: 'kabojana ba ulwakindi n' ipakuwedi ja Jonas; ndi umbwakiyate, uněně wa na Jonas A nd' okava.

33. O 'bě na moto, a běkě vitwa yoděngo, na mâ-a tědě viâ iboko vi' 'kutakuta, hanga tepě ibomako ja kwe, nd' o uhângâ, na ba ngakiyě ba ka yěněkě bwe.

34. Bwe ya nyolo ndi dihá: nd' oningě dihá javě i tamuwingě bwe, nyol' 'ávě eěhěpi e ka londi na bwe; nd' oningě i diyingě bobe, nyol' 'ávě e ka londi tepě n' ivititi.

35. Bandamakidě, o banga bwe e di na nâvě ea diya ivititi.

36. Nd' oningě nyol' 'ávě eěhěpi ea diya ti na bwe, e diye na pělě e didi ivitit', *nyol' 'ávě* eěhěpi e ka diyi ti na bwe, bwěsě o na vitwa vi yodakě na ngudi vi vėkě ávě bwe.

37. ¶ O Mâ-a diyakidi a kalaka, ka Farisi n' uhuhu ea hâhâlidě Mâ na A jake na ju, ka Mâ-a ngiya o mâ-a jadi ka Mâ-a diya o beja.

38. O Farisi a yěnidi, a ka mamaka na au tuka benâ na Mâ-a taka o diya o huma.

39. K' Upangiyi a vâ na ju, na, Hângě inyi Farisi o tanakěni sěngě na epělě o bwebwe; nd' o utema muanyu u di ti na majake na bobe.

40. *Inyi* betiketike, a 'běte a velakidi bea bwebwe, a velakidi bea utema tepě?

41. Ndi vėkěni bova boa beanyu be ja-

nidi; vâkâna belombo beëhëpi bea bëndi botano o inyëni-o jadi.

42. Maguga n' inyëni, Farisi! 'kabojana o vëkëndini ea jomu ja mint na ru na belombo be tombwakë beëhëpi, ndi o tombakëni yëkë n' itândë ja Anyambë: ekabe ndi beanyu be lukakid' o ha, nd' o dika tepë ni bepâkwë be hawe.

43. Maguga n' inyëni, Farisi! 'kabojana o tândâkândini bediya benënë o sinegâg, na mahomwë o lohambanido.

44. Maguga n' inyëni, balëndi na Farisi, menoki! 'kabojana o ndi ka malonga ma ha yënënekë, na bato ba kundwakë mâ ba yowe.

45. ¶ Ka ubweyidi mua belekanako umbâkâ mâ-a yavwana, ka mâ-a vâ na Ju, na, Uyokwidi, o âvë-o vâkë nonanë o bëte o hënjëkë na hwë ta.

46. Ka Mâ-a vâ, na, Maguga tepë n' inyëni, babweyidi ba belekanako! 'kabojana o bapakidëndini bato maumba madilo n' ibapë, nd' inyi mëtë o kupanëni maumba tē n' upenjo muanyu umbâkâ.

47. Maguga n' inyëni! 'kabojana o longakandi malonga ma mesâki, bahangwë banyu ba weyaki meâ.

48. Mbambayě o ndini leviděngo na o kamakiděndini behadi bea bahangwě banyu, 'kabajana bâ-ba ma weyaki meâ, inyěni o longakani malonga mabu.

49. Ovaně nd' o iyowě ja Anyambě i vâkě, na, Mbi ka lomi mesâki na metodu o bâ-ba jadi, ba ka weyakandi na bâ-ba ngongolakidě bâkâ :

50. Ovaně nd' o makiya ma mesâki mēhěpi, ma tâdi oviya jali ja he, ma ka uwě igona tēkadi ;

51. Oviya makiya ma Eběl na pâ makiya ma Sakaraias, a wakidi o hanganě ea âlta na tēmpěl : Mbi langwakiyandj inyěni pâkwěpâkwě, na, Be ka uwěndi igona tēkadi.

52. Maguga n' inyěni, babweyidi ba belekanako ! 'kabajana o vengiděndini enunguna e' iyowě : n' inyi mětě o ngiyeni, n' inyěni-o himbakiděni ba ombakě o ngiya.

53. O Mâ-a diyakidi a kalaka na bâ belombo tēkabe, balěndi na Farisi ba ka tundwakidě Mâ bakita bakita, o bohihakidě Mâ na A kalake belombo beitě :

54. Ba bēmběkě Mâ, ba vahaka o kaha elombo o udumbu muaju, eabu e ka tubě Mâ.

KAPITA XII.

1. O egombe tēenē, o bato baitē ba lata-nakiyedi lataniyango ba diye na tango, ba pitanaka na bwingē, a ka yalaka o vā na beyokwedi beaju na bohoboho, na, Keleva-kani na ilanda ja Farisi, i jadi inoka.

2. Ikabojana o 'bē na 'lombo e di vihamango, e ka mēndē e saliye; tombe kutamango, e ka mēndē e yowanē.

3. Ovanē nd' o eanyu e kalakidi n' ivitit' e ka yokanē o bwē; n' ibeanyu be kalakidi o matā o lolika be ka hamanudwēndi o menyuwa.

4. Mbi vāki n' inyēni mboi jamē, na, O bangakeni ba weyakē nyolo, yenē pa ba diye pē na eabu e di ba haka.

5. Ndi Mbi ka kelevidēndi inyēni uanyu a ka hangē: Bangaki Mā ni, a didi a bēkē weyango na Mā na ngudi e uhwakē o hēl; e, Mbi vāki n' inyēni, na, Bangaki Mā ni.

6. Tēmbēlēmbē itano ja hambakwē fa-thing ibale? na ea pākā ea behaliye o Anyambē a jadi.

7. Ndi na howe janyu ja molo jēhēpi i nd' o tango. O bangakeni: o kebakēndi tēmbēlēmbē iitē.

8. Mbi vâkâ tepě n' inyěni, na, Uěhěpi a ka mēmiyě 'Mba o boho boa bato, mâ tepě ua Mwana-moto a ka mēmiyě o boho boa enjěl ja Anyambě:

9. Nd' a ka hâhiyě 'Mba o boho boa bato a ka hâhudwi tepě o boho boa enjěl ja Anyambě.

10. Na a ka kalě ndaga o pělě 'a Mwana-moto, e ka 'yidwi mâ: nd' a ka kilě Ilina Iyam' a iyidwě.

11. O bâ-ba ka pādě inyěni o sinegâg, na o bapangiyi, na o ngudi i jadi, o nakakeni nyanga e tombeeanyu e ka yavwaně, tombeeanyu e ka vâyě:

12. Ikabojana Ilina Iyam' i ka yokuděte inyěni nyang' 'anyu e lukakě o vâ o iwěla tēdině.

13. ¶ Ka moto n' uhuhu ua njamba a vâ na Ju, na, Uyokwidi, kalaka na mwan'-ina, na a kabake n' uinba ekuha.

14. Ka Mâ-a vâ na ju, na, Momo, nj' a pangaki 'Mba uyěkidi n' ukabi muanyu?

15. Ka Mâ-a vâ na bâ, na, Kelevakani, n' inyěni o ka bandamakiděni itângina: 'kabojana eměná ea moto e 'bě o belombo beité ibeaju be pigakě.

16. Ka Mâ-a kaniya bâ ukanakâdi, na, He ea enami n' uhuhu e lêngâkindi beité :

17. Ka mâ-a pikiliya n' ulema, na, Mbi hake lě na, 'kabojana mbi 'bě n' iboko via kotidě bebuma beamě ?

18. Ka mâ-a vâ, na, Mbi hake kakana : mbi bulwakiděndi kundu jamě, n' umbamba longa iněně ; omě nd' umba-mbi ka kotidě bebuma beamě na ngumb' 'amě eě-hěpi.

19. N' umba-mba vâ n' ilina jamě, na, Ilina, o kotudwěngo ngumba eité ea mepuma meité ; yâjâkâ, jaka, mâtâkâ, peyaka.

20. Nd' Anyambě a vâki na ju, na, O ndi etiketike, ilina jâvé i vahakwěnd' âvé o bulu těkabo : vâkâna ibeâvé be kuhidi beně be lě bea nja ?

21. Eâ nyanga tě te 'a a kuhakě hika 'aju mětě, a diye enami o pělě 'a Anyambě.

22. ¶ Ka Mâ-a vâ na beyokwedi beaju, na, Ovaně nd' Umba-mbi vâkě n' inyěni, na, O nakakeni eměná 'anyu sasě, ibeanyu be ka jě ; tombe na bea nyolo janyu, n' ibeanyu be ka bătě.

23. Eměná e wa na beja, na nyolo wâ na ibâtâ.

24. Hilakěteni byungu, 'kabojana bea liyaka na bea-bea benjaka; be 'bě na kundu na ndabo; nd' Anyambě a jakiděte bea: o 'běni bwamu wa na lonâni?

25. Nj' a didi inyěni-o jadi a didi a bada-ka ekulu bwaba ka hamba 'nâ o utě muaju na bonakaka?

26. Oningě o diyeni na ngudi e hakě elo-mbo e di yěviyěngo, e lě nd' eanyu e naka-kě bepâkwě?

27. Hilakěteni ka manga ma tombwakě: ma haka ehavu, na mâ-ma vihaka; ndi mbi vâki n' inyěni, na, pě lě Sâlomân n' ivenda jaju jěhěpi a ib' o bâtakâ ka manga těkama.

28. Ndi pě lě Anyambě a bâtidě lě behavu, be jadi o buhwa o 'hiki, vakě bea bě o diyâ; a bâtidě inyěni wa? O ndini n' ika-midě ihâlě.

29. O vahakeni eanyu e ka jě, tombe eanyu e ka mâtě, o diyake tepě ni na melema mea penda.

30. Ikabojana betomba bea he be vaha-kandi belombo těkabe beěhěpi: ndi Hângw' 'anyu a te yowěngo na o ndi na mala ma belombo těkabe.

31. ¶ Ndi vahakani o bohoboho ipangiya

ja Anyambě; vâkâna belombo tĕkabe beš-
hĕpi be ka badudwĕndi inyĕni.

32. Mwanga uhâlĕ, o bangakeni; 'kabo-
jana Hângw' 'anyu a tândângo o vĕ inyĕni
ipangiya.

33. Hambakidĕni ibeanyu be janidi, vĕki
mekuge; kenjakĕni o pĕl' 'anyu belandi be
ha dunaka, hika oba e ha makiya, o mwibi
u ha bakamaka, o nyĕlĕlĕ e ha 'bĕ na ngu-
di o jongolidĕ.

34. Ikabojana o hik' 'anyu e jadi, te ule-
ma muanyu u ka diya tepĕ.

35. Behena beanyu be diyake tingwĕngo,
na litwa lanyu lo yodakani.

36. N' inyĕni mĕtĕ ka bato ba vengakĕ
upangiyi muabu, o mâ-a ka pâyĕ oviya
diba; ovanĕ nd' o mâ-a ka bĕ a pângĕ
a tinakidĕ, ba dubwakiya mâ o mbenjĕ
pâkâ.

37. Ibâtâ na bahayi tĕbanĕ, ba upangiyi
a ka kâbidi ba pepwaka o mâ-a ka timbĕ:
Mbi langwakiyandi inyĕni pâkwĕpâkwĕ,
na, a ka tingandi utumba, na mâ-a diyidĕ
bâ o beja; na mâ-a viya ka haya bâ.

38. Oningĕ na a ka pâyĕ elahe 'a be-
bale, tombe elahe 'a belalo, na mâ-a kâbidĕ
bâ nonanĕ, ibâtâ na bahayi tĕbanĕ.

39. Ndi yowakëni ekae, na, a duwakë ndabo a jaka a yowakë iwëla ja mwibi u ka pâyë, a ka pepwandi, a hulide ndabo 'aju e tubakwë.

40. Diyaka tepëni kokëngo: 'kabojana Mwana-moto a vakandi iwëla janyu i ha pikilakiyani.

41. ¶ Jâ ndi ja Piter ja vâ na Ju, na, Upangiyi, hwë te ibâvë ba kanakiyë ukana-kâdi tēkamu, ipë na bēhēpi?

42. K' Upangiyi a vâ, na, Nja jadi yongo ea bokeli na yunya e' upangiyi *muaju* u ka tēdē mâ upepuwi mua ndabo, a kabakë beja o hongodi 'aju?

43. Ibâtâ n' uhayi tēmune, e' upangiyi *muaju* o mâ-a ka pâyë a ka kâbidi mâ na a haka nonanë.

44. Pâkwëpâkwë Mbi langwakiyandi inyëni, na, a ka tēdē mâ upangiyi mua *ibeaju* be janidi beēhēpi.

45. Nd' oningë uhayi tēmune mâ-a vâ n' ulema *muaju*, na, Upangiyi *muamë* u dilidëndi ipâ jaju; a ka yalakë o boma bahayi ba bamo na ba bajo, a jaka, a mâtâkâ, a peyaka,

46. Upangiyi mu' uhayi tēmune a ka pândi o buhwa boaju bo ha umbwakiyi mâ,

iwěla jaju i ha bandamakidě, a ka leni mâ kya, na mâ-a vē mâ ngabo 'aju na ba ha kamakidě.

47. Uhayi tě u yowakidě upango mua upangiyi muaju, a kenjě, a haye ipangidi viaju, a ka bomwi metilakwě meitě.

48. Nd' a ha yowakide, a 'la ka ha belombo twětwe na mbomako, a ka bomwi mehâlě. Ikabojana a věkwě beitě, a ka uwě beitě; ua bato a bweyakidě beitě, má tepě uabu a uwakě wa.

49. ¶ Mbi pwi ka huludě vey a o he; ndi Mbi pangaka lě nde, oningě via kalwa?

50. Ndi Mbi na baptisma eamě e ka baptaiswě; Mbi ka naka lě pě ndi e t' o maya!

51. O yebakiyandini na Mbi viyi ka vě jonga o he? Mbi languwendi 'nyěni, na, Nyawě; te kabo ipěhě:

52. Oviya 'gombe těkae batano o ndabo pâkâ ba ka pěhěndi, balalo pěhěngo na babale, babale pěhěngo na balalo.

53. Hangwě a ka pěhi na mwa-momo, mwa-momo na hangwě; nyangwě na mwa-mwajo, na mwa-mwajo na nyangwě; nyangwě 'a momo n' ubâmbi, n' ubâmbi na nyangwě 'a momo.

54. ¶ Ka Mâ-a vâ tepě na bato, na, O bě-kětení o yěningěni evindi e pumakě o pělě 'a manga, elěngiaha inyěni mâ, na, Unyěngě u vakandi; na eâ e diyaka *tepě* nonaně.

55. N' upupě mua diko u vungaka, inyěni, na, Yomu e ka diyandi; na eâ e hamaka.

56. Menoki! o yowuděndini iyebiya ja boho boa oba na he; nd' e lě nd' eanyu e ha yebakiya egombe *těkae*?

57. E, nd' e lě nd' eanyu e ha yěkěkidě inyěni mětě e di hohonganěngo.

58. ¶ Oningě o kěkě na ndoba 'vě na 'la o uyěkidi u didi, hunganaka o huludě mâ nyol' 'ávě, o njea; banga a dula 'vě o uyěkidi u jadi, n' uyěkidi mâ-a vě ávě ubweyani muaju na a uhwa 'vě o ndabo 'a ntyogo.

59. Mbi langwakiyand' ávě, na, oa pume omě, kabo oa vě vipupuhu yia madikanido.

KAPITA XIII.

1. Omě o diyaki na bâkâ ba langwakiyi Mâ o pělě 'a ba Galili, ba Pailat ba hâbâ-kidě makiya mabu na meambo meabu.

2. Ka Jisus a yavwana ka Mâ-a vâ na bâ, na, O yebakiyandini-na ba Galili baně

ba diyaki bobe wa na ba Galili bēhēpi, 'ka-bojana ba hakudwi belombo tēkabe ?

3. Ndi Mbi langwakiyandi inyēni, na, Nyawē: inyēni bēhēpi o ka wati nyanga tē, kabo oa uluwani.

4. O pikilakiyandini na tombe jomu na lowambi tē, i vihamakiyi na elongo o Siloam, ka eā-ea weya bā, ba bobe wa na ba diyaki o Jēruselēm bēhēpi ?

5. Ndi Mbi langwakiyandi inyēni, na, Nyawē: inyēni bēhēpi o ka wati nyanga tē, kabo oa uluwani.

6. ¶ Ka Mâ-a kaniya tepē ukanakâdi tē-kamu, na Momo n' uhuhu a diyaki na ele 'a fig liwēngo o mwanga muaju; ka mâ-a pâ ka vaha bebuma omē, nd' a duwe.

7. Já ndi jaju ja vâ na utati mua mwa-nga muaju, na, Hilakēte, o mepuma tē me-lalo ekame ndi imeamē me pâdi ivaha ja bebuma o ele tē ea fig ekae, ndi mbi duwe: kwēlēkē eā; e palakē lē he na nde ?

8. Ka mâ-a yavwana ka mâ-a vâ na mâ, na, Upangiyi, ta dika tepē eā upuma tē-kamu mbwe, mbi t' o tonga eā, na pepe-njanē eā;

9. Ipē e ka jate bebuma: nd' oningē e jaye, bēngē kwēlēkē eā.

10. ¶ A diyakidi a yokwakidi o sinegâg pâkâ o buhwa bo' Iyâjâ.

11. Hilakête, mwajo a diyakidi n' ilina j' ikâhâ jomu ja mepuma na mepuma lowambi, tumbamango, au yâlâkê o tepuwa na vilolombo.

12. O Jisus a yêni mâ, ka Mâ-a ndiya mâ o Mâ-a jadi, ka Mâ-a vâ na ju, na, Mwajo o 'njuwaniyendi oviya ikâhâ jâvê.

13. Ka Mâ-a kahidê mâma kadu maju: ka Mâ-a tēmê de o mbenjê pâkâ, a bendakê Anyambê.

14. K' upangiyi mua sinegâg a yavwana na malingwa, 'kabojana Jisus a yongakidêndi o Iyâjâ, ka mâ-a vâ na ebimba, na, Ho na hw' utoba ja bato i lukakê o ha behavu: vakani nandi ka yongakwêni o hwi tēdinê, ndi hanga o buhwa bo' Iyâjâ.

15. K' Upangiyi a yavwana mâ, na, Âvê unoki! inyêni, uêhêpi oa bēkêni o Iyâja oa unjuwani nyati tombe buru 'aju o ndabo ea bembe, na vala ka mâtidê eâ miba?

16. Nandi te mwajo tē, a di mwana ua Ebrahim ekanê, ua Setan a diyakê katango, o jomu tē ja mepuma na mepuma lowambi ekadi, au lukaka o unjwê mekato tēkame o buhwa bo' Iyâjâ?

17. Ndoba jaju jěhěpi i yěněkindi ihâni, o Mâ-a kalaki belombo těkabe: ka ebimba eěhěpi ea peya na belombo be' ivenda ibea-ju be hakidi beěhěpi.

18. ¶ Ka Mâ-a vâ, na, Ipangiya ja Anyambě i kwanaka lě nja 'lombo ě? Mbi ka kwanidě lě jâ nde?

19. I kwanakandi utonga mua ebuma ea mustard, mua moto u nângâkidi, ka mâ-a uhwa mâ o mwanga muaju; ka muâ-mua tombuwa, ea bě ele 'něně; na lonâni la oba lo ka batamaka o melabe meaju.

20. Ka Mâ-a vâ pě, na, Mbi kwanakidě lě ipangiya ja Anyambě nde?

21. I kwanakandi ilanda, ja mwajo i nângâkidi ka mâ-a hâbě jâ na byějâ bea pěmbě belalo, ka beâ beěhěpi bea landa.

22. Ka Mâ-a pudungana o mamboka na mabâka a pakwanakiya a kěķě na 'la o pělě 'a Jěrusalěm.

23. ¶ Jâ ndi j' umbâkâ ja vâ na Ju, na, Upangiyi, ba ka yongě ba ka diyi nyěvâ? Ka Mâ-a vâ na bâ, na,

24. Haka na jai ingiya ja jâmbě ihâlě: 'kabojana Mbi langwakiyand' inyěni, na, baitě ba ka vahand' o ngiya, ndi ba yâle.

25. Nd' oningě a duwě ndabo a 'muwi-

ngě, na mâ-a diba jámbě, běngě o yalakěni o těmě o bwebwe, o ka tinakiděni jámbě, na, Upangiyi, Upangiyi, dubwakiya hwě; a ka yavwanand' inyěni, na, Mba 'we inyěni pělě 'anyu ea viya :

26. O ka yalěndini o vá, na, Ho jakite na hwě-ho mâtákite o pwanja 'vě, na návě-o yokwakiděte o mehěnge meahu.

27. Nd' A ka vwi, na, Mbi langwakiyandi inyěni, na, Mba 'we inyěni pělě 'anyu ea viya, věngěměkěni Umba-mbi jadi inyi běhěpi bahayi ba bobě.

28. Omě o ka diyi mbembe n' ikalidě ja mahonga, o inyěni-o ka yěněni Ebraham, na Aisak, na Jekáb, na basáki běhěpi, o ipangiya ja Anyambě, ndi inyi mětě o dumakwěni.

• 29. Ba ka viyě o mbuhwa, na manga, na ngángá, na diko, ba ka diyandi diya o ipangiya ja Anyambě.

30. Hilakěteni, ba madikanido ba ka diyi ba bě o bohoboho, na ba bohoboho ba bě o madikanido.

31. ¶ O buhwa tě ka Farisi jáká ja viya ka bâ-ba vá na Ju, na, Umwaka, věmgěměkě okava; 'kabojana Hěrod a vahakand' o weya 'vě.

32. Ka Mâ-a vâ na bâ, na, Kěkěni, ka langwakiyeni uHINGI tĕmunĕ, na, Hilakĕte, Mbi dumaka devil, n' Umba-mbi ka yongi bebĕdi o buhwa na vakĕ, nd' o bwe n' ubwa bĕngĕ Mbi hânjâbâkudwĕ.

33. Ndi tombe kakana Mbi na mala na mbi tamwaka o buhwa, na vakĕ, na bo ka vitĕ: 'kabojana ea diye na usâki u ka wĕ oviya Jĕruselĕm.

34. O Jĕruselĕm, Jĕruselĕm, âvĕ-o weya-kĕ basâki, na nâvĕ-o yangwaka ba ma lo-makwĕ o âvĕ-o jadi malale; njo iitĕ ndi jamĕ i bâbâkidĕ o yolĕ bana bâvĕ ta, bwĕsĕ ka mwadi mnea kuba u yolakĕ bana baju o mapĕpu maju, ndi o bâbeni!

35. Hilakĕteni, ndabo 'anyu e dikanindi inyĕni e jiliyango: Mbi langwakiyandi inyĕni pâkwĕpâkwĕ, Oa yĕne pi 'Mba ni, kabo o 'gombe e ka pâyĕ eanyu e ka vâyĕ, na, Ibâtâ na A vakĕ na dina ja Upangiyi.

KAPITA XIV.

1. E diyakindi o Mâ-a diyakidi a kĕkĕ o ndabo 'a Farisi pâkâ enĕnĕ ka ja pĕmbĕ o buhwa bo' Iyâjâ, ba ka bĕmbĕkĕ Mâ.

2. Hilakěte, moto n' uhuhu a diyaki na mehiyo mea jemi ja njambě a didi o boho boaju.

3. Ka Jisus a yavwuwa, ka Mâ-a vâ na bayokwidi ba Elekanako na Farisi, na, E te hohonganěngo na o yongě o Iyâjâ ?

4. Bâ te dâ. Ka Mâ-a nângâ mâ, ka Mâ-a yongě mâ, ka Mâ-a huludě mâ.

5. Ka Mâ-a yavwana bâ, na, Nj' a jadi inyěni-o didi a běkě ba nyati 'aju tombe buru 'aju ea kwa o mbela, a hungane o hoduwa eâ na buhwa boa Iyâjâ ?

6. Bu yâlâke o yavwana pě Mâ belombo těkabe.

7. ¶ Ka Mâ-a kaniya ba ndakudwě ukanakâdi, o Mâ-a yěněki bâ-ba pânâkâ bediya beněně ; ka Mâ-a vâ na bâ, na,

8. Oningě oa ndudwě na moto o isango ja diba, o diyake o ediya ea hěhiyěngo ; ipě moto ua betiyango wa na nâvē a ma ndudwěndi na mâ ;

9. Na a ma ndiya inyěni na mâ a viya ka vâ na nâvē, na, Věkě momo těkaně iboko ; vâkâna oa 'la n' ihâni ka nângâ ediya ea hubiyango.

10. Nd' oningě oa ndudwě, ka diyake o ediya ea hubiyango ; na ovaně nd' o a nda-

kiyě âvě a ka viyě a ka vâýě na nâvě, na, Mbweyi 'amě, betakiya okaně: vâkâna o pahiyendi idilwě o pwanja ea ba di na nâvě o ija.

11. Ikabojana a betakidě nyol' 'aju mětě, a ka hubudwěndi; na a hubakidě nyol' 'aju mětě, a ka betudwěndi.

12. ¶ Já ndi jaju ja vâ tepě na a ndakiyi Mâ, na, Oningě o haka beja bea joba-meolo tombe bea kolo, o ndakiye mboi jâvě, tombe bana ba nyângwě, tombe majawě mâvě, tombe na ba bakakě na nâvě baněně; o banga ba ndiya tepě âvě, nâ nâvě oa pahiya yâbu.

13. Nd' oningě oa had' isango, ndakiye mekuge, na byěmě, bebokě, na pâgu:

14. Vâkâna o vambudwěndi ibâtâ; 'kabojana bâ ba 'bě na ngudi ea timbě âvě yâbu; nd' o ka timbwi yâbu o ipumbuwa ja bayamu.

15. ¶ O moto n' uhuhu a diyaki na Ju o beja a yoki belombo těkabe, ka mâ-a vâ na Ju, na, Ibâtâ na a ka jě pěmbě o ipangiya ja Anyambě.

16. Ka Mâ-a vâ na ju, na, Moto n' uhuhu a hakiděndi isango iněně na kolo, ka mâ-a ndidě baitě:

17. O 'gombe e' isango na kolo ka m̄a-a loma uhayi muaju ka v̄a na ba ndakudwě, na, Vakani; 'kabojana belombo beēhēpi bea bi kokango.

18. Bēhēpi timbango udumbu 'mbâkâ ba ka yalakě iha ja ponda. Ua bohoboho na m̄a, na, Mbi ndi hambango epēhi ea 'hiki, e na mala na mbi kěķě ka yēnē eā: mba hāhālidēnd' āvē papwakidě 'mba.

19. K' upakwě a v̄a, na, Mbi ndi hambango jomu ja nyati, mb' 'alandi ka yējīyě jā: mba hāhālidēnd' āvē papwakidě 'mba.

20. K' upâkwě a v̄a, na, Mbi ndi bango mwajo, ovaně nd' umba-mba yāle o viya.

21. K' uhayi tē m̄a-a timba, ka levidě upangiyyi muaju belombo tēkabe. Ka a duwi ndabo a linguwa ka m̄a-a v̄a n' uhayi muaju, na, Kěķě wāwā o mehēngě na o njea ja mboka, na nāvē oa vana okava mekuge, na byēmě, na bebokě, na pāgu.

22. K' uhayi m̄a-a v̄a, na, Upangiyyi, e hamindi ka 'vē o ma sombiyě, ndi loboko lo ngitewě.

23. K' upangiyyi a v̄a n' uhayi, na, Kěķě o njea inēnē na mani, o ka pinyilakidě b̄a na ba vake, ndabo 'amě e londē.

24. Ikabojana mbi langwakiyand' āvē, na,

Bamo ba ma ta ndudwě baně ba veke pě isango jamě n' umbâkâ.

25. ¶ Bebimba beněně be tamwaki na Ju: ka Mâ-a 'luwa, ka Mâ-a vâ na bâ, na,

26. Oningě moto a vaka o 'Mba-mbi jadi, a bine hangwě, na nyangwě, na mwad' 'aju, na bana baju, na bana ba nyangwě, na mala ku, e, na eměná 'aju mětě tepě, a yale o diya eyokwed' 'amě.

27. A ka měndě a bape krâs 'aju, na mî-a vitě 'Mba, a yâle o diya eyokwed' 'amě.

28. Ikabojana nja a didi inyěni o jadi ovaně, a didi a běkě a pangaka ilonga ja ndabo eněně, a ta o diya diya, na mî-a ka langaka nyanga e ka weyě, ipě a te twětwě na o madě eâ?

29. O banga a bě mî janga yalěngo, a diye pě na ngudi e hânjâbâkidě eâ, na ba ka hilě běhěpi ba ka yalakě o věhě mî,

30. Na, momo těkaně a yalakiděnd' ilonga, nd' au diyaki na ngudi e hânjâbâkidě.

31. Tombe b' upolo u kěkě ka yana eduka n' upolo upâkwě, mî-a taka diya

diyango, a ka langanakě n' ipě bâ na jomu jaju ja tâjeni ba ka yâlěte o lata na a vakě o mâ-a jadi na mabo ma tâjen mabale.

32. E diye nonaně, vâkâna a lomakandi metodu, me latakě jonga, o upâkwě a ngite na masěyi maitě.

33. Yâ nyanga tě te 'a a didi inyěni o jadi ovaně uěhěpi a ka měndě a dike ibeaju be janidi beěhěpi, a yâle o diya eyokwed' amě.

34. ¶ Vianga a bwamu: nd' oningě vianga via nyangě uju muaju, vi ka pahiya lě pě ulělē na ově?

35. Via lukaka pě na ba he, tombe na ba behu; ndi bato ba uhwaki viâ. A di na matâ ma yokakě, a yokake.

KAPITA XV.

1. Ka bayoli-pago běhěpi na bato babě ba viya o Mâ-a jadi ka yoka Mâ.

2. Ka Farisi na balěndi ba hâkalâniyě, na, Momo těkaně a věhělēkiděndi bato babe, na Mâ-a jaka na bâ.

3. ¶ Ka Mâ-a kaniya bâ ukanakâdi těkamu, na,

4. A lě.nja moto a didi o inyěni o jadi,
a běkě mâ na kama ea medâmbě, na
mâ-a nyanga umbâkâ o tango 'abu, nd'
a dike mabo ibuwa n' ibuwa o nginga, na
mâ-a 'la ka vaha mua nyangango, kabo a t'
a duwa muâ?

5. O mâ-a duwi *muâ*, a kahakidě muâ o
iběkě jaju, a peyaka.

6. O mâ-a pâkâ o ndabo, vâkâna a nda-
nakiya ba mboi jaju na ba bakakě na mâ,
na mâ-a vâ na bâ, na Peyaki n' umba; 'ka-
bojana mbi duwendi udâmbě muamě u ma
nyanga.

7. Mbi langwakiyandi inyěni, na, eâ
nyanga tě te ea mbya e ka diyandi oba
o pělě 'a mot' ube umbâkâ, a ulwaka, wa
na o pělě 'a mabo ma bato bayam' ibuwa
na bato ibuwa, ba ha ibě na mala m' iluwa.

8. ¶ Tombe nja mwajo-ě a didi a běkě
mâ jomu ja fula ja hika etano, na mâ-a
nyangě fula pâkâ, nd' a yode vitwa, na
mâ-a viyâ ndabo, a ka vahaka na bokele
kabo a te o duwa eâ?

9. A duwingě eâ, vâkâna a ndanaki-
yandi mboi jaju na ba bakakě na mâ, na,
Peyaki n' umba; 'kabojana mbi duwendi
fula tě eamě e nyangakidě.

10. Mbi langwakiyandi inyëni, na, eä nyanga tē te ea mbya e nd' o pwanja ea enjël ja Anyambē o mot' ube umbākā a 'luwakē.

11. ¶ Ka Mā-a vā, na, Momo n' uhuhu a diyaki bana babale :

12. Ka uabu ua ndēmbē a vā na hangwē, na, Paia, vĕkē 'mba mbēi ea jumba i ka kwē umbi jadi. Ka mā-a kabaniya bā nyanga 'aju e diyanakidi.

13. Hwi i diye iitē ka ua ndēmbē a yolē beēhēpi ta, ka mā-a ha 'këndā o ehe 'a yavi-dēngo, ka mā-a jongolidē jumba jaju ovonē n' idiyedi vi' ujolongo.

14. Nd' o mā-a bēkidi a makidēte jēhēpi, ka nja enēnē ea kwa o ehe tēnē; ka mā-a yalakand' o nyamana.

15. Ka mā-a 'la ka lata na umbākā ua badiyi ba ehe tēnē; ka mā-a loma mā o mwanga muaju ka jedē ngweya.

16. A ka yombwaka na te a londidēndi ihuhu jaju na bepape bea ngweya be ma jaka : au diyaka na moto a vēki mā.

17. O mā-a pādi ipikiliya jaju mētē, ka mā-a vā, na, Paia a lē bahayi ba bokālākwē baningē ba di na pēmbē wa na e kokakē bā, nd' umba kabo bowaka na nja !

18. Mbi těměkěndi na 'la o Paia a jadi, n' umba-mba vâ na ju, na, Paia, mbi hango bobe o pělě 'a Hěvĕn, na o boho boâvĕ,

19. Mbi 'bĕ pĕ weyango na mbi tubakwĕ na mwan' 'âvĕ : pangaka 'mba uhayi muâvĕ mua bokâlâkwĕ umbâkâ.

20. Ka mâ-a těmě, na pâ o hangwĕ a jadi. Nd' o hangwĕ a yĕni mâ, a ngite yavidĕngo, ka mâ-a yĕniyĕ mâ ngâtâ, ka mâ-a vala umbila, ka mâ-a hikamiya ibâlu jaju, ka mâ-a pyâpyâ mâ.

21. Ka ua mwana a vâ na ju, na, Paia, mbi hango bobe o pělě 'a Hěvĕn, na o boho boâvĕ, mbi 'bĕ pĕ weyango na mbi tubakwĕ na mwan' 'âvĕ.

22. Ndi hangwĕ a vâki na bahayi baju, na, Pumakĕni ibâtâ iyamu mĕtĕ, oa bâtidi mâ ni; oa vami mâ ni mbonga o upenjo muaju, na makogo o matambi maju :

23. N' inyĕni oa vanani etumbĕ ea nyati evangu, oa weyani; ho ka jakani, ho ka peyakani :

24. Ikabojana mwa t' uamĕ ekanĕ a diya-ki wango, a pumbuwendi; a diyaki nya-ngango, a duwaniyendi. Ba ka yalakĕ o peya.

25. Ndi mwan' 'aju u' utodu a diyakind' o

mwanga: o mâ-a pâdi a bakamakate na ndabo, a ka yokaka mabeka na lembo.

26. Ka mâ-a ndiya uhayi umbâkâ, ka mâ-a bata mâ, na, belombo tĕkabe be lĕ na?

27. Ka mâ-a languwa mâ, na, Mwana-nyângwĕ a pândi; ka hângwĕ a weyidĕ etumbĕ ea nyati evângu, 'kabojana a pahiyete mâ upeha.

28. Ka mâ-a linguwa, au bâbâkâ o ngiya: ovanĕ nd' o hangwĕ a puma, ka mâ-a hâhâlidĕ mâ.

29. Ka mâ-a yavwana ka mâ-a vâ na hangwĕ, na, Hilakĕte, inepuma tĕ imeamĕ me hayed' âvĕ meitĕ ekame, mbi 'bĕ na ego-mbe eamĕ e pulidĕ elekanako 'âvĕ; nd' o 'bĕ 'mba vĕngo na ba mwana mbodi, nana mbi peyaka na mboi jamĕ:

30. Ndi ipâ ja mwa tĕ uâvĕ ekanĕ ja pâ, a kuwidĕ jumba jâvĕ na bevove, o weyidi mâ etumbĕ ea nyati evângu.

31. Ka mâ-a vâ na ju, na, Mwan' 'amĕ, o diyakate n' umba egombe eĕhĕpi, n' ibeamĕ be janidi beĕhĕpi be nd' ibeâvĕ.

32. E lukakite na ho peyaka, na hwĕ-ho ka yĕnĕkĕ mbya: 'kabojana mwa tĕ oa nyângwĕ ekanĕ a diyakindi a wa, nd' a pumbu-wendi; a diyaki nyangango, a duwaniyendi.

KAPITA XVI.

1. Ka Mâ-a vâ tepě na beyokwedi beaju, na, Enami ea momo n' uhuhu, e diyaki na yongo; e salakudwě mâ na e jongolakidi mâ jumba jaju.

2. Ka mâ-a ndiya mâ, ka mâ-a vâ na ju, na, E lě nd' eamě e yokakě ekae o pěl' 'ávě? ta tatuwa nyanga 'vě e hadi o ávě-o diyě yongo; 'kabojana oa diye pě yongo.

3. Já ndi ja yongo tě ja vâ n' ulema, na, Mbi hake lě na? 'kabojana upangiyi muamě a vengidě 'mba oviya yongo: mba yâle o tonga; mbi yokakandi ihâni j' ijo-mbana.

4. Mbi ka langandi nyang' 'amě e ka hayě, na ovaně nd' o bâ-ba ka ngidě 'mba o mandabo mabu, o 'mba-mbi ka věngěmě oviya yongo.

5. Ka mâ-a ndiya ba diyaki hangwě nuwanango běhěpi, ka mâ-a vâ na ua boho-boho, na, O lě nuwanango upangiyi muamě na ě?

6. Ka mâ-a vâ, na, Kama ea byějâ bea mavulě. Ka mâ-a vâ na ju, na, Nângâkâ ejanganangob' 'ávě, oa diya wâwâ, na nâvě oa lěndě mabo matano.

7. Já ndi jaju ja vâ n' upâkwě, na, O lě nuwanango na ě? Ka mâ-a vâ, na, Kama ea byějâ bea hwit. Ka mâ-a vâ na ju, na, Nângâkâ ejanganangob' 'ávě, oa lëndě ma-bo lowambi.

8. K' Upangiyi a bendě yongo tě e ha hakidi hohonganěngo yeně, 'kabojana e haki bokeli: 'kabojana bana ba he těkaně ba ndi o igona jabu iyowě wa na bana ba bwe.

9. Mbi langwakiyandi inyěni, na, Lataki mboi na mamân ea bobě; ovaně nd' o inyěni o ka běyě oa věngěměni, ba nângâ inyěni o bediya bea 'gombe eěhěpi.

10. A bweyakě ikěngě na behâlě, a ka bweya tepě ikěngě na beité: na a ka humamě na behâlě, a ka humamě tepě na beité.

11. Nd' oningě o bweyeni ikěngě na mamân ea bobě, nja ka bweyidě inyěni hika ea mbambayě?

12. Nd' oningě o bweye n' ikěngě na bea mot' upâkwě, nja ka vě inyěni ibeanyu mětě?

13. O 'bě n' uhayi a ka dilě bahangwě babale: 'kabojana a ndi a binaka umbâkâ, na mâ-a tândâ upâkwě; e diye nonaně vâ.

kâna a ka bweyiděndi umbâkâ, na mâ-a pějě upâkwě. O iběni na ngudi o dilě Anyambě na mamân.

14. Ka Farisi ba diyaki tepě n' itângina, ba yoka belombo tēkabe beěhěpi; ba ka vėhěkě Mâ.

15. Ka Mâ-a vâ na bâ, na, Inyěni ndi ba huwakidě nyolo janyu mětě o bato ba jadi; ndi Anyambě a te yowěngo melema meanyu; 'kabojana e yěněněkwě jambo iněně na bato e ndi elombo e binakwě o boho boa Anyambě.

16. Belekanako na basâki ba hukakiděnd' o Jân: oviya egombe tēeně ipangiya ja Anyambě i kalakudwěndi, na mpto uěhěpi a pinyilakiděnd' o ngiya 'mě.

17. E bobâbu wa na he na oba ba tombaka, ndi hanga na epuhu ehâlě mětě e puhwanakiya o belekanako.

18. A ka věngidě mwad' 'aju, na mâ-a ba upâkwě, a handi ihonde; na a ka bayě pě mwajo tē a di věngudwěngo na momi 'aju nē a ha tepě ihonde.

19. ¶ O diyaki na enami ea inomo e ma bâtâkâ mangâla na mavěla mayam', a ma jaka beja beyamu buhwa boěhěpi.

20. O diyaki n' ujombani dina na La-

sarus, a ma nangakudwě o jámbě jaju, penge ti.

21. A vahaka o jedwě na nguhu i ma kutwaka o tagulu ea enami tě ea momo: na mbwa tepě i ma vaki ka měngwěké penge jaju.

22. E diyakindi, na, ujombani u wakidi, ka mâ-a bapwě na enjěl na 'la o ngonga ea Ebrahim: ka enami ea wa tepě, ka mâ-a tongwě;

23. Ka mâ-a betaně mihâ maju o Hěl, a bě o majili, ka mâ-a yěně Ebrahim yavi-děngo, na Lasarus o ngong' 'aju.

24. Ka mâ-a yama, ka mâ-a vâ, na, Paia Ebrahim, yěněké 'mba ngâtâ, na nâvě oa loma Lasarus, na, a dubake upenjo muaju o miba, na mâ-a vâtě 'mba emi 'amě; 'kabojana mbi yěněki majili o ungo-nyi tēkamu.

25. Ndi Ebrahim a vâki, na, Mwana-o, yongakiděte o 'gombe 'âvě e diyakidi mihâ o ma pahakiyi belombo beâvě beyamu, Lasarus tepě belombo bebe: ndi kya tēkâně a ka yěněkudwě mbya, nd' âvě-o yěněké majili.

26. Tombete beěhěpi ekabe be diye, ho ndi na mbelenge eněně bonguwěngo o ha-

ngan' 'ahu na nâvě: ovaně nd' o ba ka vahě o tomba oviya okava na pâ o âvě-o jadi ba ka diyě ba yâle; na ba vakiyě ovoně, ba yâle o tomba na pâ o hwě-ho jadi.

27. Ka mâ-a vâ, na, Paia, mba hâhâli-dënd' âvě lomaka mâ o ndabo 'a paia:

28. Ikabojana mbi na bana b' ina batano; ovaně nd' o mâ-a ka pakuwě bâ, o banga ba pâ tepě iboko tě via majili ekavi.

29. Ebrahim na mâ, na, Ba na Mosēs na basâki; ba yokakiye bâ.

30. Ka mâ-a vâ, na, Nyawě, Paia Ebrahim: nd' oningě umbâkâ a vala o bâ-ba jadi oviya iwedo, vâkânâ ba uluwendi.

31. Ka mâ-a vâ na ju, na, Oningě ba yokiye Mosēs na basâki, ba yoke pě, tombe-te umbâkâ a pumbuwa oviya iwedo.

KAPITA XVII.

1. Jâ ndi jaju ja vâ na beyokwedi beaju, na, Ikâbânidě ja himbani' ja diye i pâyē: ndi maguga na a ka pâdě jâ!

2. E ndi bwam' wa na mâ n' ilale i kâ-

kânákwě i tingákwě má o ibálu jaju, na má-a uhvě o manga, nana a kâbânákidě umbâkâ o bahâle ekaba.

3. ¶ Bandamakiděni inyi mětě n' inyi mětě: Oningě mwana-nyângwě a beviya âvě, kandakidě má; oningě a 'luwa, iyakidě má.

4. Nd' oningě a beviya 'vě njo hěmbwědi o buhwa, na má-a timba tepě o âvě-o jadi njo hěmbwědi o buhwa, na, Mbi 'luwendi; na nâvě oa 'yidě má.

5. Ka metodu mea vâ n' Upangiyi, na, Badakiya hwě ikamidě.

6. K' Upangiyi a vâ, na, O jakani n' ikamidě ka utonga mua 'buma ea mustard, te o t' o vâkâni na ele tě ea sikamain ekae, na, Pumbwanakiya na metamba, oa 'la kâ liyaniya o manga; na eâ-e ka yoyate inyěni.

7. Ndi nja a jadi o inyěni-o jadi, a běkě má n' uhayi u pudwaka na plou tombe u jakidě bembe, a pâkâte oviya mwanga, na má na má, na, Egombe te 'gombe ka diyake ija?

8. Hanga na a ka vahand' o vâ na ju, na, Kenjakě ibeamě iboko viamě vi ka jě, oa tinga utumba, o ka vengaka 'mba, mba

ta ja, n' umba-mba ta mâtâ; bĕngě o jake na nâvĕ o mâtâke.

9. A vĕkĕndi uhayi tĕmunĕ akeva 'kabo-jana a haki belombo be sombiyakudwĕ mâ? Mba piviyaka.

10. Eâ nyanga tĕ te eanyu, oningĕ o hangĕni belombo beanyu be di sombyuwĕngo beĕhĕpi, vâkâteni, na, Ho ndi bahayi ba ha 'bĕ na evângâ: ho te hango nyang' 'ahu e luki na ha.

11. ¶ E diyakindi, o Mâ-a bĕkidi a kĕkĕ na 'la o Jĕruselĕm, ka Mâ-a tomba o hanganĕ ea Sameria na ea Galili.

12. O Mâ-a betidi o ibâkâ n' ihuhu, ka jomu ja bamo ba diyaki begâlani ja lata na Mâ, ba tĕmĕki yavidĕngo:

13. Ka bâ-ba betĕ moyi mabu, na vâ, na, Paia, Jisus, yokakiya hwĕ ngâtâ.

14. Nd' o Mâ-a yĕni bâ, ka Mâ-a vâ na bâ, na, Kĕkĕni, oa levidĕni nyolo janyu prist. E diyakindi, o bâ-ba diyakidi ba kĕkĕ, ka bâ-ba yonga.

15. Umbaka, o mâ-a yĕni na a yongindi, ka mâ-a timba, a ka bendakĕ Anyambĕ na joyi oba.

16. Ka mâ-a kwa na boho boaju o beko beaju, a ka vĕkĕ Mâ akeva: na mâ-a diyaki ua Sameria.

17. Ka Jisus a yavwana ka Mâ-a vâ, na Bu yongakwě jomu? ndi ibuwa ja bē l' ove?

18. Bu duwaniya ba timbidi ivě ja ibendě o Anyambě a jadi kabo mwěngi tēkamu.

19. Ka Mâ-a vâ na ju, na, Tēmēkě, kēkě pělě na eâvě: ikamidě jâvě i hunginind' âvě.

20. O Farisi ba uwi Mâ, na, Ipangiya ja Anyambě i ka viya lě nja 'gombe-ě, ka Mâ-a yavwana bâ, na, Ipangiya ja Anyambě ja vaka ona 'lombo e yēnēnēkě:

21. Na bâ-ba vâye, na, Hilakēni okava! tombete, na, Hilakēte okavaně! 'kabojana ipangiya ja Anyambě i n' inyēni.

22. Ka Mâ-a vâ na beyokwedi beaju, na, Hwi i vakandi, ijanyu i ka vahě o yēnē buhwa bâkâ boa Mwana-moto, ndi oa yēni boâ ni.

23. Ba ka diyi ba ka vâkâ n' inyēni, na, Yēnēkēte okava; tombete, Yēnēkēte na okavaně. O vitaki bâ ni, o bengaki bâ ni.

24. Ikabojana bwēsě te ka epělupělu, e pělumakě o ihuku ja oba jâkâ, e panyakate na 'la ihuku ja oba ipâkwě; eâ nyanga tē te 'a Mwana-moto e ka diyě o buhwa boaju.

25. Nd' a ka lukandi a ta yēnē belombo beitě, na igona tēkadi ja ta kiya Mâ kiyango.

26. Bwēsě ka eâ-e diyakidi o hwi ja Noa,

nonaně tepě ka eâ-e ka diyě o hwi ja Mwanamoto.

27. Ba jaka, ba mâtâkâ, ba baka, ba věněkě o maba, kwanga nala buhwa boa Noa bo ngakiyendi o Ak, boa tonda bo pâkidi, na jilidě bâ běhěpi.

28. Pani ka eâ-ě diyakidi o hwi ja Lât; ba jaka, ba mâtâkâ, ba hambaka, ba hambanaka, ba liyaka, ba longaka;

29. Ndi buhwa tě boa Lât bo pumakid' o Sâdâm te boa vey a na sulfěr bo nâkidi oviya 'ba, na jilidě bâ běhěpi.

30. Nonaně tepě o eâ-e ka diyě o buhwa boa Mwana-moto bo ka puliyě.

31. O buhwa těboně, a ka diye o ndabo oba, na mâ na belombo beaju o ndabo, a hubake ka věngidě beâ: na a ka diyě o 'hiki, a timbake tepě o bea mbuhwa.

32. Yongakiděni mwad' 'a Lât.

33. Uěhěpi a ka vahě o yongě emenâ 'aju a ka nyangi eâ; na uěhěpi a ka nyangě emenâ 'aju te a ka tatě eâ.

34. Mbi langwakiyandi inyěni, o bulu těboně bamo babale ba ka diyandi ikondo jákâ; umbâkâ a ka nângwěndi, n' upâkwě a dikana.

35. *Bajo* babale ba ka diyi ba nyingaka

ta; umbâkâ a ka nângwëndi, n' upâkwě a dikana.

36. Bamo babale ba ka diyand' o 'hiki; umbâkâ a ka nângwëndi, n' upâkwě a dikana.

37. Ka bâ-ba yavwana Mâ, na, Ove lě Upangiyi? Ka Mâ-a vâ na bâ, na, Iboko via ekengo vi jadi, viâ te via mbela vi ka yolwě ta.

KAPITA XVIII.

1. Ka Mâ-a kaniya bâ ukanakâdi, nana bato ba lukakand' o kaliya egombe eëhëpi, ba kâmbe;

2. Na, O diyaki na uyëkidi o mboka, u ha bangakidi Anyambě, na mâ-a tangina tepě moto.

3. O diyaki na mwalika o mboka tě; ka mâ-a viya o mâ-a jadi, na, Kundaka 'mba ndoba 'amě.

4. Nd' au bâbâkâ o 'gombe: ndi na mbuhwě-mbuhwě a vâki n' ulema, na, Tombe k' umba-mbi ha bangaka Anya-mbě, n' umba-mbi tangini tepě moto;

5. Ndi 'kabajana mwalika tēkamu u haki 'mba njuke, mbi ka kundi mâ, o

banga a vâhidě 'mba na bovaka na bovaka.

6. K' Upangiyi a vâ, na, Yokakateni ka uyěkidi ube u vâkě.

7. Ndi Anyambě a kunde ibaju ba di pânângo, ba yakiyě Mâ bulu na mwehe, tombete Mâ-a vengakate ulingo uya-ba?

8. Mbi langwakiyandi inyěni, na, A ka hunganandi o kunda bâ. Mětě, o Mwanamoto a ka pâyě, a ka duwate ikamidě o he?

9. Ka Mâ-a kaniya ukanakâdi tēkamū o ba ma pitakidě bâ mětě na ba diyaki bwamu, ndi ba pějěkě bapâkwě:

10. Bato babale ba betakind' o tēmpěl ka kaliya; umbâkâ ua Farisi, upâkwě uyoli-pago.

11. Ka Farisi a tēmě ka mâ-a kaliya na nyol' 'aju kakana, Anyambě, mbi vėkěnd' Ávě akeva, 'kabojana mbi 'bě ka bato bapâkwě ba jadi, ka bapambalanidi, ka ba ha haka hohonganěngo, ka ba iho-nde, tepě bwěsě k' uyoli-pago tēkamū.

12. Mbi hindinakandi nja o wiki pākâ njo ibale, mbi vėkě mběi ea jom' o ungu-mba muamě.

13. K' uyoli-pago, mâ-a těmě yaviděngo, a diye na ngudi o betě tombe na mihâ maju oba, a kumbaka ngong' 'aju, na, Anyambě, yokakiya 'mba ngâtâ, mbi mot' ube.

14. Mbi langwakiyandi inyěni, na, mo-to těkaně a hubakindi na vala o ndabo 'aju huwudwěngo wa n' upâkwě: 'kaboja-na a ka betidě nyolo 'aju uěhěpi nd' a ka hubudwě; nd' a ka hubidě nyolo 'aju nd' a ka betudwě.

15. Ka bâ-ba vana tepě Mâ mekěkě, nana A kupanakě meâ: nd' o beyokwedi beaju be yěnidi, ka bâ-ba kandidě bâ.

16. Ndi Jisus a ndakiyi bâ o Mâ-a ja-di, na vâ, na, Dikakani ba nděmbě ba va-ke o 'Mba-mbi jadi, o kandakidi bâ ni, 'ka-bojana jâ jângâ tědině ndi j' ipangiya ja Anyambě.

17. Pâkwěpâkwě Mbi vâki n' inyěni, na, A ka měndě a věhělidě ipangiya ja Anyambě ka mwa-nděmbě a ngiye omě na vilolombo.

18. K' ipangiysi n' uhuhu mâ-a uwa Mâ, na, Uyokwidi uyamu, mbi hake lě nja 'lombo-ě o ijiga ja eměná ea egombe eěhěpi?

19. Ka Jisus a vâ na mâ, na, O tubaka lě 'Mba na uyamu na nde? o 'bě na uyamu, kabo Umbákâ, Mâ ndi Anyambě.

20. O te yowěngo belekanako, O hake ihonde, O weyake moto, O ibake, O langwanakiye evela, Hekakidě hângwě na nyângwě.

21. Ka mâ-a vâ, na, Mbi tatite ekabe beěhěpi oviya nděmbě 'amě.

22. Nd' o Jisus a yoki belombo těkabe, ka Mâ-a vâ na ju, na, O ngite o nyamaka elombo eákâ: hambakidě ibeávě be janidi beěhěpi, o ka kabaka na mekuge, vâkâna oa bi na hika o Hěvăn: oa viya, ka vitě 'Mba.

23. O mâ-a yoki ekae, a yěněki ngěbě eitě, 'kabojana a diyaki na boněně boitě.

24. O Jisus a yěni na a yěněki ngěbě eitě, ka Mâ-a vâ, na, Bokolo boitě nde boa ba di na hika eitě ba ngakiya o ipangiya ja Anyambě!

25. Ikabojana e bobâbu na kaměl e ngakiya o ubana mua tombo, wa na moto a di kenango a ngakiya o ipangiya ja Anyambě.

26. Ka ba yokakidi ba vâ, na, Nandi a lě nja a ka yâlě o yonga?

27. Ka Mâ-a vâ, na, Belombo be ha 'bě na

ngudi o hama na bato be te be hamaka na Anyambě. .

28. Já ndi ja Piter ja vâ; na, Yěněkěto, ho senji beěhěpi, na vit' ávě.

29. Ka Mâ-a vâ na bâ, na, Pâkwěpâkwě Mhi vâki n' inyěni, na, O 'bě na moto a di senjango ndabo, tombe hangwě na nya-ngwě, tombe bana ba nyangwě, tombe mwa-jo, tombe bana, o nyanga ea ipangiya ja Anyambě,

30. A ka měndě a pahiye wa kya těkaně okava, na o ehe e vakě eměna ea egombe eěhěpi.

31. Ka mâ-a nângâ jomu na babale, ka Mâ-a vâ na bâ, na, Hilakěteni, ho betakandi o Jěruselěm, o belombo bea basâki be lěnděkidi o pělě ea Mwâna-moto beěhěpi be ka timwě.

32. Ikabojana a ka kândudwěndi bato ba 'tomba epâkwě, A ka věhwěndi, na A ka hakwě bobe boitě, na A ka tuwakwě malě;

33. Ba ka bomi Mâ, na bâ-ba weya Mâ; o buhwa boa hwi 'lalo vâkâna A punbu-wendi.

34. Ndi ba ib' o bweyakidě belombo těkabe na ea eâkâ: ndaga těkaně e diyaki

kutamango o bâ-ba jadi, na ba ib' o yowakě belombo be ma kalakwě.

35. ¶ E diyakindi, o Mâ-a diyakidi a bě baka na Jěriko, ka pāgu na 'huhu a diyaki diya o pēpěkě 'a njea a jombanaka :

36. O mâ-a yokidi ebimba e tombaka, ka mâ-a uwa, na, ekae e lě na ?

37. Ka bâ-ba languwa mâ, na, Jisus ea Nasarět nd' a tombakě.

38. Ka Mâ-a yama, na, Jisus, Mwana Devid, yokakiya 'mba ngâtâ.

39. Ka ba kěkidi o bohoboho ba kandidě mâ, nana a diyake dâ : nd' a yamaki pě wa, na, Mwana Devid yokakiya 'mba ngâtâ.

40. Ka Jisus a tēmě, ka Mâ-a sombiyě na a vanakwě o Mâ-a jadi : o mâ-a bakamidi, ka Mâ-a uwa mâ,

41. Na, O vahaka lě 'Mba-mbi haka 'vě na ě ? Ka mâ-a vâ, na, Upangiyi, mbi pahakiye iyěně.

42. Ka Jisus a vâ na ju, na, Paha-kiya iyěně : ikamidě jāvě i yongiděnd' âvě.

43. Ka mâ-a hungana o pahiya iyěně, ka mâ-a vitě Mâ, a kěkě a bendakě Anyambě : o bato běhěpi ba yěnidi, ka bâ-ba vě Anyambě ibendě.

KAPITA XIX.

1. Ka Jisus a ngiya na pudungana Jě-riko.

2. Hilakěte, momo dina na Sakius, a diyakidi ngāwe 'a bayoli-pago, na mǎ tepě kenango.

3. Ka mâ-a vaha o yěně Jisus nyang' 'aju e diyakidi; nd' a yāle na ndumba, 'kabojana a diyaki n' ute uvuve.

4. Ka mâ-a 'la umbila o bohoboho ka mâ-a beta o ele ea sikamor nana a ka yěni Mâ; 'kabajana A diyaki na A ka tombi o njea těně.

5. O Jisus a pâdi o iboko tě, ka Mâ-a unbuwa oba, ka Mâ-a yěně mâ, ka Mâ-a vâ na mâ, na, Sakius, hadivakidě, na nāvě oa huba; 'kabajana Mbi te Mbi diyaka o buhwa těkabo o ndabo 'āvě.

6. Ka mâ-a hadividě, ka mâ-a huba, ka mâ-a ngidě Mâ na mbya.

7. Nd' o bâ-ba yěni eâ, bâ běhěpi ba ka hâkâlânâkiyi, na, A 'li ka yěngidě na momo a di mot' ube.

8. Ka Sakius a těmě, ka mâ-a vâ n' Upangiyi, na; Upangiyi, hilakěte, ekulu e' ungumba muamě nd' eamě e věkě me-

kuge; nd' oningě 'mba nāngānā moto ka moto elombo na mbabo, mbi ka timbi mā benai.

9. Ka Jisus a vā na ju, na, Buhwa tēkabo ndi bo' iyonga bo pādi o ndabo tēkaně, jambojana māa te mwana ua Ebrahim.

10. Ikabojana Mwana-moto a pāndi ka buta na ka yongě e jadi nyangango.

11. O 'bā-ba yoki belombo tēkabe, ka Mā-a bada ka Mā-a kaniya ukanakādi, 'kābojana A diyakindi A bě baka na Jē-ruselēm, 'kabojana ba ma pikilakiya na ipangiya ja Anyambě ja 'li ka pumiya o mbenjě pākā.

12. Ovaně nd' o Mā-a vāki, na, Enāmi 'a momo na uhuhu e kěkind' o ehe 'a yaviděngo ka pahiya ipangiya o pěl' 'aju mětě, na mā-a timba.

13. Ka mā-a ndiya jomu jaju ja bahayi, ka mā-a bweyidě bā jomu ja mawēla, ka mā-a vā na bā, na, Janjakani kwanga n' umba-mbi ka pāyě.

14. Ndi ibaju ba mboka ba ma lonaki mā, ka bā-ba loma mbando o mbuhwa 'aju, na, Hoa vahaka momo tēkaně a pangakiya hwě.

15. E diyakindi, o mâ-a diyakidi a timba, pahiyango ipangiya, ka mâ-a sombiyě na bahayi tě ibaju ba věki hika, ba ndakudwě o mâ-a jadi, na ovaně nd' o mâ-a ka yowě nyanga ea moto uěhěpi e kovidin' ukita.

16. Ka ua bohoboho a pâ, na, Upangiyi, iwěla jávě i kovi jomu ja mawěla.

17. Ka mâ-a vâ na ju, na, Hohonganěngo, uhayi uyamu: 'kabojana o bweyidi ikěngě na ehâlě mětě, pangakiya jomu ja mboka.

18. Ka ua babale a pâ, na, Upangiyi, iwěla jávě i kovi mawěla matano.

19. Ka mâ-a vâ tepě na ju, na, Diyaka tepě ávě ua mboka itano.

20. K' upâkwě a pâ, na, Upangiyi, hila-kěte, iwěla jávě nd' ekadi ijamě i di tatango bakiděngo n' unamba:

21. Ikabojana mbi bangind' ávě, nana o mot' ukolo: o tâlâkiděte ibeávě be ha nangakidě, na n' ávě o benjaka ibeávě be ha liyakidi.

22. Ka mâ-a vâ na ju, na, Uhayi ngávě ube, mbi ka yěkiděte ávě na bea udumbu muávě mětě. Ávě te yowěyowě na mbi mot' ukolo, mbi tâlâkidě ibeamě be ha

nangakidě, mbi benjaka ibeamě be ha li-yakidi.

23. Nd' e lě nd' eâvě e ha vėkidi hika 'amě o ikova, ovaně nd' umba-mbi ka uwě ibeamě n' ikova o ipâ jamě i ka pâyě?

24. Ka mâ-a vâ na ba diyaki baka, na, Nângânâki mâ ni iwěla tēdině, oa vi jâ ni a di jomu ja mawěla.

25. (Ka bâ-ba vâ na ju, na, Upangiyi, a jomu ja mawěla.)

26. Ikabojana mbi vâki n' inyěni, na, A janidi uěhěpi nd' a ka věwě; a ha 'bě ně, a ka nângânwěndi tombete ibeaju be janidi.

27. Ndi vanakani okava ndoba t' ijamě, i ha vahaki 'mba mbi pangakiya bâ, n' inyěni oa weyi bâ ni o boho boamě.

28. ¶ A kalakate nonaně, ka mâ-a 'la o bohoboho, bobetaka na 'la o Jěruselēm.

29. E diyakindi, o Mâ-a diyakidi a bě baka Bětpeje na Bětane, o ukodi u tubakwě na ukodi mua Alivs, ka Mâ-a loma beyo-kwedi beaju bebale,

30. Na, Kěkěni o ibâkâ i jadi o boho boanyu; o betakateni omě o ka duwandini etumbě ea buru tingamango, e ha diuwěte na moto; unjuwaki eâ ni oa vani eâ ni okava.

31. Nd' oningě moto ka moto a uwa inyě-

ni, na, O unjuwaka li eâ-i na nde? o ka vâki na ju kakana, Ikabojana Upangiyi a na mala na eâ.

32. Ka ba lomakudwě ba 'la, ka bâ-ba kâbidě pani-ka Mâ-a ma languwa bâ.

33. O bâ-ba diyaki ba unjuwaka etumbě, ka bâ-ba duwi eâ ba vâ na bâ, na, O unjuwaka li etumbě na nde?

34. Ka bâ-ba vâ, na, Upangiyi a na eâ na mala.

35. Ka bâ-ba vana eâ o Jisus a jadi: ka ba-bâ kahidě ngâi jabu o etumbě, ka ba-bâ batidě Jisus omě.

36. A kěkě, ba wanjaka ngâi jabu o njea.

37. O Mâ-a diyakidi a bě baka n' ihu-
banido j' ukodi mua Alivs, ebimba ea be-
yokwedi eěhěpi e ka yalakě ipeya n' ibe-
ndě ja Anyambě na moyi maněně o pělě
ea behavu tě beněně ibeabu be yěněkidi;

38. Na, ibâtâ n' Upolo u vakě na dina
j' Upangiyi: jonga o Hěvăn, ivenda oba
mětě.

39. Ka Farisi jâkâ ja ebimba ja vâ
na Ju, na, Uyokwidi, kandakidě beyokwedi
beâvě.

40. Ka Mâ-a yavwana ka Mâ-a vâ na bâ,

na, Mbi langwakiyandi inyěni, na, ekaba ba diyingě dâ, vâkânâ malale ma te ma hunganaka o yama.

41. ¶ O Mâ-a bakamidi, ka Mâ-a hilě mboka, ka Mâ-a eya eâ mbembe,

42. Na, Avě kab' avě, t' o diyakingě yowěngo tombekete o buhwa k' iboávě ekabo, belombo bea jonga jávě! nd' o kya těkaně be kutudwěngo mihâ mávě.

43. Ikabojana hwi i vakand' avě-o jadi, ja ndoba jávě i ka tongě avě uhembe ulwaniděngo, na ba avě petango sâta, dibiděngo avě pělě jěhěpi,

44. Ba ka nangiděnd' avě na he věvělě, na bana bávě ba jadi utema muávě; na bâ-ba dikiye avě tombe n' ilale jâkâ kahamango n' ipâkwě; 'kabojana oa ' o diyaka egombe 'avě e lumbakudwě yowěngo.

45. Ka Mâ-a vala o těmpěl, ka Mâ-a yalě ipumě ja ba ma hambaka omě, na ba hambakidě tepě.

46. Na Mâ na bá, na, E lěndwěngo, na, Ndabo 'amě e ndi ndabo e' ikaliya; nd' o ndi yâ ni pangango eboboka ea me-yibi.

47. A yokwakidě o těmpěl buhwa ka

buhwa. Ndi prist ja meolo na balēndi na bato banēnē ba butakind' o weya Mâ,

48. Ba duwe nyang' 'abu e ka hayē : 'kabojana bato bēhēpi ba ma yokolakiidi Mâ na iyokiya inēnē.

KAPITA XX.

1. E diyakindi, buhwa bâkâ o jâ hwi tēdinē, A yokwakidē bato o tēmpēl, a kalakiya sango-eyamu, ka prist ja meolo na balendi na batodu ba pâ o Mâ-a jadi,

2. Ka bâ-ba kala na Ju, na, Langwakiya hwē, ngud' 'âvē e hanakē belombo tēkabe? tombe a lē nja a vēkid' Âvē ngudi tēkanē?

3. Ka Mâ-a yavwana ka Mâ-a vâ na bâ, na, Mbi ka uwa tepē inyēni ndaga pâkâ ; n' inyēni oa languwi 'Mba ni :

4. Baptisma ea Jân, e diyakindi ea Hēvën, ipē ea bato ?

5. Ka bâ-bâ hokolani bâ mētē na bâ mētē, na, Oningē hoa vâ na, ea viya oba ; A ka vwi, na, Nd' o 'nyakidē li o kamidi mâ ni nandē ?

6. Nd' oningě hoa vâ, na, Ea bato ; bato bēhēpi ba ka yanguwi hwě malale : 'kabojana ba ditākidi na Jân a diyaki usaki.

7. Ka bâ-ba timbwana, na, ba yâle o languwa pělě 'aju e vakiyedi.

8. Ka Jisus a vâ na bâ, na, N' Umbamba languwe tepě inyēni ipanga jamě i hanakě beloinbo tēkabe.

9. Jâ ndi jaju ja yalě o kaniya bâ ukakâdi tēkamu ; Momo n' uhuhu a liyaki mwanga, ka mâ-a dikiya muâ baliyi, ka mâ-a 'la o ehe ea yaviděngo ulingo uyaba.

10. O hongodi ka mâ-a loma uhayi o baliyi ba jadi, nana ba vėke mâ bebuma bea mwanga : ndi baliyi ba bomaki mâ, ka bâ-ba timbě mâ naně.

11. O njo 'pâkwě ka mâ-a loma uhayi upâkwě : ka bâ-ba boma tepě mâ, ka bâ-ba haya mâ ihadi vi' ihâni, ka bâ-ba timbě mâ naně. •

12. Njo 'pâkwě ka mâ-a loma ua balalo : ka bâ-ba luma tepě mâ, ka bâ-ba uhwa mâ o uhěngě.

13. Jâ ndi j' upangiyi mua mwanga ja vâ, na, Mbi hakě lě na ě? Mbi ka loma-

ndi mwan' 'amě a tândâkě : e te diyaka na ba ndi ba běkě ba yěningě mâ na bâ-ba dilě mâ.

14. Nd' o baliyi ba yěni mâ, ka bâ-ba hokolaniya bâ mětě na bâ mětě, na, Ujigi nd' ekamu : vakani, ho weyaki mâ ni, na ekuha ea bě eahu.

15. Nonaně, ka bâ-ba pumě mâ o mwan-nga o bwebwe, ka bâ-ba weya mâ. Upangiyi mua mwanga a ka ha lě bâ ovaně na ě?

16. A ka viyi ka jilidě baliyi tēbaně, na mâ-a vě mwanga bapâkwě. O bâ-ba yoki eâ bâ, na, E diyake nonaně.

17. Ka Mâ-a hilě bâ, ka Mâ-a vâ, na, E di lëndwěngo ekae e lě, na, Ilale ja balongi i kiyakidi, já ndi ja bě pě molo mu' itududu?

18. Moto uěhěpi a kwakě o ilale tēkadi a ka bukiyandi; ndi uaju a ka kwě uěhěpi, i ka nyingi mâ.

19. Ka prist ja meolo ma balěndi ba butaki o nangidě benâ o Mâ-a jadi o iwěla tēdině; ndi ba bangaki bato : 'kabajana ba yěněki na A kanakiyi bâ ukana-kâdi tēkamû.

20. Ba ka běmběkě Mâ, ka bâ-ba loma

ndâdu, i pumakiyedi ona bato bayamu, nana ba ka bweyi ndaga jaju, na ovaně nd' o ba ka pādě Mâ o ngudi na ipangiya ja gâven.

21. Ka bâ-ba uwa Mâ, na, Uyokwidi, ho yowěngo na o vâkândi na nâvě o yokwakidě hohonganěngo, na nâvě oa yěněkě moto uěhěpi pivi, nd' o yokwakiděndi njeya ea Anyambě pâkwěpâkwě :

22. E te hohonganěngo na ho věkě Sisar pago, ipě e ibě ?

23. Nd' A yěněkindi ugono muabu, ka Mâ-a vâ na bâ, na, O yějěkiyě li Mbi na nde ?

24. Levakidi 'Mba ni fura. E lě na uvela na dina ja nja? Ka bâ-ba timbwana na vâ, na, Bea Sisar.

25. Ka Mâ-a vâ na bâ, na, Věkěni Sisar belombo be di bea Sisar, na Anyambě belombo be di bea Anyambě.

26. Ba yâle o bweya ndaga jaju o boho boa bato : ka bâ-ba mama iyavwana jaju, ka bâ-ba vâlâmiyě vo.

27. ¶ Ka Sadusi jâkâ i ma hâhâkâ nana o 'bě n' ipumbuwa, ja pâ o Mâ-a jadi ; ka bâ-ba uwa Mâ,

28. Na, Uyokwidi, Mosěs a lěnděkiyi

hwě, na, Oningě mwana-nyangwě na moto a wa, na mâ-a dika mwajo, a wa a diye na bana, na mwana-nyangwě a ka nângâkâ mwad' 'aju, na mâ-a tēdē mwana-nyangwě ibângâ.

29. O diyaki ba nyangwě pâkâ hěmbwě-di: ka ua bohoboho ua nângâ mwajo, ka mâ-a wa a diye na bana.

30. Ka ua babale a nângâ mâ o bobaka, ka mâ-a wa a diye na mwana.

31. Ka ua balalo a nângâ mâ; eâ nya-nga tē te ea hěmbwědi tē eēhēpi; ba wakite ba dike bana.

32. O madikanido ka ua mwajo a wa tepě.

33. A ka diya lě ovaně mwad' 'a nja o ipumbuwa? 'kabajana bēhēpi hěmbwědi tē te ba baki mâ.

34. Ka Jisus a timbwana ka Mâ-a vâ na bâ, na, Bana ba he tēkaně ba bakandi, na bâ-ba vēkwě o maba:

35. Ndi ba ka yěnwě weyango na o pa-hiya ehe tēe ně, n' ipumbuwa j' iwedo, ba baka, na bâ-ba vēkwě o maba:

36. Na bâ-ba yalě pě o wa: 'kabajana ba diyakate ba bē bwēsě ka enjěl; ba bēndi bana ba Anyambě, ba diyaki bana ba ipumbuwa.

37. Ea na bato ba pumbwakandi, pë lë na Mosës a levakidëte o ele, o mâ-a tubakë Jëhova, na, Anyambë ea Ebrahim, na Anyambë ea Aisak, na Anyambë ea Jekâb.

38. Ikabojana A 'bë Anyambë ea ba di wewe, ndi A ea ba di mihá : 'kabojana bëhëpi ba te o Mâ-a jadi miha.

39. ¶ Jâ ndi ja balëndi bâkâ ja timbë, na, Uyokwidi, oa vwi bwamu.

40. Oviya 'vanë b' uwaka pë Mâ *nyuwë* na vilolombo.

41. Ka Mâ-a vâ na bâ, na, E lë ndi eabu e vâkë na Kraist a Mwana ua Devid ?

42. Devid mâ mëtë a ka vâkâ o ejanganangobo ea Psamu, na, Jëhova a vâki n' Upangiyi muamë, na, Diyaka o enâ 'amë eyomi,

43. Kabo Mba ta panga baloni bâvë ebonga 'vë e pitakiyë.

44. Devid a tubaka Mâ, na, Upangiyi, nd' A lë mwan' 'aju na ë ?

45. Ka Mâ-a vâ na beyokwedi beaju o matâ ma bato bëhëpi, na,

46. Kelevakani na balëndi, ba vahakë o tamwaka na ngâi iyaba, ba tândâkâ mahomwë o mahambanido, na bediya benënë o sinegâg, na lolika la betiyango o masango.

47. Ba pukulakě mandabo ma mealika, na bâ-ba haka makaliya mayaba iyaba ja bato: bâ baně ba ka duwi pě ivomudwě iněně wa.

KAPITA XXI.

1. Ka Mâ-a betaně mihâ, ka Mâ-a yěně benami be kutwakidě mavě mabu ma bove-kě o egala ea ungumba.

2. Ka Mâ-a yěně tepě mwalika n' uhu-hu mu' ukuge u kutwakidě mait ibale omě.

3. Ka Mâ-a vâ, na, Mbi langwakiyandi inyěni o pâkwěpâkwě, na, ukuge tě mua mwalika ekamu mâ-a kutudi wa na bâ bě-hěpi :

4. Ikabojana ekaba běhěpi ba kutidě-ndi mavě mabu ma Anyambě oviya bwi-ge boabu : ndi mâ na bonyamo boaju a kutuděte nyang' 'aju e ma diyana eěhěpi.

5. ¶ O bâkâ ba diyaki ba kalaka o pělě 'a těmpěl, nyang' 'aju e diyaki kâ-vudwěngo na malale na mavě mayam', A vâki, na,

6. Nd' o pělě 'a belombo tě ibeanyu be hilakě ekabe, hwi i vakandi, i ka měndě i

dikane ilale jákâ n' ipâkwě kahaniděngo, i ka mëndě i sajwě.

7. Ka bâ-ba uwa Mâ, na, Uyokwidi, belombo tēkabe be ka diya lě nja 'gombe ě? na e lě nja ndembo ě e ka diya o belombo tēkabe be ka hamě?

8. Ka Mâ-a vâ, na, Bandamakiděni o banga oa temudwěni: 'kabošana baitě ba ka pwi na dina jamě, na, Umbi Mâ; ego-mbe ea bi baka: o vitanaki bâ ni.

9. Ndi o inyěni-o ka yokěni o pělě 'a beduka na bedungu, o bangakeni: 'kabošana belombo tēkabe ndi be ka botě; nd' ihuku i ha koke.

10. Ka Mâ-a vâ na bâ, na, Yeně etomba e ka yani na etomba *epâkwě*, dině ipangiya na ipangiya *ipâkwě*:

11. He e ka ninganěndi ininganě iněně o loboko lākâ, n' usalaku, na bevuvu; na belombo bea mahihi na megoma meněně me ka yěněněndi oba.

12. Ndi na ekabe beěhěpi na taka, ba ka kahidi benâ beabu o 'nyěni-o jadi, na o ngongolidě 'nyěni, ba ka pāděndi inyěni o sinegâg, na o ndabo ja ntyogo, o pâkudwěni o boho boa mepolo na bapangiyyi o nyanga ea dina jamě.

13. E ka diyandi o 'nyëni-o jadi o pëlë 'a ipakuwa.

14. Nandi lenakide *ea ni* o melema meanyu, o take o pikiliyani nyang' anyu e ka timbwaně:

15. Ikabojana Mbi ka vëndi 'nyëni udumbu n' iyowě, bea ndoba janyu jěhěpi be ka mëndě ba sule na ba dibide,

16. O ka kândwëndini na ba jakidi 'nyëni, na bana ba nyangwě, na majawě, na mboyi; ba ka weyakiděndi 'nyëni *báká*.

17. O ka binwëndini na *bato* běhěpi o nyanga ea dina jamě.

18. Ndi tombe na howe ea molo muanyu ea nyange.

19. Pahakiyateni malina manyu n' iyika janyu.

20. O inyëni-o ka yënëni Jěruselēm na ndumba ulwaniděngo, yowakěni na ujilo muaju mua bě piělě.

21. Nandi ba jadi o Judia ba kweyakě o mekodi; ba ka diyě omě o hanganě ba vengēměke; ba ka diyě o behiki ba ngakiye omě.

22. Ikabojana já hwi těkadi ndi ja ngundako, ovaně nd' o belombo beěhěpi be lënděkudwě be ka hohonganě.

23. Ndi majili na ba ka diyě na memi na ba ka nyangě, o hwi tēdině! 'kabajana etuniya eněně e ka diyandi o ehe, na ngambi na bato tēkaba.

24. Ba ka kwi na mběbâ e' ukwala mu' ibâtâ, ba ka valanwi mbwedi o betomba beēhēpi; na Jēruśelēm a ka pitakwě nâ Betomba kabo o 'gombe ea Betomba e ka honganě.

25. ¶ Ndembo i ka diyandi o joba, na ngāndě, na nyētēti; o he majili ma betomba, na njukě; manga na bebuluwa be bumbaka;

26. Melema mea bato me ka diyě mea pēpē na jângâ, na imbuwa ja belombo be vakě o he: 'kabajana ngudi ja oba i ka ninganěndi.

27. Nandi bēngě ba yěněkě Mwana-moto a vaka o evindi na ngudi n' ivenda iněně.

28. O belombo tēkabe be ka yalě o hama, bēngě o umbwakiyeni oba, n' inyēni oa betēni meolo manyu; 'kabajana ivango janyu ja bēndi baka.

29. Ka Mâ-a kaniya bâ ukanakâdi, na; Hilakēteni ele ea itâlâ, na bele beēhēpi;

30. Oningě be ka pumakě *bekai*, o yěně.

kětení na o yowudětení 'nyěni mětě na ego-
mbe ea yomu ea běndi piělē.

31. Eā nyanga tē te eanyu, o inyěni-o ka
yěněni belombo tēkabe be hamaka, yowakē-
ni na ipangiya ja Anyambě ja běndi piěle.

32. Mbi langwakiyandi inyěni pākwe-
pākwe, na, Igona tēkadi ja tombe, kabo
beěhěpi ekabe bea hama.

33. He na oba ndi be ka tombě; ndi nda-
ga jamě ja tombe.

34. ¶ Bandamakiděni inyi mětě, banga o
'gombe te 'gombe melema meanyu mea to-
mba o londa na belombo bea 'mēna tēkae n'
ivula n' ipeya, na buhwa tēboně boa kábide
inyěni matota.

35. Ikabojana bo ka viyandi pani-ka ila-
mbo o bēhěpi ba jadi o boho boa he boē-
hěpi.

36. Nandi, vengakiděni n' inyěni-o ka ka-
lakiyani egombe eěhěpi, ovaně nd' inyěni o
ka yěněněni weyango na o kweyia belombo
tē be vakě ekabe beěhěpi, na o tēmě o boho
boa Mwana-moto.

37. Na mwehe A diyakindi A yokwakidě
o tēmpěl; o bulu ka Mā-a puma, na 'la ka
diya o ukodi u tubakwě na *Ukodi* mua
Alivs.

38. Ka bato běhěpi ba punda o Mâ-a jadi o těmpěl n' ubwa, ka yoka Mâ.

KAPITA XXII.

1. Nandi isango ja pěmbě e ha 'bě na ilanda i ma tubakwě, na, Isango j' Ikunduwa, i diyaki ja bě piělě.

2. Ka prist ja meolo na balěndi ba vaha nyang' 'abu e ka weyě Mâ ; 'kabojana ba bangaki bato.

3. ¶ Ka děvil ea ngiya o ulema mua Judas a ma tubakwě, na, Iskariât, ua tango ea jomu na bebale.

4. Ka mâ-a 'la pělě na 'aju, ka mâ-a tinga na prist ja meolo na ngâwě, nyang' 'aju e ka kândě Mâ o bâ-ba jadi.

5. Ba yěněki mbya, ka bâ-ba panganě mâ na ba ka vi mâ dâlě.

6. Ka mâ-a yohaně ; a ka vahaka egombe e kândânâkě Mâ o bâ-ba jadi o ebimba e ha 'bě.

7. ¶ Ka buhwa boa pěmbě e ha 'bě na ilanda boa pâ, o Ikunduwa i ka weywě.

8. Ka Mâ-a loma Pite na Jân, na, Kě-kěni ka kenjaki hwě ni Ikunduwa, ho jeni.

9. Ka bâ-ba vâ na Ju, na, O ka vaha lě ho kenjakě ove?

10. Ka Mâ-a vâ na bâ, na, Hilakěteni, inyěni o ka ngiyěni o mboka, moto a ka lati n' inyěni omě, bapěngo imâgi ja miba; o ka vitanaki mâ ni o ndabo 'aju e ka ngiyě.

11. N' inyěni oa vâni na momo uyam' ua ndabo, na, Uyokwidi a vwi na nâvě, na, Ikenga ja bangi ijamě i ka jě Ikunduwa na beyokwedi beamě, i l' ově?

12. A ka leviděndi inyěni ilika via 'ba iněně bonguěngo: o ka kenjakěni omě.

13. Ka bâ-ba 'la, ka bâ-ba kâbidě ka Mâ-a ma languwa bâ: ka bâ-ba kenjě isango.

14. O iwěla i ipâkidi, ka bâ na jomu ja metodu na metodu mebale ba diyanidě.

15. Ka Mâ-a vâ na bâ, na, N' iyombuwa ndi 'jamě i yombwakidi o ja Ikunduwa tě-kadi n' inyěni n' Umba na taka o yěně betuniya:

16. Ikabojana Mbi vâki n' inyěni, na, Mba je pě já, kabo o já i ka hohonganě o ipangiya ja Anyambě.

17. Ka Mâ-a nângâ sěngě ea kapi, ka Mâ-a vě akeva, na, Nângâkâni ekae, o ka kabanakiyani inyi mětě n' inyi mětě.

18. Ikabojana Mbi vâki n' inyëni, na, Mba mâtě pě ebuma e' ukâdi, kabo ipangiya ja Anyambě ja pâ.

19. ¶ Ka Mâ-a nângâ pěmbě, ka Mâ-a vě akeva, ka Mâ-a pěhě *ed*, ka Mâ-a vě bâ, na, Nyol 'amě e didi věwěngo o pěl' 'anyu nd' ekaně: hakani ekae iyongidě jamě,

20. Ka Mâ-a vě pě *sěngě* ea kâpi, beja pa, na, *Sěngě* tě ea kâpi ekaně, e ndi panga ea kya na makiya mamě, ma tâkě o pěl' 'anyu.

21. Ndi hilakěteni, enâ ea a kândâkě 'Mba e *te* n' Umba o tagulu.

22. Pâkwěpâkwě Mwana-moto a kěkěte, kâ eâ-e pangakudwě: ndi maguga na moto tě uaju A ka kândwě!

23. Ka bâ-ba yalě iuwana bâ mětě na bâ mětě, na, nja didi o bâ-ba jadi a 'mbaka o ha elombo tēkae.

24. ¶ Ba diyaki tepě na jomano, na, nja ka langwě boněně wa.

25. Ka Mâ-a vâ na bâ, na, Mepolo mea Betomba me pangakiyi bâ; na ba yambakiyi bâ ba tubakwě na ba hakě bwamu.

26. Ndi oa *diyeni* nonaně: nd' a ka diyě boněně o 'nyëni-o jadi, a diyake ka nděmbě mětě; a ka diyě molo, ka a hakiyě.

27. *Měťě* nja *di* boněně wa, a diyakě o beja, ipě a hakiyě? hanga na a diyakě o beja? ndi Mbi nd' o 'nyěni-o jadi ka a hakiyě.

28. Inyěni ndi ba bembidi n' Umba o mayějudwě mamě.

29. Mbi kenjiděndi 'nyěni ipangiya, ka Paia a di 'Mba kenjiyěngo.

30. Na ovaně nd' inyěni-o ka diyěni o jakani o mâtākâni o tagulu 'amě o ipangiya jamě, diyango o beka o yěkěkiděni jomu ja miyâ na miyâ mabale ma Isreěl.

31. ¶ K' Upangiysi a vâ, na, Saimân, Saimân, hilakěte, Setan a yombwakand' inyěni ovaně nd' o mâ-a ka hěhě inyěni pani ka hwit.

32. Ndi Mbi kaliyendi o pěl' 'âvě, na ovaně nd' ikamidě jâvě i ka měndě i nyange: o âvě-o ka diyě oa 'luwa, o ka yâdâkidě bana ba nyângwě.

33. Ka mâ-a vâ na Ju, na, Upangiysi, mbi te kokěngo na o vala na nâvě, o ndabo 'a ntyogo, na iwedo.

34. Ka Mâ-a vâ, na, Pite, Mbi langwakiyand' âvě, na, kuba ea kâkâle o buhwa tēkabo, nd' o hâhě nj' ilalo na oa 'wě 'Mba.

35. Ka Mâ-a vâ na bâ, na, o 'Mba-mbi

lomakidi inyěni o diyi na elandi ea dālě, na elandi ea kola, na makogo, o nyamakindini elombo? Ka bâ-ba vâ, na, Na vilolombo.

36. Jâ ndi jaju ja vâ na bâ, na, Nd' o kya těkaně, a di na elandi ea dālě, a nāngâ-ke *ea*, a di na elandi ea kola a *hake* nyanga tě; a ha 'bě n' ukwala mu' ibâtâ, a hamba-kidě ngâi 'aju, na mâ-a hamba umbâkâ.

37. Mbi vâki n' inyěni, na, e di lëndwě-ngo ekae e ka hânjâbiyi n' Umba, Ka Mâ-a langwě na bahayi ba bobe: 'kabojana belombo be jadi o pěl' 'amě be te n' ihuku.

38. Ka bâ-ba vâ, na, Upangiyi, hilakěte mekwala mu' ibâtâ mebale nd' ekame. Ka Mâ-a vâ na bâ, na, Ea bi twětwe.

39. ¶ Ka Mâ-a puma, ka Mâ-a 'la o ukodi mua Alivi te ka Mâ-a ma haka mběmbě; ka beyokwedi beaju bea vitě Mâ.

40. O Mâ-a diyedi A bě iboko tě, ka Mâ-a vâ na bâ, na, Kalakiyani, banga oa ngiyani iyějudwě.

41. Ka Mâ-a věngěmě o bâ-ba diyakidi pani-ka ihwa j' ilale, ka Mâ-a kwa na ma-bāngâ ka Mâ-a kaliya,

42. Na, Paia, oningě oa panga, věngěkidě 'Mba *sěngě* tě ea kâpi ekaně; ndi, hanga upango muamě, nd' umuâvě, u hamake.

43. Ka enjël e viya oba ea pumiya Mâ, e ka yâdâkidê Mâ.

44. O Mâ-a diyakidi a ka yënêkê meadi ka Mâ-a kaliya pë n' inënë: ebabadi 'aju ea bē bwēsē ona matâi ma makiya manënë ma kwaka o he.

45. O Mâ-a umwedi ikaliya, ka Mâ-a pâ o beyokwedi beaju be jadi, ka Mâ-a kâbidê bâ-ba tikaka na ngëbë,

46. Ka Mâ-a vâ na bâ, na, O yaka li na nde? tēmekëni, o ka kalakiyani, banga oa ngiyani iyëjudwë.

47. ¶ O Mâ-a békite a kalaka, hilakête ebimba, na a ma tubakwë, na, Judas, ua jomu na babale, a kékê o boho boabu, ka mâ-a bakama na Jisus k' a pyâpyâ mâ.

48. Ndi Jisus a vâki na mâ, na, Judas, o kândâki Mwana-moto n' ipyâpyâ?

49. O ba diyakidi Mâ ulwanidëngo ba yënidi be ka vitë, bâ na Mâ, na, Upangiyi, ho kokake n' ukwala mu' ibâtâ?

50. ¶ K' umbâkâ uabu a koka uhayi mua prist ya molo ka mâ-a lena mâ ditâ jaju iyomi.

51. Ka Jisus a timbwana, na, Hukakidëni ovanë. Ka Mâ-a kupanë ditâ jaju, ka Mâ-a yongë mâ.

52. Já ndi ja Jisus ja vâ na prist ja meolo, na ngáwe ja tēmpěl, na batodu, ba vaki o Mâ-a jadi, na, O pândini na mekwala na beposa, ona o vakandi o mwibi u jadi?

53. O Mbi diyaki n' inyēni o tēmpěl buhwa ka buhwa, ou hambakidēni benâ o Umbi jadi; ndi iwēla janyu nd' ekadi, na ipanga j' ivititi.

54. ¶ Já ndi jabu ja nāngâ Mâ, na vala na Mâ, ka bâ-ba pādě Mâ o ndabo 'a prist ea molo. Ka Pitě a vitě yavidēngo.

55. O bâ-ba bondakidě veyā o hanganě e' ikenga, bâ 'mě diyango, ka Pitě a diya tēpě o ngalakabo 'abu.

56. Ndi itāngâ n' ihuhu i yēněki mâ diyango baka na veyā, mâ mâ dihá sii, mâ, na, Ekaně a diyaki tepe na Ju.

57. Ka mâ-a hâhâ mâ, na, Mwajo, mba 'wě Mâ.

58. Vikikili kwěi k' upâkwě a yēně mâ, ka mâ-a vâ, na, O tēpě uabu. Ka Pitě a vâ, na, Momo, mbi 'bě.

59. Ulingo k' iwēla jákâ tombango, k' upâkwě a vâ yâdidēngo, na, Mbambayě ekaně a diyaki tēpě na mâ; 'kabojana a ndi ua Galili.

60. Ka Pitě a vâ, na, Moto, mba 'wě ka ávě o vâkě. A kalakate o mbenjě tě ea pākā, kuba e kākālākā.

61. K' Upangiyi a vonguwa, ka Mâ-a umbuwa Pitě. Ka Pitě a yongidě ndaga e' Upangiyi, nyang' 'aju a vâki na ju, na, Na kuba na kākālākā, o ka háhiyi 'Mba nj' ilalo.

62. Ka Pitě a puina o uhěngě, a ka eyaka nangudi.

63. ¶ Ka bamo tě ba bweyaki Jisus ba diyaki ba ka věhěkě Mâ, ba bomaka Mâ.

64. O bâ-ba dibi Mâ mihâ, ba ka bweyaka Mâ o boho, na uwa Mâ, na, Sâkākā, nj' 'a bweyakě Ávě?

65. Na belombo bepâkwě beité beabu be ma kalaka o pěl' 'aju bokilaka.

66. Buhwa bo yakate, ka batodu ba bato na prist ja meolo na balěndi ba lataniya, ka bâ-ba pādě Mâ o 'hoka 'abu, na,

67. Ávě ndi Kraist? langwakiya hwě. Ka Mâ-a vâ na bâ, na, Oningě 'Mba languwa inyěni, oa kamiděni:

68. Oningě 'Mba uwa tepě *inyěni*, oa yavwani 'Mba ni, n' inyěni oa huludě tepi 'Mba ni.

69. Okava tombango vâkâna Mwana-

moto a diyendi o 'nâ 'yomi ea ngudi ea Anyambě.

70. Ka bâ bēhēpi ba vâ, na, O te Mwana-Anyambě e? Ka Mâ-a vâ na bâ, na, O ndini vângo na Mbi wě.

71. Ka bâ-ba vâ, na, Ho lě pi na nja mal'ě ma tali? 'kabojana hwě mětě ho yokindi oviya udumbu muaju mětě.

KAPITA XXIII.

1. Ka ebimba eabu eēhēpi ea umwanidě, ka bâ-ba valana Mâ o Pailat a jadi.

2. Ka bâ-ba yalě o bakidě Mâ, na, Ho duwindi ekaně a ulwakidě 'tomba, na a kandakidě na Sisa a vėkwė pago, na na Mâ mětě ndi Kraist upolo.

3. Ka Pailat a uwa Mâ, na, Ávě ndi Upolo mua Jiu? Ka Mâ-a yavwana Mâ ka Mâ-a vâ, na, O vâki eâ.

4. Já ndi ja Pailat ja vâ na prist ja meolo na bebinba, na, Mba 'b' o duwa móto tėkaně evenda.

5. Ka bâ-ba loluwa n' iněně, na, A hiha-kidě bato, a yokwakidě o Jndia eēhēpi, a yalakě o Galili na pâ ono okava.

6. O Pailat a yokidi o pělě ea Galili, ka mâ-a uwa n' ipě a ua Galili.

7. O mâ-a yowudě na a u' ipanga ja Hěrod, ka mâ-a validě Mâ o Hěrod a jadi, mâ mětě a diyakit' omě o Jěruselěm hwi tědině.

8. Hěrod a yěněki mbya 'něně, o mâ-a yěněki Jisus: 'kabajana a diyakindi a vahaka o yěně Mâ *ulingo* uyaba, 'kabajana a diyakindi a yoka belombo beité o pěl' 'aju; a yombwaka na t' a ka tand' o yěně Mâ a haka elembo.

9. Ka mâ-a uwa Mâ ndag' iitě; nd' A 'b' o yavwanaka mâ elombo.

10. Ka prist ja meolo na balěndi ba tēměkindi ba ka bakakidě Mâ nangudi wa.

11. Ka Hěrod na bamo baju ba 'duka ba hadividě Mâ, ba ka vėhěkě Mâ, ka bâ-ba batidě Mâ ibâtâ i panyakě, ka bâ-ba timbě pě Mâ o Pailat a jadi.

12. ¶ Boâ buhwa tě boa Pailat na Hěrod be lataki mboi; 'kabajana ba diyaki n' ibino ovyo bâ mětě na bâ mětě.

13. ¶ O Pailat a bědi prist ja meolo na bapangiyi ba bato ndiyango,

14. Mâ na bâ, na, O vanakidi 'mba ni moto těkaně, na a ulwakiděndi bato; hila-

kěteni, mbi kâtite *Mâ* o boho boanyu, na mbi 'bě duwango moto těkaně njěnji o pělě 'a belombo t' ibeanyu be bakakidě *Mâ* :

15. E! tombe na Hěrod : 'kabojana mbi lomakite inyěni o mâ-a jadi; ndi umbwakiyateni, o 'bě na elombo lukango n' iwedo e hawudwě o *Mâ*-a jadi.

16. Vâkâna mbi ka bomi *Mâ*, na huludě *Mâ*.

17. Ikabojana o mala ndi imaju ma hula-kidě umbâkâ o bâ-ba jadi o Isango.

18. Ka bâ-ba yama o njamba pâkâ, na, Věngěmě na *moto* těkaně ovaně, na nâvě oa hulidě hwě Barabas :

19. (A vamakudwě o ndabo 'a ntyogo, o pělě 'a ivegwanidě n' ihuhu i hakudwě o mboka, n' iweyana.)

20. Pailat a diyaki n' upango mu' ihulidě ja Jisus, ka mâ-a kala pě na bâ.

21. Ndi ba yamaki, na, Kâmâkidě *Mâ* o krâs, kâmâkidě *Mâ* o krâs.

22. Ka mâ-a vâ na bâ njo e' ilalo, na, Na nd' e lě, a ma ha lě nja bob' ě? Mbi 'bě mâ duwango na tina e' iwedo: vâkâna mbi ka bomi *Mâ*, na validě *Mâ*.

23. Ka bâ-ba loluwa n' iněně moyi eba,

ba uwaka na a kâmakudwě o krâs : ka moyi mabu na ma prist ja meolo ma bala.

24. Ka Pailat a lenidě na e diyake nyang' 'abu e ma jomba.

25. Ka mâ-a hulidě uabu a jombakidi, a ngakudwě o ndabo 'a ntyogo n' ivegwaniđe n' iweyana ; ndi a věki Jisus o itâ-ndidi muabu.

26. O bâ-ba diyaki ba valanaka Mâ, ka bâ-ba bweya Saimân pâkâ, ua Sairini a viya o 'hiki, mâ ndi uabu a hikakidě krâs, na a bapakiyě yâ o mbuhwa ea Jisus.

27. ¶ Ka njamba ea bato eněně, na bajo, ya vitě ba eyaka mâ na bâ-ba tatabangana.

28. Ndi Jisus a ka vongwaka o bâ-ba jadi ka Mâ-a vâ, na, na, Bajo ba Jěruselěm, o eyaki 'Mba ni, ndi 'yakani o pěl' 'anyu, na bana banyu.

29. Ikabojana umbwakiyateni hwi i vakandi, ijabu i ka vâyě, na, Ibâtâ na ba bekomba, na mahuhu ma ha jakidi, na mabě ma ha nyangakidě.

30. Ba ka diyi ba ka yalakě o vâ na mekodi, na, Vihamakiyi hwě ni ; na bekandan-golo, na, Dibaki hwě ni.

31. O vëngě lě ba ha belombo tēka-be o ele e di mihâ, ba ka ha lě ea yahe-yahe na ě ?

32. O diyaki tepě na bapâkwě babale, ba haki bobe, ba valanakwě na Mâ ka weyudwě.

33. O bâ-ba pâdi o iboko, i ma tubakwě na Kalvari, ka bâ-ba kâmidě Mâ omě, na ba haki bobe, ekaně o 'nâ eyomi, ekaně o 'nâ ea 'mëngwě.

34. ¶ Jâ ndi ja Jisus ja vâ, na, Paia, iyakidě bâ ; 'kabojana ba 'wě nyang' 'abu e hakě. Ka bâ-ba kabaniya ngâi 'aju na hoduwa kwai.

35. Ka bato ba tēmě inbuwa. Ka bâ na bapangiyi ba tâba tepě Mâ, na, A ma yongaki bapâkwě ; a t' o yongě nyol' 'aju inětě, oningě na ekaně te Kraist ea Anyambě e di pânângo.

36. Na sâjě tepě ba ka vëhěkě Mâ, ba vaka o Mâ-a jadi, ka vëkě Mâ vinigar,

37. Na, Oningě na o ndi Upolo mua Jiu, yongakě nyol' 'âvě mětě.

38. Ka ilëndě ja lëndwě oba ea molo muaju na melëndâ mea Grik, na Latin, na Hibru, na, UPOLO MUA JIU ND' EKAMU.

39. ¶ Ka moto a haki bobe umbâkâ a diyaki këlëmëngo a kila Mâ, na, Oningë na o te Kraist, yongakë nyol' 'âvë na hwë tepë.

40. Ndi k' upâkwë a yavwana n' a kandidate mâ, na, Oa bangaka Anyambë, âvë o jadi o jâ ikobwë tē ?

41. Hwë hohonganëngo mbambayë; 'kabojana ho pahiyi mahomano ma behadi beahu: ndi momo tēkanë a 'bë hango elombo ka 'lombo.

42. Ka mâ-a vâ na Jisus, na, Upangiyi, o ka yongakidë 'mba o âvë-o ka pâyë o ipangiya jâvë.

43. Ka Jisus a vâ na ju, na, Mbambayë, Mbi langwakiyand' âvë, na, O buhwa tēkabo nd' âvë-o ka diyë n' Umba o Paradais.

44. E diyakindi ea bë hongodi ea ba jomu na mawëla mabale, na ivititi na diyaka o he eëhëpi kwanga nala mawëra malalo.

45. Ka joba ja vinda, ka unamba unënë mua tēmpël mu-a pehiyë na hanganë.

46. ¶ O Jisus a yamidi na joyi 'nënë ka Mâ-a vâ, na, Paia, Mba bweyidëndi ilina jamë o makadu mâvë. O Mâ-a bi nonanë vango, ka Mâ-a diba.

47. O Sënturiân a yënidi be hamakidi,

ka Mâ-a bendě Anyambě, na, Ea bo-mwě penda, na, moto tēkaně a diyakindi uyamu.

48. Bebimba beēhēpi be yolanakidě ka yěně nyanga tēkaně, o bâ-ba hilidě belombo be hamakidi, ka bâ ba timbanidě, ba kěķě ba kumbaka ngonga jabu.

49. Megangano meaju meēhēpi, na bajo ba vitakidě Mâ oviya Galili, ba tēmēki na masēyi, ba hilakě belombo tēkabe.

50. ¶ Hilakěte, o *diyaki* na momo dina na Josěf, ua 'hoka; na *mâ-a diyaki* tepě moto uyam', ua hohonganěgo:

51. Mâ nd' a ha kamakidě ehok' 'abu n' ihadi viabu: a diyaki ua Arimatia, mboka ea Jiu; na mâ mětě a diyaki tepě a vengaka ipangiya ja Anyambě.

52. *Momo* tēkaně a kěkind' o Pailat a jadi, ka mâ-a jomba ekengo ea Jisus.

53. Ka mâ-a hubě eâ, ka mâ-a dinga eâ na ivěla, ka mâ-a nangidě eâ o malonga ma pudwakudwě ilale, ma diyakidi ma t' o nangudwě moto n' ivâkwě.

54. Boâ buhwa tēboně ndi bo diyaki bo' ikengě na buhwa bo' Iyâjâ bo diyaki bo bengakiya.

55. Ka bajo tepě, ba vakiyi na Ju o Ga-

lili, ba vitě, ka bâ-ba hilě malonga, na nya-
nga ea ekengo 'aju e nangakudwě.

56. Ka bâ-ba timba, ka kenjě meyâmbâ
na mavulě; ka bâ-ba yâjâ o buhwa bo' Iyâ-
jâ, hohonganěngo na elekanako.

KAPITA XXIV.

1. Nandi o *buhwa* boa wiki boa bohoboho
ka bâ na *bapâkwě*, ba punda n' ubwa ka
bâ-ba viya o malonga, ba valanaka belombo
bea kango beabu be kenjakidě.

2. Ka bâ-bâ kâbidě ilale vunguludwěngo
o malonga.

3. Ka ba-ba ngiya, ndi bu kâbâkidě eke-
ngo ea Upangiyi Jisus.

4. E diyakindi, o bâ-ba diyakidi ba naka-
ka opěla těně, hilakěte, bamo babale ba di-
yaki na ngâi i panyakě de piělě na bâ;

5. O bâ-ba diyaki ba bangaka ka bâ-ba
balidě meoho *meabu* o he, bâ na bâ, na, O
butaka lě ni A di mihâ o ba wewe ba didi
na nde?

6. A ibě okava, nd' A pumbuwendi; yo-
ngakiděni kâ Mâ-a kalaki n' inyěni o Mâ-a
diyakite a ngite o Galili,

7. Na, Mwana-moto a ka bweyudwěndi o makadu ma bato babe, na Mâ-a kâ mudwě o krâs, o buhwa bo' ilalo na Mâ-a umuwa pě.

8. Ka bâ-ba yongidě ndaga jaju.

9. Ka bâ-ba timba oviya malonga, na pâdě sango ea belombo těkabe beěhěpi o jomu n' umbâkâ na bapâkwě běhěpi.

10. Ba diyakindi Meri Magdalini na Joana, na Meri *nyangwě* ea Jems, na *bajo* bapâkwě *ba diyaki* na bâ, ba langwakiyedi metodu belombo těkabe.

11. Ndaga jabu i yěněněkindi o bâ-ba jadi ka bekalěkalě ; bu kamidě bâ.

12. Já ndi ja Pitě ja umuwa, na vala měmbila o malonga ; a ka balamaka, ka mâ-a yěně menamba mea liněn iboko n' iviabu bya, ka mâ-a timba, a kěķě a mamaka n' ulema muaju belombo tě be hamidi.

13. ¶ Umbwakiyate, o boâ buhwa tě babale ibabu ba diyaki ba kěķě o ibâkâ dina na Emaus, i diyaki mabo ma furlâng utoba oviya Jěruselēm.

14. Ka bâ-ba hova elâmbě bâ mětě na bâ mětě o pělě ea belombo tě be hamidi ekabe beěhěpi.

15. E diyakindi, o bâ-ba diyaki ba hova-

ka elâmbě, na bâ-ba batanakě, ka Jisus Mâ mětě a bakama, na kěķě na bâ.

16. Ndi mihâ mabu ma himbakudwěndi na bu yowakě Mâ.

17. Ka Mâ-a vâ na bâ, na, Ma lě nja mangâ-e ma ndaga imanyu ma kěķě o kěķě o bomaka penda inyěni mětě n' inyi mětě o inyěni-o tamwakě na ngěbě ekama?

18. Ka uabu umbâkâ, a diyaki dina na Kliopas, a timbwana ka mâ-a vâ na Mâ, na, O ndi mětě mwěngi o Jěruselěm, ka 'vě o ha yowakě belombo be di hama-ngo omě o hwi těkadi ekabe?

19. Ka Mâ-a vâ na bâ, na, Nja belombo e? Ka bâ-ba vâ na Ju, na, Bea Jisus ea Nasarět, momo a diyaki usâki u kenaki na behadi na ndaga o boho boa Anyambě na bato běhěpi :

20. Ka prist ja meolo na bapangiyi bahu ba bweyidě Mâ o yěķě e' iwedo, ka bâ-ba kâmidě Mâ o krâs.

21. Ndi ho ma pitakidi na Mâ nd' a 'mbakid' o vanguwa Isreěl: na tombe behěpi ekabe, o buhwa ndi buhwa bo' ilalo na belombo těkabe na hama.

22. E, na bajo ba njamb' 'ahu bâkâ ba ma punda o malonga, ba pangi hwě ho mamaka ;

23. O bâ-ba ha duwedi ekengo 'aju, ka bâ-ba timba, ka bâ-ba vâ, na, ba ma yěně tepě ehihila ea enjěl, i ma languwa *bâ* na A bi mihâ.

24. Ka ba di na hwě bākâ ba vala tepě o malonga, ka bâ-ba kâbidě tepě ka bajo ba ma vâ : ndi Mâ ndi uabu a ha yě-nidi.

25. Ka Mâ-a vâ na bâ, na, A ! betiketike, na melema me di bodilo n' ikamidě ja beěhěpi bea basâki be kalakidi :

26. Kraist au lukaka o yěně njuke tēka-di, na ngiya o ivenda jaju ?

27. Ka Mâ-a yalě na Mosēs na basâki bapâkwě bēhěpi, A ka pēhěkiyě bâ Ilēndwě jēhěpi belombo bea pělě 'aju mětě.

28. Ka bâ-ba bakama o ibâkâ jabu i kēkidi : ka Mâ-a ha bwēsě ona A 'mbaka o to-mba yaviděngo kwěi.

29. Ndi ba pinyilakidi Mâ, na, Yěngěkidě na hwě ; 'kabojana ea bi kolo, na buhwa bo tângamindi. Ka Mâ-a 'la ka yěngidě o bâ-ba jadi.

30. E diyakindi, o bâ na Mâ ba diyanakid' o beja, a ka nāngâkâ pēmbě, ka Mâ-a vambiya eâ ibâtâ, A ka pēhěkě, ka Mâ-a vě bâ.

31. Ka mihâ inabu ma bumuwa, ka bâ-ba yowě Mâ; ka Mâ-a nyângiyě bâ mihâ mabu.

32. Ka bâ-ba vâ bâ mětě na bâ mětě, na, Ulema muahu u diya u ka yodaka hwě utema, o Mâ-a ma kala na hwě o njeja, na o Mâ-a ma bumudě Malěndwě o hwě-ho jadi?

33. Ba ka těmě kě o j' iwěla tě ka bâ-ba timba o Jěruselěm, na bâ-ba kâbidě jomu n' umbâkâ, na ba diyaki na bâ yolaněngo,

34. Na, Upangiyi a pumbuwendi pâkwě-pâkwě, A ma pumiyand' o Saimân a didi.

35. Ka bâ-ba pakuwa belombo *be hamakid'* o njea, na nyang' 'abu e yowakidě Mâ, na ipěhě ja pěmbě.

36. ¶ O bâ-ba kalaki kakana, ka Jisus mâ mětě A těmě o hanganě 'abu, ka Mâ-a vâ na bâ, na, Jonga n' inyěni.

37. Ndi ba diyakindi na jângâ, na bâ-ba pikiliya na ba yěnindi ilina.

38. Ka Mâ-a vâ na bâ, na, O yěněkě li njuke ea nde? mapikiliya ma umwaka li o melema manyu na nde?

39. Hilakěni makadu mamě na matambi mamě, na A t' Umba mětě: ta kupani 'Mba ni, oa yěněni; 'kabojana ilina i 'bě na me-

honi na bevehe, k' inyëni o yënëki 'Mba ni Mbi jadi.

40. O Mâ-a bi nonaně vângo, ka Mâ-a levidě bâ makadu *maju* na matambi *maju*.

41. O bâ-ba diyaki ba t' o kamidě na mbya, ba mamaka, Mâ na bâ, na, O bi na beja okava ?

42. Ka bâ-ba vě Mâ ekulu ea 'jaka bo upakwě, na ea ekoda ea boyi.

43. Ka Mâ-a nângâ *beâ*, ka Mâ-a ja *beâ* o pwanj' 'abu.

44. Ka Mâ-a vâ na bâ, na, Ndaga jamě i kalaki n' inyëni o 'Mba-mbi diyakidi Mbi ngite n' inyëni, *nd'* ekadi ; na belombo beě-hěpi be ka timwěndi, be di lěndwěngo o Elekanako ea Mosěs, na o basâki, na o Psamu o pěl' 'amě.

45. Já ndi jaju ja bumudě bâ mapikiliya mabu, na ba bweyakidě Malěndwě,

46. Ka Mâ-a vâ na bâ, na, E lěndwěngo kakana, na kakana ka Kraist a lukaki na wa, na Mâ-a 'pumbuwa o bawewe o buhwa bo' ilalo :

47. N' iluwa ja melema n' ivěngidě ja bobe be ka pakudwě betomba beěhěpi o dina jaju, jali na Jěruselěm.

48. Inyëni ndi tali ja belombo těkabe.

49. ¶ Hilakěteni, Mbi bandakiděndi mohano mua Paia o inyěni-o jadi: ndi ta himbani o mboka Jěruselěm, kabo inyěni o ka pugwi na ngudi oviya 'ba.

50. ¶ Ka Mâ-a valana bâ kwanga nala Bětane A ka bětakě makadu maju ka Mâ-a vambiya bâ ibâta.

51. E diyakindi, o Mâ-a vambakiyi bâ ibâtâ, ka Mâ-a pěhwě na bâ, ka Mâ-a betanwě o Hěvěn.

52. Ka bâ-ba kaliya Mâ, ka bâ-ba timba o Jěruselěm na mbya 'něně:

53. Ba diyakind' o těmpěl lilimiděngo, ba tumbwakidě na ba bendakě Anyambě Aměn.

0 5166. 206. 100 20. 1881)
SANGO EYAMU

EA JÂN E LĚNDĚKIDI.

THE GOSPEL ACCORDING TO
JOHN,

TRANSLATED INTO THE BENGAL LANGUAGE

BY THE LATE REV. W. CLEMENS, AND WITH THE OTHER GOSPELS
REVISED AND HARMONIZED BY REV. R. H. NASSAU.

GABOON AND CORISCO MISSION, WEST AFRICA.

NEW YORK:
AMERICAN BIBLE SOCIETY,
INSTITUTED IN THE YEAR MDCCCXVI.

1881.

[Benga, 16mo.]

SANGO EYAMU

EA JÂN E LËNDËKIDI.

KAPITA I.

1. Ndaga e diyakind' o jali, na Ndaga e diyaki na Anyambë, na Ndaga të e diyakindi Anyambë.

2. Yâ të e diyaki na Anyambë o jali.

3. Mâ nd' A velakidi belombo beëhëpi; o 'bë na elombo e velakudwë, A diye, e di velwëngo.

4. Emënë e diyakind' o Mâ-a jadi; emënë të e diyakindi Bwe ya bato.

5. Ndi Bwe të e bumwakindi o ivititi; ndi ivititi viu yowakë yâ.

6. ¶ O diyaki na momo a lomakudwë oviya Anyambë a jadi, dina jaju ndi Jân.

7. Mâ nd' a vakidi upakuwi, ka pakuwa o pëlë 'a Bwe tënë, na ovanë nd' o bato bëhëpi ba ka kamidë Mâ.

8. Au diyaka Bwe tënë, ndi a lomakudwëndi ka pakuwa o pëlë 'a Bwe tënë.

9. *Yâně* e diyakindi Bwe 'a pákwěpákwě, e bumwakidě moto uěhěpi a vakě o he.

10. A diyakind' o he, Mâ tepě a velaki he, ndi he yu yowakě Mâ.

11. A vakind' o ibaju mětě ba jadi, ndi ibaju mětě bu vėhělěkidě Mâ.

12. Ndi tango e vėhělěkidě Mâ, ndi eaju e vėki ngudi na ba bě bana ba Anyambě, ba kamakidě dina jaju:

13. Bu jakwě na makiya, na bâ bu jakwě n' upango mua mehoni, bu jakwě tepě n' upango mua moto, kabo mua Anyambě.

14. Ndaga tē e 'lwakudwi mehoni, ka yâ-ya diya o hwě-ho jadi, (ka hwě-hwa yěně ivenda jaju, pani ka ivenda ja mwana ua Hangwě u' umbâkâ,) A di londango ti na ehewě na pákwěpákwě.

15. ¶ Jân a pakwakindi o pěl' 'aju, ka mî-a yama, na, Mâ nd' ekaně uamě a vâki, na, A vakě o mbuhw' amě, A ndi wa n' umba; 'kabojana A diyakite ovaně mbi t' o diya.

16. Ilonda jaju nd' ijahu ja bėhěpi i di pahiyango, ehewě o ehewě.

17. Ikabojana belekanako be vėkudwě na Mosěs, ndi ehewě na pákwěpákwě be vaki na Jisus Kraist.

18. O 'bě na moto a di yěněngo Anyambě o 'gombe t' egombe; Mwana u' umbâkâ, A jadi o ngonga ya Hangwě, Mâ nd' A di pakuwango o pěl' 'aju.

19. ¶ Upako mua Jân nd' ekamu, o Jiu ba lomakidi prist na ba Livai oviya Jěrusalēm, ka uwa mâ, *na*, Ávě lě nja?

20. Ka mâ-a mēmě, au hâhâkâ; ndi a mēměki, *na*, Mbi 'bě Kraist.

21. Ka bâ-ba uwa mâ, *na*, Nde lě? Ávě ndi Ilaias? Ka mâ-a vâ, *na*, Mbi 'bě mâ. Ávě ndi usâki tě? Ka mâ-a yavwana, *na*, Nyawě.

22. Jâ ndi jabu ja vâ na ju, *na*, Nd' âvě lě nja? ho vale ka languwa ba ma loma hwě. O vâkâ lě na o pěl' 'âvě mětě?

23. Ka mâ-a vâ, *na*, Uмба *ndi* joyi j' umbâkâ i yakě o nginga, *na*, Těkiděni njea ja Anyambě, pani ka usâki Iseyas-a vâkidi.

24. Ba lomakudwě ba diyakindi ba Farisi.

25. Ka bâ-ba uwa mâ, *na*, Nd' e lě nde 'âvě e baptaisakě, oningě na o 'bě Kraist, *na* Ilaias, *na* ba usâki tě?

26. Jân a yavwanaki bâ, *na*, Mbi baptaisakandi na miba: ndi Umbâkâ a ndi de o inyěni-o jadi, uanyu a ha 'wě:

27. Mâ ndi A vakě o mbuhw' 'amě, A ndi

pânwěngo oboho n' umba, mbi 'bě weyango na mbi unjuwaka ukâdi mua ikogo jaju.

28. Belombo tēkabe be hamakindi o Bēta-bera o pělē 'pâkwě ya Jâdan, o Jân a diya-kidi a baptaisanaka.

29. ¶ Jân a yěněki Jisus' a vaka o mâ-a jadi o buhwa bopâkwě, ka mua vâ, na, Umbwakiyateni Mwanudâmbe ua Anyambě, a věngěkidě bobe boa he.

30. Mâ nd' ekaně uamě a vâki, na, Momo a vakandi o mbuhw' 'amě, A di pânwěngo oboho n' umba; 'kabojana a diyakite ovaně mbi t' o diya.

31. Mbu yowakě Mâ: ndi A ka levudwě-ndi Isreěl, ovaně nd' umba-mbi viyedi ka baptaisa na miba.

32. Ka Jân a pakuwa, na, Mbi yěněkindi Ilina i hubaka oviya oba pani ka mbenga, na já na batamaka o Mâ-a jadi.

33. Mbu yowakě Mâ: ndi A lomaki 'mba ka baptaisa na miba, Mâ nd' a vâki n' umba, na, Uâvě a ka yěně Ilina i hubaka na já-ja diya o Mâ-a jadi, Mâ ndi mâně a baptaisakě n' Iliná Iyamu.

34. K' umba-mba yěně, k' umba-mba pakuwa upako, na, ekaně a Mwana Anya-mbě.

35. ¶ Buhwa bo vitakidě bopâkwě Jân a tēměki pě na beyokwedi beaju bebale ;

36. A tamwakiya Jisus o Mâ-a tamwakidi, ka mâ-a vâ, *na*, Umbwakiyateni Mwanudâmbě ua Anyambě.

37. Beyokwedi bebale be yokaki mâ-a kalaka, ka beâ-bea vitě Jisus.

38. Já ndi ja Jisus ja 'luwa, ka Mâ-a yěně bâ-ba vitakě Mâ, ka Mâ-a vâ na bâ, *na*, O vahaka li ndě? Ka bâ-ba vâ na ju, *na*, Rabai, (yěně ndi, *na*, Uyokwidi oningě ja 'ludwě,) o diyaka lě ove?

39. Ka Mâ-a vâ na bâ, *na*, Vaka ka yěně-keni. Ka bâ-ba viya ka yěně o Mâ-a diyakidi, ka bâ-ba nangiya buhwa tēboně o Mâ-a jadi: 'kabojana e diyaki ya bě mawěla manai.

40. Umbâka ua babale ba yokaki Jân ba vitakidě, ndi Andru mwana nyangwě na Saimân Pitě.

41. A duwakindi o bohoboho mwana nyangwě mětě Saimân, ka mâ-a vâ na ju, *na*, Ho duwi Měsaias: i ndi, *na*, Kraist, oningě ja 'ludwě.

42. Ka mâ-a vana mâ o Jisus a jadi. O Jisus a yěni mâ ka Mâ-a vâ, *na*, Ávě ndi Saimân mwan' 'a Jonas: o ka tubwi,

na, Sifas, yeně ndi, *na*, ilale, oningě ja 'ludwě.

43. ¶ Jisus a mbakindi o vala o Galili o buhwa bo vitakidě, ka Mâ-a yěně Filip, ka Mâ-a vâ na ju, *na*, Vitakě 'Mba.

44. Filip a diyakindi ua Bětseda, mboka ya Andru na Pitě.

45. Filip a duwakindi Nataneěl, ka mâ-a vâ na ju, *na*, Ho duwi Mâ ua Mosěs o belekanako na basâki a lënděkidi, *na*, Jisus ya Nasarět mwan' 'a Josěf.

46. Ka Nataneěl a vâ na ju, *na*, Elombo eyam' e te vakiya o Nasarět? Filip a vâki na ju, *na*, Vaka ka yěněkě.

47. Jisus a yěněki Nataneěl a vaka o Mâ-a jadi, ka Mâ-a vâ, *na*, Umbwakiyate ua Isreěl mětě, a ha 'bě n' ukândâ.

48. Nataneěl a vâki na ju, *na*, Wa yowě lě 'mba na ove? Ka Jisus a yavwana mâ, *na*, Mbi ma yěnět' âvě, o âvě-o ma diya ibomako ja ele ya itâlâ ovaně Filip a t' o ndiya 'vě.

49. Nataneěl a yavwakindi ka mâ-a vâ na ju, *na*, Rabai, o ndi Mwana Anyambě; âvě ndi Upolo mua Isreěl.

50. Jisus a yavwanaki ka Mâ-a vâ na 'ju, *na*, Ikabojana Mbi ma vwi na nâvě, *na*,

Mbi ma yěnět' ávě o ibomako ja ele ya itálá o kamakiděte? o ka yěni belombo beněně wa na ekabe.

51. Kâ Má-a vâ na ju, *na*, Pâkwěpâkwě mětě Mbi vâki n' inyěni, *na*, Egombe tēkae tombango, o ka yěněndini oba bwe, na injěl ja Anyambě i betaka na já i hubaka o Mwana-moto a jadi.

KAPITA II.

1. Diba i diyakindi o hwi 'lalo o Kena ya Galili, nyangw' 'a Jisus a diyakind' ovoně.

2. Jisus na beyokwedi beaju ba ndakudwě tepě o diba.

3. O bâ-ba vahi wain, ka nyangw' 'a Jisus a vâ na Má, *na*, Ba 'bě na wain.

4. Ka Jisus a vâ na mâ, *na*, Mwajo Mbi ka ha lě na nâvě na? iwěla jamě i ha pâyete.

5. Nyangwě a vâki na bahayi, *na*, Elo-mbo eaju yěhěpi e ka vâýě n' inyěni, *na*, Hakani; hakani.

6. Omě o diyaki na bevondo bea miba utoba bea malale, itukidi via Jiu, be weyaka yâkâ galân ibale na ba ilalo.

7. Jisus a vâki na bâ, *na*, Londakëni bevondo na miba. Ka bâ-bâ londě beâ nal'udumbu.

8. Ka Mâ-a vâ na bâ, *na*, Tokani, oa valanani gâveni y' isango. Ka bâ-ba valana.

9. O upangiyi mu' isango u bëki miba ma 'lwakudwě wain vekango, au yowakě o yâ e vakiyedi, (kabo bahayi ba tokaki miba ndi ba yowakidě,) ka gâveni y' isango ya ndiya ubayi,

10. Ka mâ-a vâ na ju, *na*, Moto uěhěpi a tēkidi wain eyam' o jali, na oningě bato ba maděngě o mâtâ bwamu, běngě a tēkidě ebe: *nd'* âvě o tatango wain eyamu na pâ kya tēkaně.

11. Jali tě ja belembo ekadi, ndi ja Jisus i hakidi o Kena ya Galili, ka yâ e levidě ivenda jaju, ka beyokwedi beaju bea kamidě Mâ.

12. ¶ Ka Mâ-a vala o Kapërneum o ekae e bëki pa, na nyangwě na bana ba nyangwě na beyokwedi beaju; bu bembaka ovoně hwi iitě.

13. ¶ Isango ja Jiu j' Ikunduwa i diyaki ja bě piělě, ka Jisus a vala o Jěruselěm.

14. Ka Mâ-a duwa o tēmpil ba ma ha-

mbaka nyati, na medâmbě, na mbenga, na bapepengani ba dâlě bâ diyediye:

15. O Mâ-a běkidi hango ukasa mua me-kâdi mehâlě, ka Mâ-a duma bâ běhěpi o těmpil na medâmbě na nyati; ka Mâ-a hova dâlě ja bapepengani, na Mâ-a ka idakě tagulũ;

16. Ka Mâ-a vâ na ba ma hambaka mbe-nga, na, Věngěkidi belombo těkabe okava: o pangakeni ndabo 'a Paia ya bě ndabo ya mahambe.

17. Ka beyokwedi beaju bea yongidě na e lěndwěngo, na, Edoko ya ndabo 'ávě e ji 'mba.

18. ¶ Já ndi ja Jiu ja yavuwa, ka bâ-ba vâ na ju, na, Nandi o haka belombo těka-be, ndi e lě nja nděmbo-ě eávě e levidě hwě?

19. Ka Jisus a yavuwa, ka Mâ-a vâ na bâ, na, Bulwakidi těmpil těkaně, Mbi ka těděte yâ na hwi ilalo.

20. Ka Jiu ba vâ, na, Těmpil těkaně e diyakindi mabo ma mepuma manai na mepuma utoba ilongwě, o ka těděte yâ na hwi ilalo?

21. Ndi A kalakindi těmpil ya nyolo 'aju mětě.

22. O Mâ-a diyakidi A pumbuwa òviya bawewe, ka beyokwedi beaju bea yongidě na yâ nd' eaju e kalaki na bá: ka bâ-ba kamidě ilěndwě, na ndaga ya Jisus e kala-kidi.

23. ¶ O Mâ-a diyaki o Jěruselěm o iku-nduwa, o *buhwa bo'* isango, baitě ba kama-kidi dina jaju, o bâ-ba yěněkidi belembo beaju be ma haka.

24. Ndi Jisus Au vėkě bâ nyolo 'aju, 'kabojana A yowakiděte *bato* bėhěpi.

25. Au vahaka tepě na moto a pakwakiye Mâ o pěl' 'a moto: 'kabojana a yowakiděte nyanga e diyakidi o moto a jadi.

KAPITA III.

1. O diyaki na momo ua Farisi, dina na Nikodimás, upangiyi mua Jiu.

2. Mâ nd' a vakidi o Jisus a jadi na bulu, ka mâ-a vâ na ju, *na*, Rabai, ho yowěngo na o ndi uyokwidi u di viyango Anyambě a jadi: 'kabojana o 'bě na moto a didi a haka belembo tě ibeâvě be hakě ekabe, kabo Anyambě a di na ju.

3. Jisus a yavwanakindi, ka Mâ-a vâ na

ju, *na*, Mbi vâki na nâvě pákwěpákwě mětě, *na*, Moto a yâlě o yěně egândâ ya Anyambě, kabo a ta jawě epákwě njo.

4. Nikodimâs a vâki na ju, *na*, Moto a ka jawě lě pě, *na*, mâ-a bě utodu? a ka ngiyi pě o ihuhu ja nyangwě epákwě njo, na mâ-a jawě?

5. Jisus a yavwanakindi, *na*, Pákwěpákwě mětě Mbi vâki na nâvě, *na*, Kabo moto a jawě na miba na Ilina, a ngiye egândâ ya Anyambě.

6. A di jawěngo na mehoni, a mehoni; na a di jawěngo n' Ilina, a ndi ilina.

7. O mamake nyang' 'amě e ma vâ na nâvě, *na*, O jakwěni epákwě njo.

8. O upupě u vungakě o mu tândâkě, o ka yokate edungu 'aju, ndi o 'bě na ngudi e pakwakě o mu vakiyě, na o mu kěkě: nona-ně tepě o moto uěhěpi a di jawěngo n' Ilina.

9. Nikodimâs a yavwakindi ka mâ-a vâ na 'ju, *na*, Belombo těkabe be ka diya lě na?

10. Ka Jisus a yavuwa ka Mâ-a vâ na 'ju, *na*, O 'bě hangwě ya Isreěl, ndi oa 'wě belombo těkabe?

11. Pákwěpákwě mětě Mbi vâki na nâvě, *na*, Ho kalakandi ibeahu be yowudě, na

hwě-ho pakwakandi ibeahu be di yěněgo;
ndi inyěni oa nāngākāni upako muahu.

12. Oningě Mba languwa inyěni belombo
bea he, ó kamiděni, o l' o kamakidi, na,
oningě Mba languwa inyěni belombo bea
Hěvěn?

13. O 'bě na moto a di betango o Hěvěn,
kabo Mâ-a vakiyed' o Hěvěn, Mwana-moto
a jad' o Hěvěn.

14. ¶ Pani ka Mosěs a betakidě mbamba
o nginga, nonaně tepě o Mwana-moto a ka
betwě oba:

15. Na a kamakidě Mâ uěhěpi a nyange,
ndi a ka pahiyandi eměná ya egombe yě-
hěpi.

16. ¶ Kakana ndi Anyambě a tândáki he,
ka Mâ-a vě Mwan' 'aju umbákâ, na, uěhěpi
a ka kamidě Mâ, a nyange; ndi a na eměná
ya egombe yěhěpi.

17. Ikabojana Anyambě au lomaka Mwa-
n' 'aju o he ka kwehě he, ndi kabo na ova-
ně nd' o he e ka yongě o Mâ-a jadi.

18. ¶ A kamakidě Mâ, a 'bě kwango': ndi
a ha kamakidě Mâ, a kwi pâni, 'kabojana a
'bě kamiděngo dina ja Mwana Anyambě
umbákâ.

19. Makwa nd' ekama, na, bwe ya pâ o

hě, ndi bato ba tândâkândi ivititi wa na bwe, 'kabojana behadi beabu be ndi bobe.

20. Ikabojana moto uěhěpi a hakě bobe a binaki bwe, na mâ-á vaka o bwe, o banga behadi beaju be sulwě.

21. Ndi a hakě pâkwěpâkwě, a pâkândi o bwe, na ovaně nd' o behadi beaju be ka yowaně, na be hamaki na Anyambě.

22. ¶ Belombo těkabe pa, ka Jisus na beyokwedi beaju be viya o 'hiki ya Judia; omě nd' o Mâ-a diyaki na bâ, A baptaisanaka.

23. ¶ Jân a diyaki tepě a baptaisanaka o Inon, piělě na Selim, ikabojana omě o diyaki na miba maitě: ka bâ-ba viya, na bâ na baptaisakwě.

24. Ikabojana Jân a diyakite a t' o vawmwe o ndabo-ivititi.

25. ¶ Beyokwedi bea Jân na Jiu, ba diyaki na nyuwe o pěl' 'a itukwě.

26. Ka bâ-ba viya o Jân a jadi, ka bâ-ba vâ na ju, na, Rabai, A diyaki na nâvě o pělě 'pâkwě ya Jâdan, uâvě a pakwakě upako, umbwakiyate, A baptaisakandi, na bato běhěpi ba kěkěnd' o Mâ-a jadi.

27. Ka Jân a yavuwa ka mâ-a va, na, Moto a pahiye elombo, kabo ya věwě mâ oviya Hěvăn.

28. Inyëni mětě o pakwaki upako o pěl' 'amě, na mbi vâki, *na*, Mbi 'bě Kraist, ndi mbi ndi lomwěngo o boho boaju.

29. A di n' ubâmbi, ndi ubayi: ndi mbweyi y' ubayi, e di de e yokaki joyi jaju, e peyaki na ngudi eitě na joyi j' ubayi: mbya tě eamě ekaně e hohonganiděndi.

30. A ka kenandi, ndi mbi *ka* hâlâvi-yěndi.

31. A vakiyě oba, a ndi wa na běhěpi: a jadi ua he, a he, na mâ-a kalaka tepě bea he: a vakiyě oba, a ndi wa na běhěpi.

32. Ibeaju be di yěněngo n' ibeaju be di yokango, beâ ndi ibeaju be pakwakě; nd' o bě na moto a kamakidě upako muaju.

33. A kamakidě upako muaju, a vaměngo o male maju na Anyambě a pâkwě-pâkwě.

34. Ua Anyambě a di lomango, a kalaka-ndi ndaga ja Anyambě: 'kabojana Anyambě á věkě *Mâ* Ilina na 'yějâ.

35. Hangwě a tândâ Mwana, A ndi věngo belombo beěhěpi o benâ beaju.

36. A kamakidě Mwana, a na eměná ya egombe yěhěpi: ndi a ha kamakidě Mwana, a yěne eměná, ndi ngambi ya Anyambě a na ju.

KAPITA IV.

1. O Upangiyi a yowudě na Farisi ba diyaki ba yoka na Jisus a handi na Mâ-a baptaisa tepě beyokwedi wa na Jân,

2. (Ndi Jisus mětě au baptaisaka, kabo beyokwedi beaju,)

3. Ka Mâ-a dika Judia, na 'la o Galili.

4. Ndi e lukaki na A pudunganaka Sameria.

5. Jâ ndi jaju ja pâ o mboka ya Sameria, e tubakwě na Saikar, piělě na epěhi ya 'hiki ya Jekâb e vėki mwan' 'aju Josěf.

6. Idango ja Jekâb i diyakind' omě. Ka Jisus a yěně nyolo vâhâ na 'kěndâ, ka Mâ-a diya o idango: i diyakindi ja bě joba meolo piělě.

7. Omě o pâkindi mwajo ua Sameria ka toka miba: ka Jisus a vâ na 'ju, na, Vě 'Mba, Mbi mâte.

8. (Ikabojana beyokwedi beaju be diyaki bea valanidě o mboka ka hamba beja.)

9. Ka mwad' 'a Sameria a vâ na ju, na, Yeně e lě nd' eâvě ua Jiu, nd' o jombaka 'mba miba, umba mwad' 'a Sameria? 'kabo-jana ba Jiu na ba Sameria ba jukaka.

10. Jisus a yavwanaki ka Mâ-a vâ na 'ju,

na, O jaka yowěngo ivě ja Anyambě, *na* A vâkě na nâvě, *na*, Věkě 'Mba, Mbi mâte; t' o uwi Mâ, na Mâ-a vě âvě miba ma eměná.

11. Ka mwajo tě a vâ na 'ju, *na*, Paia, o 'be na elombo e tokanakě, n' idango i tepě na ndiba: nd' o pahiye lě miba tě ma eměná maně ove?

12. Ávě ndi boněně wa na hangw' 'ahu Jekâb, a věki hwě idango, mâ mětě a mâtâ-kiyěte omě, na bana baju, na bembe beaju?

13. Jisus a yavwanaki mâ, *na*, Moto uěhěpi a mâtâkě miba těkama, a ka yokandi evělě njo 'pakwě.

14. Ndi moto uěhěpi a ka mâtě miba mamě ma' ka věyě mâ, a yoke pě evělě; ndi miba mamě ma ka věyě mâ, ma ka diyandi idango ja miba i vovolaka nala o eměná ya egombe yěhěpi.

15. Ka mwajo a vâ na 'ju, *na*, Paia, věkě 'mba miba těkama, ovaně nd' umba-mbi ka měndě mbi yoke pě evělě, n' umba-mbi viye pě okava ka toka.

16. Jisus a vâki na 'ju, *na*, Ka ndakiye momi 'âvě, na nâvě oa viya okava.

17. Ka mwajo a yavwana, *na*, Mbi 'bě na momo. Jisus a vâki na 'ju, *na*, Oa vwi bwamu, *na*, Mbi 'bě na momo.

18. Ikabojana o bango bamo batano, na mâ uâvě a janidi kya tēkaně, a 'bě momi 'âvě: o yeně nd' eâvě e vwi pâkwěpâkwě.

19. Ka mwajo a vâ na 'ju, *na*, Paia, mbi yowudi na o ndi usâki.

20. Bahangwě bahu ba ma kalakiyandi o ukodi tēkamu; ndi inyěni mâ na o Jēruselēm ndi iboko via bato vi lukakě o kaliya.

21. Jisus a vâki na mâ, *na*, Mwajo, kamakidě 'Mba, iwěla i vakandi, ijanyu i ka mēndě o kaliya Hangwě, tombe o ukodi tēkamu, tombe o Jēruselēm.

22. Inyěni o kâlakiyandi eanyu e ha yowě: ho, yowěngo elombo 'ahu e kalakiyě, 'kabojana iyonga i ndi ja Jiu.

23. Ndi iwěla i vakandi, jâ nd' ekadi, o bakaliyi ba mbambaě ba ka kaliyě Hangwě n' ilina na pâkwěpâkwe: 'kabojana Hangwě a vahakandi jângâ tēdině i kalakiyě Mâ.

24. Anyambě a *ndi* Ilina: ba kalakiyě Mâ, ba lukakand' o kaliya *Mâ* n' ilina na pâkwěpâkwě.

25. Mwajo a vâki na ju, *na*, Mbi yowěngo na Mēsaias a vakandi, a tubakwě *na*, Kraist; o Mâ-a ka pâyě, A ka pakuwi hwě belombo beěhěpi.

26. Jisus a vâki na ju, *na*, Umba-mbi kalakě na nâvě, Umbi *Mâ*.

27. ¶ Kakana ka beyokwedi beaju bea pâ, ka bâ-ba mama na A kalaki na mwajo tě: nd' o 'bě na moto a vâki, *na*, O vahaka lě nde? naba, *na*, E lě nd' eâvě e kalakě na mâ?

28. Ka mwajo a dika evondo 'aju, ka mâ-a vala o mboka, ka mâ-a vâ na bamio, *na*,

29. Okani, ka yěněkeni Momo, a di 'mba pakuwango belombo beěhěpi ibeamě be di hango: a 'bě Kraist ekaně?

30. Ka bâ-ba vala oviya mboka, na 'la o Mâ-a jadi.

31. ¶ O egombe těeně beyokwedi beaju be kalaki, *na*, Uyokwidi, jaka.

32. Ndi A vâki na bâ, *na*, Mbi na beja be jakě ibeanyu be ha 'wě.

33. Ovaně nd' o beyokwedi be vâki bâ mětě na bâ mětě, *na*, Moto a ma vani Mâ *elombo* e jakě?

34. Jisus a vâki na bâ, *na*, Beja beamě ndi iha ja upango mua A lomaki 'Mba, n' ihânjâbidě ja ehavu 'aju.

35. Oa vâkâni, *na*, Ngandě inai, *vâkâna* ndonda e pândi? umbwakiyateni, Mbi vâki

n' inyëni, *na*, Betakëni mihâ, oa 'mbuwani o behiki; bea bi botano pâni na ndonda.

36. A benjakë a pahakiyandi mahomano, na mâ-a yolakë bebuma o emênâ ya 'gombe yëhëpi: ovanë nd' o bâ babale, a liyakë na a benjakë, ba ka peyë ta.

37. Okava nd' o ndaga tënë e di pâkwë-pâkwë, *na*, Umbâkâ a liyaka, upâkwë a benjaka.

38. Mbi lomindi inyëni ka benja, o inyëni o ha hakidi ehavu: bato bapâkwë ndi ba hakidi, inyëni o ngiyendi o behavu beabu.

39. ¶ Ba Sameria baitë ba mboka tënë ba kamakidi Mâ na nyanga ya mwajo e vâki, *na*, A ma pakuwi 'mba belombo beamë be di hango beëhëpi.

40. O ba Sameria ba pâkidi o Mâ-a jadi, ba hâhâlâkidi Mâ na A t' o diya na bâ: ka Mâ-a diya omë hwi ibale.

41. Baitë bapâkwë ba kamakidëndi, 'kabojana ndaga jaju mëtë;

42. Ka bâ-ba vâ na wa mwajo, *na*, Nandi ho kamidëndi, hanga 'kabojana âvë-o na pakuwa hwë; ho yoki Mâ-a kalaka hwë mëtë, ho yowudëndi mbambaë na ekanë a ndi Kraist, Uhungini mua he.

43. ¶ Hwi ibale tombango ka Mâ-a vëngě-mě omě, na 'la o Galili.

44. Ikabojana Jisus mâ mětě A vâki, na, usâki á hekakudwě o 'hiki 'aju mětě.

45. O Mâ-a pâkidi o Galili, ba Galili ba vëhělěkidi Mâ, ba yëněkindi belombo beë-hěpi ibeaju be hakidi o Jëruselēm o isango : 'kabojana bâ-ba kěki tepě isango.

46. Nonaně ka Jisus a pâpě epâkwě njo o Kena ya Galili, o Mâ-a 'lwakidě miba wain. E diyaki na momo n' uhuhu uněně, mwan' 'aju a diyakindi a běkě o Kapërneum.

47. O mâ-a yokakidi na Jisus a vakandi oviya Judia na 'la o Galili, ka mâ-a vala o Mâ-a jadi, a ka hâhâlâkidi Mâ na A vake ka yongě mwan' 'aju : 'kabojana a diyakindi a bě o bowaka.

48. Jâ ndi ja Jisus ja vâ na ju, *na*, Oa kamiděni kabo oa yëněni ndembo na belombo be mamanakwě.

49. Momo t' uněně a vâki na ju, *na*, Paia, vaka na mwan' 'amě na taka wa.

50. Jisus a vâki na ju, *na*, Kěkě o njea 'vě ; mwan' 'ávě a te mihâ. Ka momo tě a kamidě ndaga ya Jisus e kalaki na ju, ka mâ-a vala o njea 'aju.

51. O mâ-a diyakidi a kěkě, ka bahayi .

baju ba lata na ju, ka bâ-ba languwa mâ, na, Mwan' 'âvë a mihâ.

52. Ka mâ-a uwa bâ iwëla jaju i yalakidë iyonga. Ka bâ-ba vâ, na, Vaiko o iwëla jâkâ ndi ivëvu i dikaki mâ.

53. Nonanë nd' o hangwë a yowakidë na i *diyakite* iwëla ja Jisus i vâki na ju, na, Mwan' 'âvë a te mihâ: ka mâ mëtë a kamidë na ndabo 'aju yëhëpi.

54. Elembo epâkwë ya bebale nd' ekae ya Jisus e hakidi, o Mâ-a valakidi o Galili oviya Judia.

KAPITA V.

1. Ekae tombango, o diyaki na isango ja Jiu: ka Jisus a vala o Jëruselëm.

2. O Jëruselëm o na etima o *ihambanido* ja medâmbë e tubakwë na emi ya Hibru, na, Betësda, e jadi na belëmbë betano.

3. Omë nd' o nangakiyë ebimba enënë, ea mebëdi, pâgu, ba dëhimakë, na bevande limbelimbe, ba vengakë ininganë ja miba.

4. Ikabojana enjël e ma këkëndi o 'gombe yâkâ o etima tēenë ka ninganë miba: moto ka moto a ma pâkâ omë na bohoboho, oningë miba ma ninganwëngo, a yonga-

kandi jângâ ja ebëdi jëhëpi ijaju i diya-nakë.

5. Momo n' uhuhu a diyakind' omë, a diyaki na 'bëdi mabo ma mepuma malalo na mepuma logwambi.

6. O Jisus a yënëki mâ bya, ka Mâ-a yowë na a bembindi n' *itingidi tëvinë* ego-mbe eyaba, ka Mâ-a vâ na ju, *na*, O vaha-kand' o diya upeha? '

7. Ubëdi a yavwanaki Mâ, *na*, Upangiyi, mbi 'bë na moto a vamakë 'mba o etima, oningë miba ma ninganwëngo: mbi bëkëte mbi vaka, vâkâna upâkwë a pitakandi oboho n' umba.

8. Ka Jisus a vâ na ju, *na*, Umwaka, nâ-ngâkâ ikondo jâvë, na nâvë oa tamuwa.

9. Elëngiaha tepë momo të a bë upeha, ka mâ-a nângâ ikondo jaju, a ka tamwaka: buhwa të bo diyaki buhwa bo' Iyâjâ.

10. ¶ Jiu ba vâki na a yongakudwë, *na*, Bo ndi buhwa bo' Iyâjâ; e 'bë bwamu na nâvë o bapakë ikondo *jâvë*.

11. A yavwanaki bâ, *na*, A ma panga 'mba upeha Mâ nd' a ma vâ n' umbâ, *na*, Nângâkâ ikondo jâvë, na nâvë oa tamuwa.

12. Jâ ndi jabu ja uwa mâ, *na*, A lë nja

moto-ě a ma vâ na nâvě, *na*, Nangáká ikondo jávě, na nâvě oa tamuwa.

13. Ndi a yongakudwě á yowakě Mâ: 'kabajana Jisus a nyângákindi o bâ-ba jadi, ebimba ea bato e diyakindi iboko *těvině*.

14. Ekabe tombango Jisus a duwaki mâ o těmpil, ka Mâ-a vâ na ju, *na*, Umbwakiyate oa bě ndi upeha: o hake pě bobee, obanga elombo ebe wa ya pâ o âvě-o jadi.

15. Ka momo tě a věngěmě, ka Mâ-a languwa Jiu na A diyaki Jisus a pangaki mâ-a bě upeha.

16. Ovaně nd' o Jiu ba haki Jisus njuke, na bâ-ba ka vahaka o weya Mâ, 'kabajana A hakindi belombo těkabe o buhwa bo' Iyâjâ.

17. ¶ Ndi Jisus a vâki na bâ, *na*, Paia a hakandi o 'gombe těkae, Mbi haka tepě.

18. Ovaně nd' o Jiu ba vahaki pě o weya Mâ, 'kabajana Au weyaka kabo buhwa bo' Iyâjâ dipâ, ndi A vâki tepě na Hangwě ndi Anyambě, a pangaki Mâ mětě na A te nyannga pâká na Anyambě.

19. Jisus a yavwanakindi ka Mâ-a vâ na bâ, *na*, Pâkwěpâkwě mětě Mbi vâki n' inyěni, *na*, Mwana a haye elombo mâ mětě, kabo eaju e yěněkě Hangwě a haka: 'kabo-

jana belombo beaju be hakě, beâ tepě bea Mwana be hakě.

20. Ikabojana Hangwě a tândâkândi Mwana, A leviděngo Mâ belombo beaju mětě be hakě beěhěpi : a ka levidě tepě Mâ behavu beněně wa na ekabe, ovaně nd' inyěni o jadi o mamanakani. .

21. Pani ka Hangwě a pumbwakidě bawewe, na Mâ-a pangaka bá mihâ ; nonaně tepě o Mwana a pumbwakidě uaju a ka pangě.

22. Ikabojana Hangwě a yěkěkidě moto ; ndi A věngo Mwana yěkě yěhěpi :

23. Ovaně nd' o *bato* běhěpi ba ka dilě Mwana, pani ka bâ-ba dilakě Hangwě. A ha dilakě Mwana, á dilakě Hangwě e lomaki Mâ.

24. Mbi vâki n' inyěni pâkwěpâkwě mětě, na, A yokakě ndaga jamě, na mâ-a kamidě Mâ-a lomaki 'Mba, a na eměná ya egombe yěhěpi, a pâye pě o makwa ; ndi a tombindi oviy' iwedo nala eměná.

25. Mbi vâki n' inyěni pâkwěpâkwě mětě, na, Iwěla i vakandi, i tepě kya tēkaně, o bawewe ba ka yokě jowi ja Mwana Anyambě : ba ka yokě ba ka diyandi.

26. Pani ka Hangwě a di na eměná mâ

mětě, nonaně nd' o Mâ-a di vëngo Mwana, na A diake na 'mënâ mâ mětě;

27. A vëngo tepě Mâ ngudi e yëkëñëkidě, 'kabojana A ndi Mwana-moto.

28. O mamakeni ekae: 'kabojana iwëla i vakandi, ja bëhëpi ba jadi o malonga, ba ka yoki jowi jaju,

29. Ba ka pumbuwandi; ba di hango bwam', ipumbuwa ja emënâ; ba di hango bobe, ipumbuwa j' ivomudwë.

30. Mba haye elombo Umba mětě: Mbi yëkëkidëndi pani ka Umba-mbi yokakë: yëkë 'amě e hohonganëngo; 'kabojana Mba vahaka upango muamě mětě, kabo upango mua Hangwë e lomaki 'Mba.

31. Oningě Mbi pakwaka upako o pël' 'amě, vâkâna upako muamě u 'bë pâkwëpâkwë.

32. ¶ O n' upâkwë a pakwakë upako o pël' 'amě, Mbi yowëngo na upako muaju u pakwakë o pël' 'amě, u pâkwëpâkwë.

33. O lomakidëndini o Ján a jadi, ka mâ-a pakuwa upako o pâkwëpâkwë.

34. Ndi Mba pahakiya upako o moto a jadi: ndi Mbi vâki belombo tëkabe, na ovaně nd' inyëni o ka yongwëni.

35. A diyaki, bwe e yodakë na e bu-

mwakě: n' inyěni o diyakindi bábângo na o peya na bwě 'aju o egombe.

36. ¶ Mbi n' upako uněně wa na *mua* Jân: ikabojana behavu bea Hangwě be věki 'Mba na Mbi hânjâbâkidě beâ, beâ ndi ibeamě be hakě, be pakwakandi o pěl' 'amě, na, Hangwě nd' a lomaki 'Mba.

37. Hangwě e lomaki Mba mâ mětě, a tepě pakuwango o pěl' 'amě. O ha yokeni joyi jaju egombe t' egombe, n' inyěni o ha yěněteni uvela muaju.

38. O 'běni na ndaga jaju o inyěni o jadi: 'kabojana oa kamakiděni uaju a di lomango.

39. ¶ Butakani Malěndwě; 'kabojana omě nd' inyěni o pikilakiyě na o ndini na eměná ya 'gombe yěhěpi: mâ ndi ma pakwakě o pěl' 'amě.

40. Ndi oa viyeni o 'Mba-mbi jadi, na ovaně nd' inyěni o ka pahiyě eměná.

41. Mba pahakiya ihekudwě o bato ba jadi.

42. Ndi Mbi yowěngo inyěni, na o 'běni n' itândě ja Anyambě o inyěni-o jadi.

43. Mbi pândi na dina ja Paia, ndi inyěni oa věhělěkidi 'Mbani: oningě upâkwě a

viya na dina jaju mětě, mâ ndi uanyu a ka vëhëlidě.

44. O l' o kamakidëni na? ba pahana-kiyëni ihekudwě, n' inyëni-oa vaheni ihekudwě i *vakiyě* Anyambě a jadi dipâ.

45. O pikilakiyeni na Mbi ka tubandi inyëni o Hangwě a jadi: o n' *umbâkâ* a tubâkě, Mosës, uanyu a pitakidě.

46. Ikabojana o jaka o kamakidëni Mosës, t' o kamakidëti 'Mbani: 'kabojana a lëndëkindi o pël' 'amě.

47. Nd' oningě ó kamidëni malendwě maju, o ka kamidě li ndaga jamě na?

KAPITA VI.

1. Belombo tēkabe tombango Jisus a kěkindi o mwidi mua manga ma Galili, ma jadi, *na*, ma Tibiriâs.

2. Kâ ebimba ea bato enënë ya vitě Mâ, 'kabojana ba yënëkindi belembo beaju be hakidi o mebëdi.

3. Jisus a betakindi o ukodi, ka Mâ-a diya omě na beyokwedi beaju.

4. Isango ja Jiu j' Ikunduwa, i diyaki ja bě piělě.

5. ¶ O Jisus a betakidě mihâ *maju* ka Mâ-a yěně njamba ea bato eněně ba vaka o Mâ-a jadi, A vâki na Filip, *na*, Ho ka hamba lě pěmbě ove ijabu i ka jě?

6. (A vâkind' ekae isulě jaju: 'kabo-jana mâ mětě A yowakiděte ka Mâ-a ka hayě.)

7. Filip a yavwanaki Mâ, *na*, Kama ja fula ibale ja pěmbě i 'bě twětwe na bâ, moto moto a nângâkâ vipupuhu.

8. Eyokwedi 'aju yâkâ, Andru mwana-nyangwě na Saimân Pitě, a vâki na ju, *na*,

9. Mwana a nd' okava, a di na membunda mea pěmbě ya barli metano na bejaka behâlě bebale: ndi be ka ha lě nde o bato tě baitě ekaba ba jadi?

10. Ka Jisus a vâ, *na*, Diyakidi bato těkaba (Iboko tě i diyaki na mbwisanga iitě mětě.) Ka bamo ba diya o he ka tâjen itano o tango 'abu.

11. Ka Jisus a nângâ membunda; o Mâ-a diyakidi a vě akeva, ka Mâ-a kaba na beyokwedi, na beyokwedi bea vě ba diya-kudwě o he; a haki tepě bejaka nonaně nyang' 'abu e vahakidi.

12. O bâ-ba diyaki ba vula, A vâki na beyokwedi beaju, *na*, Yolakěni nguhu i ma

dikana, ovaně nd' o elombo e ka mēndě e nyange.

13. Ka bâ-ba yolě *jâ* ta, jomu ja belinga na belinga bebale bea londa na nguhu ja membunda mea pēmbě ya harli metano, i dikanakidi tomběngo ba jakidi.

14. Jâ ndi ja bato tē o bâ-ba yēnēkidi elembo ya Jisus e hakidi, ja vâ, *na*, Pâ-kwēpâkwē ekaně e usâki tē u ka viyě o he.

15. ¶ O Jisus a diyakidi A yowě na ba 'mbakind' o pâ ka nângâ Mâ na ngudi, o panga Mâ upolo, A vengēmēki pē nala uko-di, mâ mētě dipâ.

16. O kolo e diyaki ya pâ, beyokwedi beaju be hubakindi o manga,

17. Ka bâ-ba vama o elende, ka bâ-ba jabuwa o manga nala o mwidi mua Kapē-neum. Idiyakindi ja bē ivititi, ka Jisus Au diyaki hubango o bâ-ba jadi.

18. Kâ manga ma bumba na tina y' upu-pě uněně u vungakidi.

19. O bâ-ba diyaki ba duka pani ka mabo ma fâlângâ mabale na fâlângâ itano naba mabo malalo, ba yēnēki Jisus a tamwaka o manga, A bengakiyi piělě na ele-nde: ka bâ-ba banga.

20. Nd' A vâki na bâ, *na*, A te 'Mba: o bangakeni.

21. Jâ ndi jabu ja tândâ o nângâ Mâ o 'lende: elěngiaha tepě elende e pâkâ o he 'abu e kěkidi.

22. ¶ Buhwa bo vitakidě, o bato ba tēmēkidi o mwidi upâkwě mua manga bu yěněkě elende epâkwě omě, kabo yâkâ ya beyokwedi e vamakidi, Jisus tepě Au kěkě na beyokwedi beaju o 'lende, ndi beyokwedi beaju be kěkite dipâ;

23. (Ndi belende bepâkwě be vakiyend' oviya Tibiriâs piělě n' iboko viabu vi jaki pěmbě, o Upangiyi a diyaki a vě akeva:)

24. O bato ba yěněkidi na Jisus a 'bě omě tombe na beyokwedi beaju, ka bâ-ba vama tepě o belende, ka bâ-ba pâ o Kapěrneum ba vahaka Jisus.

25. O bâ-ba diyaki ba duwa Mâ o pělě 'pâkwě ya manga, ba vâki na ju, *na*, Rabai, o vaki lě okava nja 'gombe-ě?

26. Jisus a yavwanaki bâ ka Mâ-a vâ, *na*, Mbi vâki n' inyěni pâkwěpâkwě mětě, *na*, Oa vahaki 'Mbani 'kabojana o yěněkindini belembo, ndi 'kabojana o jakindi mēmbunda mea pěmbě n' inyěni na vulaka

27. ¶ O hakiyeni beja be nyangakě, ndi

hakiyani beja be diyakě egombe yěhěpi, bea Mwana-moto be ka věyě inyěni : 'kabojana Anyambě ya Hangwě a ndi Mâ lënděngo male.

28. Jâ ndi jabu ja vâ na ju, *na*, Ho hake lě na, ho haye behavu bea Anyambě ?

29. Jisus a yavwanaki bâ ka Mâ-a vâ, *na*, Ehavu 'a Anyambě nd' ekae, *na*, Kamakidi Mâni uaju A di lomango.

30. Ba vâki na ju, *na*, E lě nja ndembo-ě eâvě e levakidě, eahu e jadi e yěněkě, *na* hwě-hwa kamidě âvě ? O haka lě na ?

31. Bahangwě bahu ba ma jaki pěmbě o utove ; pani ka yâ e di lëndwěngo, *na*, A věki bâ pěmbě e jakě ya viya o Hěvăn.

32. Jâ ndi ja Jisus ja vâ na bâ, *na*, Mbi vâki n' inyěni pâkwěpâkwě mětě, *na*, Mo-sěs au věkě inyěni pěmbě tě e vakiyed' o Hěvăn ; ndi Paia a věkěndi inyěni pěmbě ya pâkwěpâkwě e vakiyě o Hěvăn.

33. Ikabojana pěmbě 'a Anyambě ndi Mâ-a vakiyed' o Hěvăn, A věkě eměná o he.

34. Ba vâki na ju, *na*, Upangiyi věkě hwě pěmbě těně egombe yěhěpi.

35. Jisus a vâki na bâ, *na*, Umba ndi pěmbě ya 'měná : a ka viyě o 'Mba-mbi jadi, a yoke nja ; a kamakidě 'Mba, a yoke evělě.

36. Ndi Mbi vâki n' inyëni, *na*, O ti 'Mbani yënëngo, ndi oa kamakidëni.

37. Bëhëpi ba Hangwë ba di 'Mba vëngo ba ka pândi o 'Mba-mbi jadi; a ka viyë tepë o 'Mba-mbi jadi, Mba pumë mâ.

38. Ikabojana Mbu hubaka oviya Hëvën ka ha upango muamë mëtë, kabo upango mua A lomaki 'Mba.

39. Upango mua Hangwë a lomaki 'Mba nd' ekamu, na eaju e di 'Mba vëngo yëhëpi ya nyange, ndi Mbi ka pumbudi pë yâ o buhwa boa madikanido.

40. Upango mua A lomaki 'Mba nd' ekamu, na uëhëpi a yënëkë Mwana, na mâ-a kamakidë Mâ, a na 'mënâ ya egombe yëhëpi: Mbi ka pumbudi mâ o buhwa boa madikanido.

41. Jiu ba hâkâlânâkiyi Mâ 'kabojana A vâki, *na*, Umba ndi pëmbë e vakiyed' oviya Hëvën.

42. Ka bâ-ba vâ, *na*, A 'bë Jisus ekanë mwan' 'a Josëf, ho dimbakiyi Hangwë nâ nyangwë? ndi e lë nde eaju e vâkë, *na*, Mbi hubakindi oviya Hëvën?

43. Jisus a yavwakindi ka Mâ-a vâ na bâ, *na*, O hâkâlânâkiyeni inyi mëtë n' inyi mëtë.

44. O 'bë na moto a ka viyë o 'Mba-mbi jadi, kabo Hangwë a lomaki 'Mba a dula mâ: na Mbi ka pumbudi mâ o buhwa boa madikanido.

45. E lëndwëngo o usâki, na, Bâ bëhëpi ba ka yokudwi na Anyambë. Tina tënë ya moto uëhëpi a di yokango na mâ tepë yokuwango o pël' 'a Hangwë, a vakandi o 'Mba-mbi jadi.

46. Hanga na moto ka moto a yënëngo Hangwë, kabo Mâ-a di oa Anyambë, Mâ nd' a di yënëngo Hangwë.

47. Mbi vâki n' inyëni pâkwëpâkwë mëtë, na, A kamakidë 'Mba, a na 'mënë ya egombe yëhëpi.

48. Umba ndi pëmbë tē ya emënë.

49. Bahangwë banyu ba ma jaki mana o utove, ndi ba wendi.

50. Ekanë ndi pëmbë e vakiyë o Hëvën, e jadi oningë moto a jengë yâ, vâkâna a we pë.

51. Umba ndi pëmbë e di mihâ, e vakiyed' o Hëvën: oningë moto a jengë pëmbë tēkanë, a ka diyandi egombe yëhëpi: pëmbë 'amë e ka vëyë ndi mehoni meamë, imeamë me ka vëyë o emënë ya he.

52. Ka Jiu ba sâja bâ mëtë na bâ mëtë,

na, Momo tēkaně a l' a věkě hwě mehoni *meaju* ija na?

53. Jisus a vâki na bâ, *na*, Pâkwěpâkwě mětě Mbi vâki n' inyěni, *na*, Oa diyeni na eměná oningě o jeni mehoni mea Mwana moto, n' inyěni-oa mâti makiya maju.

54. Uěhěpi a jakě mehoni meamě na mâ-a mâtákâ makiya mamě, a na eměná ya ego-mbe yěhěpi: Mbi ka pumbudi mâ o buhwa boa madikanido.

55. Ikabojana mehoni meamě ma ndi beja pâkwěpâkwě, makiya mamě ma ndi imâtâ pâkwěpâkwě.

56. A jakě mehoni meamě na mâ-a mâtâ-kâ makiya mamě, a diyakandi o 'Mba-mbi jadi, Umba tepě o Mâ-a jadi.

57. Pani ka Hangwě e jadi, a lomaki 'Mba, n' Umba-mbi diyaka na Hangwě: nonaně tepě a jakě 'Mba, a ka diyi n' Umba.

58. Ekaně ndi pěmbě tě e vakiyed' o Hě-věn: hanga pani ka bahangwě banyu ba jaki mana, ndi ba wendi: a ka jě pěmbě tēkaně a ka diyandi egombe yěhěpi.

59. A vâki belombo tēkabe o sinigâg, o Mâ-a yokwakidě o Kapěrneum.

60. Beyokwedi beaju beité, o bâ-ba yoka-

kidi *ekae*, ba *vâki*, *na*, Ekaně ndi ndaga ekolo ; a lě nja a ka yâlě o yoka yâ ?

61. O Jisus mâ mětě A yowudě na beyokwedi beaju be hâkâlânâkiyi yâ, A *vâki* na bâ, *na*, Ekae e numbakiděndi inyěni ?

62. *E lě nde* oningě oa yěněni Mwana-moto A betaka o Mâ-a diyakid' o vyo ?

63. I ndi Ilina i umwakidě ; mehoni meá kovaka elombo : ndaga jamě i kalakě n' inyěni, i ndi ilina na eměná.

64. Ndi o na bâkâ o inyenio jadi ba ha kamakidě. Ikabojana Jisus a yowakiděte oviya jali ba ha kamakidě, na a ka kândidě Mâ.

65. Ka Mâ-a *vâ*, *na*, Ovaně nd' o 'Mbambi *vâki* n' inyěni na o 'bě na moto a ka yâlě o viya o 'Mbambi jadi, kabo ya věwě mâ oviya Paia a jadi.

66. ¶ Oviya '*gombe* tēeně beyokwedi beaju beitě be timbaki na mbuhwa, bu tamwaka pě na ju epâkwě njo.

67. Já ndi ja Jisus ja *vâ* na jomu na be-bale, *na*, Inyěni-o ka 'la tepěni ?

68. Ka Saimân Pitě a yavwana Mâ, *na*, Upangiysi ho ka late o nja jadi ? âvě nd' O di na ndaga ja eměná yâ egombe yěhěpi.

69. Ho kamiděngo, na hwě tepě yowěngo

na Ávě ndi Kraist těně, Mwana-Anyambě ya mihâ.

70. Jisus a yavwanaki bâ, *na*, Mbu pâ-nâk' inyěni jomu na babale, nd' umbákâ o inyěni-o jadi a ndi děvil?

71. A kalakindi o pěl' 'a Judas Iskariât *mwana* ua Saimân : ikabojana mâ ndi mâně a ka kândě Mâ, a diyakite wa jomu na babale.

KAPITA VII.

1. Belombo těkabe tombángo, Jisus a jopakindi o Galili : Au vahaka o jopa o Judia, 'kabojana Jiu ba butakindi o weya Mâ.

2. Isango ja Jiu ja meákâ i diyaki ja bě piělě.

3. Bana ba nyangwě ba vâki na ju, *na*, Umwaka oviya okava, na nâvě-oa 'la o Judia, ovaně nd' o beyokwedi beávě be ka yěně tepě behavu beávě be hakě.

4. Ikabojana o 'bě *na* moto a hakě elo-mbo ikutakuta na mâ mětě a vahaka o yowaně o bwebwe. Oningě na o hakandi belombo těkabe, levakidě nyolo 'ávě mětě he.

5. (Ikabojana bana ba nyangwě bu kamakidě Mâ.)

6. Já ndi ja Jisus ja vâ na bâ, *na*, Egombe 'amě e ha pâyete : ndi egombe 'anyu e te 'gombe yěhěpi kokango.

7. He ya yâlě o bina inyěni ; ndi e binaki 'Mba, 'kabojana Mbi langwakiyandi o pěl' 'a yâ, nana behavu beaju be nd' o beva.

8. Kěkěteni o isango těkadi : Mbi ha valete o isango těkadi ; 'kabojana egombe 'amě e ha timete.

9. O Mâ-a diyakidi a vâ ndaga těkadi o bâba jadi, ka Mâ-a diyate o Galili.

10. ¶ Nd' o bana ba nyangwě ba diyaki ba vala, ka Mâ-a vala tepě o isango, hanga o bwebwe, ndi panika ikutakuta.

11. Ka Jiu ba vaha Mâ o isango, *na*, A l' ove ?

12. O diyaki n' ihâkâlâniyě iitě o bato ba jadi o pěl' 'aju : 'kabojana bâkâ ba vâki, *na*, A ndi mot' uyamu : bâkâ mâ, *na*, Nyawě ; A yabaki bato.

13. Ndi moto au kalaka o bwebwe o pěl' 'aju, *na* jângâ ja Jiu.

14. ¶ O hanganě e' isango Jisus a kěkěndi o těmpil A ka yokwanakidě.

15. Ka Jiu ba mamana, *na*, Moto těkaně a yowudě lě iyowě *na*, a yokuwe ?

16. Jisus a yavwanaki bâ ka Mâ-a vâ, *na*,

Iyokwanidě jamě i 'bě ijamě, i ndi ja A lomaki 'Mba.

17. Oningě moto a bâbingě o ha upango muaju, a ka yowěte o pěl' 'a iyokwanidě ipě i ndi ja Anyambě, ipě Mbi kalakate Umba mětě.

18. A kalakě o pěl' 'aju mětě, a vahaka-ndi ivenda jaju mětě: ndi a vahakě ivenda ja a lomaki mâ, mâ ndi pâkwěpâkwě, na bobe bo 'bě o ma-a jadi.

19. Mosěs au věkě inyěni belekanako, nd' o 'bě na moto n' umbâkâ a tatakě belekanako? Ndi e lě nde eanyu e vahaka o weyi 'Mbani?

20. Ebimba e yavwanakindi ka yâ ya va, na, O na dēvil: nja a vahaka o weya 'vě?

21. Jisus a yavwanakindi ka Mâ-a vâ na bâ, na, Mbi hango ehavu yâkâ eanyu ya bēhēpi e mamanakě.

22. Ndi Mosěs a věkindi inyěni ihěbwě, (hanga o nyanga ya na i ndi ja Mosěs, ndi i ndi ja bahangwě;) n' inyěni o hěběkě-ndini moto o buhwa bo' Iyâjâ.

23. Oningě moto a pahiya hěbwě o buhwa bo' Iyâjâ, nana elekanako ya Mosěs e weya-kwě; o lingwakandini n' Umba, 'kabojana

Mbi ma yongi moto yongëngo o buhwa bo' Iyâjâ?

24. O yëkëkidëni o bwebwe, ndi yëkë-kidi yëkë ya hohonganëngo.

25. Jâ ndi ja ba Jëruselëm bâkâ ja vâ, na, A 'bë mâ ekanë uabu a vahakë o weya?

26. Ndi, umbwakiyate, A kalakate, A bange, na bâ-bâ vâkâ na ju elombo. Bapanngiyi ba te yowëngo pâkwëpâkwë na Kraist mëtë nd' ekanë?

27. Ndi ho yowëngo pëlë ea ekanë e viyedi: nd' o Kraist a ka pâyë, o 'bë na moto a ka yowë pël' 'aju e viyedi.

28. Ka Jisus a yama o Mâ-a diyakidi a yokwanakidë o tëmpil, na, O yowudëti 'Mbani, o yowudëteni tepë pël' 'amë e viyedi: Mbu pumanakiya Umba mëtë, ndi A lomaki 'Mba, A ndi pâkwëpâkwë, uanyu a ha 'wë.

29. Ndi Mbi yowudëte Mâ; 'kabojana Mbi viyango oviya Mâ-a jadi, na Mâ tepë a i 'Mba lomango.

30. Jâ ndi jabu ja vaha o nângâ Mâ: ndi o 'bë na moto a kahakidë Mâ benâ, 'kabojana iwëla jaju i diyakite i t' o pâ.

31. Baitë ba ebimba ba kamakidi Mâ, ka bâ-ba vâ, na, O Kraist a ka pâyë, a ka

handi belembo wa na ekabe bea *momo* těkaně be hakě?

32. ¶ Farisi ba yokakindi na ebimba e kalakandi belombo těkabe o pěl' 'aju: ka Farisi na prist ja meolo ba loma bavengi ka bweya Mâ.

33. Ka Jisus a vâ na bâ, *na*, Mbi te n' inyěni okava egombe ehâlě, vâkâna Mbi valindi o A lomaki 'Mba a jâdi.

34. O ka vahandi 'Mbani, ndi oa duwi 'Mba-ni: oa yâlěni o pâ o Umba-mbi jadi.

35. Jiu ba vâki bâ mětě na bâ mětě, *na*, A ka 'la l' ove, o hwě-ho ka mëndě ho duwe Mâ? a ka 'landi o ba di vanjanganango o Betomba bepâkwě be jadi, ka yokudě Betomba bepâkwě?

36. I lě nj' ivâdi ijaju i vâkě ekadi, *na*, O ka vahandi 'Mbani, ndi oa duwi 'Mbani: oa yâlěni o pâ o Umba-mbi jadi?

37. O buhwa tě boněně boně bo' isango boa madikanido, Jisus a těměkindi ka Mâ-a yama, *na*, Oningě moto a di na evělě; a vake o Umba-mbi jadi ka mâtâ.

38. A kamakidě 'Mba, pani ka ilěndwě i vâkě, *na*, ihuhu jaju i ka vovolandi liho la miba ma eměná.

39. (A kalakind' ekae o pěl' ea Ilina ja ba

ka kamidě Mâ i ka pahiyě; 'kabojana Ilina Iyam' i diyakite i t' o věwě, 'kabojana Jisus a diyakite A t' o hekudwě.)

40. ¶ Baitě ba ebimba o bâ-ba yokakidi ekae, ba vâki, *na*, Pâkwěpâkwě ekaně a ndi Usâki tě.

41. Bâkâ mâ, *na*, Ekaně a ndi Kraist mětě. Bapâkwě mâ, *na*, Kraist a ka viya-ndi oviya Galili?

42. Ilěndwě ja vâkâ na Kraist a ka viya-ndi o ibângâ ja Devid, o ibâkâ ja Bětlihěm o Devid a diyakidi?

43. Ipěhě i diyaki o ebimba e jadi o pěl' 'aju.

44. Bâkâ o njamb' 'abu ba vahakind' o bweya Mâ, ndi moto au kahakidě Mâ benâ.

45. ¶ Ka bavengi ba viya o prist ja meolo na Farisi ba jadi; ka bâ-ba uwa bâ, *na*, E lě nd' eanyu e ha vani MÂ?

46. Ka bavengi ba yavwuwa, *na*, O 'bě na moto a kalakě n' ivâkwě pani ka momo těkaně.

47. Ka Farisi ba yavwana bâ, *na*, Inyě-ni-o yabudwě tepěni?

48. Bapangiyi n' umbâkâ tombe na ba Farisi, ba te Mâ kamiděngo?

49. Ndi ebimba tě e ha 'wě belekanako ekae, e ndi hâkwěngo.

50. Nikodimâs a vâki na bâ, (a vakidi o Jisus a jadi na bulu, a diyakindi umbâkâ uabu,) *na*,

51. Elekanako 'ahu e yěķķiděte moto, e t' o yoka mâ-a kalaka, na o yowě eaju e hakě?

52. Ba yavwakindi ka bâ-ba vâ na ju, *na*, O tepě oa Galili? Butaka na nâvě-oa 'mbuwa; 'kabojana usaki a pumiye o Galili.

53. Moto uěhěpi a ķěkindi o ndabo 'aju mětě.

KAPITA VIII.

1. Jisus a ķěkindi o ukodi mua Âlivi:

2. A pâki pě o těmpil bopundaka n' ubwa, o Mâ-a diyakidi diyango, bato běhěpi ba vakindi o Mâ-a jadi, ka Mâ-a yokudě bâ.

3. Balěndi na Farisi ba vani Mâ mwajo a bweyakudwě n' ihonde: o bâ-ba těkidě mâ o hanganě,

4. Ba vâki na ju, *na*, Paia, mwajo tekaně a bweyudwěndi n' ihonde, n' ihadi mětě.

5. Ndi Mosěs a sombiyakidi hwě o bele.

kanako na manga ka ekama ba ka yangwa-kwě malale : nd' Ávě-o vâkâ lě na ?

6. Ba kalakind' ekae iyějiiyě jaju, ovaně nd' o bâ-ba ka duwě eabu e ka tubě Mâ. Ndi Jisus a balamakindi ka Mâ-a lëndě o he n' upenjo *muaju*, *ona Au yokaka bâ*.

7. O bâ-ba diyakite ba bataké Mâ ka Mâ-a tepuwa ka Mâ-a vâ na bâ, *na*, A ha 'bě na bobe o inyěni-o jadi, a take na yanguwa mâ ilale.

8. Ka Mâ-a balama pě, ka Mâ-a lëndě o he.

9. Melema mea ba yokaki *yâ mětě* me sulakidi bâ, ka bâ-ba puma umbâkâ n' umbâkâ, yalěngo n' utodu kwanga nala ua madikanido : ka Jisus a dikana dipâ na mwajo o hanganě de.

10. O Jisus a běkidi tepuwango, Au yě-někě moto kabo mwajo, A vâki na ju, *na*, Mwajo batubi bâvě ekaba ba l' ove ? o 'bě na moto a ma kwehě ávě ?

11. A vâki, *na*, Moto a 'be, Upangiyi. Jisus a vâki na ju, *na*, Mba kwehě tepě ávě ; kekě, ndi o hake pě bobe njo epâ-kwě.

12. ¶ Já ndi ja Jisus ja kala pě na bâ, *na*, Umba ndi bwe ya he : a vitakě 'Mba a

tamuwe n' ivititi, nd' a ka diyi na bwe ya eměná.

13. Ovaně nd' o Farisi bu vâki na ju, *na*, Ávě mětě t' o pakwakě upako muávě; upako muávě u ibě pákwěpákwě.

14. Jisus a yavwanakindi ka Mâ-a vâ na bâ, *na*, Tombekete Mbi pakwaka upako muamě Umba mětě, upako muamě u te pákwěpákwě: 'kabojana Mbi yowěngo pěl' 'amě e vakiyedi, na pěl' 'amě ea 'la: ndi inyěni-oa 'wěni pěl' 'amě e pákidi, na pěl' 'amě ya 'la.

15. O yěkěkiděndini na mehoni, ndi Mba yěkěkidě moto.

16. Ndi oningě Mbi yěkěkidě, yěkě 'amě e ndi pákwěpákwě: 'kabojana Mbi 'bě dipâ, kabo Umba na Hangwě e lomaki 'Mba.

17. E tepě lěndwěngo o elekanako 'anyu, na upako mua bato babale u ndi pákwěpákwě.

18. Umba ndi umbákâ a pakwakě o pěl' 'amě mětě; na Hangwě e lomaki 'Mba, a pakwaka tepě o pěl' 'amě.

19. Ba vâki na ju, *na*, Hângwě a l' ove? Jisus a yavwanaki, *na*, Inyěni-oa 'wi 'Mbani tombe na Paia tepě: o jaka o yowaki 'Mbani, t' o yowudě tepěni Paia.

• 20. Jisus a kalaki ndaga tĕkadi o kundu, o Mâ-a diyaki a yokwanakidě o tĕmpil : mo-to au bweyaka Mâ 'kabojana iwĕla jaju i diyakite i t' o pâ.

21. Jâ ndi ja Jisus ja vâ pĕ na bâ, *na*, Mb' 'alandi o njea 'mĕ, o ka vahandi 'Mbani ; o ka wandini na mabe manyu : iboko viamĕ vi ka 'lĕ oa yâlĕni o pâ.

22. Ka Jiu ba vâ, *na*, A ka weyi nyolo 'aju ? 'kabojana a vwi, *na*, Oa yâlĕni o pâ pĕl' 'amĕ e kĕkĕ.

23. A vâki na bâ, *na*, O ndini ba he ; Mbi ndi ua oba : inyĕni-o ndini ba he tĕkanĕ ; Mbi 'bĕ ua he tĕkanĕ.

24. Ovanĕ nd' Umba-mbi vâkĕ n' inyĕni na o ka wandini na mabe manyu : 'kabo-jana oningĕ ó kamidĕni na Umb' i *mâ*, o ka wandini na mabe manyu.

25. Ka bâ-ba vâ na ju, *na*, Âvĕ lĕ nja ? Ka Jisus a vâ na bâ, *na*, Mbi nd' uamĕ a vâki n' inyĕni oviya jali.

26. Mbi na belombo beitĕ be kalakĕ na be yĕkĕkidě inyĕni : ndi A lomaki 'Mba, A ndi pâkwĕpâkwĕ ; Mbi kalaki na he belombo beamĕ be di yokango na ju.

27. Ndi bu bweyakidě na A kalaki na bâ o pĕl' 'a Hangwĕ.

28. Jisus a vâki na bâ, *na*, O inyëni-o ka betëni Mwana-moto oba, nandi bêngë o yowakëni na Umb' i *mâ*, na Mba haka elombo Umba mëtë; ndi Mbi kalaki belombo tēka-be panika Paia a yokwakidë 'Mba.

29 A lomaki 'Mba a n' Umba: Hangwë a 'bë 'Mba dikango dipâ; 'kabojana Mbi hakandi egombe yëhëpi belombo be tândâ-kidë Mâ.

30. Baitë ba kamakidi Mâ, o Mâ-a diyaki a kalaka ndaga tēkadi.

31. Jâ ndi ja Jisus ja vâ na Jiu tē ba kamakidë Mâ, *na*, Oningë o lilimidëngëni o ndaga 'amë, *vâkâna* o ndini beyokwedi be-amë mbambaë;

32. Vâkâna nandi o ka yowëndini pâkwë-pâkwë, na pâkwëpâkwë tē e ka pangandi inyëni humu.

33. ¶ Ba yavwanaki Mâ, *na*, Ho ndi ibângâ ja Ebrahim, moto ka moto a 'bë hwë nivango: ndi e lë ndi eâvë e vâkë, *na*, O ka pangwëndi humu?

34. Jisus a yavwanaki bâ, *na*, Pâkwëpâkwë mëtë, Mbi vâki n' inyëni, *na*, A hakë bobe uëhëpi, a ndi univwi mua bobe.

35. Uhayi a diyaka o ndabo egombe yëhëpi, *ndi* Mwana nd' a diyakë egombe yëhëpi.

36. Nd' oningě Mwana a pangingě inyě-
ni humu, vâkâna o diyendini humu mba-
mbaě.

37. Mbi yowěngo na o ndini ibângâ ja
Ebrahim; ndi o vahakand' o weyi 'Mbani,
'kabojana ndaga 'amě e 'bě n' iboko o inyěni
o jadi.

38. Mbi kalakandi ibeamě be di yěněngo
na Paia: inyěni o hakandini tepě ibeanyu
be yěnekidi na hângw' 'anyu.

39. Ba yavwakindi ka bâ-ba vâ na ju, na,
Hangw' 'ahu ndi Ebrahim. Jisus a vâki
na bâ, na, O jakani bana ba Ebrahim, t' o
hakateni behavu bea Ebrahim.

40. Ndi kya tēkaně, o vahakand' o weyi
'Mbani moto a langwakiyě inyěni pâkwě-
pâkwě, eamě e di yokango na Anyambě:
Ebrahim au haka ekae.

41. O hakandini behadi bea hângw' 'anyu.
Jâ ndi jabu ja vâ na ju, na, Hu jakwě behi-
la; ho te Hangwě pâkâ, kažo Anyambě.

42. Jisus a vâki na bâ, na, Anyambě a
jaka Hângw' 'anyu, t' o tândâkâti 'Mbani:
'kabojana Mbi pumakiyendi k' Umba-mba
viya o Anyambě a jadi; Mbu vaka Umba
mětě, Mâ nd' a lomaki 'Mba.

43. E lě ndi eanyu e ha bweyakidě ikali-

di viamě? 'kabojana oa yâlěni o yoka ndaga 'amě.

44. O ndini ba hângw' 'anyu, děvil, idokuwa ja hângw' 'anyu t' ijanyu i ka bâbě o ha: a diyakite uweyani oviya jali, Au diyaka o pâkwěpâkwě; 'kabojana pâkwěpâkwě eu diyaka o mâ-a jadi. Oningě a kala bojowa, a kalakate ibeaju mětě: 'kabojana a ndi unoki, na mâ-a tepě hangwě ya bojowa.

45. Oa kamakidi 'Mbani, 'kabojana Mbi langwakiyandi *inyěni* pâkwěpâkwě.

46. A lě nja o inyěni-o jadi a sulakě 'Mba na bobe? Nd' oningě Mbi kalaka pâkwěpâkwě, e lě ndi eanyu e ha kamakidě 'Mba?

47. A di ua Anyambě, a yokaki ndaga ja Anyambě; inyěni-oa yokaki *jâni*, 'kabojana o 'běni ba Anyambě.

48. Jâ ndi ja Jiu ja yavwa ka bâ-ba vá na ju, *na*, Hoa vâkâ bwamu, na O ndi ua Sameria, na nâvě-o na děvil?

49. Jisus a yavwanakindi, *na*, Mbi 'bě na děvil: ndi Mbi hekakidi Paia, inyěni-oa hekakidi 'Mbani. .

50. Mba vahaka tepě ivenda jamě mětě: o n' umbâkâ a vahakě, na Mâ-a yěkěkidě.

51. Pâkwěpâkwě mēte Mbi vâki n' inyě-
ni, *na*, Oningě moto a tataka ndaga jamě, a
yěne iwedo nala egombe yěhěpi.

52. Jâ ndi ja Jiu ja vâ na ju, *na*, Nandi
ho yowudi na O na děvil. Ebrahim a we-
ndi na basâki; na nâvě mâ, *na*, Oningě
moto a tataka ndaga jamě, a veke iwedo
nala 'gombe yěhěpi.

53. Āvē nd' o di wa na hangw' 'ahu
Ebrahim, a wedi? na basâki ba wedi: o
pangaka lě Āvē mětě nja?

54. Jisus a yavwanakindi, *na*, Oningě
Mbi hekakidě nyolo 'amě mětě, vâkâna
ihelikidě jamě i 'bě elombo: Paia nd' a heka-
kidě 'Mba, uanyu a vâkě na A ndi Anya-
mbě 'anyu.

55. Ndi oa 'wi Mâni; ndi Mbi yowěngo
Mâ: oningě Mba vâ, *na*, Mba 'wě Mâ, Mbi
tepě ujojowi pani k' inyěni: ndi Mbi yowě-
ngo Mâ, n' Umba-mbi tataki ndaga jaju.

56. Hângw' 'anyu Ebrahim a peyakindi
iyěně ja buhwa boamě: a yěněki *boá*, ka
mâ-a yěně mbya.

57. Jâ ndi ja Jiu ja vâ na ju, *na*, O ha
pâdětě mabo ma mepuma matano utodu,
na nâvě *mâ na* o yěněkindi Ebrahim?

58. Jisus a vâki na bâ, *na*, Pâkwěpâkwě

mětě Mbi vâki n' inyěni, *na*, Oviya Ebraham a t' o diya, Mbi diyakite.

59. Já ndi jabu ja tâlidě malale ma yangwakiyě Mâ: ndi Jisus a kutaki nyolo 'aju, ka Mâ-a puma o těmpil, a pudungana ki hangan' 'abu, kâ Mâ-a tomba kakana.

KAPITA IX.

1. O *Jisus* a tombakidi, A yěněki momo a diyaki pâgu oviya ijadi jaju.

2. Beyokwedi beaju be uwaki Mâ, *na*, Uyokwidi nja haki bobě, momo těkaně, ipě hangwě na nyangwě, eaju e jakudwě pâgu?

3. Jisus a yavwanakindi, *na*, Momo těkaně a 'bě hango bobě, tombe na nyangwě na hangwě: ndi e ndi na behavu bea Anyambě be ka yowaněndi o mâ-a jadi.

4. Mbi hake behavu bea A lomaki 'Mba o mu ngite mwehe: bulu bo vakandi, o moto a yâlě pě o ha ehavu.

5. Mbi ndi bwe ya he, ulingo muamě u didi o he těkaně.

6. O Mâ-a diyakidi a kala ekae, a tuwaki malě o he, ka Mâ-a bunda mahě na malě tě, ka Mâ-a hingila mahě tě o mihâ ma pâgu.

7. A vâki na ju, *na*, Kěķě, ka tukake o 'tima ya Siloam, (e jadi *na*, Lomwěngo, oningě ja 'ludwě.) A ķěkindi nandi ka tuka, a timbakindi, a ka yěněķě.

8. ¶ Bato ba longaki na ju baka na ba yěněķi mâ ovyo a jakudwě pâgu, ba vâki, *na*, A 'bě mâ ekaně a diyaki diya a jombanaka?

9. Bâkâ mâ, *na*, Mâ nd' ekaně: bapâkwě mâ, *na*, A kwanaki mâ: *ndi* a vâki, *na*, Umbi mâ.

10. Ovaně nd' o bâ-bâ vâki na ju, *na*, Mihâ mâvē ma bumwaniyě lě na?

11. A yavwanaki na, Momo, a tubakwě, *na*, Jisus, a bâhâkidi mahě ka Mâ-a hingila mâ o mihâ mamě, ka Mâ-a vâ n' umba, *na*, Kěķě, ka tukake o 'tima ya Siloam: k' umba-mba vala na tukaka, k' umba-mba yěně.

12. Jâ ndi jabu ja vâ na ju, *na*, A l' ove? A vâki, *na*, Mba 'wě.

13. ¶ Ba vanaki mâ a diyaki pâgu o vyo o Farisi ba jadi.

14. Bo diyaki buhwa bo' Iyâjâ o Jisus a bâhâkidě mahě na Mâ-a bumwakidě mihâ maju.

15. Jâ ndi ja Farisi ja uwa pě mâ na a pahakiye lě iyěně jaju na. A vâki na bâ,

na, A vamakiděndi mahě o mihâ mamě, k' umba-mba tuka, k' umba-mba yěně.

16. Ovaně nd' o Farisi jáká i vâki, *na*, Momo tēkaně a 'bě ua Anyambě, 'kabojana a tataka buhwa bo' Iyâjâ. Bapâkwě ba vâ, *na*, Moto a jadi ube a l' a haka elembo ya jângâ tēkadi na-e? Ipěhě i diyaki o bâ mětě ba jadi.

17. Ba vâki pě na mwa tě ua pâgu, *na*, O vâká lě o pěl' 'aju, nana o Mâ-a bumudě mihâ mâvě na-e? A vâki, *na*, A ndi usâki.

18. Ndi Jiu bu kamakidě o pěl' 'aju, na a diyaki pâgu nana a pahiyendi iyěně jaju, kabo o bâ-bâ ndakiyedi hangwě na nya-ngwě ya a pahakiyedi iyěně.

19. Ka bâ-ba uwa bâ, na, Mwan' 'anyu nd' ekaně, uanyu a vâkě na a jakudwi pagu? Ndi a yěněkě lě pě nand' e?

20. Hangwě na nyangwě ba yavwanaki bâ, na, Ho yowěngo na mwana 'hu nd' mwan' 'ahu ekaně, tepě na a jakudwi pâgu.

21. Ndi elombo e pangi mâ-a yěněkě, hoa 'wě yâ; na A bumudě mihâ maju hoa 'wě: a běndi ijaju igona; uwaki mâni: mâ mětě a ka kalate.

22. Hangwě na nyangwě ba kalaki *ndaga* tēkadi, 'kabojana ba bangaki Jiu:

'kabajana Jiu ba diyaki ba lata pâni ta, na moto a ka mēmě Mâ na a diyaki Kraist, a ka pumwěnd' o sinigâg.

23. Ovaně nd' o hangwě na nyangwě ba vâki, *na*, A běndi ijaju igona; uwaki mâni.

24. Já ndi jabu ja ndiya pě momo tě a diyaki pâgu, ka bâ-ba vâ na ju, *na*, Bendakě Anyambě: ho yowěngo na momo těkaně A moto ube.

25. A yavwanaki ka mâ-a vâ na, Ipě A ndi mot' ube, *ipě a ibě* mba 'wě: mbi yowěngo elombo yâkâ, mbi diyaki pâgu, ndi mbi ka yěnekěndi.

26. Já ndi jabu ja vâ pě na ju, *na*, A haki l' âvě na-e? A bumwaki lě mihâ mâvě na-e?

27. A yavwanaki bâ, *na*, Mbi ma languwat' inyěni, ndi ou yokani: o vahaka li o yoki njo epâkwě na-e? inyěni o ka bâbâtě o diya tepě beyokwedi beaju?

28. Já ndi jabu ja kila mâ ka bâ ba vâ, *na*, O ndi eyokwěd' 'aju; ndi ho ndi beyokwedi bea Mosěs.

29. Ho yowěngo na Anyambě a kalaki na Mosěs; *ndi* ekaně, hoa 'wě o pěl' 'aju e viyedi.

30. Momo tě a yavwanaki bâ, *na*, Okava nd' elombo e mamanakwě, eanyu e ha 'wě

o pěl' 'aju e viyedi, ndi A bumudi 'mba mihâ mamě.

31. Ho yowěngo na Anyambě a yokakiya bato babe: ndí oningě moto a diyengě ukaliyi mua Anyambě, na mâ-a haka upango muaju, mâ ndi uaju a yokakiyě.

32. Ekae e ha yokane oviya jali ja he, na moto ka moto a bumuděngo mihâ ma a di jawěngo pâgu.

33. Momo těkaně a jaka a diye ua Anyambě, t' A yâlě o ha elombo ka 'lombo.

34. Ba yavwanakindi ka bâ ba vâ na ju, na, Âvě-o jakudwě kabo na bobe, na nâvě-o ka yokwakidě hwě? Ka bâ-ba pumě mâ o uhěngě.

35. Jisus a yokakindi na ba pumi mâ o uhěngě: o Mâ-a diyakidi A duwa mâ, A vâki na ju, na, O kamakiděte Mwana ua Anyambě?

36. A yavwanakindi, na, Mâ-a lě nja, Upangiyi, nana mbi kamidě Mâ?

37. Jisus a vâki na ju, na, O te Mâ yěněngo, Mâ tepě A kalakě na nâvě ekaně.

38. Ka mâ-a vâ, na, Upangiyi mbi kamiděndi. Ka mâ-a kaliya Mâ.

39. ¶ Ka Jisus a vâ, na, Mbi pândi o he

těkaně o yěkě; na na ba ha yěněkě ba yěněke, na ba yěněkě ba diyake pāgu.

40. Farisi *jáká* i diyaki na ju, i yokakidi ndaga tēkadi, i vāki na ju, *na*, Ho tepě pāgu.

41. Jisus a vāki na bâ, *na*, O jakani pāgu, t' o 'běni na bobe: nd' o vākāndini, *na*, Ho yěněkěte; ovaně nd' o bobe boanyu bo ngitewě.

KAPITA X.

1. Mbi vāki n' inyěni pākwěpākwě mětě, *na*, A ha ngakiya o jāmbě na 'la o ibemba ja medāmbě, kabo bobetaka o pělě 'pākwě, a ndi mwibi n' upatuwi.

2. Ndi a ngakiyě o jāmbě, mâ ndi utati mua medāmbě.

3. Mâ ndi ua a tatakě jāmbě a dubwakiyě; medāmbě me yokakě joyi jaju: mâ nd' a ndakiyě medāmbě meaju na mina, na mâ-a dulakě meâ o bwebwe.

4. O mâ-a pumakě medāmbě meaju mětě, a kēkēndi o boho boabu, vākāna medāmbě me vitaki mâ: 'kabojana me yowudēndi jowi jaju.

5. Mea vite mwěngi, ndi me ka kweyi mâ: 'kabojana mea 'wě mowi ma bangi.

6. Jisus a kanakiyi bâ ukanakâdi tēmuně: ndi bu bweyakide belombo beaju be kalaki na bâ.

7. Jisus a vâki na bâ epâkwě njo, *na*, Pâkwěpâkwě mětě Mbi vâki n' inyěni, *na*, Umba ndi jâmbě ja medâmbě.

8. Běhěpi ba di viyango o boho n' Umba, ba ndi miyibi na bapatuwi: ndi medâmbě meu yokakiya bâ.

9. Umba ndi jâmbě: mo~~ka~~ ka moto a ka ngiyě n' Umba, a ka yongandi, vâkâna a ka ngiyandi o utema na mâ-a pumaka o bwe-bwe, na mâ-a ka pahiyandi iboko vi jakě.

10. Mwibi u vakate, kabo ka iba, na ka weya, na ka jilidě: Mbi pândi na ovaně nd' o bâ-ba ka pahiyě eměná, na ovaně nd' o bâ-ba ka pahiyě *yâ* eitě wa.

11. Umba ndi utati mua medâmbě uyam': utati uyam' u nangakiděndi eměná 'aju o pělě ea medâmbě.

12. Ndi ukâlwi u ha 'bě utati mua medâmbě, a ha 'bě a duwě meâ, a yěningě njâ e vaka vâkâna a diki medâmbě, na mâ-a kweya; na njâ ea bweya meâ, na eâ e ka vanjanganakě meâ.

13. Ukâlwi u kweyakandi, 'kabojana a te bokâlâkwě, a 'bě n' isâlâ o pěl' 'a medâmbě.

14. Umba ndi utati uyamu, Mbi yowěngo *medâmbě* meamě, n' imeamě me yowěngo 'Mba.

15. Panika Hangwě a yowudě 'Mba, no-naně tepě Umba-mbi di Hangwě yowěngo: Mbi nangiděngo eměná 'amě o pěl' ea medâmbě.

16. Mbi na medâmbě mepâkwě me ha 'bě mea ibemba tēkadi: meâ ndi imeamě me ka vaně, meâ tepě me ka yoki joyi jamě; vâkâna me diyendi mwanga umbâ-kâ, utati tep' umbâkâ.

17. Ovaně nd' o Paia a tândâki 'Mba, 'kabojana Mbi nangiděngo eměná 'amě, nana Mbi ka nângě pě yâ.

18. O 'bě na moto a nângâkě 'Mba yâ, Mbi yâ nangiděngo Umba mětě. Mbi na ngudi e nangakidě yâ, n' Umba-mbi na ngudi e nângâkě pě yâ. Elekanako tēkae nd' eamě e pahiyedi o Paia a jadi.

19. ¶ Ipěhě i diyaki pě o Jiu ba jadi o pěl' ea ndaga tēkadi.

20. Bato baitě ba vâki, *na*, A na dēvil, A ndi eboki; e lě ndi eanyu e yokakiyi Mâni?

21. Bapâkwě mâ, *na*, Ekadi i 'bě ndaga ja moto a di na dēvil. Dēvil a ka yâlěte o bumudě mihâ ma pâgu?

22. ¶ E diyakindi o Jěruselěm isango ja ivě ja těmpil, e diyaki tepě epedi y' ivěvu.

23. Jisus a tamwakindi o těmpil o 'lěmbě ea Sálomân.

24. Jiu ba vakindi ulwaniděngo Mâ, ka bâba vâ na ju, *ua*, U lě nj' ulingo-ě umuâvě u pangakě hwě-ho bomaka penda? Langwakiya hwě pubwe ipě O ndi Kraist.

25. Jisus a yavwanaki bâ, *na*, Mbi pakuwendi inyěni, ndi ou kamiděni: behavu beamě be hakě na dina ja Paia, be pakwakandi o pěl' 'amě.

26. Ndi inyěni oa kamakiděni, 'kabojana o 'běni medâmbě meamě, panik' Umba-mbi ma vâ n' inyěni.

27. Medâmbě meamě me yokaki joyi jamě, n' Umba-mbi yowuděte meâ, na meâ me vitanaki 'Mba:

28. Mbi věngo mea eměná ea egombe yě-hěpi; me ka měndě me nyange, o 'bě tepě na moto a ka patuwě meâ o benâ beamě.

29. Paia a vėkidi 'Mba *meâ*, A ndi boněně wa na běhěpi; o 'bě na moto a ka yâlě o patuwa *meâ* o benâ bea Paia.

30. Hwě na Hangwě, ho te mot' umbákâ.

31. Já ndi ja Jiu ja tâlidě pě malale ma yangwakiyě Mâ.

32. Jisus a yavwanaki bâ, *na*, Mbi leviděngo inyěni behavu beyamu beité oviya Paia a jadi; ndi, e lě nja 'havu-ě eanyu e yangwanakiyě 'Mba malale o behavu těbeně?

33. Jiu na yavwanaki Mâ, *na*, Hoa yangwaka 'vě malale o ehavu eyamu; ndi na tina ea ikila ja Anyambě, na tepě 'kabojana Ávě-o jadi moto, O pangaka nyolo 'ávě Anyambě.

34. Jisus a yavwanaki bâ, *na*, E 'bě lěndwěngo o 'lekanako 'anyu, *na*, Mbi vâki, *na*, O ndini beanyambě?

35. Oningě na a tubaki bâ, *na*, beanyambě, ba ndaga ja Anyambě i lumbakiyedi; ilěndwě ja yâlě o weywě;

36. O vâkândini na ua Hangwě a di nyěviděngo na a lomakidi o he, *na*, O kilakandi Anyambě; 'kabojana Mbi vâki, *na*, Umba ndi Mwana ua Anyambě?

37. O kamakidi 'Mbani, oningě na Mba haka behavu bea Paia.

38. Nd' oningě Mbi haka, tombekete o kamidi 'Mbani, kamakiděni behavu: ovaně nd' inyěni-o ka yowěni n' inyěni-oa kamiděni na Hangwě nd' o 'Mba-mbi jadi, n' Umba-mbi tepě o Mâ-a jadi.

39. Ovaně nd' o bâ-ba vahaki pě o bwe-ya Mâ; ka Mâ-a kweya oviya benâ beabu,

40. A kěki pě o mwidi 'pâkwě ea Jâdan, iboko via Jân vi baptaisanakidi o bohoboho; Ka Mâ-a diyate omě.

41. Ka baitě ba vala o Mâ-a jadi, ka bâ-ba vâ, na, Jân au haka elembo; ndi belombo bea Jân be kalakidi o pěl' 'a momo tēkaně beēhēpi, be diyaki pâkwěpâkwě.

42. Baite ba kamakidi Mâ omě.

KAPITA XI.

1. *Momo* n' uhuhu a diyakindi a běkě, *dina, na, Laserâs, ua Bětane mboka ya Meri na iluku jaju Martha.*

2. (Me diyaki Meri tš me hakiyedi Upangiyi mavulě ma kango, ka mâ-a tituwa matambi maju na howe jaju, ndomi 'aju Laserâs nd' a diyakidi a běkě.)

3. Maluku maju ma lomaki ndaga o Mâ-a jadi, na, Upangiyi, umbwakiyate uâvě a tândâkě a běkěndi.

4. O Jisus a yokakidi eně, a vâki, na, Ebědi tēkae e 'bě y' iwedo, ndi y' ivenda ja

Anyambě, nana Mwana-Anyambě a ka he-
kudwě na eá.

5. Jisus a ma tândâki Martha na iluku
jaju na Laserás.

6. O Mâ-a yokaki na a běkěndi, a nanga-
kiyi pě hwi ibale o iboko t' iviaju vi diya-
kidi.

7. Beně kělěbě, ka Mâ-a vâ na beyokwe-
di *beaju*, na, Ho kěke pěni o Judia.

8. Beyokwedi *beaju* be vâki na ju, na,
Paia, Jiu ba vahite o yanguwa 'vě malale
kya, na nâvě o kěkě pě ovoně?

9. Jisus a yavwanakindi, na, Buhwa bâká
a 'bě jomu ja mawěla na mawěla mabale?
Oningě moto a tamwaka na mwehe, a vu-
ngule, jambojana a yěněkěndi bwe ya he
těkaně.

10. Nd' oningě moto a tamwaka na bulu,
a ka vungulandi, 'kabojana a 'bě na bwe.

11. O Mâ-a běki belombo těkabe kalango,
ka Mâ-a vâ na beyokwedi *beaju*, na, Mbwe-
yi 'ahu Laserás a yakandi; ndi Mb' 'alandi
nana Mbi umwakidě mâ o viyá.

12. Já ndi ja beyokwedi *beaju* ja vâ, na,
Upangiyi, oningě na a yakandi vâkâna a ka
yongandi.

13. Ndi Jisus a kalakindi o pěl' 'a iwedo

jaju : ndi bâ-ba pikilakiyi na ipě a kalaki-
ndi o pěl' 'a iyâjâ o viyâ.

14. Ka Jisus a languwa bâ pubwe, *na*,
Laserâs a wendi.

15. Mbi yënëkě mbya o pěl' 'anyu, 'ka-
bojana Mbu diyaka omě, nana inyěni-o ka
kamiděni ; ndi ho kěkeni o mâ-a jadi.

16. Jâ ndi ja Tâmas e tubakwě na Didi-
mâs, ja vâ na beyokwedi na ju, *na*, O 'kani
tepě, ho vali nana ho we na ju.

17. O Mâ-a pâkidi Jisus a kâbâkidi mâ
a diyaki a *nangakiya* o malonga hwi inai.

18. (Bětane a diyaki piělě na Jěruse-
lěm, panika masěi ma jomu na fâlângâ
itano :)

19. Baitě ba Jiu ba vakindi o Martha na
Meri ba jadi ka nyěvidě bâ o pěl' 'a ndomi
'abu.

20. O Martha a yokakidi na Jisus a va-
kandi, ka mâ-a vala ka lata na ju : ndi Meri
a diyakite diyango o ndabo.

21. Jâ ndi ja Martha ja vâ na Jisus, *na*,
Upangiyi, o jaka okava, te mwan' ina au
wa.

22. Ndi mbi yowěngo na tombekete kya
těkaně, elombo 'âvě e ka uwě Anyambě,
Anyambě a ka vënd' Âvě *yâ*.

23. Jisus a vâki na ju, *na*, Ndomi 'âvë a ka pumbuwate.

24. Martha a vâki na ju, *na*, Mbi yowu-dëte na a ka pumbuwandi o ipumbuwa o buhwa boa madikanido.

25. Jisus a vâki na ju, *na*, Umba ndi ipumbuwa na emënë: a kamakidë 'Mba, tombekete a wa, a ka diyate:

26. Uëhëpi a ka kamidë 'Mba, mâ te mihâ, a ka mëndë a we pë. O kamakidët' ekæ?

27. A vâki na ju, *na*, E, Upangiyi: mbi kamakidëndi na Âvë ndi Kraist mëtë, Mwa-na ua Anyambë a lenakudwë na A ka viyë o he.

28. O mâ-a bëke ekabe kalango ka mâ-a 'la ka ndiya iluku jaju Meri ikutakuta, na, Uyokwedi a pândi, A ndakiyand' âvë.

29. O mâ-a yokakidi *enë*, ka mâ-a 'muwa wâwâ, na vala o Mâ-a jadi.

30. Jisus a diyakite a t' o pâ o mboka, a diyakite iboko tē via Martha vi lataki na ju.

31. Jiu tē ba diyakidi na mâ ba nyëvë-kidë mâ o ndabo, o bâ-ba yënëki Meri a umwaka wâwâ na mâ-a pumaka, ba vita-kidi mâ, na, A 'landi o malonga ka ya ovonë.

32. O Meri a pâkidi iboko via Jisus vi diyakidi, a yěněki Mâ, ka mâ-a kwa o beko beaju, a vâki na ju, *na*, Upangiyi, o jaka okava, te mwan' ina au wa.

33. O Jisus a yěněki mâ a yaka, na Jiu tepě ba vakidi na mâ, ba yaka, ilina jaju i njimakindi, ka Mâ-a yěně njuke.

34. A vâki, *na*, O nangidě li mâni ove? Ba vâki na ju, *na*, Upangiyi, vaka, ka yěněkě.

35. Jisus a yakindi.

36. Jâ ndi ja Jiu ja vâ, *na*, Yěněkěteni ka Mâ-a tândâkě mâ.

37. Ka bâkâ ibabu ba vâ, *na*, Momo tě a bumwakidě mihâ ma pâgu ekaně, au 'mbakate o yâlě o panga momo těkaně na au wake?

38. Jisus a njimaki pě o ulema muaju ka Mâ-a pâ o malonga. U diyakindi ubwalange, ilale omě nangudwěngo.

39. Jisus a vâki, *na*, Věngěkiděni ilale. Iluku ja a diyakidi wango, Martha, a vâki na ju, *na*, Upangiyi, a ka nâvâkândi egombe tēkae: 'kabojana a bi na wa na hwi inai.

40. Jisus a vâki na ju, *na*, Mbu vâkâ na nâvě na oningě o kamiděngě, o ka yěněndi ivenda ja Anyambě?

41. Já ndi jabu ja vëngidë ilale oviya *iboko* via ekengo vi nangakiyedi. Ka Jisus a betë mihâ *maju* oba, ka Mâ-a vâ na, Paia, Mbi langakand' Âvëo Âvë-o di 'Mba yokiyango:

42. Mbi yowëngo na O yokakiyi 'Mba egombe yëhëpi: ndi Mbi vâkândi *ekae* o pël' ea bato ba di tëmëtëmë, nana bâ-ba ka kamidë na Âvë nd' o lomaki 'Mba.

43. O Mâ-a bëki nonanë kalango, a yama-ki na joyi oba, *na*, Laserâs, pumaka.

44. Ka a diyakidi wango a puma, maka-du na matambi katwëkatwë na menamba mea malonga: boho boaju bo diyaki di-ngwëngo na 'vëlëhë. Jisus a vâki na bâ, *na*, Unjuwaki mâni, n' inyëni-oa huludë mâ-a këke.

45. Já ndi ja Jiu tē ba vakidi o Meri a jadi baitë ba kamidë Mâ, o bâ-ba yënëki belombo bea Jisus be hakidi.

46. Ndi bâkâ ibabu ba këkëndi o Farisi ba jadi, ba 'la ka languwa bâ belombo bea Jisus be hakidi.

47. ¶ Já ndi ja prist ja meolo na Farisi ja lata êhoka, ka bâ-ba vâ, *na*, Ho hake li na? 'kabojana momo tēkanë a hakandi megoma meitë.

48. Oningě hoa huludě Mâ nonaně, vâ-kâna bato běhěpi ba ka kamidi Mâ: vâkâ-na ba Roma ba ka pândi, na bâ-ba nângâ etomba 'hu n' iboko viahu:

49. Uabu umbâkâ, *dina* Keafas, a diyakidi prist ya molo upuma tẽ, a vâki na bâ, na, Oa 'wěni elombo ka 'lombo.

50. Oa pikilakiyani na e lukango o pěl' 'ahu, nana mot' umbâkâ a waka o pěl' 'a bato, ovaně nd' o etomba yěhěpi e ka mēndě e nyange?

51. Au kalaka ekae eaju mětě: ndi a diyakindi prist ya molo upuma tēmune, a sâkâkindi na Jisus a ka wandi o pěl' 'a 'tomba tēeně;

52. Hanga kabo etomba tēeně dipâ, ndi nana A ka yolěndi tepě bana ba Anyambě ba diyakidi vanjanganango o vaba iboko viâkâ.

53. Oviya buhwa tēboně ba lataki ehoka nana ba weyi Mâ.

54. Ovaně nd' o Jisus a ha tamwaki pẽ o bwebwe o Jiu ba jadi; ndi A věngēměkind' omě na kěkě o 'hiki piělě na ŋginga, o mbo-ka e tubakwě, na, Ifreim, omě nd' o Mâ-a diyakidi na beyokwedi beaju.

55. ¶ Isango ja Jiu j' Ikunduwa i diyaki

ja bě piěľě: ka bato baitě ba vala oviya 'hiki o Jěruselěm, ka tuka nyolo jabu, ovaně isango i t' o pã.

56. Ka bâ-ba buta Jisus, ba ka kalaka bâ mětě na bâ mětě o bâ-ba tēměkidi o tēmpil, na, O pikilakiya li na, nana A ka diyandi A viye o isango?

57. Prist ja meolo na Farisi ba diyaki ba vë elekanako, na, oningě moto ka moto a di yowěngo o Mâ-a jadi, a salake, ovaně nd' o bâ-ba ka nāngě Mâ.

KAPITA XII.

1. Jâ ndi ja Jisus ja vala o Bětane ya Lasérás a diyakidi wango, uaju A pumbwakidě, hw' utoba ovaně isango j' Ikunduwa i t' o pã.

2. Omě nd' o bâ-ba yambakiyi Mâ beja bea kolo; na Martha a dilakě: ndi Lasérás nd' umbákâ a diyaki na ju o tagulu.

3. Jâ ndi ja Meri ja nāngâ iwěla ja mavulě ma kango ma spaiknard ma weyakě ihambe iněně, a hakiyi beko bea Jisus, na mâ-a ka titwaka bea na howe jaju: ndabo e londaki ti na kango ya mavulě tě.

4. Já ndi ja eyokwedi 'aju yâkâ, Judas Iskariât, *mwan'* 'a Saimân, a kândâkiyi Mâ, ja vâ, *na*,

5. Mavulě tě ma kango ekama, ma 'nyě-lwě o hambwě na kama ja fula ilalo nande, na já-ja věwě mekuge ?

6. A vâkind' ekae, hanga o nyanga ya na a yěněkindi mekuge isâlâ ; ndi 'kabojana a diyakindi mwibi, mâ tepě a diyaki na elandi, a ma bapakě be vama kwě omě.

7. Já ndi ja Jisus ja vâ, *na*, Dikaka mâ mbwe : a tatakindi ekae ya buhwa boamě bo ka tongwě.

8. Ikabojana o ndini na mekuge egombe yěhěpi ; o 'běni n' Umba egombe yěhěpi.

9. Bato ba Jiu baitě ba yowakidě na A nd' omě : ba kěkěndi hanga o pěl' 'a Jisus pa, ndi ovaně nd' o bâ-ba ka yěně Laserâs tepě, uaju a pumbwakidě.

10. ¶ Ndi prist ja meolo i hakindi ehoka nana ba weyaka Laserâs tepě ;

11. Ikabojana tin' 'aju ndi ya Jiu baitě ba kěkidi, ka bâ-ba kamidě Jisus.

12. ¶ O buhwa bo vitakidě bato baitě ba vakidi o isango, o bâ-ba yokakidi na Jisus a vakandi o Jěruselěm,

13. Ba nângâkindi magogo ma biya, ka

bâ-ba vala ka lata na ju, ba yamaka, *na*, Hosana : Ibâtâ n' Upolo mua Isreël, a vakë na dina j' Upangiyi.

14. O Jisus a duwakidi mwan' 'a þuru, A diyakind' o eâ diya; pani ka yâ-e di lëndwëngo, *na*,

15. O bangake, mwamwajo ua Saion; umbwakiyate, Upolo muâvë u vakandi, diyango o mwana-buru.

16. Beyokwedi beaju bu bweyakidë belombo tēkabe o bohoboho : nd' o Jisus a diyakidi a hekudwë, ka bâ-ba yongidë na belombo tēkabe be lëndëkudwëndi o pël' 'aju, na *na* ba haki tepë Mâ belombo tēkabe.

17. Ebimba e diyaki na ju o Mâ-a ndakiyi Laserâs o malonga maju na pumbudë mñâ, ba pakwakindi.

18. Tina tēkanë bato ba lataki na ju, 'kabojana ba yokaki na a hakindi ugoma tēkamu.

19. Ovanë nd' o Farisi ba vâki bâ mētë na bâ mētë, *na*, Oa yënëkëni na oa hakani elombo? umbwakiyateni, he e vitidi Mâ.

20. ¶ Griki jâkâ i diyaki tepë o bâ-ba jadi, ba vaki ka kaliya o isango.

21. Bâ ndi ba vakidi o Filipa jadi, a diyakidi ua Bëtseda ya Galili, ka bâ-ba

vâ na ju, *na*, Paia, ho vahakandi o yěně Jisus.

22. Ka Filip a viya ka languwa Andru : ka Andru na Filip ba languwa pě Jisus.

23. ¶ Já ndi ja Jisus ja yavwana bâ, *na*, Iwěla i pândi ja Mwana-moto i ka hekudwě.

24. Mbi vâki n' inyěni pâkwěpâkwě mětě, *na*, Kabo dihá ja wheat ja kwa o he, *na* já ja wa, i diyakate dipâ : nd' oningě ja wa, vâkâna i lângâki bebuma beité.

25. A tândâkě eměná 'aju, a ka nyangi yâ ; ndi a binakě eměná 'aju, o he těkaně, a ka tati yâ o eměná ya egombe yěhěpi.

26. Oningě moto ka moto a dilakě 'Mba, a vitake 'Mba ; o Umbi jadi, omě tepě udili muamě u ka diyě : oningě moto te moto a ka dilě 'Mba, Mâ ndi ua Paia a ka hekidě.

27. Ilina jamě i yěněki njuke kya těkaně ; nandi Mbi ka vâ lě *na* ? Paia, yongakě 'Mba oviya iwěla těkadi : ndi tina těkaně nd' eame e vanakidi o iwěla těkadi.

28. Paia, hekakidě dina jávě. Ka joyi ja viya oviya Hěvěn, *na*, Mbi já hekiděngo, n' Umba-mbi ka hekidě tepě já.

29. Ebimba e diyaki tēměngo omě e yokaki já, ka eâ-ea vâ, *na*, E ndi ngadi. Báká mâ, *na*, Enjěl nd' e kalaki na ju.

30. Jisus a yavwanakindi, ka Mâ-a vâ, na, Joyi tēkadi ju viya o pēl' 'amē, ndi o pēl' 'anyu.

31. Yēkē ya he tēkanē ya bēndi kya tēkanē: kya tēkanē ndi ea upolo mûa he tēkanē u ka 'hwēndi.

32. Nd' Umba, oningē 'Mba betwē oba ea he, vâkâna Mbi ka duli *bato* bēhēpi o 'Mbi jadi.

33. (A vâkindi ekaē, ilevidē j' iwedo jaju i ka wē.)

34. Ebimba e yavwanaki Mâ na, Ho ndi yokango o Belekanako na Kraist a ka diyate egombe yēhēpi: nd' O vâkâ lē pē, na, Mwana-moto a ka betwēnd' oba, nande? Mwana tē ua moto ekanē a lē nja?

35. Jâ ndi ja Jisus ja vâ na bâ, na, Bwe e te n' inyēni okava egombe ehâlē. Tamwakani egombe 'anyu e di na bwe, obanga ivititi via pâ o inyēni o jadi: jambojana a tamwakē n' ivititi, a 'we pēlē 'aju e kēkē.

36. Kamakidēni bwē, o inyēni-o jadini na bwe, ovanē nd' inyēni-o ka diyēni bana ba bwe. O Jisus a kalaki belombo tēkabe ka Mâ-a vengēmē, ka Mâ-a kuta nyolo 'aju oviya o bâ-ba jadi.

37. ¶ Ndi tombekete ka Mâ-a hakidi

megoma meitě o bâ-ba jadi, bu kamakidě Mâ :

38. Na ovaně nd' o ndaga ja Iseyas usâki i kalakidi, i ka hohonganě, *na*, Upangiyi, a lě nja a di kamiděngo upako anuahu? a lě nja a levudwě enâ y' Upangiyi?

39. Ovaně nd' o bâ-ba ha yâlâkidě o kamidě, 'kabojana Iseyas a vâki pě, *na*,

40. A ndi dibango mihâ mabu, na Mâ-a delidě bebumulema beabu; ovaně nd' o bâ-ba ka diyě ba yěne na mihâ *mabu*, na bâ-ba bweyidě na melema *meabu*, na ba 'luwa, n' Umba-umba yongě bâ.

41. Iseyas a vâkindi belombo tēkabe o mâ-a yěněkidi ivenda jaju, ka mâ-a kala o pěl' 'aju.

42. ¶ Tombekete ka yâ e diyaki nonaně, bapangiyi baněně baitě ba kamakidi Mâ; ndi bu mēměkě Mâ o pěl' 'a Farisi, o banga ba věngudwě o sinigâg:

43. Ikabojana ba ma tândâkândi ibendě ja bato, wa na ibendě ja Anyambě.

44. Jisus a yamaki ka Mâ-a vâ, *na*, A di 'Mba kamiděngo a kamakidě 'Mba, ndi a kamakiděndi A lomaki 'Mba:

45. Na a yěněkě 'Mba, a yěněkěte A lomaki 'Mba.

46. Mbi pândi bwe o he tēkaně, nana uěhěpi a kamakidě M'ba, a diye n' ivititi.

47. Oningě moto te moto a ka yokě ndaga jamě, na mâ-á kamidě já, Mba yěkidě mâ : jambojana Mbu vaka ka yěkidě he, kabo ka hungina he.

48. A kiyakě 'Mba, na mâ-á vėhėlidě ndaga jamě, a n' Umbákâ a yěkėkidě mâ : ndaga jamě i di kalango, já ndi i ka yěkidě mâ o buhwa boa madikanido.

49. Ikabojana Mbu kalaka Umba mětě; ndi Hangwě e lomaki 'Mba, nd' A vėki 'Mba elekanako nyanga 'amě e ka vâyě, na nyanga 'amě e ka kalě.

50. Mbi yowěngo na elekanako 'aju ndi eměnâ ya egombe yěhěpi: nyanga 'amě e kalakě yěhěpi, e ndi ka Hangwě a vâki n' Umba, nonaně tepě Umb'-i kalakě.

KAPITA XIII.

1. O isango j' Ikunduwa i t' o pâ, o Jisus a yowakidě na iwěla jaju i diyaki ja pâ, ijaju i ka vėngėmė o he tēkaně nala o Hangwě a jadi, A tândâkindi ibaju mětě ba diyakid' o he, A tândâki bâ nal' ihuku.

2. O huma ya kolo e makiyedi, (ka dëvil ya vama o ebumulema ya Judas Iskariât, *mwan' 'a* Saimân, ovaně nd' o mâ-a ka kândě Mâ,)

3. Jisus a yowakiděte na Hangwě a věngo Mâ belombo beěhěpi o benâ beaju, nana A vakiyendi Anyambě a jadi, na Mâ-a 'la tepě o Anyambě a jadi ;

4. A umwakindi o huma ea kolo, ka Mâ-a nangidě ngâi jaju bya ; ka Mâ-a nângâ tolo, ka Mâ-a dinga utumba.

5. Beně pa, A hovakidi miba o sěngě, ka Mâ-a yalě o tuka matambi ma beyokwedi, na Mâ-a ka titwaka *mâ* na tolo tě eaju e diyakidi dinganango.

6. Já ndi jaju ja viya o Saimân Pitě a jadi, ka Pitě a vâ na ju, *na*, Upangiyi, o tukaki matambi mamě ?

7. Jisus a yavwanakindi ka Mâ-a vâ na ju, *na*, Eamě e hakě, âvě-oa 'wě yâ kya těkaně ; ndi o ka yowěte okava tombango.

8. Pitě a vâki na ju, *na*, Oa tuke matambi mamě. Jisus a yavwanaki mâ, *na*, Oningě Mbi tuke âvě, vâkâna o 'bě na ngabo Umba-mbi jadi.

9. Saimân Pitě a vâki na ju, *na*, Upa-

ngiyi, hanga matambi mamě dipâ, ndi makadu *mamě* na molo *muamě*.

10. Jisus a vâki na ju, *na*, A di tanwěngo, a vahaka pě ituka kabo ituka ja matambi, ndi a ndi botano o pělě jěhěpi: inyěni-o ndini botano, ndi hanga běhěpi.

11. Ikabojana a yowakiděte a ka kândě Mâ: ovaně nd' o Mâ-a vâki, *na*, O 'běni tanango inyěni běhěpi.

12. O Mâ-a diyakidi a madě ituka ja matambi mabu, a nângâki ngâi jaju, a diyaki pě, ka Mâ-a vâ na bâ, *na*, O yowudětení eamě e ma hi inyěni?

13. O tubakandi 'Mbani, *na*, Uyokwidi n' Upangiyi: o vâkândini bwamu; 'kabojana Mbi *nonane*.

14. Ndi oningě Uмба, Upangiyi muanyu na Uyokwidi muanyu, Mba tuka inyěni matambi; inyi mětě n' inyi mětě o lukakand' o tukanani matambi.

15. Ikabojana Mbi vëndi inyěni mbuna, *na*, hakani k' Umb'-i ma hi inyěni.

16. Pâkwěpâkwě mětě Mbi vâki n' inyěni, *na*, Uhayi a 'bě boněně wa na Upangiyi; a lomakwě a 'bě boněně tēpě wa na a ma loma mâ.

17. Oningě oa yowěni belombo těkabe, n' inyěni-oa hi beâni, ibâtâ n' inyěni.

18. ¶ Mba kalaka o pěl' 'anyu bēhēpi; Mbi yowěngo ibamě ba di pânângo; ovaně nd' o ilěndwě i ka hohonganě, *na*, A jakě n' umba pěmbě, a betiděndi ekikind' 'aju o pěl' 'amě.

19. Mbi langwakiyandi inyěni e t' o pâ, na ovaně nd' inyěni-o ka kamiděni, o yâ e ka pâyě, na Umba ndi *mâ*.

20. Pâkwěpâkwě mětě Mbi vâki n' inyěni, *na*, A vĕhĕlĕkidě uamě a lomakě, a vĕhĕlĕkidi 'Mba; a vĕhĕlĕkidi 'Mba, a vĕhĕlĕkidě a lomaki 'Mba.

21. O Jisus a bĕki nonaně kalango, ilina jaju i yĕnĕki njuke, ka Mâ-a vâ, na, Pâkwěpâkwě mětě Mbi vâki n' inyěni, *na*, Ua njamba 'nyu umbâkâ, a ka kândi 'Mba.

22. Jâ ndi ja beyokwedi ja 'mbwaniya, ba bomaka penda uaju a kala.

23. Omě o diyakindi eyokwedi yâkâ hikamiyango o ngonga 'a Jisus, ya Jisus e ma tândâkâ.

24. Saimân Pitě a vĕki mâ ndembo na a uwake na a lě nja uaju A vâ.

25. Jâ ndi ja a diyaki nangiyango o ngo-

nga 'a Jisus, ja vâ na ju, *na*, Upangiyi, a lě nja?

26. Jisus a yavwanakindi, *na*, Mâ ndi uamě a ka vëyě itambu, oningě Umba *jâ* dubango. O Mâ-a běki itambu dubango, ka Mâ-a vë *jâ* Judas Iskariât *nwan'* 'a Saimân.

27. Ka Setan a ngiya o mâ-a jadi, itambu tombango. Jâ ndi ja Jisus ja vâ na ju, *na*, Haka wâwâ eâvë e hakě.

28. Ndi o 'bë na moto o tagulu a yowakidě tin' 'aju e kalaki na ju ekae.

29. Bâkâ ba pikilakiyi na 'kabojana Judas a diyaki na elandi, ovaně nd' o Jisus a diyaki A kala na ju, *na*, Hambaka ibeahu be nyamakě o pël' isango; naba, na, a vëke mekuge elombo.

30. O mâ-a nângâkidi itambu, a pumaki wâwâ: bo diyaki bulu.

31. ¶ Ovaně nd' o mâ-a diyakidi a puma Jisus a vâki *na*, Nandi Mwana-moto a hekudwěndi, na Anyambě a hekudwi na Mâ.

32. Oningě Anyambě a hekudwě na Mâ, Anyanbě a ka hekidi tepě Mâ na ma mětě; na Mâ-a ka hunganandi o hekidě Mâ.

33. Banděmbě, Mbi te n' inyěni okava egombe ehâlě. O ka vahandi 'Mbani; pani k' Umba-mbi vâki na Jiu, *na*, Oa yâlěni o

vala, o 'Mba-mbi kěķě; nyanga tě te eamě e vâķě n' inyěni.

34. Mbi vëndi inyěni elekanako ya kya, na, Tândânâkâni; pani k' Umba-mbi tândâķě inyěni, tândânâki tepě nonaně.

35. Ekae ndi ya *bato* bēhēpi e ka yowaně na o ndini beyokwedi beamě, oningě-o jadi-ni n' itândě inyěni mēte n' inyěni mētě.

36. ¶ Saimân Pitě a vâki na ju, na, Upangi-yi, oa la l' ove? Jisus a yavwanaki mâ, na, Oa yâlě o vitě 'Mba kya tēkaně, O Mbi kěķě; ndi o ka vitě 'Mba o egombe e vakě.

37. Pitě a vâki na ju, na, Upangi-yi, e lě nde eamě e ka 'nyě o vitě Ávě kya tēkaně? Mbi ka nangiděndi eměná 'amě o pěl' 'ávě.

38. Jisus a yavwanaki mâ, na, O ka nangidete eměná 'ávě o pěl' 'amě? Pâkwě-pâkwě mētě Mbi vâki na nâvě, na, Kuba ya kâkâle nd' o hâhiye 'Mba njo ilalo.

KAPITA XIV.

1. Ebumulema 'anyu e yěněke njuke: inyěni ba kamakidě Anyambě, kamakidě tepě 'Mbani.

2. O ndabo 'a Paia o na bediya beitě; e

jaka e diye *nonaně*, te Mbi languwet' inyěni. Mb' 'alandi ka kenjiyě inyěni iboko.

3. Oningě Mba vala ka kenjiyě inyěni iboko, Mbi ka pāte njo epākwě ka nāng' inyěni o 'Mba mětě mbi jadi; ovaně tepě inyěni-o ka diyě o Umb' 'i jadi.

4. Oa dimbakiyani pělě 'amě e kěķě, oa dimbakiya tepěni njea.

5. Tāmas a vāki na ju, *na*, Upangiyi, hoa 'wě pělě 'āvě e kěķě; ho ka yālě lě o yowě njea na-e?

6. Jisus a vāki na ju, *na*, Umbi Njea, na Pākwēpākwě, na Eměná: o 'bě na moto a ka pāyě o Hangwě a jadi, kabo n' Umba.

7. O jaka o yowaki 'Mbani, t' o yowudě tepěni Paia: oviya egombe tēkae o yowudě-ndi Māni, o yěni tēpi Māni.

8. Filip a vāki na ju, *na*, Upangiyi, levakidě hwě Hangwě, na yā ya hwēmīdě hwě.

9. Jisus a vāki na ju, *na*, Mba bēndi n' inyěni okava egombe eyaba, ndi hāngě o ha yowě 'Mba Filip? a di 'Mba yěněngo, a yēnite Hangwě; ndi e lě nde eāvě e vākě, *na*, Levakidě hwě Hangwě?

10. Oa kamakidě na Mbi nd' o Hangwě a jadi, na Hangwě tepě o Umb' 'i jadi? Mba kalaka ndaga jamě i kalakě na nāvě Umba

mětě: ndi Hangwě e jadi o Mba-mbi jadi, nd' a hakě behavu.

11. Kamakidi 'Mbani na Mbi nd' o Hangwě a jadi, Hangwě tepě o Umb' 'i jadi: oningě e diye nonaně, kamakidi 'Mbani o nyanga ea behavu.

12. Mbi vâki n' inyěni pâkwěpâkwě mětě, na, A kamakidě 'Mba, behavu beamě be hakě mâ-a ka ha tepě beâ; a ka hi *behavu* beněně wa na ekabe; 'kabojana Mb' 'alandi o Paia a jadi.

13. Yěhěpi eanyu e ka uwě na dina jamě, Mbi ka hi yâ, ovaně nd' o Hangwě a ka bendwě o Mwana a jadi.

14. Oningě oa uwani elombo te elombo na dina jamě, Mbi ka hi *yâ*.

15. ¶ Oningě o tândâki 'Mbani, tataki belekanako beamě:

16. Mbi ka kaliyandi Hangwě, na Mâ-a vě inyěni Unyěvidi upâkwě, nana u ka diyě n' inyěni egombe yěhěpi;

17. Mâ ndi Ilina ja pâkwěpâkwě: ja he tēkaně i ha yâlâkě o pahiyě, 'kabojana ya yěněkě Mâ, yâ ya 'wě tepě Mâ: ndi inyěni-o yowuděndi Mâni, 'kabojana a diyakandi n' inyěni, na Mâ-a ka diyandi o inyěni-o jadi.

18. Mba dike inyëni nyuwe: Mbi ka pândi inyëni-o jadi.

19. Egombe ehâlě, vâkâna he ya yěne pě 'Mba; ndi inyëni-o yěněkěndi 'Mbani: 'ka-bojana Mbi mihâ, inyëni-o ka diya tepěni mihâ.

20. O buhwa tēboně vâkâna o yowudě-ndini na Mbi nd' o Paia a jadi, inyëni-o Umb' 'i jadi, n' Umba tepě o inyëni-o jadi.

21. A di na belekanako beamě, na mâ-a tataka beâ, mâ nd' a tândâkě 'Mba: a tâ-ndâkě 'Mba, a ka tândwi na Paia, n' Umba-mbi ka tândi mâ, n' Umba-mba levidě mâ nyolo 'amě.

22. Judas, (hanga ja Iskariât,) a vâki na ju, na, Upangiyi, yeně e lě na ya na o ka levidi hwě nyolo 'âvě, nd' o levidě yâ he?

23. Jisus a yavwanakindi ka Mâ-a vâ na ju, na, Oningě moto a tândâkâ 'Mba, a ka tati ndaga jamě: Paia a ka tândi mâ, ho ka pândi o mâ-a jadi, na hwě-ho ka diyaka o mâ-a jadi.

24. A ha tândâkâ 'Mba, a tataka ndaga jamě: ndaga janyu i yokakě, i 'bě ijamě, ndi i ndi ja Hangwě e lomaki 'Mba.

25. Mbi kalaki n' inyëni belombo tēkabe, o 'Mb' 'i ngite n' inyëni o pwanja.

26. Ndi Unyěvidi, *u jadi, na*, Ilina Iya-inu, ja Hangwě i ka lomě na dina jamě, u ka yokuděndi inyěni belombo beěhěpi, na Mua ka pangak' inyěni o yongakidi belombo beěhěpi ibeamě be didi inyěni languwango.

27. Mbi diki jonga n' inyěni, Mbi věndi inyěni jonga jamě: Mba věkě inyěni pani ka he e věkě. Ebumulema eanyu e yěněke njuke, na eá e bangake.

28. O ma yokateni k' Umb' 'i ma vâ n' inyěni, *na*, Mb' 'alandi, n' Umba-mbi ka pâte inyěni-o jadi *epâkwě njo*. Oningě na o tândâkândi 'Mbani vâkâna o ka peyandini 'kabajana Mbi vâki, *na*, Mb' 'alandi o Hangwě a jadi: 'kabajana Paia a ndi boněně wa n' Umba.

29. Nandi Mbi languwendi inyěni, o yâ e ha hamete, nana o yâ e ka hamě, o ka kamakiděni.

30. Mba kale pě n' inyěni sasě okava tombango: 'kabajana upolo mua he těkaně u vakandi, u 'bě na elombo o Umb' 'i jadi.

31. Ovaně nd' o he e ka yowě na Mbi tândâki Hangwě; na pani ka Hangwě a věki 'Mba elekanako, nonaně tepě Umbi hakě. Umwakani, ho věngěměkeni okava.

KAPITA XV.

1. Umba ndi Ukâdi inua pákwěpákwě; Paia ndi momo a liyakě.

2. Paha yěhěpi e did' Umba-mbi jadi e ha lāngākā bebuma, a věngěkidi yā: *paha* yěhěpi e lāngākě bebuma, a bongwaki yā, ovaně nd' o yā e ka lāngě bebuma beité.

3. O ndini botano na ndaga jamě i di kalango n' inyěni.

4. Diyakani o 'Mb' 'i jadi, Umba tepě n' inyěni. Pani ka paha e ha yālākě o lāngā ebuma yā mětě, kabo e jadi o ukâdi: inyěni tepě oa yălěni, kabo oa diyani o Mba-mbi jadi.

5. Umba ndi ukâdi, inyěni *ndi* paha. A jadi o 'Mb' 'i jadi, Umba tepě o mâ-a jadi, mâ nd' a lāngākě bebuma beité: 'kabojana Mbi diye, oa yălěni o ha elombo ka 'lombo.

6. Oningě moto a diye o 'Mb' 'i jadi a uhu-dwěndi, na mâ-a vivilaniya pani ka paha; vākâna bato ba yolaki já na bâ-ba uhwa já o veyā, na já-ja dikiya.

7. Oningě oa diyani o 'Mb' 'i jadi, na ndaga jamě inyěni-o jadi, o ka uwateni eanyu e ka vahě, vākâna e ka hawěndi inyěni.

8. Paia a bendakwěndi na 'kae ya na o

lângâkândi bebuma beité, nonaně nd' inyě-ni-o ka diyěni beyokwedi beamě.

9. Pani ka Hangwě a di 'Mba tândângo, nonaně tepě Umb'-i didi inyěni tândângo: diyakani n' itândě jamě.

10. O ka diyandini n' itândě jamě oningě o tatakani belekanako beamě; pani k' Umba-mbi di tatango belekanako bea Paia, n' Umba-mbi jadi n' itândě jaju.

11. Mbi languwendi inyěni belombo tēkabe, na ovaně nd' o mbya 'amě e ka diyě n' inyěni, na *na* ovaně nd' o mbya 'anyu e ka londwě.

12. Elekanako 'amě nd' ekae, na, Tândânâkâni, pani k' Umba-mbi jadi inyěni tândângo.

13. Moto a 'bě n' itândě iněně wa pě na ekadi, ja moto a vě eměná 'aju o pěl' 'a mbweyi jaju.

14. O ndini mbweyi jamě, oningě o hakani eamě e sombiyak' inyěni yěhěpi.

15. Mba tube pě inyěni na bahayi oviya 'gombe tēkae; 'kabojana uhayi á yowakě ya upangiyi u hakě: ndi Mbi ndi inyěni tuba-ngo na mbweyi; 'kabojana Mbi te inyěni yowuděngo belombo beěhěpi ibeamě be di yokango o Paia a jadi.

16. O bi 'Mbani pânângo, nd' Umba ndi jadi inyëni pânângo, k' Umba-mba kenj' inyëni, na ovaně nd' inyëni o ka valě ka lângâ bebuma, na bebuma beanyu be ka bembakě: ovaně nd' o eanyu e ka uwě Hangwě na dina jamě, a ka vi yâ inyëni.

17. Mbi sombiyakëndi inyëni belombo tēkabe, na ovaně nd' inyëni-o ka tândâněni.

18. Oningě he ya bin' inyëni, oa dimba-kiyani na e binakite 'Mba oboho *e t' o bin'* inyëni.

19. O jakani ba he, te he e tândākāt' ibaju mētě; ndi he e binakandi inyëni 'kabojana o 'bēni ba he, ndi Mbi pânângo inyëni o he.

20. Yongakiděni ndaga 'amě e vâki n' inyëni, *na*, Uhayi a 'bě boněňě wa na upa-ngiyi inuaju. Oningě na ba haki 'Mba njuke, vâkâna ba ka hi tepě inyëni njuke: oningě na ba tataki ndaga jamě, vâkâna ba ka tati tepě ijanyu.

21. Ba ka handi inyëni belombo tēkabe beēhēpi o pěl' ea dina jamě, 'kabojana ba 'wě A lomaki 'Mba.

22. Mbi jakā Mbi pāye n' Umba-mba kala na bâ, te ba 'bě hango bobe: ndi okava ba 'bě pē na ponda ya bobe boabu.

23. A binakě 'Mba, a binaka tepě Paia.

24. Mbi jaka Mbi haye o bâ-ba jadi be-havu bea mot' upâkwě be ha hakidi, te ba 'bě hango bobe: ndi kya tēkaně ba te yě-něngo, na bâ-ba bini tepě hwě na Paia bě-hěpi.

25. Ndi *ekae e ndi* na ovaně nd' o ndaga e di lëndwěngo o Belekanako beabu, e ka hohonganě, na, Ba binakate 'Mba, tina e diye.

26. Nd' o Unyěvidi u ka pâyě, umuamě u ka lomě inyěni-o jadi oviya Hangwě a jadi, Ilina ja pâkwěpâkwě, i vakiyě o Hangwě a jadi, A ka pakuwand' o pěl' 'amě.

27. N' inyěni-o ka pakuwa tepěni, 'kabo-jana o diyendini n' Umba oviya jali.

KAPITA XVI.

1. Mbi languwendi inyěni belombo tē-kabe na o banga o kâbâni.

2. Ba ka věngiděndi inyěni o sinigâg: e! egombe e vakandi ya uěhěpi a weyakě inyěni, e ka piviyě na a hakandi ehavu ya Anyambě.

3. Ba ka handi inyěni belombo tēkabe, 'kabojana ba 'wě Hangwě, n' Umba.

4. Mbi langwakiyandi inyëni belombo tēkabe na ovanē nd' inyëni o ka yongidē, o iwēla i ka pâyē, na Mbi langwakiyate inyëni beâ. Mbu langwakiya 'nyëni belombo tēkabe o jali, 'kaborjana Mbi diyaki n' inyëni.

5. Ndi Mb' 'alandi o A lomaki 'Mba a jadi, ó uwaki 'Mbani n' umbâkâ, na, Oa 'la l' ove?

6. Ndi ebumulema eanyu e londi na ngēbē ti, 'kaborjana Mbi languwendi inyëni belombo tēkabe.

7. Tombekete ka yâ e di nonanē, Mbi langwakiyandi inyëni pâkwēpâkwē, na: E ndi bwam' o pēl' 'anyu n' Umba-mbi kēkē: 'kaborjana Mbi vale, Unyēvidi mua viye inyëni-o jadi; ndi oningē Mba vengēmē, vâkâna Mbi ka lomi mâ inyëni o jadi.

8. O Mu-a kâ pâyē a ka suli he o pēl' ea bobe na ea hohonganēgo, na ɛa yēkē:

9. Ya bobe, 'kaborjana bá kamakidē 'Mba;

10. Ya hohonganēgo, 'kaborjana Mb' 'alandi o Paia a jadi, n' inyëni oa yēne pi 'Mbani;

11. Ya yēkē, 'kaborjana upolo mua he tēkanē u yēkēkudwēndi.

12. Mbi na belombo beitē be kalakē n' inyëni, ndi oa yâli beâni kya tēkanē.

13. Nd' o Ilina ja pákwěpákwě i ka páyě, i ka tumbwanandi inyěni o pákwěpákwě yěhěpi; 'kabojana A kale o pěl' 'aju mětě: ndi eaju e ka yokě, *yá* nd' eaju e ka kalě: A ka leviděndi inyěni belombo be vakě.

14. A ka hekidi 'Mba: 'kabojana A ka pahiyandi ibeamě, na Mâ-a ka levakidě inyěni.

15. Belombo bea Hangwě be janidi be ndi beamě; tina těně nd' eamě ya vâ na, A ka nângândi ibeamě, na Mâ-a levidě inyěni.

16. Ukili kwěi vâkâna oa yěne pi 'Mbani: n' ukili kwěi, vâkâna o yěni pi 'Mbani; 'kabojana Mb' 'alandi o Hangwě a jadi.

17. Ja ndi ja beyokwedi beaju *beâkâ* ja vâ bâ mětě na bâ mětě, *na*, Ekae e lě nde eaju e ma vâ na hwě, *na*, Ukili kwěi, vâkâna oa yěne pi 'Mbani: n' ukili kwěi, vâkâna o yěni pi 'Mbani: na ikabojana Mb' 'alandi o Hangwě a jadi.

18. Ovaně nd' o bâ-ba vâki, *na*, Ekae e lě nde eaju e vâki, *na*, Ukili kwěi? Hoa yowě o pakuwa ka Mâ-a vâ.

19. Ka Jisus a yowě na ba vahakandi o uwa Mâ, ka Mâ-a vâ na bâ, *na*, O uwakandini inyi mětě n' inyi mětě, o pěl' 'amě e ma vâ, *na*, Ukili kwěi, vâkâna oa yěne pi

'Mbani: n' ukili kwëi, vâkâna o yëni pi
'Mbani?

20. Pâkwëpâkwë mëtë Mbi vâki n' inyëni, *na*, O ka yandini na inyëni-o hilevakani, ndi he e ka peyandi: o ka yënëndini ngëbë, ndi ngëbë 'anyu e ka 'luwandi mbya.

21. Mwajo, o mâ-a bëkë a bë n' ijadi, a yënëki ngëbë 'kabojana iwëla jaju i pândi: nd' o ma-a diyakë a ja mwana, a yongakidë pë mehiyo na mbya ya na moto a jawudwëndi o he.

22. O ndini kya tēkanë na ngëbë: ndi Mbi ka yëni pë inyëni, vâkâna ebumulema eanyu e ka yëni mbya; moto a nângâne inyëni mbya 'anyu.

23. O buhwa tēbonë oa uwi 'Mbani' elombo. Mbi vâki n' inyëni pâkwëpâkwë mëtë, *na*, Eanyu e ka uwë Hangwë na dina jamë, A ka vëndi inyëni.

24. O 'bëni uwango elombo o vyo na dina jamë: uwakani, vâkâna o pahiyendini, ovanë nd' o mbya 'anyu e ka londë.

25. Mbi kalakandi n' inyëni belombo tēkabe na mekanakâdi: ndi egombe e vakandi eamë e ka diyë Mbi kale pë n' inyëni na mekanakâdi, ndi Mbi ka levidëndi inyëni Hangwë o bwebwe.

26. O buhwa těboně ndi iboanyu bo ka uwě na dina jamě: Mba vâki n' inyěni na Mbi ka kaliyandi Hangwě o pěl' 'anyu:

27. Ikabojana Hangwě mâ mětě A tândâkândi inyěni, 'kabojana o tândâkândi 'Mbani, na-na o ndini kamiděngo na Mbi vakiyendi o Anyambě a jadi.

28. Mbi vakiyendi o Hangwě a jadi, k' Umba-mba, viya o he: Mbi dikaki pě he, na 'la o Hangwě a jadi.

29. Beyokwedi beaju be vâki na ju, *na*, Hilakěte, oa kali bwe, ou kala pě n' uka-nakâdi.

30. Ho yowuděndi nandi, na O yowuděndi belombo beěhěpi, o ibě tepě na mala na motó a uwake âvě: ekae nd' eahu e kama-kidě na o vakiyendi o Anyambě a jadi.

31. Jisus a yavwanaki, bâ, *na*, Nandi o t' inyěni-o kamiděni?

32. Umbwakiyateni, iwěla i vakandi na j' i pândi, ijanyu i ka vanjanganě, moto moto iboko viaju mětě, o ka dikandi 'Mbani dipâ: ndi Mbi 'bě dipâ, 'kabojana Hangwě a n' Umba.

33. Mbi langwakiyendi inyěni belombo těkabe, ovaně nd' inyěni o ka pahiyěni jonga o Umb'-i jadi. O ka diyandini na

betuniya o he, ndi diyaki bwamu: Mbi bali he.

KAPITA XVII.

1. Jisus a kalaki ndaga tēkadi ka Mâ-a betē mihâ maju oba, na, Paia, iwēla i pā-ndi; bendakē Mwan' 'âvē, ovanē nd' o Mwan' 'âvē a ka bendē tepē Âvē:

2. Pani ka Âvē-o di Mâ vengo ngudi e pangakiyē mehoni meēhēpi, na A vēkē tango 'âvē e di Mâ vengo emēnâ ya egombe yēhēpi.

3. Emēnâ ya egombe yēhēpi nd' ekaē, na ovanē nd' o bâ-ba ka yowē Âvē dipâ, Anyambē ya pâkwēpâkwē, na Jisus Kraist, uâvē a di lomango.

4. Mbi nd' Âvē bendengo o he: Mbi hânjâbidengo ehavu 'âvē e vēki 'Mba na Mbi hake.

5. Nandi Paia o bendakē 'Mba na nâvē mētē, n' ivenda t' ijamē i diyanaki na nâvē ovanē he e t' o diya.

6. Mbi ndi levidengo dina jâvē bato bâvē ba vēki 'Mba o he: ba diyakindi ibâvē, ka Âvē-oa vē 'Mba bâ; ba ndi tatango ndaga jâvē.

7. Nandi ba yowuděndi na belombo beě-
hěpi ibeávě be di 'Mba věngo, be ndi
ibeávě:

8. Ikabojana Mbi vi bâ ndaga jávě i
věki 'Mba; ba věhělidi já, ba tepě yowěngo
pâkwěpâkwě na Mbi vakiyendi o Ávě-o
jadi, ba tepě kamiděngo na Ávě nd' o
lomaki 'Mba.

9. Mbi kalakiyand' o pěl' 'abu: Mba
kalakiya o pěl' 'a he, ndi kabo o pěl' ibávě
ba di 'Mba věngo; 'kabojana ba ndi ibávě.

10. Ibamě běhěpi ba nd' ibávě, ibávě ba
ndi ibamě; Mbi bendakwi na bâ.

11. Mbi 'bě pě o he, nd' ekaba ba ngite o
he; Mbi vakandi o Ávě-o jadi. Paia ya
holi, tataka bâ, na dina jávě mětě, ibávě
ba věki 'Mba, ovaně nd' o bâ-ba ka diyě
pani ka mot' umbâkâ, pani ka hwě-ho *jadi*.

12. Mbi tataki bâ na dina jávě, o 'Mb'-i
diyaki na bâ o he: Mbi tatakindi ibávě ba
věki 'Mba, n' umbâkâ a 'bě nyangango kabo
mwana u' inyanga; na ovaně nd' o Ilé-
ndwě i ka hohanganě.

13. Nandi Mbi vakandi o Ávě-o jadi, Mbi
kalaki belombo těkabe o he, ovaně nd' o
bâ-ba ka pahiyě mbya 'amě londango o bâ-
ba jadi.

14. Mbi vĕngo bâ ndaga jâvĕ; na he e binaki bâ, 'kabojana ba ibĕ ba he, pani k' Umba-mbi ha 'bĕ ua he.

15. Mba kalakiya, na, Vĕngĕkidĕ bâ oviya he, ndi tataka bâ oviya bobe.

16. Ba ibĕ ba he, pani k' Umba-mbi ha 'be ua he.

17. Nyĕvĕkidĕ bâ na pâkwĕpâkwĕ 'âvĕ: Ndaga 'âvĕ e ndi pâkwĕpâkwĕ.

18. Pani ka 'vĕ o di 'Mba lomango o he, nonanĕ tepĕ Umba-mbi di bâ lomango o he.

19. O nyanga 'abu nd' eamĕ e nyĕvĕkidĕ nyolo 'amĕ mĕtĕ, ovanĕ nd' o bâ-ba ka nyĕvudwĕ na pâkwĕpâkwĕ.

20. Mba kalakiya kabo o pĕlĕ ea 'kaba pa; ndi Mbi kalakiyate na o pĕlĕ ea ba ka kamidi 'Mba na ndaga jabu:

21. Ovanĕ nd' o bâ bĕhĕpi ba ka diyĕ mot' umbâkâ, pani ka 'vĕ, Paia, o *didi* Umba-mbi jadi, n' Umba o Âvĕ-o jadi, na ba diyake mot' umbâkâ o hwĕ-ho jadi: ovanĕ nd' o he e ka kamidĕ na Âvĕ nd' o lomaki 'Mba.

22. Ivenda jâvĕ i vĕki 'Mba, Mbi vi bâ jâ; ovanĕ nd' o bâ-ba ka diyĕ mot' umbâkâ, pani ka hwĕ-ho jadi mot' umbâkâ;

23. Umba na bâ, Âvĕ n' Umba, ovanĕ

nd' o bâ-ba ka diyě hânjâbiyěngo mot' umbâ-kâ; ovaně nd' o he e ka yowě na Ávě nd' o lomaki 'Mba, na-na o tândâki bâ pani ka 'vě-o tândâkě 'Mba.

24. Paia, Mbi vahaki tepě na ibâvě ba věki 'Mba ekaba, ba diyake Umba-mbi jadi; ovaně nd' o bâ-ba ka yěně ivenda jamě ijâvě i vi 'Mba: 'kabojana o tândâkite 'Mba oviya he e t' o yalwě.

25. Paia-o ya hohonganěngo, he ea 'wě Ávě: ndi Mbi yowuděnd' ávě; ekaba ba yowěngo na Ávě nd' o lomaki 'Mba.

26. Mbi bâ pakuwango dina jâvě, n' Umba-mbi ka pakuwa tepě *jâ*: na ovaně nd' o itânde jâvě i tândânâkě 'Mba, i ka diyě o bâ-ba jadi, n' Umba tepě a bâ-ba jadi.

KAPITA XVIII.

1. O Jisus a běki ndaga těkadi kalango, ka Mâ-a puma na beyokwedi beaju na jabuwa o viho Kidrân, omě o diyaki na mwanga umuaju u ngakiyedi na beyokwedi beaju.

2. Judas t' i kândâkidě Mâ, a yowâkiděte iboko tě: 'kabojana Jisus a ma kěkě na beyokwedi beaju omě mběmbě.

3. Já ndi ja Judas ja viya omě, o mâ-a běkidi pahiyango njamba *ya bato* na benami oviya prist ja meolo na Farisi ba jadi, ba vaka na litwa, na meanyo, na bevolani.

4. Jisus a yowakiděte belombo beěhěpi be ka viyě o Mâ-a jadi, A kěkindi ka Mâ-a vâ na bâ, *na*, O butaka li nja ?

5. Ka bâ-ba yavwana Mâ, *na*, Jisus ja Nasarět. Jisus a vâki na bâ, *na*, Umba nd' *ekaně*. Judas e kândâkidě Mâ, a tēměki tepě na bâ.

6. O Mâ-a vâki na bâ, *na*, Umba nd' *ekaně*, ba timbaki na mbuhwa, ka bâ-ba kwa o he.

7. Já ndi jaju ja uwa pě bâ, *na*, A lě nj' uanyu a butakě? Ba vâki, *na*, Jisus ja Nasarět.

8. Jisus a yavwanaki bâ, *na*, Mbi ma languwate inyěni, *na*, Umba nd' *ekaně* : ndi oningě na o butakandi 'Mbani, hulwakiděni ekaba ba kěkě :

9. Ovaně nd' o ndaga 'aju e kalakidi e ka hohonganě, *na*, Ibâvě ba věki 'Mba, Mbu nyangě n' umbâkâ.

10. Saimân Pitě a diyaki n' ukwala mu' ibâtâ, a hodwaki muâ ka mâ-a bweya muâ

uhayi mua prist ya molo, na lenaka ditâ jaju iyomi. Dina ja uhayi tē ndi Malkâs.

11. Jâ ndi ja Jisus ja vâ na Pitě, *na*, Vamakě ukwala muâvě o egolo: Mbi mâtâke kâpi ya Paia e věki 'Mba?

12. Jâ ndi ja njamba na ngâwě na benami bea Jiu, ja nângâ Jisus ka bâ-ba kata Mâ.

13. Ka bâ-ba valana Mâ o bohoboho o Anas a jadi, ('kabojana a diyakindi ukiyo mua Keafas, e diyakidi prist ya molo upuma tēmune.)

14. Nandi Keafas mâ nd' a kelevakidi Jiu na, e ndi lukango na moto umbâkâ a waka o pěl' 'a bato.

15. ¶ Ka Saimân Pitě a vitě Jisus, na eyokwedi epâkwě. Eyokwedi tēnē e diyaki yowaněngo na prist ya molo, ka yâ-ya ngiya na Jisus o ikenga ja prist ya molo.

16. Ndi Pitě a tēmekindi obwebwe o ubi-yâ. Jâ ndi ja eyokwedi tē epâkwě e diyaki yowaněngo na prist ya molo, ya puma ka kala n' itângâ i tataki jâmbě, ka mâ-a ngidě Pitě.

17. Jâ ndi j' itângâ tē i tataki jâmbě ja vâ na Pitě, *na*, O 'bě tepě, ua beyokwedi bea momo tēkaně? A vâki, *na*, Mbi 'bě.

18. Bahayi na benami ba těměkind' omě ba diyaki ba haka veyā via mala; ('kaboja-na i diyakind' ivěvu :) na bâ-ba lâlâkâ: Pitě a těměki na bâ, a lâlâkâ veyā.

19. ¶ Prist ya molo e batakindi Jisus o pěl' 'a beyokwedi beaju, na iyokwanidi viaju.

20. Jisus a yavwanaki mâ, *na*, Mbi kalaki na he o bwebwe; Mbi yokwakiděte o sini-gâg na o těmpil, o Jiu ba pâkě mběmbě; Mbi 'bě vângo elombo ikutakuta.

21. O uwaka lě 'Mba nande? uwaka ba yokaki 'Mba-mbi kalaka, nyanga 'amě e vâki na bâ: umbwakiyate, ba yowuděte nyanga 'amě e vâkidi.

22. O Mâ-a běki nonaně kalango, enami yâkâ e diyaki těměngo, e bweyaki Jisus ibanjo, na, O yavwanaki prist ya molo nonaně?

23. Jisus a yavwanaki mâ, *na*, Oningě na Mbi ma kali bobē, pakwaka o pěl' 'a bobē: nd' oningě bwam' o bomaka lě 'Mba nande?

24. (Anas a diyaki a validě Mâ katwěngo o prist ya molo, Keafas, a jadi.)

25. Saimân Pitě a diyakite de a lâlâkidě nyolo 'aju. Ba vâki na ju, *na*, O 'bě ua

beyokwedi beaju? A hâhâkindi ka mâ-a vâ na, na, Mbi 'bë.

26. Uhayi umbâkâ mua prist ya molo, (a diyaki ijawe na mâ ua Pitë a lenaki ditâ,) a vâki na ju, na, Mbu yënëkë âvë na ju o mwanga?

27. Jâ ndi ja Pitë ja hâhâ pë: elëngiaha tepë kuba e kâkâlâkâ.

28. ¶ Jâ ndi jabu ja validë Jisus oviya Keafas a jadi nala o ndabo ya yëkë: e diyaki n' ubwa: bâ mëtë bu ngakiya o ndabo ya yëkë, obanga ba bevë nyolo; ovanë nd' o bâ-ba ka jë isango j' Ikunduwa.

29. Jâ ndi ja Pailat ja puma o bâ-ba jadi, ka mâ-a vâ na bâ, na, E lë nja ebuke eanyu e vanakë o pël' 'a moto tëkanë?

30. Ba yavwanaki mâ, na, A jaka a diye mot' ube, te hu vë âvë Mâ.

31. Jâ ndi ja Pailat ja vâ na bâ, na, Nângâki Mâni n' inyëni-oa yëkidi Mâni hohonganëngo na elekanako 'anyu. Jiu ba vâki na ju, na, E 'bë twëtwë na hwë-ho weyaka moto:

32. Ovanë nd' o ndaga ya Jisus e kala-kidi e ka hohonganë, eaju e vâkidi ilëvidë j' iwedo jaju i ka wë.

33. Jâ ndi ja Pailat ja ngiya pë o ndabo

'a yěķě a ndakiyi Jisus, ka mâ-a vâ na ju, *na*, O ndi Upolo mua Jiu ?

34. Jisus a yavwanaki mâ, *na*, Âvě mětě t' o vâķě elombo tēķae, ipě bato ģapâķwě ndi ba ma languwa âvě yâ o pěl' 'amě ?

35. Pailat â yavwanaki, *na*, Mbi tepě ua Jiu ? Etomba 'vě mětě na prist ja meolo ndi ba did' âvě 'mba vēngo. O lě hango nde ?

36. Jisus a yavwanakindi, *na*, Ipangiya jamě i 'bě ja he tēķaně: ipangiya jamě i ĵaka ja he tēķaně, te bahayi bamě ba ka *yanate* nana Mbi vēķwě Jiu: ndi ipangiya jamě i 'bě ja 'kava.

37. Ka Pailat a vâ na ju, *na*, Ndi, o nd' upolo ? Jisus a yavwanaki, *na*, O vâķi na Mbi nd' upolo. Ihuku tēķadi ndi ijamě i janakudwě, *na* tina tēķaně ndi eamě e vanakidi o he, nana Mbi pakwake pâķwě-pâķwě. Uěhěpi a di ua pâķwěpâķwě, a yokaki joyi jamě.

38. Pailat a vâķi na ju, *na*, Pâķwěpâķwě e lě nde ? O mâ-a bēķidi eķae vāngo ka mâ-a puma pě o Jiu ba ĵadi, ka mâ-a vâ na bâ, *na*, Mbi 'bě ģuwango njěnji o Mâ-a ĵadi *na vilolombo*.

39. Nd' inyěni-o ndini na mběmbâ na

mbi ka hulakidě inyěni umbâkâ o isango j' Ikunduwa: o ka bâbâteni mbi hulakid' inyěni Upolo mua Jiu ?

40. Jâ ndi jabu ja bēhēpi ja yama pē, na, Hanga ekaně, ndi Barabas. Nandi Barabas a diyaki upatuwi.

KAPITA XIX.

1. Jâ ndi ja Pailat ja nângâ Jisus ka mâ-a kukuwa *Mâ*.

2. Ka sâjě ja longa korowa ya mayâ, ka bâ-ba tēdě *yâ* o molo muaju, ka bâ-ba bâtidě *Mâ* ibâtâ iveyu,

3. Ba vâkâ, *na*, Mbolo, Upolo mua Jiu ! ba bomaki *Mâ* na makadu mabu.

4. Pailat a pumaki pē: ka mâ-a vâ na bâ, *na*, Umbwakiyateni, mbi vanindi *mâ* o inyěni-o jadi ovaně nd' inyěni-o ka yowěni na mbu duwa njěnji o *Mâ*-a jadi.

5. Jâ ndi ja Jisus ja puma, bātângo korowa ya mayâ na ibâtâ iveyu. Ka *Pailat* a vâ na bâ, *na*, Hilakěni momo tē !

6. O prist ja meolo na benami ba yěněki *Mâ*, ba yamaki na ngudi, na, Kâmâkidě *Mâ*, kâmâkidě *Mâ* o krâsi. Pailat a vâki

na bâ, *na*, Nângâki Mâni n' inyëni-oa kâ-midi *Mâni*: 'kabojana mbu duwa njënji o Mâ-a jadi.

7. Jiu ba yavwanaki mâ, *na*, Ho na elekanako, hohonganëngo na elekanako 'ahu A lukakand' o wa, 'kabojana a pangaki nyolo 'aju na A ndi Mwan' 'a Anyambë.

8. ¶ O Pailat a yokaki ndaga tënë, a bangaki pë wa;

9. A ngaki pë o ikenga ja yëkë, ka mâ-a vâ na Jisus, *na*, O viye lë na ove? Ndi Jisus au vëkë mâ iyavwana.

10. Jâ ndi ja Pailat ja vâ na ju, *na*, Oa kalaka n' umba e? oa 'wë na mbi na ipanga i kâmâkidë âvë o krâsi na ipanga tēpe i hulakidë âvë?

11. Jisus a yavwanaki mâ, *na*, O 'bë na ipanga i hakë 'Mba elombo, kabo ya vëwë âvë oviya oba: vâkâna a vëki âvë 'Mba, mâ ndi a di na bobë bonënë wa.

12. Ovanë nd' o Pailat a vahakind' o hulidë Mâ oviya 'gombe tēene: ndi Jiu ba yamaki, *na*, Oningë oa huludë momo tēkanë, vâkâna o 'bë mbweyi ya Sisa. Uëhëpi a pangakë mâ mētë upolo, a kalakand' o pël' 'a Sisa.

13. ¶ O Pailat a yokaki ndaga tënë, a

vanaki Jisus o bwebwe ka mâ-a diya o 'diya ya yêkê o iboko i tubakwê *na* Ndêki-ya-malalê, ndi na Hibru, *na*, Gabata.

14. I diyakindi ikenje j' isango j' Ikundu-wa, *na* egombê ya jomu na mawêla mabale; ka mâ-a vâ na Jiu, *na*, Hilakêteni Upolo muanyu!

15. Ndi ba yamaki *na* ngudi, *na*, Vêngë-kidê *Mâ*, vêngëkidê *Mâ*, kâmâkidê *Mâ* o krâsi. Pailat a vâki na bâ, *na*, Mbi kâmâ-kidê Upolo muanyu o krâsi? Prist ja meolo i yavwanaki, *na*, Ho 'bê n' upolo kabo Sisa.

16. Jâ ndi jaju ja vê *Mâ* o bâ-ba jadi, *na*, A kêkê ka kâmudwê o krâsi. Ka bâ-ba nângâ Jisus, *na* valanaka *Mâ*.

17. *Mâ* krâsi 'aju bapêngo A kêkê o iboko vi tubakwê, *na*, *Iboko* via mbombo, vi tubakwê *na* Hibru, *na*, Gâlgâta :

18. O bâ-ba kâmâkidê *Mâ*, *na* bapâkwê babale *na* *Mâ*, ekanê pêlê pâkâ, ekanê pêlê pâkâ, Jisus o hanganê.

19. ¶ Pailat a lëndêkindi ulëndâ ka mâ-a panidê mâ o krâsi. U diyaki lëndwêngo, *na*, JISUS JA NASARET, UPOLO MUA JIU.

20. Jâ ndi ja ulëndâ tēkamu mua langwê

na Jiu iitě: 'kabojana iboko via Jisus vi kâ-mâkudwě, vi diyaki piělě na mboka: u diyaki lëndwěngo na Hibu, na Griki, na Latin.

21. Jâ ndi ja prist ja meolo ja Jiu ja vâ na Pailat, na, O lënděke, Upolo mua Jiu; ndi kabo, na, ekaně a vâki, na, Umba ndi Upolo mua Jiu.

22. Pailat a yavwanaki, na, Eamě e lënděkidi e ndi lëndwěngo.

23. ¶ Jâ ndi ja sâjě ja nângâ ngâi jaju, o bâ-ba diyaki ba kâmidě Jisus, ka bâ-ba ha ngabo inai, yâně sâjě ngabo; na koto 'aju tepě: koto yu diyaka n' ulânjâ, e diyaki bolongakwě oviya oba nala o he.

24. Ba vâki bâ mětě na bâ mětě, na, Hó nyaki yâni, ndi ho hōdwaki yâni kwai, ya a ka nângě yâ: ovaně nd' o Ilëndwě i ka hohonganě i vâkě, na, Ba kabaki ibâtâ jamě, bâ mětě na bâ mětě na bâ-ba hōdwaka kwai o pěl' 'a koto 'amě. Ovaně nd' o sâjě ba haki belombo tēkabe.

25. ¶ Omě o diyaki de baka na krâsi ya Jisus, nyangwě, na iluku ja nyangwě, Meri mwad' 'a Klopas, na Meri Magdalini.

26. O Jisus a yěněkidi nyangwě na eyo-kwedi tē eaju e ma tândâka, tēměngo, a

vâki na nyangwě, *na*, Mwajo, hilakě mwan'âvě!

27. Já ndi jaju ja vâ na eyokwedi tě, *na*, Hilakě nyângwě! Oviya iwěla tēdině ka eyokwedi tēeně ya valana mâ o mbok'aju mětě.

28. ¶ Jisus a yowakiděte, ekae tombango, na belombo beěhěpi be hânjâbiyendi, na ovaně nd' o llëndwě i ka hohonganě, a vâki, *na*, Mbi yokakandi evělě.

29. Omě o diyaki na eva tēdwěngo, ti na vinigar: ka bā-ba londě nyândā na vinigar, ka bā-ba kanidě *yā* o hisāp, ka bā-ba vamě *yā* o udumbu muaju.

30. Nandi o Jisus a běki nāngāngo vini-gar, a vâki, *na*, E hânjâbiyendi: A ka bala-kidě molo muaju, ka Mā-a vě ilina.

31. Jiu ba hâhâlâkidi Pailat, 'kabojana bo diyaki buhwa bo' ikenjě, na nyolo i diyake pě o krās o buhwa bo' Iyâjâ, ('kabo-jana buhwa tě bo' Iyâjâ boně bo diyaki buhwa boněně,) na ba bukakwě beko, na bā-ba ka věngěkudwě.

32. Já ndi ja sājě ja pâ, ka bā-ba buka beko bea ua bohoboho, n' upâkwě a kāmâ-kudwě na ju.

33. Nd' o bā-ba pâkidi o Jisus a jadi, na

bâ na yěněki Mâ na a wendi pâni bu buka-
ka pě Mâ beko:

34. Ndi sâjě pâkâ e sokaki Mâ o mba-
nja 'aju n' ikângâ, ka omě oa hungana o
puma makiya na miba.

35. A yěněki *yâ*, a pakwakindi, n' upako
muaju u mbambaye: a yowěngo na a vâki
mbambaye, ovaně nd' inyěni-o ka kamiděni.

36. Belombo tēkabe be hamakindi, na
ovaně nd' o Ilěndwě i ka timwě, *na*, Evehe
'aju yâ bukwě.

37. Tepě ilěndwě ipâkwě i vâki, *na*, Ba
ka 'mbuwi Mâ, uabu a sokakidi.

38. ¶ Ekae pa, Josěf ja Arimatia, (a
diyaki eyokwedi ya Jisus, ikutakuta na
jângâ ja Jiu,) a hâhâlâkidi Pailat na a
věngěkidě ekengo ya Jisus: ka Pailat a
bâbâ. A vakindi ka mâ-a nângâ ekengo
ya Jisus.

39. Ka Nikodimâs a viya tepě omě, (a
takidi o viya o Jisus a jadi na bulu,) a
vanakidi mâr na alo hâbwěngo *be pehwaka*
ka kama ya mawěla.

40. Jâ ndi jabu ja nângâ ekengo 'a Jisus,
ka bâ-ba dinga yâ na menamba mea ivěla
na meyâmbâ ka salě ea Jiu e ma tonga-
naka.

41. Nandi o iboko viaju vi kámâkudwě o krâsi, o diyaki na mwanga; mwanga tě u diyaki na malonga ma kya, ma t' o nangu-dwě moto.

42. Omě nd' o bâ-ba nangakidě Jisus o pěl' ikenjě ja Jiu; 'kabojana malonga ma diyaki piělě.

KAPITA XX.

1. Meri Magdalini a vakindi o *buhwa boa* wiki boa bohoboho, n' ubwa n' ubwa, n' ivititi viěhěpi, o malonga, ka mâ-a yěně ilale věngudwěngo o malonga.

2. Já ndi jaju ja vala membila, nala o Saimân Pitě a jadi, na eyokwedi epâkwě ya Jisus e ma tândâkâ, ka mâ-a vâ na bâ, *na*, Ba nângindi Upangiyi oviya malonga, ndi hoa 'wě o bâ-ba nangidě Mâ.

3. Ovaně Pitě na eyokwedi tě epâkwě ba pumakindi, ka bâ-ba pâ o malonga.

4. Ba kěki membila njamba: ka eyokwedi tě epâkwě ya kebě Pitě, ka mâ-a pâ o malonga na bohoboho.

5. A balamakindi, a *'mbwakiya utema*, ka mâ-a yěně menamba mea ivěla bya; ndi au ngakiya.

6. Já ndi ja Saimân Pitě ja viya, a vita-kě mâ, ka mâ-a ngiya o malonga, a umbwakiya menamba mea ivěla bya;

7. Na 'vėlěhě tě e diyakidi o molo muaju, yu diyaka o menamba mea ivěla me jadi, ndi e diyakindi iboko n' iviaju mětě dingwěngo.

8. Já ndi ja eyokwedi tě epâkwě e vakidi o malonga na bohoboho, ya ngiya, ka mâ-a yěně, ka mâ-a kamidě.

9. Ikabojana ba diyakite ba t' o yowě Ilě-ndwě, na A ka pumbuwi pě oviya bawewe.

10. Já ndi ja beyokwedi ja valanidě pě o 'abu.

11. ¶ Ndi Meri a těměkind' o malonga o bwěbwě, a yaka: o mâ-a diyakidi a yaka, a balamakindi, a ka 'mbwakiya o malonga.

12. A yěněkindi enjěl ibale diyango, n' ibâtâ itano, yâkâ o molo, epâkwě o beko, o ekengo ya Jisus e nangakiyedi.

13. Ka bâ-ba vâ na ju, na, Mwajo, o yaka lě nde? A vâki na bâ, na, Ikabojana ba nângindi Upangiyi muamě, n' umbam-ba 'wě o bâ-ba nangidě Mâ.

14. O mâ-a diyaki nonaně vângo, a timbakiděndi iběyi, ka mâ-a yěně Jisus de, ndi au yowakě na a Jisus.

15. Jisus a vâki na ju, na, Mwajo, o yaka

lě nde? o butaka lě nja? A piviyaki Mâ na ipě A ndi utati mua mwanga, a vâki na ju, *na*, Pa, ipě âvě nd' o bapidě Mâ okava, langwakiya 'mba iboko viâvě vi ma nangidě Mâ, mbi vale ka nângâ Mâ.

16. Jisus a vâki na ju, *na*, Meri. A ulwaki ndi ka mâ-a vâ na ju, *na*, Raboni; yeně ndi, *na*, Uyokwidi.

17. Jisus a vâki na ju, *na*, O kupanakě 'Mba: 'kabojana Mbi ha betete o Paia a jadi; ndi kěkě o banabina ba jadi, o ka vâki na bâ, *na*, Mbi betakandi o Paia a jadi na Hângw' 'anyu, o Anyambě 'amě na Anyambě 'anyu a jadi.

18. Meri Magdelini a vakindi ka mâ a languwa beyokwedi na a ma yěněndi Upangi, *na* A kalaki na ju belombo těkabe.

19. ¶ Na kolo ya *buhwa* tě boa bohoboho boa wiki, o mambě ma diyaki dibwědibwě o iboko via beyokwedi vi diyaki yolăněngo na jângâ ja Jiu, Jisus a vakindi, ka Mâ-a tēmě o hangan' 'abu, ka Mâ-a vâ na bâ, *na*, Jonga n' inyěni.

20. O Mâ-a diyaki nonaně vângo, a levakidi bâ makadu *maju* na mbanja 'aju. Já ndi ja beyokwedi ja yěně mbya, o bâ-ba yěněkidi Upangi.

21. Já ndi ja Jisus ja vâ pě na bâ, *na*, onga n' inyěni : panika Hangwě a di 'Mba andiděngo, nonaně tepě Umba-mbi lomaki nyěni.

22. O Mâ-a běki nonaně vângo, A vegu-akindi o bà-ba jadi, ka Mâ-a vâ na bâ, *na*, 'ahakiyani Ilina Iyamu.

23. Uanyu a ka věngidě mabe uěhěpi, ma ka věngudwi mâ ; *na* uanyu a ka himbidě mabe uěhěpi, ma ka himbudwěndi.

24. ¶ Ndi, umbâkâ ua jomu na babale, Tâmas, a tubakwě na Didimâs, au diyaka na bâ, o Jisus a pâkidi.

25. Beyokwědi bepâkwě be vâki na ju, *na*, Ho yěninidi Upangiyi. Ndi a vâki na bâ, *na*, Kabo mba yěně makadu maju na mabeko ma hângâ, n' umba-mba ngidě upenjo nuamě o mabeko ma hângâ, n' umba-mba ngidě ikadu jamě o mbanja 'aju, mba kamidě.

26. ¶ Hwi logwambi tombango, beyokwědi beaju be lataki pě, Tâmas a diyaki na bâ : *jâ ndi ja* Jisus ja pâ, mambě ma liyaki dibwěngo, ka Mâ-a těmě o hangan' abu, A vâki na bâ, *na*, Jonga *i diyake* n' nyěni.

27. Já ndi jaju ja vâ na Tâmas, *na*, Ha-

mbakidě upenjo muâvě okava na nâvě oa hilě makadu mamě; na nâvě oa hambidě ikadu jâvě wa ngidě *jâ* o mbanja 'me; o diyake pě o diye n' ikamidě, ndi kama-kidě.

28. Tâmas a yavwanaki ka mâ-a vâ na Mâ, *na*, Upangiyi muamě, na Anyambě 'amě.

29. Jisus a vâki na ju, *na*, Tâmas, o kamiděndi 'kabajana o yěni 'Mba: ibâtâ na ba kamakidě, ba yěne.

30. ¶ Tepě Jisus a hakindi ndembo iitě ipâkwě o pwanja ya beyokwedi beaju, i ha 'bě lëndwěngo o ejanganangobo tēkae.

31. Ndi ekabe be ndi lëndwěngó na ovaně nd' inyěni-o ka kamiděni na Jisus a ndi Kraist Mwana ua Anyambě: nana o inyěni-o kamakidě o ka pahiyandini eměná na dina jaju.

KAPITA XXI.

1. Jisus a levakidi pě beyokwedi nyolo, belombo tēkabe tombango, o manga ma Tiberiâs: kakana nd' o Mâ-a levakidě *nyolo*.

2. Omě o diyaki lataniyango Saimân Pitě, na Tâmas e tubakwě na Didimâs, na Nata-

ěšl ya Kena o Galili, na *bana* ba Šěbědi,
a beyokwedi beaju bepâkwě bebale.

3. Saimân a vâki na bâ, *na*, Mb' 'alandi o
ombo. Ba vâki na ju, *na*, Ho 'alandi tepě
a nâvě. Ka bâ-ba puma na hunganaka o
ama o elende; bu weyaka elombo ka 'lo-
bo na bulu těboně.

4. O ubwa u diyaki mua pâ, Jisus a tě-
ěkindi o uhěke; ndi beyokwedi bu yowa-
ě pě na A ndi Jisus.

5. Jisus a vâki na bâ, *na*, Bana, o iběni
a elombo e jakwě? Ba yavwanaki Mâ,
a, Nyawě.

6. Ka Mâ-a vâ na bâ, *na*, Uhwakani
âba o pělě ya 'lende eyomi, vâkâna o du-
indini. O bâ-ba diyaki uhwango, bu yâ-
kě o dula elâba na bwinge boa bejaka.

7. Jâ ndi ja eyokwedi ya Jisus e ma
ndâkâ, ja vâ na Pitě, *na*, A ndi Upangiyi.
andi o Saimân Pitě a yokakidi na a ndi
pangiyi, a tingakindi koto 'aju y' uhombo,
'kabojana a diyakindi uhamba,) ka mâ-a
wa nyolo 'aju o manga.

8. Beyokwedi bepâkwě be vakindi na ele-
de ehalě, ('kabojana bu diyaka yaviděngo
a he, ndi e ma diyakate masěi ma kama ja
ambanâ ibale,) ba dulaka elâba na bejaka.

9. O bá-ba diyaki ba hubě o he, ba yěně-ki veyá via mala, na bejaka omě bya, na pěmbě.

10. Jisus a vâki na bá, na, Vanakani bea bejaka beanyu be ma weya kya.

11. Saimân Pitě a kěkindi, ka má-a dula elába o he, londango ti na bejaka beněně, kama páká na mabo matano na bejaka belalo: ndi elába yu nyakiya, tombekete ka beá be diyaki beité.

12. Jisus a vâki na bá, na, Okani, ka jakeni. Eyokwedi na ya yâká, é jakiyedi o uwa Má, na, Ávě lě a nja? bá yowěngo na A ndi Upangiyi.

13. Já ndi ja Jisus ja pá, ka Má-a nânga pěmbě, ka Má-a vě bá tepě na bejaka.

14. Njo y' ilalo nd' ekaně ya Jisus e leva-kidě nyolo 'aju o beyokwedi beaju be jadi, o Má-a diyakidi pumbuwango oviya bawewe.

15. ¶ O bá-ba maakidě ija, Jisus a vâki na Saimân Pitě, na, Saimân mwan' 'a Jonas, o tândâki 'Mba wa na ekaba? A vâki na ju, na, E, Upangiyi: o yowuděte na mbi tá-ndâkând' Ávě. A vâki na ju, na, Bombaka bana bamě ba medambě.

16. A vâki pě na ju njo y' ibalě, na, Saimân, mwan' 'a Jonas o tândâki 'Mba? A

vâki na ju, *na*, E, Upangiyi: o te yowěngo na mbi tândâkând' Ávě. Jisus a vâki na ju, *na*, Jakidě medâmbě meamě. •

17. A vâki na ju njo y' ilalo, *na*, Saimân, *muan'* 'a Jonas, o tândâkâte 'Mba? Pitě a yěněki ngěbě, 'kabejana a vâki na ju njo y' ilalo, *na*, O tândâkâte 'Mba? Ka mâ-a vâ na ju, *na*, Upangiyi, o yowuděndi belombo beehěpi; oa dimbakiya na mbi tândâkând' Ávě. Jisus a vâki na ju, *na*, Bombaka medâmbě meamě.

18. Mbi vâki na nâvě pâkwěpâkwě mětě, *na*, o 'Ávě o diyakidi iwanja o ma tingakandi utumba o nyolo 'âvě, na navě o tamwaka o loboko lâvě lo vahakidi; ndi o âvě o ka wě o ka hambidi makađu mâvě n' upâkwě a ka bătiděnd' âvě, na mâ-a ka bapakě âvě, o iboko viâvě vi ka diyě o vahe.

19. A kalakind' *ekae*, ilevidě ja jângâ j' iwedo jaju i ka bendaně Anyambě. O Mâ-a diyaki nonaně vângo A vâki na ju, *na*, Vitakě 'Mba.

20. Já ndi ja Pitě ja 'luwa, ka mâ-a yěně eyokwedi tě ya Jisus a ma tândâkâ, e vitakě; (e diyakidi hikamiyango o ngonga 'aju o huma ya kolo, a vâki, *na*, Upangiyi, a lě a nja a kândâkě Ávě?)

21. Pitě a yěněki mǎ, ka mǎ-a vǎ na Jisus, *na*, Upangiyi, momo těkaně a *ka ha* lě na ?

22. Jisus a vǎki na ju, *na*, Oningě 'Mba vaha na a yěngěkidě kabo Mba pǎ, *eně* e lě nde o ávě o jadi ? Vitakěte ávě 'Mba.

23. Jǎ ndi ja ndaga těkadi ja vala o banabina ba jadi, na eyokwedi tēeně ya we: ndi Jisus au vǎkǎ na ju, *na*, A we; kabo, *na*, Oningě Mba vaha na a yěngěkidě kabo Mba pǎ, *eně* e lě nde o ávě o jadi.

24. Ekae ndi eyokwedi tě e pakwaki o pěl' 'a belombo těkabe, na e lěnděki belombo těkabe: na hwě-ho yowěngo na upako muaju u ndi mbambaye.

25. O tepě na belombo bepǎkwě beité, bea Jisus be hakidi, be jadi, oningě bea lěndwě beěhěpi, mbi piviyaki na he yǎ mětě, ya yǎlě o huka bejanganangobo be ka lěndwě. Aměn.

15
Bengal, 1881.
BEHADI BEA METODU.

**THE
ACTS OF THE APOSTLES,**

TRANSLATED INTO THE BENGAL LANGUAGE

**BY THE LATE REV. JAMES L. MACKEY, REVISED AND WITH THE
OTHER GOSPELS HARMONIZED BY THE REV. R. H. NASSAU.**

GABOON AND CORISCO MISSION, WEST AFRICA.

**NEW YORK:
AMERICAN BIBLE SOCIETY,
INSTITUTED IN THE YEAR MDCCCLVI.**

1881.

[Benga, 18mo.]

BEHADI BEA METODU.

KAPITA I.

1. Ejanganangobo ya bohoboho eamě e lënděkiyedi ávě, Teofilo, e diyakindi ya bea Jisus be yalakidě iha n' iyokudě beě-hěpi.

2. Kwanga nala buhwa boaju bo nânga-kudwě oba, na mbuhěmbuhě ka Mâ-a sombiya metodu meaju me pânâkidi n' Ilina Iyamu :

3. Ibaju ba levakidě nyolo 'aju mihâ o betuniya beaju be běki tombango, na ndembo i ha 'bě na ngudi ya bomwě penda, a yěněněki na bâ mabo ma hwi manai, a kalaka o pělě 'a belombo bea ipangiya ja Anyambě :

4. O Mâ-a diyaki lataniyango na bá, a langwakiyi bá na bá takete o vëngëmě o Jërusalěmi, ndi ba vengake mohano mua Paia, umuanyu u di yokango n' Umba.

5. Ikabojana Jân a ma bapitaisaki mětě na miba, ndi hwi ja yaviye nd' o bapitaiswěni n' Ilina Iyamu.

6. O bâ-ba lataniyedi ka bâ-ba uwa Mâ, na, Paia, o ka timbê tepê Isreël ipangiya o egombe tēkae?

7. Ka Mâ-a vâ na bâ, na, E ibê 'anyu y' iyowê ja begombe, tombe bepedi bea Paia be di vamengo o ngud' 'aju mêtê.

8. Ndi o ka dūwandi ngudi oningê Ilina Iyamu i puggingê inyēni; vâkâna wa bēndini tali jamê o Jērusalēmi na Judia yēhēpi, na Samaria, kwanga nala o ihuku ja he ja yavidengo.

9. O Mâ-a kali belombo tē ekabe, ba umbwakiyate, ka evindi ya nângânâ bâ Mâ o mihâ mabu.

10. O bâ-ba diyakidi ba umbwakiya oba dongodongo, o Mâ-a diyakidi a betaka, ba hilête bato babale ba di tēmengo baka na bâ n' ibâtâ itano.

11. Ba vâki tepê, na, Inyi bamo ba Galili, e lē nde eanyu e di tēmengo o 'mbwakiyani oba? Jisus tē i nângânudwê inyēni na 'la o Hēvên ekadi, A ka viyate nyanga tē eanyu e yēnêkê Mâ-a kēkê o Hēvên ekanê.

12. Ka bâ-ba timba o Jērusalēm oviya ukodi u tubakwê, na, Âlivêt, u didi oviya o Jērusalēm ekëndâ ya buhwa bo' Iyâjâ.

13. O bâ-ba pâkidi ka bâ-ba beta o ilika via oba, ba diyakindi ovoně Pitě, na Jems, na Jân, na Andru, Filipo, na Tâmas, Batalomiu, na Matiu, Jems ja Alfios, na Saimân Silote, na Juda *mwa' nyangwě* na Jems.

14. Ekaba bēhēpi ba diyakite ikando j' ikaliya n' ihâhâlidě jâkâ, na bajo, na Meri nyangwě 'a Jisus, na bana ba nyangwě.

15. ¶ Jâ hwi tēdině ndi ja Pitě i tēmēkidi o hanganě ya beyokwedi, na, (tango 'a mina yēhēpi ta e diyakindi ka kama na mabo mabale),

16. Bamo na banabina, ndaga tē y' Ilina Iyamu e kalakidi ovyo n' udumbu mua Devidi o pělě 'a Judas a tumbwanaki ba nāngâki Jisus, ekaně e diyakite na e ka hohonganandi.

17. Ikabojana a langakudwěndi o tango 'ahu, na mâ-a diyaki tepě a duwa mběi o 'havu tē ya minise ekae.

18. Nandi momo tē ekaně a hambakindi ehiki na mahomano ma bobe; o mâ-a kwi molo na he, ka mâ-a tumbiya na hanganě, ka miya meaju mea pumě.

19. E diyakite yowaněngo na badiya ba Jērusalēmi bēhēpi, ovaně nd' o ehiki tēně

e ma tubakwě na emi 'abu mětě, *na*, Asě-
ldama, yeně e ndi, *na*, Ehiki ya makiya.

20. Ikabojana e lëndwěngo o ejangana-
ngobo ya Psamu, Ediya 'aju e diyake ebo-
bolo, e diyake na moto: na, Ipangiya jaju
i nāngākwě na mot' upākwě.

21. Ovaně vākāna bamo tē ba jopi na
hwě ulingo mua Upangiyi Jisus u jindi na
hwě ekaba,

22. Oviya baptisma ya Jān, nala o bu-
hwa tē iboaju bo nāngānākudwě hwě,
umbākā a 'lwakudwě tali na hwě y' ipu-
mbuwa jaju.

23. Ka bâ-ba pānā babale, Josěf i tuba-
kwě na Barsabas, a ma tubakwě na Justus,
na Mataias.

24. Ka bâ-ba kaliya, na, Āvē Jēhova,
a di yowěngo melema mea *bato* bēhēpi,
levakidě o babale ekaba uāvē a di pānā-
ngo,

25. Na ovaně nd' o mā-a ka nāngě mbēi
ya ehavu tē ya minise n' utodu ya Judas e
kwaki na bobe ekae, na ovaně nd' o mā-a
ka 'lē o iboko viaju mětě.

26. Ka bâ-ba vē kwai jabu, ka kwai ya
kwa na Mataias; ka mā-a langwě o tango
ya jomu ja metodu n' utodu 'mbākā.

KAPITA II.

1. O buhwa boa Pěntikost bo pādi, ba běhěpi ba diyakindi o ikando iboko viākā.

2. O mbenjě pākā joyi i viyendi oba, o na ja ngombe e vungaka, ka jâ-ja yambiya ndabo 'abu e diyakidi.

3. Ka bemi bea paha omě ona veyā, bea puniya o bâ-ba jadi, ka viā via koka-niya bâ.

4. Bâ běhěpi ba bě londango n' Ilina Iyamu, ba ka kalaka na bemi bepākwě, ka Ilina i vėki bâ ukalo.

5. Na Jiu i diyaki tepě, i diyaka o Jěrusalěmi, bamo bayamu, ba betomba beěhěpi be did' o he.

6. O ekae e yokanidi, ka ebimba ya yolaně ba kubakindi, 'kabojana moto uěhěpi a yokaki bâ-ba kalaka etomb' 'aju mětě.

7. Ba mamakindi umamo uněně ba ka uwanaka, na, Yěněkěteni ba 'bě ba kalakě ekaba běhěpi, ba Galili?

8. Ndi e lě nde eahu e yokakě moto uěhěpi na emi 'ahu mětě, eahu e janakudwě?

9. Ba Partia, na ba Media, na ba Ilim, na badiya ba Měsopotamia, na o Judea, na Kapadosia, na o Pontos, na Asia,

10. O Fligia, na Pamfilia, o Ijipt, na pělě ya Libia o pělě 'a Sireni, na bangi ba Roma, Jiu, na ba ulwakě.

11. Ba Kriti, na ba Arebia. ho yokaki bâ ba kalaka belombo bea Anyambě be mama-nakwě na bemi beahu mětě.

12. Ba ka mamaka ba ka butaka bâ mětě, na bâ mětě, na, Ekae e lě na ě?

13. Bapâkwě ba ma kyebaka bâ, na, Bamo tě ekaba ba vulango ivě j' usasa.

14. ¶ Ndi Pitě a tēměkindi na jomu n' umbâkâ, ka mâ-a betě joyi, ka mâ-a vâ na bâ, na, Inyi bamo ba Judia, n' inyi ba diya-kě o Jěrusalēm, yowakěni ekae, n' inyěni wa yoka tepě ni ndaga jamě.

15. Ikabojana ekaba ba 'bě peyango k' inyěni o yebakiyěni, 'kabojana buhwa bo ngite mawěla ibuwa.

16. Ndi ekae, ndi ya usâki Joël e kala-kidi, na,

17. Anyambě a vâki, na, E ka diyandi o hwi ja madikanido, mbi ka hovandi bato bēhēpi Ilina jamě: na bana banyu ba bamo na ba bajo ba ka sâkâkâ, na mawanja manyu ma ka yěnekě behihila, na batodu banyu ba ka yâtâkâ ndâtâ:

18. Mbi ka hoviděndi bahayi bamě ba

bamo na ba bajo, Ilina jamě o hwi tědině;
na bâ-ba ka sâkâkâ:

19. Mbi ka leviděndi belombo be mama-
nakwě o hěvěn oba, na ndembo o he mětě;
makiya, na vey, na bengumbi bea itutu:

20. Joba i ka uluwandi ivititi, na ngâ-
ndě makiya, na buhwa tě boa Anyambě
boněně boa yowaněngo na ta ka pâ.

21. E ka diyi na moto ka moto uěhě-
pi a ka tubě dina ja Jěhova, t' a ka
yongě.

22. Inyi bamo ba Isreěl, yokaki ndaga
tě ekadi; Jisus ya Nasarět, momo ua
Anyambě u yějěněkiyedi inyěni na me-
goma, na belombo be mamanakwě, na nde-
mbo ja Anyambě i haki na Mâ o ha-
nganě 'anyu, te ka inyi mětě o di teni yo-
wěngo:

23. Mâ uanyu a bweyakudwě, n' upango
mua Anyambě u diyakite ovyo leniyango n'
iyowě jaju ja bea bohoboho, k' inyěni wa
nângâni, na kâmâkidi o krâs na benâ bebe
na weyakani:

24. Ua Anyambě a pumbudě, o Mâ-a
bědi mehiyo mea iwedo unjuwango; 'kabo-
jana yu diyaka na ngudi ya diya na i hu-
kake Mâ.

25. Ikabojana Devidi a kalakate o pël' 'aju, *na*, Mbi takite o yënë Jéhova o boho boamě; 'kabojana a ndi o enâ 'amě eyomi, na banga mba ninganě.

26. Ovaně nd' o ulema muamě u peyaki, na emi 'amě e ka yënëkě mbya; tepě mehoni meamě me ka yâjâ n' ipitě:

27. Ikabojana wa dika ilina jamě o hěl, na nâvě wa huludě tepě Uâvě ua holi a bâkâ.

28. O 'inba yowuděngo njea ja eměná; o ka londi 'mba na mbya o pwanja 'âvě.

29. Bamo *na* banabina, mbi t' o kala n' inyěni o pělě 'a hangwě 'ahu Devid, na a wendi, na mâ-a tongudwě tepě, na malonga maju ma tepě na hwě na boa buhwa tē ekabo.

30. O mâ-a diyaki usâki, yowěngo na Anyambě a kanakiyi mâ, na ebuma ya ukuba muaju o pělě ya nyolo, ndi eaju e ka pumě Kraist ka diya o eka 'aju.

31. O mâ-a tidi o yënë ekae, ka mâ-a kala o pělě ya ipumbuwa ja Kraist, na Ilina jaju ju dikakwě o hěl, na mehoni meaju meu bâkâ.

32. Jisus tē ekadi ndi ja Anyambě i pumbudě, yâ ndi eahu e di tali.

33. O Mâ-a betudwě na enâ ya Anyambě eyomi na Mâ-a 'la ka duwa oviya Hangwě a jadi panga 'a Ilina Iyamu, ka Mâ-a hubě eanyu e yěněkě, na eanyu e yokakě ekae.

34. Ikabojana Devid a 'bě betango oba, ndi mâ mětě a vâki, *na*, Jěhova a vâki n' Upangiyi muamě, *na*, Diyaka o 'nâ eamě eyomi,

35. Kabo Mba ta panga ndoba jâvě ebo-nga 'vě e pitakiyě.

36. Ndabo ya Isreěl e yowakě pâkwě-pâkwě na Anyambě a pangi Jisus tě, eanyu e kâmâkidě o krás, ekaně, Upangiyi na Kraist.

37. ¶ Nd' o bâ-ba yokidi ekabe, ba pěhě-kiyendi ulema muabu, ka bâ-ba vâ na Pitě na metodu mepâkwě, *na*, Bamo na banabina ho ka ha lě na ě?

38. Jâ ndi ja Pitě ja vâ na bâ, *na*, Ulwakani, na inyi běhěpi na baptaiswěni na dina ja Jisus Kraist, o ivěngidě ja bobe, n' inyěni wa pahiyani ivěwě ja Ilina Iyamu.

39. Ikabojana mohano u ndi umuanyu na bana banyu, na ba di yaviděngo běhěpi, tango ya Jěhova Anyambě 'ahu e ka ndiyě.

40. Na ndaga ipâkwě iitě nangudi ijaju i kalakiyi bâ bokelevakidě, *na*, Yongaki nyo-lo janyu o igona tě ibe ekadi.

41. ¶ Jâ ndi ja ba pahakiyi ndaga jaju na mbya, ja baptaiswě; buhwa tě bo badakudwě bâ, ka tâjen ja malina ilalo.

42. Ba lilimakiděndi iyokwanidi via metodu n' ulato, n' ipěhě ja pěmbě, na makaliya.

43. Ka jângâ ja bweya ilina jěhěpi; na belombo be mamanakwě na ndembo iitě ja metodu i hakidi.

44. Ba kamakidě běhěpi ba diyaki ta, na bâ-ba diyaki tepě belombo beěhěpi ta;

45. Ka bâ-ba hamba behiki beabu na hika 'abu, ka bâ-ba kaba na moto uěhěpi, nyanga ya moto uěhěpi e ma nyamaka.

46. Ba diyaki buhwa boěhěpi ikāndo jabu jákâ o těmpěl, ba pěhěkě pěmbě o mandato, ba jaka beja beabu na mbya n' ulema 'mbâkâ.

47. Ba bendakě Anyambě, n' unyěvēno na bato běhěpi. Ka Upangiyi a badiya church ba ka yongě, buhwa boěhěpi.

KAPITA III.

1. Ka Pitě na Jân ba 'la o těmpil o iwěla j' ikaliya, ja malalo.

2. Momo umbákâ a diyakidi ebokě oviya jemi ja nyangwě a bapakudwěndi, kâ mâ-a nangudwě o jámbě j' ugomba mua těmpil i tubakwě, na, Iyamu, o ijomba ja ba ngakiyě o těmpil.

3. O mâ-a yěni Pitě na Jâni ba 'mbaka o ngiya o těmpil, ka mâ-a jomba.

4. Ka Pitě a hilě mâ dihâ sii, na Jâni na, Umbwakiya hwě.

5. Ka mâ-a yokolidě bâ, a yanaka na a ka duwandi elombo o bâ-ba jadi.

6. Jâ ndi ja Pitě ja vâ, na, Ho 'bě na silvēr na gol, ndi eamě e janidi, ndi eamě e ka věyě ávė. Na dina ja Jisus ya Nasarēt tēměkě, o ka tamwaka.

7. Ka mâ-a bwěya mâ o 'nâ eyomi, ka mâ-a tědě mâ; ka matambi na matingilingo ma duwa ngudi o njo pākâ.

8. O mâ-a sodidi, ka mâ-a tēmě de, a ka tamwaka, ka mâ-a ngiya na bâ o těmpil, a tamwaka, a sodaka, a bendakě Anyambě.

9. Ka bato bēhēpi ba yěně mâ a tamwaka, a bendakě Anyambě.

10. Ka bâ-ba yowě na a diyakite mâ-a diyakidi a jombanaka o jâmbě j' ugomba mua těmpil Iyamu; ba ka mamaka e hamakid' o mâ-a jadi n' umamo uněně.

11. O momo tě ua 'bokě a yongakudwě a hukite Pitě na Jân hukango, ka bato běhěpi ba pumanidě umbila nala o bâ-ba diyakidi o elěmbě e tubakwě, na, ya Sâlâmân, ba mamaka nangudi.

12. ¶ O Pitě a yěnidi, ka mâ-a vâ na bato, na, Inyěni bamo ba Isreěl, o mamaka lě ni ekae na nde? e lě nde eanyu e 'mbwakiyě hwě dongodongo, ona na ngudi 'ahu, na bwamu boahu ndi be pangi momo tě ekaně a tamwaka?

13. Anyambě ya Ebreham na Aisak, na Jekâbu, Anyambě ya bahangwě bahu ndi a bendidě Mwana 'aju Jisus, uanyu a hulakidě, ka inyěni wa hâhâ Mâ ni o boho boa Pailat o mâ-a pangaki na a hulakidi Mâ.

14. Ndi o hâhâkindini ua Holi, Uyamu, o ka vahakani na eweyi-bato na e věkwě inyěni.

15. Ka inyěni wa weyaki Upolo mua eměná, ua Anyambě a pumbwakidi oviya bawewe, yâ ndi eahu e didi tali.

16. Ndi dina jaju, na ikamidě ja dina

jaju, ndi i yâdidě momo tě, uanyu a yě-někě, uanyu a ha dimbakiya ekaně; e, ikamidě jaju ndi i vi mâ iyongě tě ja hânjâbi-yěngo ekadi o boho boanyu boa běhěpi.

17. Ndi banabina mbi te yowěngo, na o hakindini n' ipuhwa ja iyowě, te ka bapan-giyi banyu ba *hakidi*.

18. Ndi belombo tě, bea Anyambě be levakidě o vyo na udumbu mua basâki baju, na Kraist a ka yěni betuniya, a honganidě tepě nonaně.

19. ¶ Yěněkěni ngěbě, wa uluwani, ovaně nd' o mabe manyu ma ka buludwě, o 'gombe ya iyâdiyě e ka viyě o pwanja ya Upangiyi.

20. Ndi a ka lomi Jisus Kraist, a kala-kudwě inyěni o vyo:

21. Ua hěvěn a ka pahiyě kabo o begombe bea itimbě ja belombo beěhěpi, bea Anyambě be di kalango na medumbu mea basâki baju oviya jali ja he.

22. Ikabojana Mosēs a vâkite na bhangwě bahu pâkwěpâkwě, na, Jěhova Anyambě 'anyu a ka betěndi bana ba banyangwě banyu Usâki u ka kwaně 'Mba: mâ ndi uanyu a ka yokiyě, belombo beěhěpi ibeaju be ka vayě n' inyěni.

23. E ka diyi na ilina jëhëpi i ka mëndë i yokiyë usâki tēmune, i ka weywëndi oviya bato ba jadi.

24. E, basâki bëhëpi oviya Samuël, kwannga nala ba vitakidë, tango e di kalango yëhëpi, te langwakidi o pëlë 'a hwi të ekadi.

25. Inyëni ndi bana ba basâki, na ba pangaya Anyambë e panganakidë bahangwë bahu, na Ebreham, Na, ibângâ jâvë ndi ja iniyâ ma he të ekanë yëhëpi ma ka vambanwë ibâtâ.

26. Inyëni ndi ba Anyambë ba betidë mwan' 'aju Jisus, o bohoboho, ka Mâ-a loma Mâ ka vamba inyëni ibâtâ, j' iludë j' inyëni bëhëpi oviya mabe manyu.

KAPITA IV.

1. O bâ-ba diyaki ba kalaka na bato, ka prist na upangiyi mua tēmpil, na Sajusi, ba pâ o bâ-ba jadi.

2. Linguwango na na ba yokwakidi bato, na ba kalakiyendi ipumbuwa j' iwedo na Jisus baka.

3. Ka bâ-ba bweya bâ, ka bâ-ba vamë bâ

o ndabo-ivititi na buhwa bopákwě bo t' o ya; 'kabojana e diyaki ya bě epedi ya kolo.

4. Tombekete ka beně be diyakidi, ba yokaki ndaga baitě, ba kamakiděndi; tango ya bamo e diyakindi ka tâjen itano.

5. ¶ E diyakindi bea bwe ka bapangiyi, na batodu, na balěndi,

6. Na Anas prist ya molo, na Keefas, na Jân, na Alěxanda, na tango e diyaki jawěngo na prist ya molo, ba yolaně o Jěrusalěm.

7. O bá-ba tědě bâ o hanganě, ka bá-ba uwa bâ, *na*, E lě nja ngud' ě, tombe nja din' ě, ijanyu i hanidini ekae?

8. Jâ ndi ja Pitě, londango n' Ilina Iyamu, ja vâ na bâ, *na*, Inyi bapangiyi ba bato na batodu ba Isreěl,

9. Oningě na ho kâtákwěndi o buhwa tě ekabo na ehavu eyamu e hakudwě ebokě, tina 'aju e yonganidi;

10. Ndi inyi běhěpi yowakěni na bato ba Isreěl běhěpi, na dina ja Jisus Kraist ya Nasarět, uanyu a kâmákidi o krâs; ua Anyambě a pumbwakidě; Mâ ndi a tědě momo těkaně o boho boanyu okava upeha.

11. Ilale tě ijanyu ja balongi i ha yěně-

kidi elombo, ndi ja bě molo mu' itududu ekadi.

12. Iyonga i 'bě pě n' upâkwě, Ikaboja-na o 'bě na dina ipâkwě he i di vangu-dwěngo bato, ijahu i ka yonganě.

13. Ndi o bâ-ba yěni na Pitě na Jâni bu bangaka, na bâ tepě yowěngo na bu yolkwaka, ba diyaki bamo ba ha diyaki n' iyo-wě, ba ka mamaka, ka bâ-ba yowě na ba diyaki na Jisus.

14. Hilěngo momo a yongakidi na bâ těměngo, bu diyaka na ngudi ya boma penda.

15. Ndi o bâ-ba sombidě bâ na ba t' o puma o 'hoka, ka bâ-ba hohonganě bâ mětě na bâ mětě,

16. Na, Ho hake lě bamo těkaba na? 'kabojana ba hango ugoma u *di* yowaněngo, mua ba Jěrusalěm běhěpi u ha dimbakiya, na hwě-ho 'bě na ngudi o dimba *yâ*.

17. Ndi o banga ya yavidě pě o bato ba jadi, ho hihake bâ-i pâni, na ba kalake pě na moto ka moto na dina těkadi.

18. Ka bâ-ba ndiya bâ, ka bâ-ba kandidě bâ na ba kalakiye na ba yokwakidě pě na dina ja Jisus na vilolombo.

19. Ndi Pitě na Jân ba timbwanaki bâ, na, Ipě e hohonganěngo o boho boa Anyambě, na ho yokakiya inyěni wa na Anyambě, hohonganakěni.

20. Ikabojana ho 'bě na ngudi o diya ho kale belombo beahu be yěněkidi n' ibeahu be yokakidi.

21. Ndi o bâ-ba hihi pě bâ, ka bâ-ba hulidě bâ, ba duwe elombo ya vomwanidě bâ, na tina 'a bato, 'kabojana *bato* běhěpi ba bendakiděndi Anyambě o nyanga e hamakidi.

22. Ikabojana momo tě a levakidě ugoma tě mu' iyonga ekamu, a diyakindi a tomba igona ja mabo ma mepuma manai.

23. ¶ O bâ-ba huludwě ka bâ-ba 'la o njamb' 'abu, ka bâ-ba languwa bea prist na batodu be vâki na bâ beěhěpi.

24. O bâ-ba yokidi ka bâ-ba betě moyi mabu o Anyambě a jadi, bâ běhěpi ta, na, Jěhova âvě *ndi* Anyambě, e velakidi oba na he na manga, na be did' omě beěhěpi.

25. A vâki n' udumbu mua uhayi muâvě Devid, na, Bato ba ha 'wě Anyambě ba yokaki lě ngambi ya nde, na bato ba yebakiya beyebyayebya ?

26. Mepolo mea he me tēmėkindi ka ba-pangiyi ba yolaně ihmibidě ja Jěhova n' ihmibidě ja Kraist 'aju.

27. Ikabojana Hěrod, na Pontius Pailat, na Jěntail, na bato ba Isreěl, ba latanakiyendi mbambai ihmibidě ja mwan' 'ávě uya-mu Jisus, uávě a di papuděngo,

28. Iha ja ya enā 'ávě, na ehoka 'ávě be lenakidě na be ka hamandi.

29. Ndi Upangiyi hilakěte ka bâ-ba hiha-kě: pangaka bahayi bâvě ba kalaka ndaga jávě, ba diye na jángá,

30. N' ihmibidě ja 'ná 'ávě iyonganě, na ovaně nd' o ndembo na megoma be ka hamě na dina ja Mwan' 'ávě ua holi Jisus.

31. ¶ O bâ-ba kaliyedi, iboko viabu vi diyaki lataniyango, vi ninganakiděndi, ka bâ běhěpi ba londa n' Ilina Iyamu, ba ka kalaka ndaga ja Anyambě, ba bange pě.

32. Ebimba e kamakidě yěhěpi, e diyaki-ndi ulema umbákâ, ilina jákâ: bu diyaka na a ma vâkâ na belombo beaju be ma pigaka be diyakindi ibeaju mětě, ndi ba diyakite belombo beěhěpi ta.

33. Metodu me levakiděndi ipumbuwa ja Upangiyi Jisus na ngudi eněně: na ehekwě eněně e diyaki tepě na bâ běhěpi.

34. Bu diyaka na a ma nyamaka; 'kabo-jana tango e ma pigaka behiki na mandabo ba ma hambakidi beâ, ba vanaka mahambe ma belombo be ma hambakudwě,

35. Ka nangidě *mâ* o beko bea metodu, ngabo e ka kabakwě na moto uěhěpi, nya-nga 'aju e ma nyamaka.

36. Josès ua metodu a vangakidě na Barnabas, (i didi *na*, Mwana a hambakě) ua diya ja Livai ya ehe ya Saiprâs,

37. A diyaki na 'hiki ka *mâ-a* hambidě yâ ka *mâ-a* vana dâlě, ka nangidě jâ o beko bea metodu.

KAPITA V.

1. Ndi momo 'mbâkâ, dina na Ananaia, na mwad' 'aju Safaira ba hambiděndi ehiki.

2. Ka *mâ-a* kuta *epěhi* ya ihambe, (mwad' 'aju a diyakite yowěngo,) ka *mâ-a* vana mběi pâkâ ka *mâ-a* nangidě yâ o beko bea metodu.

3. Ka Pitě a vâ, *na*, Ananaia, e lě nde ya Setan e londidě ulema muâvě na jowakiya Iina Iyamu wa tata *epěhi* y' ihambe ja ehiki?

4. O yâ e diyakidi yu diyaka eâvě mětě?

o yâ bëki hambudwěngo yu diyakate o ngud' 'ávě mětě? o lě bondango ndaga tēkaně o ulema muávě na ě? o 'bě jowiyango bato, o jowiyango Anyambě.

5. Ananaia a yokakate ndaga tēkadi, ka mâ-a kwa, ka mâ-a wa: ka jângâ iněně ja bweya ba yokaki belombo tēkabě běhěpi.

6. Ka mawanja ba tēmě, ka bâ-ba viha mâ, ka bâ-ba pumana *mâ*, ka bâ-ba tonga *mâ*.

7. O ulingo mua mawěla malalo ka mwad' 'aju a ngiya, a yowě be hamidě.

8. Ka Pitě a yavwana mâ, na, Langwakiya 'mba ipě nyanga 'anyu e ma hamba ehiki yěhěpi te ekaně? Ka mâ-a vâ, *na*, *E*, yěhěpi te ekaně.

9. Já ndi ja Pitě ja vâ na mâ, *na*, *E* lě nde eanyu e di lataniyango ka yějiya Ilina ja Anyambě? Hilakěte beko bea ba bapě momi 'ávě be-a *běnd'* ubiyâ, ba ka pumana tepě ávě.

10. Já tepě ijaju ja kwa o beko beaju o njo pâkâ, ka mâ-a wâ; ka mawanja ma ngiya ka bâ-ba kâbidě mâ wango, o bâ-ba bapidě *mâ*, ka bâ-ba tonga *mâ* baka na momi 'aju.

11. Ka jângâ iněně ja bweya church yě-
hěpi, na tango e yokaki belombo těkabe.

12. ¶ Ka ndembo na megoma beítě bea
hawě o bato ba jadi na benâ bea metodu;
(bâ běhěpi ba diyaki lataniyango o elěmbě
ya Sâlâmân.

13. Bapâkwě bu' diyaka pě na moto a
jijakiyedi o latě nyolo 'aju na bâ; ndi bato
ba kenakidi bâ.

14. Ba kamakidě ba badakudwě pě Anya-
mbě, bebimba bea bajo na bamo;)

15. Ovaně nd' o bato ba ma vanaka me-
bědi o mehěngě, ba nangakidě bâ o mako-
ndo na bebonga beněně, na edingiha ya
Pitě a tombaka e ka tāmě o diba bâ.

16. O diyaki na ebimba e vakiyedi o ma-
mboka ma diyakidi uluaniděngo Jěrusalēm
ba vanaka mebědi, na ba ma yěněki' njuke
na malina mabe: ka bâ běhěpi ba yonga.

17. ¶ Jâ ndi ja prist ya molo ja tēmě, na
ba diyaki na ju běhěpi, (ba pělě ya Sajusi,
ka' bâ-ba yoka jeku iitě.

18. Ka bâ-ba bweya metodu, ka bâ-ba
vamě bâ o ndabo-ivititi.

19. Ndi enjěl ya Anyambě e dubwaki
mambě ma ndabo-ivititi na bulu, ka yâ-ya
pumě bâ, na,

20. Kěkěni ka těměkeni, ka kalakeni na bato ndaga ja eměná těkae jěhěpi, o těmpil.

21. O bâ-ba yoki *nonaně*, ka bâ-ba ngiya o těmpil n' ubwa mětě ba ka yokwakidě. Ka prist ya molo na ba diyaki na mâ ba pâ, ka bâ-ba lata ehoka, na batodu ba bana ba Isreěl, ka bâ-ba lomidě o ndabo-ivititi ka nângidě bâ.

22. O benami be bědi wě, bá kâbidě bâ o ndabo-ivititi, ka bâ-ba timbě ka languwa,

23. Na, Mbambayě ho ma kâbiděte ndabo-ivititi dibamango bwamu, na bevengi těměngo o bwebwe, ndi o hwě-ho dubuwedi hó kâbidě moto omě.

24. Ndi o prist ya molo, na ngâwě ya těmpil, na prist iněně ba yokidi belombo těkabe, ba ka mamaka bea, na, Ekae e ka diya lě na ě?

25. Ka moto a viya ka languwa bâ, na, Hilakěteni bamo tě ibanyu ba ngakidě o ndabo-ivititi, ba těměngo o těmpil, ba yokwakidi bato.

26. Já ndi ja ngâwě na benami ja vala ka bâ-ba vana bâ, hanga na bwai, na já ngâ ja na o banga bato ba yanguwa bâ malale.

27. O bâ-ba pâni bâ, ka bâ-ba diyidě *bâ* o boho boa ehoka, ka prist ya molo a uwa bâ,

28. Na, Hwa 'bo kandakidě inyěni, na, o yokwakidě pě ni na dina tēkadi? ndi yě-někěteni o londiděndini Jěrusalēm yěhě-pi na eyokwanidi 'anyu, na o 'mbakandini o pādě makiya ma moto tēkaně o hwě-ho jadi.

29. ¶ Jâ ndi ja Pitě na metodu *mepâ-kwě* ja timbwana bâ, na, Ho lukakandi o yokiya Anyambě wa na bato.

30. Anyambě ya bahangwě bahu ndi a betidě Jisus uanyu a weyakidi k' inyěni wa kělidi Mâ ni o 'le.

31. Mâ ndi ua Anyambě a betidě na enâ 'aju eyomi, na a *diyaki* Utumbwani na Uhungini u věkě Isreěl ihuwa, n' iyudwě ja mabe.

32. Hwě ndi tali jaju ja belombo tēkabe; yâ nyanga tē te Ilina Iyamu, ja Anyambě i věkidi ba yokakiyě Mâ.

33. ¶ O bâ-ba yoki nonaně ka bâ-ba pě-hiyě *melema*, ka bâ-ba tinga na ba weyaki bâ.

34. Ka Farisi pākâ ya tēmě o ehoka, dina na Gameliěl, uyokwidi mua beleka-

nako, ua bato bēhēpi a ma yēnēkē jambo inēnē, ka mâ-a vâ na metodu me t' o bakudwē;

35. Ka mâ-a vâ na bâ, na Inyi bamo ba Isreël, bandamakidēni nyanga 'anyu e hakē o pēlē ya bamo tēkaba.

36. Ikabojana o hwi ja bohoboho, Todas a tēmēkindi, a ka mēmēkē na a bēndi uaju moto, ka tango ya bato ka kam' inai ya lata na mâ; nd' a weyakudwēndi, ka tango e yokakiyi mâ yēhēpi ya pajangana, ba wakindi o ndâyē.

37. O moto tēkanē a bēdi tombango, ka Judas ya Galili a tēmē o hwi ja pago, a valanaki tepē bato baitē, ndi a waki tepē, ka tango e yokakiyi mâ yēhēpi ya pajangana.

38. Ndi mbi vâki n' inyēni, na, Himbamakani, dikakani bamo tēkaba mbwe: oningē ehoka tēkae tombe ehavu tēkae e diyete ya bato, e ka wate o ndâyē.

39. Ndi oningē e diyete ya Anyambē, o 'bē na ngudi ya weyidi yâ ni o ndâyē, o banga wa duwaniyani o yanaki na Anyambē.

40. Ka bâ-ba yokiya mâ, ka bâ-ba ndiya metodu, o bâ-ba bi bâ bomango, ka. bâ-ba

kandidě bâ na ba kalake pë na dina ja Jisus, já ndi jábu ja hulidě bâ.

41. ¶ Ka bâ-ba vala o boho boa ehoka, ba këkë ba peyaka nana ba langudwi na ba bi weyango na o yoka ihâni o nyanga ya dina jaju.

42. Bu dâkâ iyokudě n' ikaliya ja Jisus Kraist o tēmpil na o mandabo, buhwa ka buhwa boëhëpi.

KAPITA VI.

1. O hwi tēdině o tango ya beyokwedi e kenindi, ka ba Grisi ba tâkâlâniyě na Hibru, 'kabojana mealika meabu me ma pojakwědi o ngabo ya buhwa boëhëpi.

2. Já ndi ja jomu na babale ja ndiyě ebimba ya beyokwedi, ka bâ-ba vâ, na, E 'bë hohonganěgo na ho dikaka ndaga ja Anyambě na hwě-ho ka hakiya tagulu.

3. Ndi bana bina, 'mbwakiyani o tango 'anyu bamo hěmbwědi ba kuma eyamu, ba di londango n' Ilina Iyamu, n' iyowě, ibahu ba ka bweya o ehavu tēkae.

4. Ndi hwě-ho ka diya kabo b' ikaliya n' ipakuwa ja ndaga.

5. ¶ Ka ndaga ya tândidě ebimba yě.

hëpi, ka bâ-ba pânâ Stivën, momo a di-yaki londango ikamidë n' Ilina Iyamu, na Filip, na Prokorus, na Nikenor, na Timon, na Parminas, na Nikolas, a ulua-kidi ua Antiäk.

6. Ka bâ-ba tädë bâ o boho boa metodu: o bâ-ba bëdi kaliyango, ka bâ-ba kahidë bâ makadu.

7. Ka ndaga ja Anyambë ja kena ka tango ya beyokwedi ya vuha o Jërusalëm na ngudi, na njamba 'nënë ya prist na kâlâmâkiyë ikamidë.

8. Ndi Stivën a diyakidi ikamidë na ngudi ti, a ma haki belombo be mamakwë na megoma o meoho mea bato.

9. ¶ Jâ ndi ja ba sinigâg tē tubakwë na ya Libertini, na ba Sirini, na ba Alëxanda, na ba Silisa, na ba Asia, ba ka bomaka na Stivën penda.

10. Ba diye na ngudi ya huka iyowë n' ilina jaju i ma kalanaka.

11. Jâ ndi jabu ja kâlâ bato ba vâki, na, Ho i mâ yokango a kalaka ndaga ja makili o pëlë 'a Mosës na Anyambë.

12. Ka bâ-ba vegudë bato, na batodu, na balëndi, ka bâ-ba pâ o mâ-a jadi, ka bâ-ba bweya mâ, ka bâ-ba pädë mô o ikando.

13. Ka bâ-ba tēdě tali ja 'vela, i vâki, *na*, Moto tēkaně a dâkâ ikala ja ndaga ja makili o pělě 'a iboko tē via holi ekavi, na o pělě 'a elekanako.

14. Ikabojana ho yokango a vâkâ na Jisus tē ya Nasarēt ekaně, a ka buluděndi iboko tēkavi, na Mâ a uludě mběmbâ ja Mosēs i dikakiyi hwě.

15. O ba diyakidi o ikando bēhēpi ba hilidě mâ, ka bâ-ba yěně boho boaju boa bě o mâ na boa enjěl.

KAPITA VII.

1. Já ndi ja prist ya molo ja vâ, na, Belombo tēkabe be nonaně?

2. Ka mâ-a vâ, *na*, Bamo, banabima, na bapaia, ta yokani; Anyambě y' ivenda e pumakiyedi hangw' 'ahu Ebreham o mâ-a diyakidi o Měsopotemia ovaně a t' o diya o Karan.

3. Ka Mâ-a vâ na mâ, na, Umwaka o ehe 'âvě, dikaka majawě mâvě, na nâvě wa viya o ehe 'amě e ka levid' âvě.

4. Ka mâ-a 'muwa o ehe ya Kaldia na diyaka o Karan, o hangwě a bēdi wango na mâ na umwaka pě omě na

vaka ka diya o ehe tě eanyu ya bě.
ekae.

5. Au věkě mâ ekuha omě na vilolombo
via tēdě itambi jaju; ndi a yohanakiděte
mâ na A ka vi mâ yâ eabu, na bana baju,
e ka longě, ovaně a t' o pâ na mwana.

6. Ka Anyambě a kala kakana na, ibâ-
ngâ jaju i ka diyi bangi o ehe ya ngani, ba
ka luki bâ na bâ-ba ka jongolakidě tepě bâ,
kama ja mepuma inai.

7. Ka Anyambě a vâ pě, na, Mbi ka yě-
kiděndi etomba tě e ka lukě bâ yeně, na-
ndi běngě ba vake ka kaliya 'Mba o iboko
těkavi.

8. Ka Mâ-a vě mâ panga ya ihěbwě, ka
Ebreham a ja Aisak, ka mâ-a hěbě mâ
na hwi lowambi, ka Aisak a *ja* Jekôb,
na Jekôb na *jaka* jomu ja mejâmbi na
mejâmbi mebale.

9. Ka mejâmbi mea viniya Josěf, ka bâ-
ba hamba mâ o Ijipt, nd' Anyambě a diyaki
na mâ,

10. Ka Mâ-a věngidě mâ o njuke jaju jě-
hěpi, ka Mâ-a vě mâ unyěvěno n' iyowě o
boho boa Fero y' upolo mua Ijipt, ka Mâ-a
panga mâ gâveni ya Ijipt na ndabo 'aju yě-
hěpi.

11. Ka nja y' usalâku ya kwa o ehe ya Ijpt na Kenan, etuniya enënë; bahangwě bahu ba diye pě na ngudi ya duwa bodiya-nako.

12. Ndi o Jekâb a yoki na beja be ndi o Ijpt, ka mâ-a loma bahangwě bahu o boho.

13. *Njo* y' ibale ndi ya Josěf e yowana-kidě na bana ba hangwě, ka majawě ma Josěf ma yowaně o Fero a jadi.

14. Jâ ndi ja Josěf ja banda, ka mâ-a ndidě hangwě Jekâb na majawě maju mē-hěpi, mabo ma bato hěmbwědi na bato batano.

15. Ka Jekâb a huba o Ijpt, ka mâ-a wa, bâ na bahangwě bahu bēhěpi.

16. Ka bâ-ba valanwě o Saikēm, ka bâ-ba nangudwě o budu boa Ebreham bo hambaki na bana ba Ěmor ya *hangwě* Saikēm na dâlě.

17. Ndi o egombe ya panga ya Anyambě e kanakiyedi Ebreham e bakamidi, ka bato ba tombuwa ka bwingě o Ijpt.

18. Kwanga na upolo upâkwě u betakidi u ha yowakidě Josěf.

19. U kândâki bato bahu, a ka jongola-kidě bahangwě bahu, ba ka 'hwaka bana babu na banga ba diya.

20. Yâ 'gombe tē ndi ya Mosēs e jakudwě, a diyaki bwamu boite, ka mâ-a bongunwě o ndabo 'a hangwě ngāndě ilalo :

21. O mâ-a uhwakudwě ka mwana ua Fero ua mwajo a tâlidě mâ, ka mâ-a tombudě mâ, ka mwan' 'aju mětě.

22. Ka Mosēs a yokudwě iyowě ja Ijpt jēhēpi, a diyaki na ngudi ya ndaga na behadi.

23. O mâ-a diyakidi a pādě igona ja mabo ma mepuma manai, ka yâ-ya pâ o ulema muaju na a kēkě ka pepuwa bana ba nyangwě ba bana ba Isreěl.

24. O mâ-a yēnidi umbākā a bevakudwě ka mâ a kamaniya *mā*, ka mâ-a kunda a pambalakudwě ka mâ-a bweya ua Ijpt :

25. Ikabojana a yebakiyi na ipě bana ba hangwě ba ka yowi na Anyambě a ombakandi o vengidě bâ na enâ 'aju : ndi bu bwěyakidě.

26. Buhwa bopâkwě o bâ-ba diyaki ba yomanaka ka mâ-a levidě pē bâ nyolo 'aju mětě, na a lataki bâ, na, Bamo, inyi nyangwě pākā, o bevanakiya li nande ?

27. Ka a bevakiyedi upâkwě a tindiya mâ, na, Nja pangid' âvē upangiye n' uyēkidi muahu ?

28. O 'mbaka tepě o weya 'mba, ka ávë-o weyakidi moto ua Ijpt vaiko?

29. O Mosës a yokidi ka mâ-a kweya, ka mâ-a diya mwěngi o ehe ya Midian, eaju e jaki bana babale.

30. O mabo ma mepuma manai ma tombidi ka Enjěl ya Jěhova ya pumiya mâ o nginga ya Saina n' ungonyi mua veyo o ele.

31. O Mosës a yěnidi ka mâ-a mama ndaga a vâye; na a bakame ka hilě, ka joyi ja Jěhova ja kâbidě mâ.

32. Na, Umba ndi Anyambě ya bahângwě, Anyambě ya Ebreham, Anyambě ya Aisak, na Anyambě ya Jekâb. Jâ ndi ja Mosës ja likima, a jijiye pě o hilě.

33. Ka Jěhova a vâ na mâ, na, Věngěkidě makogo mâvě o matambi mâvě; 'kabojana mahě ma iboko tě iviâvě vi di tēměngo vině, ma ndi holi.

34. Mbi yěněngo, mbi yěněngo majili ma bato bamě ba jadi o Ijpt ma yěněkě, Mbi yokango udiki muabu u dakakě, Mbi pwi ka věngidě bâ. Ndi vaka, Mbi lomi ávë o Ijpt.

35. Mosës tě u muabu u kiyakidi, na, Nja pangid' ávë upangiyi n' uyěkidi? te

mua Anyambě u lomaki pě ka pangiya na ka věngidě bâ na enâ ya Enjěl tě e pumakiyi mâ o ele.

36. O mâ-a bědi belombo be mamanakwě na megoma hango o ehe ya Ijipt, na manga ma veivei, na nginga, o mabo ma mepuma manai, ka mâ-a věngidě bâ.

37. ¶ Mâ, Mosěs tě, nd' u vâki na bana ba Isreěl, *na*, Jěhova Anyambě 'anyu a ka betěndi 'nyěni Usâki mua bana ba banyangwě banyu u ka kwaně 'mba; mâ nd' uanyu a ka yokiyě.

38. Mâ ekaně nd' a diyaki na church o nginga na enjěl e kalaki na mâ o ukodi mua Saina na bapaia; a pahakiyi ndaga ja eměná ijaju i věki hwě:

39. Ua bahangwě bahu a ha yokakiyedi ndi ba tindakiyi *mâ*, melema meabu me ka timbaka o Ijipt,

40. Na Erân, *na*, Haka hwě bea anyambě be ka 'lě o boho boahu: 'kabajana hwa 'we pě ka Mosěs tě u vanakiyi hwě o ehe ya Ijipt ekamu a hadi.

41. Ka bâ-ba vela etumbě ya nyati o hwi tědině, ka bâ-ba yambiya ugano, 'ba ka peyaka na behavu bea benâ beabu mětě.

42. Ka Anyambě a vonguwa, ka Mâ-a vě bá o ikaliya ja ndumba ya oba; ka yâ didi lëndwěngo o 'janġanangobo ya usâki, na, Inyi ndabo ya Isreël o ndi Mbi dikiděngo tito ja wewe, na benambo, o mabo ma mepuma manai o nginga.

43. E, ka inyěni wa nângâni mâkâ mua Molâk na nyětěti ya anyambě 'anyu Rěmfan, megano meanyu me velakidi na me kalakiyě: Mbi ka valanandi 'nyěni tombango Babilon.

44. Bahangwě bahu ba diyaki na mâkâ mua tali o nginga ka Mâ-a levakidě, o Mâ-a kalaki na Mosěs, na a hakete mâ honganěngo na mbago 'aju e yěněkidi.

45. Mu-a bahangwě bahu ba vakidi o mbuhwa na Jâsua u vanakidi o ehe ya Jěntail, ba Anyambě ba dumakidi o boho boa bahangwě bahu, wě na o hwi ja Devid;

46. A duwakindi unyěvēno o boho boa Anyambě, ka Mâ-a vaha o duwa Anyambě ya Jekâb mâkâ.

47. Ndi ka Sâlâmâni a longa Mâ ndabo.

48. Tombe ka Ua-oba-mětě a ha diyaka o těmpil i longakwi na benâ; ka usâki e vâkidi, na,

49. Hěvën eka 'amě, he ebong' 'amě e pitakě: nja ndabo-ě eanyu e ka longiyě 'Mba? ka Anyambě a vâkě; nj' iboko-ě iviamě vi ka yâjě? ●

50. E 'bě 'nâ eamě e veli belombo tēkabe beēhēpi?

51. ¶ Inyi ba mabâlu yenyeyenye ba ha 'bě hěbwěngo melema na matâ ekaba, o teni Ilina Iyamu kabo bohimbakidě: nya-nga ya bahangwě banyu *e ma haka*, yâ te eanyu *e hakě*.

52. E lě nja usâki ya bahangwě banyu u ha ngongolakidě? ba weyaka ba ma leva-kidě o pělě y' ipâdi via Wa Hohonganěngo; uanyu a diyi bakândi, na baweyi;

53. Inyěni ba pahakiyi belekanako na evědi ya enjěl, nd' o tati *beâ* ni.

54. ¶ O bâ-ba yokidi belombo tēkabe, ka bâ-ba pēhiya melema, ba ka kalakidě ma-honga *mabu*.

55. Ndi o mâ-a diyakidi londango n' Ilina Iyamu a hilakiděndi oba sii, ka mâ-a yěně ivenda ja Anyambě, na Jisus a jadi tēměngo o 'nâ ya Anyambě eyomi.

56. Ka mâ-a vâ, na, Hilakěteni, mbi yěněkěndi oba bwe, na Mwana-moto a jadi tēměngo o enâ ya Anyambě eyomi.

57. Ka bâ-ba yama nangudi, matâ mabu dibango, ka bâ-ba 'la umbila o mâ-a jadi njamba pâkâ.

58. Ka bâ-ba pumě *mâ* o mboka, ba ka bweyaka *mâ* ko-ko ja malale; ka tali ja nangidě ngâi jabu o beko bea iwanja ja momo, dina na Sâl.

59. Ka bâ-ba bweya Stivěn ko-ko ja malale, ka mâ a dakiya *Anyambě*, na, Upangiyi Jisus, nângákâ ilina jamě.

60. Ka mâ a balama, ka mâ-a yama nangudi, na, Upangiyi, o langake bâ bobě tēkabo.. O mâ-a vwi nonaně, ka mâ-a kwa o viyá.

KAPITA VIII. .

1. Sâl a diyakite iwedo jaju kamiděngo. O yâ egombe tēně ndi ya church e diyakidi o Jěruselēm, e hakudwě njuke eněně; ka bâ bēhěpi ba pajangana indandanda via Judia na Semeria, dikango kabo metodu.

2. Ka bato bayamu ba bapě Stivěn *ka tonga mâ*, ka bâ-ba eya mâ mbembe eněně.

3. Ndi Sâl a ma weyakate church kabo

kwedi, a ngakiya ndabo jěhěpi a ngwanga taka bamo na bajo, ka vamakě bā o ndabo-ivititi.

4. Ovaně nd' o ba hamanakidi, ba kěkidi ba kěkě ba kalaka ndaga.

5. Ka Filip a 'la o mboka ya Semeria, ka mâ-a kaliya bā Kraist.

6. Ka bato ba yokolidě belombo bea Filip be kalakidi njamba, ba yokaka ba yěněkě megoma meaju me ma haka.

7. Ikabojana malina mabe, ma ma bě-ki yamango na mâ ma věngěmě na baitě ba mâ diyaka na mâ, na ba ma yandakudwě na ngadi, na byěmě, be yongaka.

8. Mboka těně e diyaki ya bě na mbya 'něně.

9. Nd' o diyaki na momo 'mbākâ, dina na Saimân, a takidi o timba o mboka těně a yabaka bato ba Semeria, na a běndi uaju moto uněně.

10. Mâ nd' uabu ua běhěpi a ma yokiya na nděmbě na batodu, na, Momo těkaně a ngudi ya Anyambě eněně.

11. Ba ma dilaki mâ 'kabojana a vula a yabaka bā n' utimbo.

12. Nd' o bā-ba kamakidě nyanga ya Fi-

lip e kalakidi o pělě y' ipangiya ja Anyambě na dina ja Jisus Kraist, ka bâ-ba baptaiswě, na bajo na bamo.

13. Ka mâ mětě Saimân a kamidě tepě: o mâ-a baptaisudwě a ka diyaka na Filip, a ka mamaka o mâ-a yěni megoma na ndembo i hamakidi.

14. Ndi o metodu me diyakidi o Jěruseľm me yokakidi, nana ba Semeria ba pahiyi ndaga ja Anyambě, ka bâ-ba loma Pitě na Jân o bâ-ba jadi:

15. O bâ-ba bi wě, ka bâ-ba kaliya bâ na ba pahakiye Ilina Iyamu:

16. (Ikabojana i diyakite i ta o puga bâ na moto n' umbákâ: ba diyakite kabo baptaiswěngo na dina,j' Upangiyi Jisus.)

17. Ka bâ-ba kahidě bâ makadu, ka bâ-ba pahiya Ilina Iyamu.

18. O Saimân a yěni na ikahidě ja makadu mea metodu, ndi pâkidi Ilina Iyamu, ka mâ-a vě bâ hika,

19. Na, Věké tepi 'mba ni ngudi těkaně, ovaně nd' umba-mbi ka běyě mbi kahiděngě moto makadu, na mâ-a pahiya Ilina Iyamu.

20. Ndi Pitě a vâki na mâ, na, Hika 'vě e hinakiyete na nâvě, jambojana o pikili-

yangó na bova boa Anyambě bo ndi bo hambakwě na hika.

21. O 'bě na mběi tombe ikabo o itato tēkadi : 'kabojana ulema muāvě u 'bě honganěngo o mihâ ma Anyambě.

22. Yěněkě ngěbě o nyanga ya bobe tē iboāvě bo hadi ekabo, wa kaliya Anyambě ipě a ka iyidě ipikiliya ja ulema muāvě.

23. Ikabojana mbi hilidi na o ngite o njongi 'a jodi, na meboka mea bobe.

24. Já ndi ja Saimân ja vâ, na, Kalakiyi 'mba ni Upangiyi, ovaně nd' o belombo tē ibeanyu bea kalaka be ka diyě be pâyē o 'mba-mbi jadi.

25. O bâ-ba bi langango na bâ tepě ndaga ja Anyambě kaliyango, ka bâ-ba timba o Jěruselēm, ba kěkě ba kalakiya sango eyam' o mamboka ma Semeria maitě.

26. Ka enjěl ya Anyambě ya kala na Filip na, Těměkě, kěkě o pěl' 'a diko o njeya e vakiyě oviya Jěrusalēm na pá o Gesa, e di nginga.

27. Ka mâ-a tēmě ka mâ-a vala : a hilěte momo ua Ithiopia, utonga mua ngudi eněně o ivenda ja Kandase ya kweno ya ba Ithiopia, a ma pangakiya ungumba muaju muěhěpi, a viya o Jěruselēm ka kaliya,

28. A timbaka, o ndabo-'a-belape diyango, a langaka Isea ya usâki.

29. Ka Ilina ja Anyambě ja vâ na Filip, na, Bengakiya, wa bakama na ndabo tě ya belape ekaně.

30. Ka Filip a 'la ovoně umbila, o mâ-a yoki mâ-a langaka Isea ya usâki, ka mâ-a vâ na mâ, na, O bweyakiděte nyanga 'vě e langakě?

31. Ka mâ-a vâ, na, Mbi ka bweyidě lě na, moto a t' o levidě 'mba? Ka mâ-a va-ha na Filip a betake ka diya na mâ.

32. Iboko via ilěndwě iviaju vi diyakidi a langaka nd' ekavi, A tumbwanakudwěndi ka udâmbě u kěkě ka weyuwě, emukumuku bwěsě na mwana-udâmbě a didi o boho boa ba kěngěkě Mâ, nonaně tepě o mâ-a ha dubwakidi udumbu muaju;

33. O ihubiya jaju ka yěkě 'aju ya nângânwě Mâ; nja ka pěhě mbamba jaju? Ikabojana eměná 'aju e věngudwěndi o he.

34. Ka utonga mâ-a timba na Filip, na, Mba hâhâliděnd' âvě, nja ua usâki a kala-kiya belombo těkabe? mâ mětě, ipě mot' upâkwě?

35. Jâ ndi ja Filip ja dubuwa udumbu

muaju, ka mâ-a yalë o ilëndwë të ka mâ-a kaliya mâ Jisus.

36. O bâ-ba validi ekëndâ ka bâ-ba pâ o miba na mahuhu ; ka utonga mâ-a vâ, na, Yënëkëte, miba *nd' ekama* ; e lë pë nde e himbakidë 'mha na mbi baptaisakwë ?

37. Ka Filip a vâ, na, Oningë na o te kamidëngo n' ulema muâvë muëhëpi, na nâvë wa baptaiswë. Ka mâ-a timbë, na, Mbi kamidëngo na Jisus Kraist a Mwana-Anyambë.

38. Ka mâ-a sombiya na ndabo 'a-belape e tëmëke de ; ka Filip n' utonga bēhë ba huba o miba ; ka mâ-a baptaisa mâ.

39. O bâ-ba jabuwedi o miba, k' Ilina ja Upangiyi ja nângâ Filip, utonga u yëne pë mâ : ka mâ-a 'la ekëndâ a këkë a peyaka.

40. Ndi Filip a duwanakiyendi o Asotus : a tombaka ka mâ-a kaliya o mamboka mëhëpi, kwanga nala o mâ-a pâkidi o Sësaria.

KAPITA IX.

1. Sâl a diyakite a ngite a vegumaka mekëtku mea iweya ja beyokwedi bea Upangiyi, ka mâ-a 'la o prist ya molo a jadi,

2. Kâ vaha bejanganangobo be kěķě o Damakus o sinigâg i jadi, na oningě a duwingě ba njeya těkaně, ba diye tombe bamo, tombe bajo, a vana bâ na mekato o Jěrusalēm.

3. A kěķěte a bě baka na Damaskus: tepě o njo pākâ bwe ya viya ka panyiya mâ ya viya oba.

4. Ka mâ-a kwa o he, ka mâ-a yoka joyi, i vâkâ na mâ, *na*, Sâli, Sâli, o haka lě 'mba njuke tě eněně ekaně ya nde?

5. Ka Mâ-a vâ, *na*, Âvě a lě nja, Upangiyi? K' Upangiyi a vâ, *na*, Umb' i Jisus uâvě a hakě njuke tě eněně ekaně: e bokolo na o tudakiya o ndongo.

6. A njanjalanaka, a mamaka, ka mâ-a vâ, *na*, Upangiyi, o ka vahâ lě 'mba mbi haka nde? K' Upangiyi Mâ-a vâ n mâ, *na*, Těměkě, kěķě o mboka, ovoně nd' âvě-o ka langudwě nyanga 'vě e ka hayě.

7. Ka ba kěķi na mâ njamba ba těmě de, ba puhaka ndaga ya kala, bâ te yoka-ngo joyi, ndi ba yěne moto.

8. Ka Sâl a 'muwa o he; o mihâ maju ma bumuwedi a yěne moto: ndi ba tumbwanaki mâ o 'nâ vyě, na pânâ o Damaskus.

9. A diyaki hwi 'lalo a yěne, a je, na mâ-a mâte.

10. ¶ Eyokwedi yâkâ e diyakindi o Damaskus dina Ananaias, mâ ndi ua Upangiyi a vâkidi o ndâtâ, *na*, Ananaias. Ka Mâ-a vâ, *na*, Hilakětě, umba te 'kaně, Upangiyi.

11. Ka Upangiyi mâ-a vâ na mâ, *na*, Těměkě, kěkě o uhěngě u tubakwě na De, wa uwa ba ndabo 'a Judas momo a tubakwě na Sâl ya Tarsus: hilakěte, a kala-kiyandi.

12. Na mâ-a tepě yěněngo ehihila, momo a tubakwě na Ananaias a vaka o mâ-a jadi, ka kahidě mâ ikadu, na a yěněkě.

13. Ka Ananaias a timbě, *na*, Upangiyi mba vuli mbi yokaka na bato baitě, nyinga ya bobe boa momo těkaně bo di hango bato bâvě bayamu ba didi o Jěrusalěm :

14. Ndi na kumbanakidě o mâ-a vėwu-dwě ngudi ya na a katake ba tubakě dina jâvě, na prist ya molo okava.

15. K' Upangiya a vâ na mâ, *na*, Haka ekěndâ, 'kabojana a ndi eva 'mě e di pânângo e ka bapě dina jamě o Jěntail, na mepolo, na bana ba Isreel ba jadi.

16. Ikabojana mbi ka levidi mâ nyanga

ya belombo beněně ibeaju be ka yěně o nyanga ya dina jamě.

17. Ka Ananias a ha ekěndā 'aju. O mâ-a ngiyedi o ndabo, ka mâ-a kahidě mâ makâdu, na, Mwanina Sâl, Upangiyi, (Jisus a pumakiyedi âvě o njeya, o âvě-o vakiyedi,) a lomi 'mba na yěněkě, na nâvě wa londa n' Ilina Iyamu.

18. Tepě ka belombo bea kwa o mihâ maju ona manyâ; ka mâ-a yěně o mbenjě pākâ ka mâ-a tēmě ka mâ-a baptâiswě.

19. O mâ-a pahiyi beja ka mâ-a yâdiyě. Jâ ndi ja Sâl ja diya na beyokwedi be diyakidi o Damaskus mbei ya hwi.

20. O yâ njo tě ya pākâ a ka langwakiya Kraist o sinigâg, na, a Mwana-Anyambě.

21. Ndi ba yokakidi bēhēpi ba mama-kindi, na, A 'bē a ma weyaka ba ma dakiya dina tēkadi o Jērusalēm ekaně, na mâ a pâte okava o yâ na ovaně nd' o mâ-a ka 'laně bâ na mekato o prist ja meolo i jadi?

22. Ndi Sâl a yâdâki boyâdâkâ na boyâdâkâ, a ka suliyakě Jiu i diyakidi o Damaskus, n' ilevidě ja na ekaně ndi na Kraist mětě.

23. ¶ O hwi iitě i bēdi tombango, ka Jiu

ba vala o ehoka na ba 'mbakandi o weya mâ :

24. Ndi eveng' 'abu e ma vengamakiya mâ, e diyaki ya yowaně o Sâl a jadi: ba ka vengaka inambě ma megomba, bulu na mwehe na ovaně nd' o bâ-ba ka weyě mâ.

25. Jâ ndi ja beyokwedi ja nângâ mâ na bulu ka bâ-ba vamě mâ o ngandi ka bâ-ba hubě mâ o ugomba.

26. O Sâl a pâdi o Jêrusalēm wě, a ka yějěkě o lata na beyokwedi: ndi bâ bēhēpi ba ma bangaki mâ, ba diye kamiděngo na a ndi eyokwedi.

27. Ndi Barnabas a nângâki mâ, ka mâ-a pâde mâ o metodu me jadi, ka mâ-a langu-wa bâ nyanga 'aju e yěněkidi Upangiyi o njeya, na nyanga 'aju e kalaki na mâ, na eaju e kalaki dina ja Jisus o Damaskus a bange.

28. A diyaki na bâ o Jêrusalēm, a vakiya, a timbaka.

29. A ka kalaka na dina ja Upangiyi Jisus a bange, a bonaka penda na ba Gris: ba ka 'mbaka o weya mâ.

30. O bana ba nyangwě ba yowudě, ka bâ-ba hubana mâ o Sēsaria na validě mâ o Tarsus.

31. Nandi běngě church i pahakiye iyâjâ oviya Judia na Galili nala o Semeria, i ka tombwaka. Ka jâ ja vaha o bâ-ba tamuwi na jângâ ja Upangiyi, na mbya y' Ilina Iyamu.

32. ¶ O Pitě a tombidi a kěķě a ka hama ka mâ-a pâ o bato bayamu ba diyakidi o Lida ba jadi.

33. Ka mâ-a kâbidě omě momo dina na Enias, a diyakidi a bě o ikondo mepuma lowambi na ebědi 'a ngadi.

34. Ka Pitě a vâ na mâ, na, Enias, Jisus Kraist a yongiděnd' âvě: těměkě, wa samba enangi 'âvě. Ka mâ-a hungana tepě o těmě.

35. O ba diyakidi o Lida na Saron, běhěpi ba yěně mâ, ka bâ-ba uluwa o Upangiyi a jadi.

36. ¶ Eyokwedi yâkâ e diyakindi o Jâpa, dina na Tabaita, i 'luakudwě, na, Dâkas: mwajo těkaně a diyaki na behavu beyamu beítě, na bova boaju bo ma věněķě.

37. O jâ hwi tědině a 'la ka bě ka mâ-a wa: o bâ-ba bi mâ tukango ka bâ-ba nangidě mâ o ilika via oba.

38. Nd' o Lida a diyakite baka na Jâpa, na beyokwedi tepě yokango na Pitě a nd' omě ka bâ-ba loma bato babale o mâ-a jadi,

na ba vahaki *mâ a pâkâ* o bâ ba jadi, boha-divakidě.

39. Já ndi ja Pitě ja těmě ka *mâ-a* 'la na bâ, o *mâ-a* pâdi ka bâ-ba valana *mâ* o ilika via oba : ndi mealika meěhěpi me diyaki baka ilevidě ja koto na ngái ja Dâkas i haki, o *mâ-a* diyakidi a ngite na bâ.

40. Ndi Pitě a pumakidi bâ běhěpi, o *mâ-a* humi mabângâ ka *mâ-a* kaliya, ka *mâ-a* vonguwa o ekengo e jadi, na, Tabaita, umwaka. Ka *mâ-a* dubuwa mihâ : o *mâ-a* yěně Pitě, ka *mâ-a* diya diya.

41. Ka *mâ-a* hambidě *mâ enâ*, ka *mâ-a* hěhě *mâ* ; o *mâ-a* bedi bato bayanu na mealika ndiyango, ka *mâ-a* timbě *mâ* o bâ ba jadi mihâ.

42. Ka yâ-ya yowaně o Jápa yěhěpi ; ka baitě ba kamidě Upangiyi.

43. O bea be bi nonaně hamango, ka *mâ-a* diya hwi iitě o Jápa na Saimân *pâkâ* e ma haka bekoto.

KAPITA X.

1. O diyaki na momo 'mbâkâ o Sēsaria, dina na Kárnillas, senturian ya njamba té e ma tubakwě na ya ba Itali.

2. *Momo* uyamu, a ma bangaka Anyambě, bâ na ba ndabo 'aju bēhēpi, a ma vē-kě bato bova boitě, na mâ a kalakiya tepě Anyambě egombe yēhēpi.

3. O epedi ya mawěla malalo ka mâ-a yě-ně ehihila, enjěl ya Anyambě suka e vaka na o mâ-a jadi, ka ya vâ na mâ, *na*, Kârnilias.

4. O mâ-a hilidě mâ ka mâ-a banga, mâ na, E lě nde Upangiyi? Ka mâ-a vâ na mâ, *na*, Makaliya mâvé na bova boávě be pândi iyongidě o boho boa Anyambě.

5. Ndi lomaka bato o Jâpa, ka ndiya Saimân, a di pě na dina ipâkwě, na, Pitě :

6. A lumbiyango Saimân e hakě bekoto, a di ndabo baka na manga; mâ ndi a ka languw' âvé nyanga 'vé e ka hayě.

7. O enjěl e kalaki na Kârnilias e validi kâ mâ-a ndiya bahayi ba ma diyaka na mâ o ndabo babale, na sâjě eyamu o tango ya ba ma hakiya mâ egombe yēhēpi.

8. O mâ-a bi bâ belombo *těkabe* beēhēpi langwango, ka mâ-a lona bâ o Jâpa.

9. ¶ Bia bwe o bâ-ba diyaki ba kě-kě ekěndâ ba bě baka na mboka, ka Pitě a 'la o ndabo oba ka kaliya, o epedi ya jobameolo.

10. A diyakindi a ka yokaka nja, a 'ka 'mbaka o ja : o bâ-ba diyaki ba kenjakě, ka mâ-a kwa uge,

11. Ka mâ-a yěně hěvĕn bwē, na elombo e hubaka o mâ-a jadi ona sande, tingwĕngo o mahuku manai, e hulakudwĕ o he :

12. E diyaki na tito i didi o he ja bengo benai jĕhĕpi na tito ja mehili, na belombo be landakě, na lonāni la oba.

13. Ka joyi ja pâ o mâ a jadi, na, Pitĕ, emwaka ; weyaka, o ka jaka.

14. Ndi Pitĕ a vâki, na, Hanga nonanĕ, Upangiyi ; ekaboja mbi 'bĕ jango belombo be di bea kāmân be ha 'bĕ o tana.

15. Ka joyi ja kala pĕ na mâ njo y' ibale, na, O tubake ya Anyambĕ e di tanĕngo na e kāmân.

16. Ekae e hamaki njo ilalo ; ka elombo ya nāngwĕ pĕ oba.

17. O ulingo mua Pitĕ u diyakidi a mama ehihila tĕ eaju e yĕnĕkidi yĕnĕ, ka yâ e ka diyĕ, tepĕ bamo tĕ ba Kârniliyas ba lomakidi ba bĕ o jâmbĕ j' ugomba, ba ka uwaka mâ o ndabo 'a Saimân.

18. Ka bâ-ba ndiya, ka bâ-ba uwa n' ipĕ Saimân e tubakwĕ tepĕ na Pitĕ, a lumbiyanngo omĕ.

19. ¶ O Pitě a diyakidi a pikilakiya ehi-hila, k' Ilina ja vâ na ju, *na*, Hilakěte, bamo balalo ba vahakand' âvě.

20. Těměkě, wa huba na vala na bâ, o bome elombo penda: 'kabojana umb' i ma loma bâ.

21. Ka Pitě a huba na vala o bato ba Kârniliyas ba lomakidi o mâ-a jadi; na, Hilakěteni, umba uanyu a vahakě: ndi ekaně o ma viya lě nde?

22. Ka bâ-ba vâ, *na*, Kârniliyas ya senturian, moto uyamu', a bangakě Anyambě, ua 'tomba ya Jiu yěhěpi a tubaki itubi iyamu, Anyambě a kelevidi mâ na enjěl eyamu na a bandake âvě o ndabo 'aju, vâkâna a yoki ndaga na nâvě:

23. Ka mâ-a ngidě bâ, ka mâ-a ha bá ulunda. Bia bwe, ka Pitě a vala na bâ ka bana ba nyangwě ba Jâpa bákâ, ba vala na mâ njamba.

24. Bopâkwě bwě, ka bâ-ba pâ o Sěsaria. O Kârniliyas a bědi majawě maju, na mboi jaju j' ulema ndiyango, a ka vengaka bâ.

25. O Pitě a diyakidi a ngâkiya, ka Kârniliyas a lata na mâ, ka mâ-a kwa o beko beaju, a kalakiya *mâ*.

26. Ka Pitě a umudě mâ, na, Těměkě: umba-mbi te momo.

27. O mâ-a bi na mâ kalango, ka mâ-a ngiya ka mâ-a kâbidě baitě ba yolanakidě.

28. Ka Mâ-a vâ na bâ, na, Wa dimbaki-yani e 'bě elombo ya hohonganěgo na moto a di ua Jiu, a lataka njamba na ua etomba epâkwě, tombete a pâkâ o mâ-a jadi; ndi Anyambě a 'mba leviděngo na mbi tubake moto ka moto uěhěpi na a kâmân tombe na a 'bě o tana.

29. O umba-mbi bědi bandwěngo, k' umba mbi vakě, mbi diye na ndaga ya petuwa: k' umba-mbi uwake ndaga 'amě e ma bandanwě?

30. Ka Kârnillas a vâ, na, Na hwi 'nai mbi diyaki mbi hindinaka kwanga n' iwěla těkadi; o mawěla malalo, umba-mbi diya-kidi mbi kalakiya o ndabo 'amě, hilakěte momo, a di tēměngo o boho boamě n' ibâtâ itano,

31. Na, Kârnillas, ikaliya jâvě i yokani-ndi, na bova boâvě bo yongudwě tepě o boho boa Anyambě.

32. Bandaka o Jâpa, wa ndidě Saimân e tubakwě tepě, na, Pitě; a lumbiyango o ndabo ya Saimân e hakě bekoto baka na

manga: mâ ndi a kâ bëyě pângo na mâ-a kala na nâvë.

33. K' umba-mba banda 'vë o njo pâká ; bwamu tepě ka 'vë o pâde. Yâ nd' eahu e didi okava kotamango o boho boa Anyambě, ka yoka belombo bea Anyambě be jadt âvë sombiyěngo beěhěpi.

34. ¶ Jâ ndi ja Pitě ja dubuwa udumbu muaju ka mâ-a vâ, na, E pâkwěpâkwě k' umba-mbi di hilěngo na Anyambě a 'bë ukumuni mâ-a bato:

35. Nd' a te o 'tomba ka 'tomba yěhěpi a ka bangě mâ, na mâ-a haka hohonganěngo, mâ te uaju a nângâkě.

36. Ndaga ja *Anyambě* i bandakidě bana ba Isreěl, i kalakudwě jonga na Jisus Kraist: (Mâ nd' Upangiyi mua běhěpi:)

37. Ndaga tě i janyu i ha dimbakiya, i hamanaki na Judia yěhěpi, ubota na Galali, i dibaki mbuhwa na baptisma ya Jân, e ma kalakiya ;

38. Na nyanga ya Anyambě e bakakidi Jisus ya Nasarět n' Ilina Iyamu na ngudi: a ma kěkě a kěkě a haka bwamu, a yongakě ba ma pinyalakudwě na dëvil ; ekaboja Anyambě a diyaki na Mâ.

39. Hwě ndi tali ja belombo těkabe beě.

hěpi oviya 'he ya Jiu na pá o Jěrusalěm;
uabu a weyakidi ka bâ-ba kělidě Mâ o ele:

40. Mâ ndi ua Anyambě a pumbwakidě
na hwi 'lalo, ka Mâ-a levidě nyolo 'aju o
bwebwe;

41. Hanga o bato běhěpi, ndi kabo tali i
pânâkudwě o boho boa Anyambě, hwě ba
ma jaka na ba ma mâtâkâ na ju o Mâ-a
běki pumbuwango o iwedo.

42. Ka Mâ-a sombiya hwě na ho langwa-
kiye bato běhěpi, na hwě-ho ka pupaka na
Mâ ndi ua Anyambě a di pangango *na a*
diyake uyěkidi mua ba di mihâ na ba di
wewe.

43. Mâ ndi ua basâki běhěpi a di tali na
a ka kamidě ma na dina jaju, te a ka pahi-
yě iyidwě ja bobe.

44. ¶ O Pitě a diyakidi a ngite a kalaka
ndaga těkadi, ka Ilina Iyamu ja puga ba
yokaki ndaga běhěpi.

45. Tango ya ba ma hěběkwě e kama-
kidě na tango e vaki na Pitě ba mamaki-
ndi, 'kabojana Jěntail ba pugakudwě tepě
na Ilina Iyamu.

46. Ikabojana ba yokaki bâ ba kalaka
bemi bepâkwě, ba ka bendakě Anyambě.
Jâ ndi ja Pitě ja timbě, na,

47. O na moto ua kandidě miba na banga ekaba ba baptaiswě, ba di pahiyango Ilina Iyamu ka hwě ekaba?

48. Ka mâ-a sombiyě bâ na ba baptaisa-kwě na dina ja Upangiyi. Jâ ndi ijabu ja hâhâlidě mâ na a t' o diya na bâ mběi ya hwi.

KAPITA XI.

1. Ka metodu na bana ba nyangwě ba diyakidi o Judia, ba yoka na Jěntail ba pahiyendi ndaga ja Anyambě.

2. O Pitě a betidi o Jěrusalēm, jâ ndi ja ba ma hěběkwě ja sâja na ju,

3. Na, O kěkindi o bato ba ha 'bě hěbwěngo ba jadi, ka 'vě 'wa ja na bâ.

4. Ndi Pitě a timbakiyendi *upako* oviya jali, a ka langwaka bâ hohonganěngo, na,

5. Mbi diyakindi o mboka ya Jâpa, mbi kalakiya: o 'mba-mbi kwedi uge, k' umba-mba yěně ehihila, elombo e hubaka ona sandě eněně, e hulakudwě oba, tingamango o mahuku manai; ka yâ ya pa o umba-mbi jadi:

6. Ka umba-mba batidě yâ mihâ mamě

k' umba na hilě, k' umba-mba yěně tito i did' o he ja bengo benai, na tito ja mehili na belandě, na lonani la oba.

7. K' umba-mba yoka joyi i vâkâ n' umba, *na*, Pitě, umwaka: weyaka, o ka jaka.

8. Ndi ka umba-mba vâ, *na*, Hanga no-naně, Upangiyi, 'kabojana o 'bě na elombo ya kâmân tombe e ha 'bě o tana e di ngiyango udumbu muamě o 'gombe te 'gombe.

9. Ka joyi ja timbě pě 'mba oviya oba, *na*, O tubake ya Anyambě e di taněngo na e kâmân.

10. Ekae e hamaki njo ilalo: ka beěhěpi bea timba o hěvën.

11. O yâ njo tě ya pâkâ, hilakěte bamo balalo ba bě o ndabo 'amě e diyakidi, ba lomwě oviya Sēsaria na pâ umba-mbi jadi.

12. K' Ilina ja tundudě 'mba na mbi kěkě na bâ, mbi bome elombo penda. Ka ba tě bina utoba ekaba ba vitě 'mba, ka hwě-hwa ngiya o ndabo ya momo tě.

13. Ka mâ-a levidě hwě nyanga 'aju e yěněkidi enjěl o ndabo 'aju de, ka yâ-ya vâ na mâ, *na*, Lomaka bato o Jâpa, wa

ndidě Saimân a didi na din' ipákwě, na, Pitě;

14. Mâ ndi a ka languwě âvě ndaga janyu na ba ndabo 'âvě, i ka yonganě.

15. Mbi yalakěte ikala, ka Ilina Iyamu ja puga bâ, te ka jâ i haki hwě o jali.

16. Jâ ndi jamě ja yongidě ndaga y' Upangiyi o Mâ-a vâki, na, Jân a ma baptaisakě mětě na miba; ndi o ka baptaiswëndini na Ilina Iyamu.

17. O Anyambě a vėkite bâ bova, ka iboaju bo vėki hwě ba kamakidě Upangiyi Jisus Kraist, mbi lě ua 've k' umba-mbi 'mbakidi o himbidě Anyambě?

18. O bâ-ba yoki belombo tėkabe ka bâ-ba vâlâmiyě, ba ka bendakě Anyambě, na, Hângě Anyambě a vė tepě Jěntail iluwa ja melema ja eměná.

19. ¶ Jâ ndi ja ba pajanganakidi na njuke e hakudwě Stivěn ja 'la kwanga na o Finisi na Saiprus na Antiák, ba kaliye bapákwě ndaga, kabo Jiu dipâ.

20. Bâkâ ba diyaki bamo ba Saiprus na Sirini, o bâ-ba pâdi o Antiák ba ka kalaka na ba Gris, ba kalakiya Upangiyi Jisus.

21. Enâ ya Upangiyi e diyaki na bâ:

ka tango eněně ya kamidě ka ya ulūwa o Anyambě a jadi.

22. ¶ Ka sango ya belombo tēkabe ya pā o matā ma church e diyakidi o Jēruselēm: ka bâ-ba loma Barnabas na a kēke ka hukiya o Antiāk.

23. O mâ-a bēdi wě, na mâ tepě yěněngo ehewě na Anyambě, a yěněki mbya, ka mâ-a leva bâ bēhēpi na ba bakamaka o Upangiyi a jadi na itinga ja ulema.

24. Ikabojana a diyaki moto uyam', Ilina Iyamu n' ikamidě ti: ka bato baitě ba badudwě o Upangiyi a jadi.

25. Já ndi Barnabas ja 'la o Tarsus ka vaha Sâl:

26. O mâ-a duwi mâ ka mâ-a pādě mâ o Antiāk, e diyakindi ba makiděndi upuma uhuhu, ba yolanakě na church, ba yokwakidě bato baitě. Beyokwedi be takindi o tubwě na Krisân o Antiāk.

27. ¶ Já hwi tēkadi ba vakiyi basāki o Jērusalēm na pā o Antiāk.

28. Ka ua njamba 'abu 'mbākâ, dina na Agabus, a tēmě ka mâ-a sala n' Ilina Iyamu, na, usalāku uněně u ka diyandi o he yēhēpi: e hohonganakidě o hwi ja Klādias Sisar.

29. Ka beyokwedi bea tinga na ba bandakiděndi ihana, moto uěhěpi hohonganěngo na ngud' 'aju, o bana ba nyangwě ba diyakidi o Judia ba jadi.

30. Ka bâ-ba ha tepě, ka bâ-ba bandidě beâ batodu o benâ bea Barnabas na Sâl.

KAPITA XII.

1. O yâ egombe těně, ndi ya Hěrod y' Upolo e hambakidě benâ *beaju* o inyungudě ja church.

2. Ka mâ-a weya Jems ya mwa' nyanngwě na Jân n' ukwala.

3. O mâ-a yěni yâ e tândâkidě Jiu, ka mâ-a bada pě, na a bweyaka tepě Pitě. Hwi tědině ndi i diyaki ja pěmbě e ha 'bě na ist.

4. O mâ-a bweyi mâ ka mâ-a ngidě *mâ* o ndabo-ivititi, ka mâ-a bweyidě *mâ* jomu ja sâjě na sâjě utoba na i tatake mâ; a yanaka isango ja bokunduaka tombango, vâkâna a pumidi mâ o bato ba jadi.

5. Já ndi ja Pitě ja tatwě a ndabo-ivititi: ndi church yu dâkâ mâ o ikaliya o Anyambě a jadi.

6. Ndi o Hërod a diyakidi a ka 'mbaka o pumě mâ, Pitě a diyakindi a yaka bulu tē o hanganě ya sâjě ibale vamwěngo mehi-nganakano mebale; batati o ubiyâ ba tataka ndabo-ivititi.

7. Hilakěte enjěl ya Anyambě a pândi o *mâ-a* jadi, bwe e ka panyaka o ndabo-ivititi: ka yâ-ya bweya Pitě o ubaha, na umwakiđě mâ, na, Umwaka wâwâ. Ka mehi-nganakano meaju mea kutuwa o benâ beaju.

8. Ka enjěl ya vâ na mâ, *na*, Tingaka utumba, wa tinga makogo mâvě: ka mâ-a ha tepě. Ka mâ-a vâ na mâ, *na*, Pugaka kapa 'âvě, wa vitě 'mba.

9. Ka mâ-a puma na vitě mâ, a yowě na ya enjěl e hakidi yeně e pâkwěpâkwě; ndi a ma yebakiyi, na, a yěněkěndi ehihila.

10. O bâ-ba tombidě ilika via bohoboho na via lobale, ka bâ-ba pâ o jâmbě ja bekěi i pulakiyě o mboka; i dubwanakiyi n' upango muaju mětě: ka bâ-ba puma, ba bě landango uhěngě umbâka; já ndi ja enjěl ja dika mâ.

11. O Pitě a pwi ka yongidě, mâ na, Nandi mbi yowuděndi na e pâkwěpâkwě na Upangiyi a ma lomandi enjěl 'aju na *Mâ-a*

věngidě tepě 'mba o benâ bea Hěrod, na nyanga ya bato ba Jiu e ma yanaka.

12. O mâ-a batidě ka mâ-a pâ o ndabo ya Meri mea nyangwě ya Jân, i diyaki pě na dina ipâkwě, na, Mark; o baitě ba diyaki yolaněngo ba kalakiya.

13. O Pitě a tinidě jâmbě j' ugomba, ka mwa-mwajo a viya ka yokolidě, dina jaju ndi Roda.

14. O mâ-a yembi joyi ja Pitě au dubwaka pě jâmbě na mbya, ndi a kěkindi umbila ka languwa, na, Pitě a ndi o ubiyâ de.

15. Ka bâ-ba vâ na mâ, *na*, O potuwango. Ndi a lilimakidi na e nonaně. Jâ ndi jabu ja vâ, *na*, E ndi enjěl 'aju.

16. Ndi Pitě a diyakite kabo tinakidě. O bâ-ba dubuwi *jâmbě* na yěně mâ, ba ka mamaka.

17. Ndi a pěpěkidi bâ na enâ na ba vâlâ-mâkiye, a ka langwakiya bâ nyanga ya Upangiyi e věngěkidě mâ o ndabo-ivititi. Ka mâ-a vâ, *na*, Kěkěni ka levakiděni Jems na bana bina belombo těkabe. Ka mâ-a věngěmě na 'la o iboko ipâkwě.

18. Boyaka te sâjě ba viya ka vavalana, na, Pitě a ha lě na ě?

19. O Hěrod a bi mâ vahiděngo a duwe,

ka mâ-a kâtâ batati, ka mâ-a sombiya na ba wake. Jâ ndi jaju ja huba o Judia na pâ o Sësaria, ka mâ-a diya omě.

20. ¶ Hěrod a binaki na ba Tair na Sai-dân nangudi. Ka bâ-ba lata njamba pākâ na pâ o mâ-a jadi, o bâ-ba bēdi mboi na Blastus a ma pangakiya ilika via upolo lata-ngo, ka bâ-ba vaha jonga, 'kabojana ehe y' upolo ndi e ma bombaka eabu.

21. O buhwa bo levakudwě ka Hěrod a bātâ kěmbâ jaju j' upolo, a diyendi o eka 'aju, a ka kalaka na bâ.

22. Ka bato ba yamanidě, na, *Ekadi i* joyi ja anyambě, i 'bě ja moto.

23. Ka enjěl ya Upangiyi ya bweya mâ, 'kabojana a ib' u vėkě Anyambě ivenda: ka mâ-a jewě na melâmbi, na waka.

24. ¶ Ndi ndaga j' Anyambě i tombwa-kindi ka jâ-ja vuha.

25. Ka Barnabas na Sâl ba timba oviya Jěrusalēm o bâ-ba makidě uloma *muabu*, ka bâ-ba nângâ Jân, i diyaki pě na din' ipâkwě, na, Mark.

KAPITA XIII.

1. Ndi church e diyakidi o Antiâk, e diyaki na basâki na bayokwedi na bahuu;

ba Barnabas na Simiân e tubakwě, na, Nijěr, na Lusius ya Sairini, na Maneën, a tombwaki na Hěrod ya titrark, na Sâl.

2. O bâ-ba diyaki ba haki Anyambě n' ihindina, ka Ilina Iyamu ja vâ, *na*, Bakakidi 'mba ni Barnabas na Sâl o ehavu 'amě e di bâ ndiyango.

3. O bâ-ba bědi hindinango ka kaliyango, ka bâ-ba kahidě bâ benâ ka bâ-ba validě *bâ*.

4. ¶ O bâ-ba lomudwě na Ilina Iyamu, ka bâ-ba vala nala o Silisia; ka bâ-ba tindiya pě omě ovaně na pâ Saiprus.

5. O bâ-ba diyakidi o Salamis, ba kalakiyi ndaga ja Anyambě o sinegâg ya Jiu. Ba diyaki tepě na uhayi *muabu* Jân.

6. O bâ-ba tombidě nenge na pâ Pafos, ka ba-ba kâbidě nganga pâkâ, e didi usâki mua vela ua Jiu, dina na Bar-jisus:

7. A ma diyaki Surjius Pâlâs gâveni ya ehe tě moto ua bokeli; a ndakiyi Barnabas na Sâl, na a vahakandi o yoka ndaga ja Anyambě.

8. Ndi Elimas ya nganga, ('kabojana dina jaju i ma uluakudwi nonaně,) a himbakidi bâ, a vahaka o vongudě gâven oviya ikamidě.

9. Já ndi ja Sâl (*a ma tubakwě tepě, na, Pâl*) a di londango n' Ilina Iyamu, ja batiďě mâ mihâ,

10. Ka mâ-a vâ, *na, A!* moto a di londango na bokeli boitě, n' ujolongo uitě, mwanua dčvčl, ndoba ya bwamu bočhčpi, wa dâye ilčngidč ja njeya ja Upangiyi, ja hongančngo?

11. Ndi hilakčte enâ ya Upangiyi ya bčndi o âvč-o jadi, o ka diyi pâgu, wa yčnč joba o ulingo. O njo pâkâ tepč ka bengumbe n' ivititi via kwa o mâ-a jadi; a kčkč a vahaka moto a tumbwana mâ o 'nâ bweyango.

12. Ka gâven a kamidč o mâ-a yčnčki nyanga e hamakidi, a ka mamaka iyokwanidi ja Upangiyi.

13. O Pâl na njamb' 'aju ba 'njuwedi o Pafos, ka bâ-ba pâ o Pâga ya Pamfilia: ka Jân a dika bâ na timbaka o Jčrusalčm.

14. ¶ Nd' o bâ-ba umuwedi o Pâga ka bâ-ba pâ o Antiâk ya Pisidia; o buhwa bo' Iyâjâ ka bâ-ba ngiya o sinigâg ka bâ-ba diya diya.

15. O belekanako na basâki be bčdi langwčngo, ka bapangiyi ba sinigâg ba bandidč bâ, *na, Inyi bamo na bana bina, ipč* o ndi na ndaga ya leva bato, kalakani.

16. Já ndi ja Pâl ja tēmě, o mât-a bi pēpiděngo na enâ ka mât-a vâ, *na*, Bamo ba Isreěl, na inyěni ba bangaki Anyambě, yokolakiděni.

17. Anyambě ya bato tě ba Isreěl ekaba a pânâki bahangwě bahu ka Mât-a betidě bato, o bā-ba diyaki bangi o ehe ya Ijipt, ka Mât-a věngidě bā omě na enâ eyádě.

18. Ka Mât-a yika pani jabu o nginga mabo ma mepuma manai.

19. O Mât-a bēdi jiliděngo betomba hěmbwēdi o ehe ya Kenan, ka Mât-a kabiya bā ehe 'abu na kwai.

20. Yeně kělěbě ka Mât-a vě bā bayěkidi ulingo mua kama ja mepuma inai na mabo matano, kwanga na pā o egombe ya Samuěl ya usâki.

21. Na mbuhěmbuhě ka bā-ba vaha upolo: ka Anyambě a vě bā Sâl mwan' 'a Kish momo ua diyâ ja Běnjamin, o ulingo mua mabo ma mepuma manai.

22. O Mât-a věngidě mât, ka Mât-a betidě bā Devid na a diyake upolo muabu: uajū a langwakidi ilango, na, Mbi duwango Devid ya Jěsi moto a didi ulema k' umuamě, a ka hayě upango 'muamě muěhěpi.

23. O ibângâ ja momo tě ekaně ndi ja

Anyambě i tēdě Isrēel Uhungini, Jisus, hohonganě na mohano *muaju* :

24. O Jân a kalakiyi bato ba Isreël baptisma y' iluwa o bohoboho, ovaně a t' o pá.

25. O Jân a diyakidi a ka 'mbaka o hânjâbidě ekěndâ 'aju, a ma vâki, *na*, O pivi-yaka li na mbi lě a nja? Mbi 'bě *Mâ*. Ndi hilakěteni, umbâkâ a bengakě 'mba, uamě a ha 'bě weyango tombe n' injuwa ja makogo *maju*.

26. Bamo *na* bana-bina, bana ba diyâ ja Ebreham, na tango e bangakě Anyambě, inyěni ndi o bandudwěni ndaga tē j' iyonga ekadi.

27. O ba Jērusalēm na bapangiyi babu ba ha yowakidě *Mâ*, tombe na moyi ma basâki ba ma langakwě buhwa boa Iyâjâ boěhěpi, ka bâ-ba hohonganě *beâ* o bâ-ba kwehakidě *Mâ*.

28. Tombe ka bâ-ba ha duwaki tina ya weyana *Mâ*, ba vahaki Pailat na a weyakidě *Mâ*.

29. O bâ-ba hohonganidě nyanga e lëndě-kudwě *Mâ* yěhěpi, ka bâ-ba hubě *Mâ* o ele, ka bâ-ba nangidě *Mâ* o budu.

30. Ndi Anyambě a pumbwakidi *Mâ* o iwedo:

31. Ka Mâ-a yĕnĕnĕ na ba vakiyi na Mâ o Galili na pâ o Jĕrusalĕm hwi iitĕ, ba di tali jaju o bato ba jadi.

32. Ndi ho langwakandi 'nyĕni sango 'a mbya ya na mohano u yohanakudwĕ baha-ngwĕ bahu,

33. Anyambĕ a timidi mâ na hwĕ, bana babu, o Mâ-a pumbudĕ Jisus; ka yâ e di lĕndwĕngo o Psamu y' ibale, *na*, O mwan' 'amĕ, buhwa tĕkabo ndi boamĕ bo jad' avĕ.

34. Ndi o pĕl' 'aju e pumbwakidĕ Mâ o iwedo, na a timbĕ pĕ ka bâ, a vâki kakana, Mbi ka vĕnd' inyĕni ngâtâ ja Devidi ja mbambaye.

35. Ovanĕ tepĕ o Mâ-a vâkĕ o *Psamu* opâkwĕ, na, Wa huludĕ uâvĕ A di Holi a bâkâ.

36. Ikabojana Devid a bĕkite mâ igona. jaju hayango, n' upango mua Anyambĕ, ka mâ-a kwa o viyâ, na nangakudwĕ o baha-ngwĕ ba jadi, ka mâ-a bâ.

37. Ndi ua Anyambĕ a pumbwakidĕ, au bâkâ.

38. ¶ Bamo *na* bana bina, yowakĕni na momo tĕkanĕ a kalakudwĕ inyĕni iyidwĕ ja mabe;

39. Ba kamakidě bēhēpi ba huwakudwi na belombo beēhēpi, ibeabu be ha 'bē na ngudi ya huwudwě na belekanako bea Mosēs, o pěl' 'aju.

40. Ndi bandamakidēni, o banga e di kaluwěngo o basāki, ya pā o inyēni-o jadi;

41. Inyēni ba pējēkě, hilakēni, wa manani, wa wani; ikabojana mbi hakandi ehavu o hwi janyu, ehavu 'anyu e ka mē-ndě o kamidēni, tombete moto a langwakate inyi yā.

42. O Jiu ba pūmidi o sinigāg, ka Jēntail ba hāhālidě na ndaga tēkadi i kalakudwě pē bā buhwa bo' Iyājā bopākwě.

43. O ebimba e kumbulanidi, ka Jiu iitě, na ba ma 'luakidi ikaliyedi, ba vitě Pāl na Barnabas; o bā-ba kali na bā, ka bā-ba sombiyě bā, na, ba hilimakide o diya na ehekwe ya Anyambě.

44. Buhwa bo' Iyāyā bopākwě, bo latakinyi manini ma na mboka yēhēpi ka yoka ndaga ja' Anyambě.

45. Ndi o Jiu ba yēni bebimba ka bā-ba viniya bā, ba ka kalaka bobē o pělě 'a belombo bea Pāl be kalaki, ba bomaka penda, ba kilaka Anyambě.

46. Ndi Pâl na Barnabas ba yâdâki pê n' iněně, ka bâ-ba vâ, *na*, Ma diyaki mala na ndaga ja Anyambě i take o kaludwě inyěni: ndi inyěni o věngiděndi já ni, o ndi yěněngo nyolo janyu na i 'bě weyango eměná e ha 'bě n' ihuku, yěněkěteni, ho vonguwendi o Jěntail ba jadi:

47. Ikabojana Anyambě e di hwě sombiyěngo na ho hake nonaně, *na*, Mbi nd' ávě těděngo na diyaka bwe ya Jěntail, *na* ovaně nd' ávě o ka diyě o iyongě ja mahuku ma he.

48. O Jěntail ba yoki nonaně, ba yěněki mbya, ba ka bendakě ndaga ja Upangiyi: tango e lenakudwě na ba ndi ba eměná e ha 'bě n' ihuku, ba kamakiděndi.

49. Ka ndaga ja Upangiyi ja hamana indendandenda těvině viěhěpi.

50. Ndi Jiu ba vegwakiděndi bajo bayamu ba ma dilakwě, *na* bato baněně ba mboka těně, ka bâ-ba ha Pâl na Barnabas njuke eněně, ka bâ-ba duma bâ o betěbě beabu.

51. Ka bâ-ba pupuwa bâ mahě ma beko beabu, ka bâ-ba pá o Ikonium.

52. Ka beyokwedi bea londa na mbya, n' Ilina Iyamu.

KAPITA XIV.

1. E diyakidi o Ikonium ka bâ bēhē ba vala o sinigâg ya Jiu ta, ka ndumba 'nēnē ya Jiu, tepē na Grik, ya kamidē na nyanga 'abu e kalakidi.

2. Ndi Jiu i ha kamakidē ba vegwakidi Jěntail, ka bâ-ba panga mapikiliya mabu ma bevaka na bana-bina.

3. Ba diyakindi ulingo uyaba ba kalaka ba bange, na Upangiyi a ma kamanakiya ndaga ja ehekwē 'aju, a hulakidē ndembo na belombo be mamakwē na be hamake na benâ beabu.

4. Ndi ndumba ya mboka e pēhiyendi bâ-kâ ba timba na Jiu, bâkâ na metodu.

5. O Jěntail na Jiu tepē na bapangiyi babu, ba vwi na ba pumaki bâ, na bâ-ba jongolidē bâ, ba ka bweyaka bâ malale,

6. O bâ-ba yowudē, ka bâ-ba kweya na vala o Listra na Derbe, mboka ja Laikaonia n' indendandenda ē jad' omē uluanidēngo.

7. Ka bâ-ba kaliya sango eyam' omē.

8. ¶ Mot' umbakâ a diyakindi o Listra, yēmiyēngo o beko, a didi ebokē oviya jemi ja nyangwē, a tamuwē.

9. A yokaki Pâl a kalaka : o mâ-a hilidē

má dihâ sii, ka mâ-a yënë mâ na a na ika-
midě i ka yongě mâ,

10. Ka mâ-a vâ joyi oba, *na*, Těměkě na
beko beávě de. Ka mâ-a soda, a ka ta-
mwaka.

11. O bato ba yeni nyanga ya Pâl e ha-
kidi, ka bâ-ba betě moyi mabu na etomba
ya Laikaonia, *na*, Bea anyambě be hubindi
o hwě-ho jadi na mevela mea bato.

12. Ka bâ-ba vangidě Barnabas, *na*, Jupi-
těr; Pâl, *na*, Měrkurius, ikabojana mâ ndi a
diyakidi ukali uněně.

13. Jâ ndi ja prist ya Jupitěr e diyakidi
o mboka ya vana nyati na malângâ o ma-
mbě ma megomba, ba ka 'mbaka o yambiya
bâ mwambo, bâ na bato.

14. O Metodu, Barnabas na Pâl, ba
yokidi ka bâ-ba nyaya ngâi jábu, ka
bâ-ba vala umbila o bato ba jadi, ba ya-
maka,

15. Ba vâkâ, *na*, Bamo, o haka li belombo
těkabe nande? Ho te bato ba itingidi k'
ivianyu, ho kalaki n' inyěni na vongwakani
oviya behayěhayě těkabe, na pâ o Anyambě
ya eměná e velakidi oba na he, na manga
na be jad' omě beěhěpi.

16. A hulakidě betomba beěhěpi, o ego-

mbe tě e di tombango, na ba tamwakete o njeya jabu mětě.

17. Ndi Au dikaka mâ mětě a diye na tali, a haki bwam' a vĕkĕ hwě mbwiya oviya oba, na hongodi ya bebuma, a londaka melema meahu na beja na mbya.

18. Manini ma na bu yâlâkĕ o kandidě bâ na ndaga tĕkadi, na ba yambakiye bâ mwambo.

19. ¶ Ka Jiu jákâ ja viya o Antiák na Ikonium, ba ka hihakidě bato, o bâ-ba bĕdi Pâl malali bweyango, ka bâ-bâ dula mâ o mboka o bwebwe, ba yebakiya na a wendi.

20. Ndi o beyokwedi be lungi mâ ka mâ a 'muwa, ka mâ-a pâ o mboka: bia bwe, ka bâ na Barnabas ba 'la o Děrbi.

21. ¶ O bâ-ba bĕdi sango eyamu kaliyango, o mboka tĕně, na bâ tepě bato baitě yokudĕngo, ka bâ-ba timba pĕ o Listra, na Ikonium, na Antiák.

22. Ba yâdâkidě malina ma beyokwedi, ba kelevakidě bâ na ba lilimakidě ikamidě tepě, na ho ka ngiyate o ipangiya ja Anyambĕ kabo na njuke eitě.

23. O bâ-ba pendi bâ batodu o church yĕhĕpi, na bâ tepě kaliyango, na bâ hindi-

nango, ka bâ-ba dikiya ba Anyambě 'abu e ma kamakidě.

24. O bâ-ba tombidě Pisidia ka bâ-ba pâ o Pamfilia.

25. O bâ-ba bēdi ndaga o Pâga kaliyango, ka bâ-ba huba o Atalia :

26. Ka bâ-ba 'muwa omě na pâ o Antiák, omě nd' o bâ-ba bweyakidě bâ ehewě ya Anyambě, o iha ja ehavu 'abu e ma haka.

27. O bâ-ba pâdi na bâ tepě church yolaněngo ka bâ-ba timbiya nyanga ya Anyambě e haki na bâ, na nyanga 'aju e dubuwi Jěntail jâmbě ja ikamidě.

28. Ka bâ-ba diya na beyokwedi omě ulingo uyaba.

KAPITA XV.

1. Ka bamo bâkâ ba vakiyedi o Judia, ba yokudě bana-bina, na, O t' o hěbwěni eřingidi ya Mosěs, wa yongeni.

2. O bâ na ba Pâl na Barnabas, ba yoman i jomano iněně, na bâ-ba boma tepě penda eněně, ka bâ-ba tinga na Pâl na Barnabas na bapâkwě ba tango tě ba beta-ke, na vala o Jěrusalēm o metodu na batodu ba jadi, ka lenidě ndaga těkaně.

3. O church e bi bâ dikiděngo, ka bâ-ba ka hama o Finise na Semeria, ba langwaka nyanga 'a Jěntail e didi uluango: ka bâ-ba panga bana-bina ba yěněki mbya eněně.

4. O bâ-ba pâdi o Jěruselēm, ka church ya vėhělěkidě bâ, na metodu, na batodu, ka bâ-ba languwa belombo bečhěpi, nyanga ya Anyambě e hadi na bâ.

5. Ndi bâkâ ba tēměkindi ba diyaki ba pělě 'a Farisi, ba ma kamakidě, na, E na mala ma na ba hěběkwě, na bâ-ba ka tata-ka elekanako ya Mōsēs.

6. ¶ Ka metodu na batodu ba yolaně o ihilě ja ndaga těkaně.

7. O bâ-ba bomi penda, ka Pitěr a tēmě ka mâ-a vâ na bâ, na, Bamo na bana-bina, o teni yowěngo nyanga ya Anyambě e pâ-nâki 'mba o tango 'ahu, na Jěntail ba yokaki ndaga ja sango eyamu n' udumbu 'muamě, na bâ-ba ka kamakidě.

8. Ka Anyambě, a yowudě melema, Mâ mětě a diya bâ tali, ka Mâ-a vě bâ Ilina Iyamu te ka *Mâ-a věki* hwě:

9. A yěne hwě na bâ nyang' ibale, ka Mâ a bonguwa melema meabu n' ikamidě.

10. Nd' e lě nde eanyu e yějěkiyě Anyambě na o bătâkiděndini mabâlu ma beyo-

kwedi panga, eahu na bahangwě bahu e ha diyaki na ngudi ya bapě ?

11. Ho kamiděngo na ehekwě ya Upangiyi Jisus Kraist, ndi eahu e ka yongani, yâ nyanga tē te eabu.

12. ¶ Jâ ndi ja ebimba yěhěpi ja vâlâmiyě ba ka yokolakidě ka Pâl na Barnabas ba ma langwaka nyanga ya Anyambě e ma haka megoma na belombo be mama-kwě na benâ beabu.

13. ¶ O bâ-ba vâlâmiyedi ka Jems a timbě, na, Bamo na bana-bina, ta yokolakidi 'mba ni.

14. Simion a languwendi nyanga ya Anyambě e yalakidě o lumbiya Jěntail, o huduwa bâ bato ba dina jaju.

15. Ndaga ja basâki i lataka tepě na ekae ; ka yâ di lěndwěngo, na,

16. Na mbuhěmbuhě vâkâna Mbi timbindi, n' umba-mba longa mâkâ mua Devid u kwedi : Mbi ka longi bea huluwango, n' umba-mba tēdē mâ :

17. Na ovaně nd' o bato ba di dikana-ngo ba ka vahě Upangiyi, na Jěntail i tubudwě dina jamě jěhěpi, nonaně ndi ka Anyambě tē e hakě belombo tēkabe beěhěpi, a vâkě.

18. Behavu bea Anyambě beěhěpi be te yowaněngo o Mâ-a jadi oviya jali ja he.

19. Vâkâna ijamě joyi ndi na ho hakeni ba Jěntail ba didi uluango o Anyambě a jadi njuke:

20. Ndi ho lěnděkiye bâ ni bejangana-ngobo bea na ba bambwake ijongoliya, na megano, na ihonde, na belombo be dibakwě jeku na makiya.

21. Ikabojana Mosěs oviya ovyo, a te na ba kalakiyě mâ o mamboka měhěpi, a langakwě o sinigâg buhwa boa Iyâjâ beěhěpi.

22. Ka metodu, ba batodu, na church yěhěpi, ba tândâ o bâ-ba pâni bato ba njamba 'abu, ka bâ-ba loma bâ na Pâl na Barnabas, o Antiâk, ba Judas e tubakwě, na, Barsabas, na Sâilas, bato baněně o tango ya bana-bina:

23. Ka bâ-ba banda bâ mbando i kěkě kakana; Metodu, na batodu, na bana-bina, ba homakandi bana ba banyangwě ba Jěntail ba jad' o Antiâk, na Siria, na Silisia.

24. O hwě-ho yokaki na bâkâ ba vakiyendi o hwě-ho jadi ba hakindi 'nyěni njuke na ndaga, ba uluakidě malina manyu, na, *Ta* hěbwěni, wa tatani belekanako; ho věye bâ elekanako *ka yeně*:

25. Ka hwě-hwa yěně bwamu o hwě-ho di lataniyango itinga jâkâ na ho pânâke bamo, na hwě-hwa loma bâ na Barnabas na Pâl, ibahu ba tândâkě ;

26. Bamo ba di beměná beabu pāděngo o mahihi o nyanga ya dina ja Upangiyi Jisus Kraist.

27. Ho lomindi Judas na Sailas, ba ka languwate inyěni belombo tě n' udumbu.

28. Ikabojana hwě n' Ilina Iyamu ho yě-něngo na e bwamu na ho bapidě pě inyěni jumba iněně wa na belombo te be di na mala ekabe ;

29. Na, věngěměkěni oviya bejaka be yambakudwě megano, na makiya, na belombo be dibakwě jeku, n' ihonde ; o věngiděngěni nyolo janyu oviya belombo těkabe, vâkânâ o handi bwamu. Diyaki pâlâ.

30. O bâ-ba věwudwě ekěndâ ka bâ-ba pâ o Antiâk : o bâ-ba yolidě ebimba ka bâ-ba bweyidě bâ mbandô.

31. O bâ-ba langi yâ, ba ka peyaka na ndaga těně.

32. O Judas na Sailas, ba diyaki tepě basâki bâ metě, ba ka levaka bana-bina na ndaga iitě nangudi, ba ka yâdâkidě bâ.

33. O bâ-ba diyedi omă ulingo, ka bana-

bina ba hulidě ba na jonga, na pâ o metodu me jadi.

34. Ndi Sailas a tândâkindi o diya pě omě ulingo.

35. Pâl, bâ na Barnabas ba diyaki tepě o Antiâk, bâ na bapâkwě baitě ba yokwa-kidě, na bâ-ba kalakiya ndaga ja Upangiyi.

36. ¶ Hwi jáká .kělěbě, ka Pâl a vâ na Barnabas, na, Ho t' o vala ka pepuwa bana-bina o mamboka mēhēpi imahu ma kali-yedi ndaga ja Upangiyi, *hwa ta yěně* ka bâ-ba hakě.

37. Ka Barnabas a panga na ba 'lani Jân, a di pě na dina ipâkwě, na, Mârk.

38. Ndi Pâl au yěněkě na e bwamu na ba valanaka mâ, na o mâ-a dikaki bâ o Pamfilia, a vale pě na bâ o ehavu.

39. O jomano i kenidi ka bâ-ba pēhě, ekaně a kěkě eaju pělě, ekaně a kěkě eaju pělě: ka Barnabas a nângâ Mark, ka mâ-a tindiya na vala o Saiprus;

40. Ka Pâl a pânâ Sailas, o bana ba nyangwě ba bweyidě bâ ehekwě 'a Anyambě, ka mâ-a vala.

41. Ka mâ-a tomba o Siria na Sailisia, a kěkě a yâdâkidě ba church.

KAPITA XVI.

1. Já ndi ijabu ja pâ o Děrbi na Listra : ka bâ-ba kâbidě eyokwedi omě, dina na Timotius, mwana ua mwajo 'mbâkâ ua Jiu, a ma kamakidě ; ndi hangwě a *diyakindi* ua Grik :

2. Ua bana-bina ba diyakidi o Listra na Ikonium, a ma tubaka itubi iyamu.

3. Mâ ndi ua Pâl a pangakidi o valana ; ka mâ-a nângâ mâ, ka mâ-a hěbě mâ, na jângâ ja Jiu i diyakidi o ekulu tēnē : ika-bojana bâ bēhēpi bu dimbakiya na hangwě a ndi ua Grik.

4. O bâ-ba ma khamaka o mamboka, ba ka bweyakidě bâ mbando ja metodu, na batodu ba diyakidi o Jěruselēm, i bandakidi.

5. Ka church ja huka ikamidě, i ka vuhaka buhwa boěhēpi.

6. Nd' o bâ-ba tombidě Frigia n' indandanda via Galesia, o Ilina Iyamu i kandidě bâ na ba kalakiye ndaga o Asia,

7. O bâ-ba bēdi pângo o Mysia, ka bâ-ba yějě o vala o Betinia, ndi Ilina ju hula-kidě bâ.

8. O bâ-ba tombi baka na Mysia, ka bâ-ba huba na pâ o Troas.

9. Ka Pál a yěně ehihila na bulu. Moto ua Masidonia a jadi de, a hâhâlâkidě má, na, Vaka o Masidonia, ka hana hwě.

10. O mâ-a bědi ehihila yěněngo, ka hwě hwa panga ekěndâ ya Masidonia o njo pâ-kâ, yowěngo mětě na Upangiyi a ndiyi hwě ka kaliya bâ sango eyamu.

11. O hwě-ho 'njuwedi o Troas, ka hwě-hwa pâ na ikângâ tě ja jákâ o Samotresia, bopâkwě o Niapolis;

12. Oviya omě na pâ o Filipai, e di mboka eněně o ekulu tě ya Masidonia yeně, yâ tepě kâlóni: ho diyakindi o mboka těně mběi ya hwi.

13. O buhwa boa Iyâjâ ka hwě-hwa umuwa o mboka, ka hwě-hwa pâ baka na viho o ikaliya i 'mbakid' o hawě; na hwě na diyanakidě ho ka kalaka na bajo, ba ma pâkâ omě.

14. ¶ Ka mwajo umbâkâ dina na Lidia, ehambi ya mangâla, o mboka ya Taiataira, a ma kalakiya Anyambě, a yoka; o Anyambě a dubuwedi ukema 'muaju, a ka yokolakidě belombo bea Pál be ma kalaka.

15. O bâ na ba ndabo 'aju ba baptaisudwě, ka mâ-a hâhâlidě hwě, na, Oningě na o ndi 'mba ni yěněngo na mbi na ikamidě

ja Anyambě, ndi vakani o ndabo 'amě, wa diyani omě. Ka mâ-a dula hwě.

16. E diyakindi o hwě-ho kěki ka kaliya, ka mwajo 'mbâkâ, a diyaki hweywěngo n' ilina i ma sâkâkâ, a ngakidě ba duwě mâ nyeno eněně na nyanga 'aju e ma sâkâkâ, a latana hwě:

17. A ma vitanakě hwě na ba Pâl, a ka yamaka, na, Bamo těkaba ba ndi bahayi ba Anyambě ya oba mětě, ba levakidě hwě njea y' iyonga.

18. A ma hakandi ekae hwi iitě. Ndi o Pâl a yěni ngěbě ka mâ-a vonguwa, ka mâ-a vâ na ilina, na, Mbi sombiyakěndi âvě na dina ja Jisus Kraist, na, věngěmėkě o mîa a jadi. Ka mâ-a věngěmė iwěla tě.

19. ¶ O ba duwě mâ ba yěnidi na ipite jabu i ma kovanaka i 'bě pě, ka bâ-ba bweya Pâl na Sailas, ka bâ-ba dula bâ o ihambanido, o bapangiyi ba jadi,

20. Ka bâ-ba pânâ bâ o bayěkidi bajadi, na, Bamo těkaba ba ndi ba Jiu, ndi na haki mboka 'ahu njuke eněně,

21. Na bâ-ba yokwakidě mběmbâ i ha 'bě hohanganěngo na ho pahakiya, tombe ho tataka, jambojana hwě ba Roma.

22. Ka ebimba ya umwanidě ukenda

'mbâkâ na o bâ-ba jadi: ka bayëkidi ba nyaya ngâi jabu, ka bâ-ba sombiya na ba bomakwě.

23. O bâ-ba bweyi bâ mekasa meitě, ka bâ-ba vamě bâ o ndabo-ivititi, na, utati mua ndabo-ivititi na a bandamakidě bâ bwamu.

24. O mâ-a pahiyedi ileva tědině, ka mâ-a ngidě bâ o ndabo-ivititi ya 'tema, ka mâ-a kâmidě bâ meboka.

25. ¶ Na bulu-tema, ka Pâl. na Sailas ba kaliya, ba ka tumbwakidě lembo lo benda-kě Anyambě: ka ba diyakidi o ndabo-ivititi ba yoka.

26. O njo pâkâ tepě, he ka ninganaka, jali ja ndabo-ivititi i ka hohaka: ka mambě mēhēpi ma dubwaniya o mbenjě pâkâ, ka meboka meabu mea bēhēpi mea hāniyě.

27. O utati mua ndabo-ivititi a 'muwend' o viya viaju, a 'la ka yěně mambě ma ndabo-ivititi bwe, ka mâ-a hoduwa ukwala 'muaju na a ombakandi o weya nyolo 'aju, a yebakiya na mbwedi i mand' o kweya.

28. Ka Pâl a yama joyi oba, na, O kokakidě nyolo 'âvě; 'kabojana ho te hwě bēhēpi.

29. Ka mâ-a ndiya vituwa, ka mâ-a soda

na ngiya, a vaka a likimaka, ka mâ-a kwa o boho boa Pâl na Sailas ;

30. Ka mâ-a pumana bâ, ka mâ-a vâ, na, Bamo, mbi hake læ nja 'lombo-ě e ka yongě 'mba ?

31. Ka bâ-ba vâ, na, Kamakidě Upa-ngiyi Jisus Kraist, vâkâna o yongindi, na ba ndabo 'âvě.

32. Ka bâ-ba kala na mâ ndaga ja Upa-ngiyi, tepě na ba diyakidi o ndabo 'aju běhěpi.

33. Ka mâ-a nângâ bâ o iwěla tě na bulu, ka mâ-a tuka bâ mabibi ; ka mâ-a baptaiswě, bâ na ibaju běhěpi njamba pâkâ.

34. O mâ-a ngidě bâ o ndabo 'aju, ka mâ a tědě bâ beja, a ka peyaka, kamiděngo Anyambě, bâ na ndabo 'aju yěhěpi.

35. O buhwa bo yadi ka bayěkidi ba loma sarjěnt, na, Hulakidi bamo těbaně, ba kěke.

36. Ka utati mua ndabo-ivititi a languwa ndaga tě Pâl, na, Bayěkidi ba lomandi joyi na hulamakani, wa 'lani, ndi kěkěni, o ka kěki na jonga.

37. Ndi Pâl a vâki na bâ, na, Ba hwě bomango o bwebwe ho kobe, ho jadi ba

Roma, na bâ tepě hwě vaměngo o ndabo-ivititi, na ba-pumaki pě hwě ikutakuta? nyawě na vilolombo; ndi ba vake bâ mětě na bâ-ba pumě hwě.

38. Ka sarjěnt ba languwa ndaga tēkadi bayēkidi, ba ka bangaka, o bâ-ba yokidi na ba ndi ba Roma.

39. Ka bâ-ba pâ, ka hâhâlidě bâ, ka bâ-ba pumě bâ, ka bâ-ba vaha bâ na ba umwake o mboka 'abu.

40. O bâ-ba pumidi o ndabo-ivititi, ka bâ-ba ngiya o ndabo ya Lidia, o bâ-ba yěni bana-bina, ka bâ-ba homba bâ, bēngě ba kēkě.

KAPITA XVII.

1. Ndi o bâ-ba tombidě Amfipolis na Apollonia, ka bâ-ba pa o Těsalonika, omě o diyaki na sinigág ya Jiu.

2. Pâl, oviya i diyakidi itingidi viaju, ka mâ-a ngiya o bâ-ba jadi, hwi j' Iyâjâ ilalo, a vėkě bâ tina o ndaga ja Anyambě.

3. A bumwakidě a pulakidě na ma diya-ki mala na Kraist a yěněki betuniya, na Mâ-a pumbuwa pě: na Jisus tē eamě e kalakiyě ekaně, ndi Kraist.

4. Ka bâkâ ba kamidě, ka bâ-ba timba na Pâl na Sailas, ndumba eněně ya Grik i ma kalakiya, na bajo baněně mběi 'něně.

5. ¶ Ndi Jiu i ha kamakidě, ba umwaki n' ivina, ka bâ-ba nāngâ bato bâkâ babe ba ekondo ya hubiyango, ka bâ-ba lata njamba, ka bâ-ba ha ilombe o mboka yěhěpi, ka bâ-ba kuhwa ndabo ya Jeson, na ba vahakandi o pumě bâ o bato ba jadi.

6. O bâ-ba ha duwi bâ ka bâ-ba dula Jeson na banabina bâkâ, na pânâ bâ o bapangiyi ba mboka ba jadi, ba yamaka, *na*, Ba uluakidě he, melo na he, ekaba ba pâ tepě okava;

7. Ba Jeson ba ngidě ekaba, ekaba bēhepi te ba hingake na elekanako ya Sisar melo mbiani, na wa bi pě na upolo upâkwě, na, Jisus.

8. Ka bâ-ba ha bato na bapangiyi ba mboka těně njuke, o bâ-ba yoki belombo tēkabe.

9. O bâ-ba panganidě na Jeson na bapâkwě, ka bâ-ba hulidě bâ.

10. ¶ Ka bana-bina ba hungana o validě Pâl na Sailas na bulu, na pâ o Beria; o bâ-ba pâdi *omě*, ka bâ-ba ngiya o sinigág ya Jiu.

11. Ekaba ba diyaki batwëbatwë wa na ba Tësalonika, ikabojana ba diyaki kokëngo n' ivëhëlidë ja ndaga o mapikiliya mabu, n' ibuta ja ndaga ja Anyambë, buhwa boëhëpi, n' ipë belombo tëbenë be te nonanë.

12. Ovanë nd' o baitë ba kamakidë: na bajo ba ma dilakwë ba Grik, na bamo mbëi 'nënë.

13. Ndi o Jiu ja Tësalonika ba yowudë na Pâl a kaliya ndaga ja Anyambë o Beria, ka bâ-ba lataniya tepë omë ba ka vegwakidë bato.

14. Jâ ndi ja bana-bina ja hungana o validë Pâl na a këke ona a 'mbaka o vala o manga: ndi Sailas na Timotius ba dikana-kite omë.

15. Ka ba tumbwanaki Pâl, ba pâdë mâ o Athëns: ka bâ-ba vala o mâ-a sombidë bâ, na Sailas, na Timotius ba hunganake o vala o mâ-a jadi.

16. ¶ Ndi o Pâl a diyakidi a vengaka bâ o Athëns, k' ilina jaju ja betë, o mâ-a yëni mboka londango na megano.

17. Ovanë nd' o mâ-a ma kalakà na Jiu na bato ba ma kalakiya na ba ma lataka na mâ o sinigâg na lohambanido, buhwa boëhëpi.

18. Já ndi ja bato b' iyowě bákâ ba Epikurus na ba Stoik, ba dibidě mâ: bákâ bâ, na, Moto tē ua evâvâlâ ekaně a 'mbaka lě o vâ na? Bákâ mâ, na, A umwanakiyi na a ndi elevidi ya bea anyambě beyânâ: jambojana o mâ-a kalakiyi bâ Jisus na ipumbuwa.

19. Ka bâ-ba nângâ mâ ka bâ-ba pânâ mâ o Ariapogus, na, Yowakidě hwě eyokwidi tē ya kya eâvě e kalakiya ekae?

20. Ikabojana o pâkiděndi belombo be mamakwě o matâ mahu: ho vahakandi o yowě ka belombo tēkabe be jadi.

21. (Ikabojana ba Athěns na bangi ba diyakidi omě, bu tombakě egombe 'abu iha ja elombo 'pâkwě, kabo n' ilanguwa tombe 'yoka ja elombo eyânâ.)

22. ¶ Já ndi ja Pâl ja tēmě o hanganě ya ukodi mua Mars, ka mâ-a vâ, na, Inyěni bamo ba Athěns, mbi hilěngo na o ndini na relijin eitě o pělě ya belombo beěhěpi.

23. Ikabojana o 'mba-mbi diyaki mbi tombaka, mbi hilakiděndi megano manyu, k' umba-mba duwa âltar, lěndwěngo, na, **YA ANYAMBĚ E HA 'WANĚ.** Uanyu a kalakiyěte o yowi Mâ ni, ekaně Mâ ndi uamě a langwakiyě inyěni.

24. Anyambě e velaki he na belombo be jad' omě, o Mâ-a didi Upangiyi mua he na oba, a diye o těmpil i hakwě na bená :

25. Na Mâ-a kalakudwě tepě na bená bea bato bwěsě ona a na elombo 'aju e nyamakě, jambojana Mâ t' a vėkě bėhěpi eměná na pudi, na belombo beėhěpi.

26. Na Mâ-a velango betomba bea bato beėhěpi makiya mākā, na ba diyake o boho boa he, ka Mâ-a lenidě hongodi e vānaku-dwi ovyo, na mekabo mea bolongi boabu :

27. Na ba vahakiye Upangiyi n' ipě ba ka bodidě Mâ, na bâ-ba duwa Mâ, tombe ka Mâ-a ha 'bě yaviděngo na hwě bėhěpi :

28. Ikabojana Mâ nd' uahu a diyanakě, na hwě-ho tamwaka, na hwě-ho jadi ; bwěsě te ka balěndi banyu mětě bākā ba vākě, na, Ikabojana ho tepě beloani beaju.

29. Ndi o hwě-ho didi beloani bea Anyambě, hwa lukaka o pikiliya na Anyambě a kwanaki hika, tombe silvěr, tombe ilale i pakakwě n' ikěngě na bokeli boa moto.

30. Anyambě a ma pojaki begombe bea bohuma těkabo ; ndo kya okava a ka sombi-yaki bato bėhěpi ba loboko lėhěpi na ba uluake :

31. Ikabojana a leniděngo buhwa i boaju

bo ka yëkidě he, yëkě eyamu, na Momo tě uaju a di kenjěngo; uaju a jadi yowu-děngo bato bēhēpi n' ipumbudě jaju i pumbwakidě Mâ.

32. ¶ Nd' o bâ-ba yokidi o pělě ya ipumbuwa, bâkâ ba ka vĕhĕkě, bâkâ mâ, na, Ho ka yoka itato tĕkadi na nâvĕ egombe 'pâkwĕ.

33. Ka Pâl a vala oviya o bâ-ba diyakidi.

34. Ndi bamo bâkâ ba natamakite o mâ-a jadi, ka bâ-ba kamidě: ba diyakidi o tango tě ndi o Daionisius ya Ariapogus, na mwajo dina na Damaris, na bapâkwĕ tepĕ.

KAPITA XVIII.

1. O belombo tĕkabe be bĕdĕ kĕlĕbĕ, ka Pâl a 'muwa o Athĕns, na pâ o Kârint;

2. Ka mâ-a kâbidě Jiu pâkâ, dina na Akwila a jakudwĕ o Pântus, a viyate o Itali kya, bâ na mwad' 'aju Prisila, ('kabojana Klâdias a sombiyakidi Jiu jĕhĕpi na i 'mwake o Roma,) ka mâ-a pâ o bâ-ba jadi.

3. O mâ-a diyakidi ebano tĕ ka bâ, na bâ-ba diya, a ka haka ehavu, ('kabojana eabu evângâ e diyakidi ndi iha ja meâkâ.)

4. A věkě tina o sinigâg buhwa bo' Iyâjâ boěhěpi, a tunduakidě Jiu na Grik.

5. O Sailas na Timotias na pâdi oviya Masidonia, ka Pâl a babaliya ilina, a ka pupaka Jiu na Jisus ndi Kraist.

6. O bâ-ba himbidě nyolo jabu mětě, ba ka kilaka, ka mâ-a pupuwa ngâi *ja-ju*, na bâ, na, Makiya manyu ma *běte* o meolo meanyu mětě; mbi tanindi: oviya okava tepě umba-mbi kěkě o Jěntail ba jadi.

7. ¶ Ka mâ-a 'nuwa omě, ka mâ-a ngiya o ndabo ya momo 'mbâkâ a ma kalakiya Anyambě, dina jaju ndi Justus, ndabo 'aju e ma bakaki na sinigâg.

8. Ka Krispus ngâwě ya sinigâg, a kamidě Upangiyi, bâ na ba ndabo 'aju běhěpi: ba Kârint bătě o bâ-ba yokidi, ba kamakiděndi ka bâ-ba baptaiswě.

9. Já ndi ja Upangiyi ja kala na Pâl na bulu, na ehihila, na, O bangake, ndi kalaka, o vâlâmâkiye:

10. Ikabojana Mbi te na nâvě, o 'bě na moto a ka kupaně âvě, na kokakiděnd' âvě: 'kabojana Mbi na bato bătě o mboka tēkaně okava.

11. Ka mâ-a diya *omě* upuma umbâkâ

na ngândě utoba, a yokwakidě bâ ndaga j' Anyambě.

12. ¶ O Galio a diyakidi gâven ya Akea, Jiu ba logwakindi, ka bâ-ba timba ukenda umbâkâ o ihimbidě ja Pâl, ka bâ-ba pâdě mâ o 'diya ya yěkě,

13. Na, Ekaně a tundwakidi bato na ba kalakiyi Anyambě nyanga e ha 'bě ya elekanako.

14. O Pâl a diyakidi a 'mbaka o dubuwa udumbu, ka Galio a vâ na Jiu, na, Ka na i ndi 'tato ja ibevaniya tombe ja bobē, e inyi Jiu, te mbi te na tina ya 'yika n' inyēni.

15. Ndi oningě na i te penda ja ndaga na mina na belekanako beanyu, umbwakiyani *yeně* inyēni mětě; mba yěkidě itato ka dině.

16. Ka mâ-a duma bâ o 'diya ya yěkě.

17. Ka Grik jěhěpi ja nângâ Sâstēnes, ngâwě ya sinigâg, ka bâ-ba boma mâ o boho boa ediya ya yěkě: ndi Galio au yěněkě belombo tēkabe beěhěpi isâlâ.

18. ¶ O ekabe be bědi kělěbě, ka Pâl a diya pē *omě* ulingo uitě, ka mâ-a yokaně bana ba nyangwě, ka mâ-a tindiya na vala o Siria, bâ na Prisila, na Akwila; a kěngě-

kidi molo muaju o Sěnkria; ikabojana a diyaki na panga.

19. O mâ-a pâdi o Ěfisus, ka mâ-a dika bâ omě: ndi mâ mětě a ngakiyendi o sini-gâg, a vĕkě Jiu tina.

20. O bâ-ba vâki na a tepě o diya na bâ ulingo, au kamakidě:

21. Ndi a yohanakidi bâ, na, Tombete na nalě mbi ka tatandi isango tĕ i vakě o Jĕrusalĕm ekadi: ndi mbi ka timbate o inyĕni-o jadi, oningě Anyambě a bagina. Ka mâ-a tindiya oviya Ěfisus.

22. O mâ-a hĕdĕ o Sĕsaria, ka mâ-a beta ka homa church, ka mâ-a huba na vala o Antiâk.

23. O mâ-a tombidě ulingo, ka mâ-a 'mu-wa na vala o ehe ya Galesia na Fligia yĕ-hĕpi, a yâdâkidě beyokwedi beĕhĕpi.

24. ¶ Ka Jiu pâkâ dina na Apâlâs, a jakudwĕ o Alĕxandria, ukali uyamu bade mětě na ndaga ja Anyambě, ya pâ o Ěfisus.

25. Momo tĕkanĕ a yokwakudwĕndi nje-ya ya Upangiyi; o mâ-a diyaki yâdângo ilina, a ma kalakandi na mâ-a yokwakidě tepě ndaga ja Anyambě nangudi, a dite yowĕngo kabo baptisma ya Jân.

26. A ka yalaka o kala o sinigâg, a ba-

nge. O Akwila na Prisila ba yokidi, ka bâ-ba nângâ mâ ka bâ-ba pêhě mâ njeya ya Anyambě bwébwe.

27. O mâ-a pangidi o tomba na vala o Akea, ka bana ba nyangwě ba lëndě bejannganangobo, be levake beyokwedi na ba vĕhĕlĕkidě mâ: o mâ-a pâdi, a ka hanaka ba ma kamakidě na ehekwě.

28. A ma sulaki Jiu nangudi, a levakidě o ndaga ja Anyambě, na Jisus ndi Kraist.

KAPITA XIX.

1. E diyakindi o Apâlâs a diyakidi o Kârint, o Pâl a tombidi o betěbě bea oba ka mâ-a pâ o Ěfîsus: ka mâ-a kâbidě beyokwedi beâkâ omě,

2. Ka mâ-a vâ na bâ, *na*. N' inyĕni na kamidě, o teni pahiyango Ilina Iyamu? Ka bâ-ba vâ na mâ, *na*, Ho 'bě yokango nana o na Ilina Iyamu.

3. Ka mâ-a vâ na bâ, *na*, Ndi o baptaisa-kudwě lě ni o nja jadi? Ka bâ-ba vâ na mâ, *na*, O baptisma ya Jân.

4. Jâ ndi ja Pâl ja vâ, *na*, Mbambayě Jân a ma baptaisakandi na baptisma ya

iluwa, a vâkâ na bato na ba kamakidě a bengakě mâ, Mâ mâně ndi Jisus Kraist.

5. O bâ-ba yokidi ka bâ-ba baptaiswě na dina ja Upangiyi Jisus.

6. O Pâl a kahidě bâ benâ k' Ilina Iya-mu ja puga bâ ; ba ka kalaka na bemi, ba ka yokwakidě.

7. Bamo tě bēhēpi ba diyakindi baka na jomu na babale.

8. Ka mâ-a ngiya o sinigâg, a ka kalaka o ulingo mua ngândě ilalo, a bangi, a boma-ka penda, a tunduakide belombo bea pělě ya ipangiya ja Anyambě.

9. Nd' o bâkâ ba deli melema, bá kamidě, ndi ba ka haka pě o kala na ebimba o boho o pělě ya njeya tēkaně, ka mâ-a vėngēmě, na paluakidě beyokwedi, a boma-ka penda o sikul ya Tairanus buhwa boěhēpi.

10. Ekae e diyakindi o ulingo mua me-puma mebale ; ovane nd' o ba diyakidi o Asia bēhēpi, na Grik, na Jiu, ba kokanaki-yedi iyoka ja ndaga ja Upangiyi Jisus.

11. Ka Anyambě a ha megoma na me-huhu na benâ bea Pâl ;

12. Ovaně nd' o bevělēhi na menamba be vakiyě o nyolo 'aju be pāngě o mebēdi me

jadi, tepě bebědi be vëngëmëkë, malina mabe ma pumaka o bâ-ba jadi.

13. ¶ Jâ ndi ja Jiu jâkâ i ma lengaka, ba ma vëngëkidi malina, ja nângâ yâ na ba ka ndakiyi ba diyakë na malina mabe, na dina ja Upangiyi Jisus, na, Ho kanakiyand' ävë Jisus ya Pâl e kalakiyë.

14. O diyaki tepě na bana hëmbwëdi ba Siva ua Jiu, a diyaki ngâwë ya prist, ba haki nonanë.

15. Ka ilina ibe ja timbë, na, Mba dimbakiya Jisus, n' umba-mba dimbakiya tepë Pâl; ndi inyi lë ba nja?

16. Ka moto tē, a diyaki na ilina ibe, a soda o bâ-ba jadi, ka mâ-a kâbidë bâ, ka mâ-a bala bâ, ba ka pumaka o ndabo tēnë mehamba na mavenge,

17. Ekæ e yowanakidi na Jiu na Grik i diyakidi o Ěfisus jëhëpi: ka jângâ ja bweya bâ bëhëpi, ka dina ja Upangiyi Jisus ja kena.

18. Ka baitë ba kamakidë ba viya, ba ka mëmëkë, ba levakidë behadi beabu.

19. Ka baitë ba diyaki na megono mea utimbo, ba vana bejanganangobo beabu, ka bâ-ba tumba beâ o boho boa *bato* bëhëpi; ka bâ-ba langa beâ beëhëpi ihambe, ka bâ-

ba ~~hohonganě~~ mabo ma tâjen ja *bepěhi* bea hika matano.

20. Nonaně nd' o ndaga ja Anyambě i tombwakidi ka já ja kebě.

21. ¶ O belombo tēkabe be bēdi kēlēbē, ka Pāl a yana na ilina, na, oningě a ka hamingě o Masidonia na Akea vākāna a valindi o Jerusaleṃ, na, Mba viya ovoně, vākāna mbi yēni tepě Roma.

22. Ka mǎ-a loma ba ma hakiya mǎ ba-
bale o Masidonia, Timotius na Erastus; *ndi*
mǎ mētě a diyakindi o Asia ulingo.

23. O yǎ egombe tē ka ilombe via hawě
o pělě ya njeya tēkaně.

24. Ikabojana *momo* 'mbākā dina na
Dimētrius, ukuli mua hika, a ma haka Dia-
na mbago ja hika, a ma ngakidě ba duwě
ehavu nyeno eněně;

25. Ka mǎ-a ndiya bǎ na ba ma haka
ehavu tē ndiyango kota, ka mǎ-a vǎ, na,
Bamo, wa dimbakiyani na ehavu tēkae ndi
eahu e duwanakě boněně boahu.

26. O yěnekěteni, n' inyěni o yokaka te-
pě ni na hanga kabo o Ěfesus dipǎ, ndi piělě
na Asia yěhěpi te ya Pāl tēkeně, a tundua-
kidě na mǎ-a 'luakidě bato baitě, a vākā
na behakwě na benǎ be 'bě bea anyambě.

27. Ovaně vâkâna e 'bě kabo ehavu tē eahu ekae dipâ e di na mahihi ma ihadivu-dwi, ndi na tēmpil ya anyambě eněně ya mwajo, Diana, ua Asia na he yěhěpi a kalakiyate, a ka pějwě na boněně boaju boa wa.

28. O bâ-ba yoki nonaně ba londaki na jeku, ba ka yamaka, na, Diana ya ba Ěfesus a nd' o kena.

29. Mboka yěhěpi ya bě ngwaněě: o bâ-ba bweyi Gaius na Aristarkus, bamo ba Masidonia, ba ma jopaka na Pâl njamba, ka bâ-ba nganidě njamba pâkâ o ikenga iněně,

30. O Pâl a 'mbakidi o ngiya na vala o bato ba jadi, ka beyokwedi bea himbidi mâ.

31. Ka bâkâ ba diyakidi baněně o Asia, ba diyaki mbweyi jaju, ba banda mâ mbando, ba vahaka na a jijakiye o ngiya o ikenga.

32. Bâkâ ba yama yeně elombo, bâkâ ba yama epâkwě: 'kabojana ebimba e diyaki ya juka, baitě bu yowakě tina 'abu e latanakiyedi.

33. Ka bâ-ba dula Alěxanda o ebimba e jadi, o Jiu ba tēdě mâ o boho. Ka Alě-

xanda a pëpidë na enâ, o mâ-a 'mbakidi o kamaniya nyolo 'aju o bato ba jadi.

34. Ndi o bâ-ba yowudë na a ndi ua Jiu, bëhëpi, joyi jâkâ, ba ka yamaka ulingo mua ba mawëla mabale, Diana ya ba Ēfesus a *nd'* o kena.

35. O ulëndi mua mboka a vâlâmidë bato, ka mâ-a vâ, *na*, Inyëni bamo ba Ēfesus, nja moto-ë a dimbakiyë na mboka ya ba Ēfesus e kalakiyandi anyambë enënë ya mwajo, Diana, n' *ugano* u pukwakidi oviya Jupitë a jadi ?

36. O belombo tëkabe be ha 'bë na ngudi ya bomwë penda, o lukakandi o vâlâmiyëni, o hayeni elombo na bwayë.

37. Ikabojana o ndi bamo të ekaba vanango okava ba 'bë bayibi ba church, na bâ-ba 'bë tepë bakili ba anyambë 'anyu ya mwajo.

38. Nd' oningë Dimëtrius na ibaju ba ehavu, ba jadi na moto n' itato, elekanako e te bya, na gâven i teiwë: ba kalana-kiye.

39. Ndi oningë wa uwa tepë ni moto upâkwë itato, i ka leniyate o ikando ja honganëngo.

40. Ho na mahihi n' ikâtwë n' ilombe të

via buhwa ekavi, tina 'ahu ya tatuwa mbě-
lěkě tēkaně, e diye.

41. O mâ-a bi nonaně kalango, ka mâ-a
validě ebimba.

KAPITA XX.

1. O ilombe i mayedi ka Pâl a ndiya be-
yokwedi, ka mâ-a yohaně bâ, ka mâ-a 'mu-
wa na vala o Masidonia.

2. O mâ-a tombidě hanganě tēdině, na
mâ tepě bâ maleva maitě dikiyango, ka
mâ-a pâ o Gris.

3. Ka mâ-a diya ovoně ngândě 'lalo.
Ka Jiu ba venga mâ ehânge, o mâ-a di-
yakidi a ka 'mbaka o tindiya na vala o
Siria, ka mâ-a panga na a tombaki ja
Masidonia.

4. Ka ekaba ba vala na mâ njamba, na
vala o Asia, Sopatěr ua Beria; ba Tēsalo-
nika, Aristarkus na Sikundus; na Gaius ua
Děrbe, na Timotius; ba Asia, Tikakus na
Trofimus.

5. O ekaba ba validi o bohoboho, ka bâ-
ba venga hwě o Troas.

6. O hwi ja pěmbě e ha 'bě na ist, i bēdi
tombango, ka hwě-hwa tindiya o Filipai na

pâ o bâ-ba .diyakidi o Troas na hwi 'tano ;
ka hwě-hwa diya omě hwi hěmbwědi.

7. O buhwa boa wiki boa bohoboho, o
beyokwedi be lataniyi ka pěhě pěmbě, ka
Pâl a kaliya bâ, (kenjango na bia bwe tě
te eaju e ka valě,) ka mâ-a kaliya kwanga
na o bulu 'tema.

8. Ilika via oba iviabu vi diyaki latani-
yango vi diyaki na litwa loitě.

9. Iwanja jâkâ i diyakindi o windě, o
viyâ viněně, dina jaju Yutikus: o Pâl a
bembidě ikaliya, ka mâ-a hinduwa na viyâ
ka mâ-a pukuwa oviya nděki ya ilalo, ka
mâ-a hěhwě ekengo.

10. O Pâl a hubidi, ka mâ-a kwa o mâ-a
jadi, ka mâ-a puga *mâ*, ka mâ-a vâ, *na*, O
yěněki njuke; 'kabojana eměná 'aju e ngite
na ju.

11. O mâ-a betidi ka mâ-a pěhě pěmbě
o mâ-a bi jango, ka mâ-a kala pě uli-
ngo uyaba kwanga na yakako, na mâ na
kěkě.

12. Ka bâ-ba vana iwanja tě ja bě mihâ,
na bâ na yěněkě mbya 'něně.

13. ¶ Ka hwě-hwa vala o bwalo b' uta-
ngani o boho, jâ ndi ijahu ja tindiya na
vala o Asos, ho yanaka na ho ka vami Pâl

omě: 'kabojana a lenakidi nonaně, o mâ-a pangakidi o 'tamuwa ja he.

14. O hwě na bâ ho latidi o Asos, ka hwě-hwa vamě mâ, ka hwě-hwa pâ o Mitalini.

15. Ka hwě-hwa tindiya omě bia bwě, ka hwě-hwa pâ hohonganěngo na Kios; bopâkwě ka hwě-hwa pâ o Samos, ka hwě-hwa yěngidě o Trojilium; bopâkwě bo yadi ekabo, ka hwě-hwa pâ Mailitus.

16. Ikabojana Pâl a yanaki na a 'li ka tomba baka na Ěfesus, jambojana au vahaka o tombě ulingo o Asia: a hunganaka na a ka pâ o Jěrusalēm o buhwa boa Pěntikost.

17. ¶ Mâ te o Mailitus, ka mâ-a banda igende o Ěfesus, ka ndiya batodu ba church.

18. O bâ-ba pâdi o mâ-a jadi, ka mâ-a vá . na bâ, na, Wa dimbakiyani oviya buhwa boa bohoboho i boamě bo pâkidi o Asia, nyanga 'amě e diyi n' inyěni,

19. Mbi hakiya Upangiyi na ihubidě j' ipikiliya jěhěpi na manyângádiba maitě, na mayějudwě, ma ma pâká o umba-mbi jadi na behänge bea Jiu be ma vengaka 'mba:

20. Tepě na nyanga 'amě e ha dimbakidi inyěni elombo ya mala, ndi mbi ma levakidě inyěni, n' umba-mbi yokwakidě inyěni

o bwebwe, mba viya yâně ndabo, mba timba yâně,

21. Mbi pupaka Jiu na Grik běhě, na ba uluake o Anyambě a jadi, na ba kamakidě Upangiyi muahu Jisus Kraist.

22. Ndi hilakěteni mb' 'aland' okava, katwěngo n' ilina na vala o Jěrusalēm, mba 'wě belombo be ka hawě 'mba ovoně:

23. Kabo nyanga y' Ilina Iyam' e pakwakě o mboka yěhěpi na mekato na betuniya be vengaki 'mba.

24. Ndi belombo těkabe bea hokakě 'mba n' umba-mba langaka tepě eměná 'amě ihambe iněně, na ovaně nd' umba-mbi ka hânjâbidě ikânjá jamě na mbya, na ehavu ya minise eamě, e pahakiyedi o benâ bea Upangiyi Jisus, o idakuwa ja sango eyamu ya ehekwě ya Anyambě.

25. Ndi hilakěteni, mbi te yowěngo na inyi běhěpi, ibamě ba di kaliyango ipangiya ja Anyambě, wa yěne pi boho boamě.

26. Mba ndiyandi 'nyěni na diyaki tali o mwehe mua buhwa, ja na mbi papuwango oviya makiya ma bato běhěpi.

27. Ikabojana mbi 'bě inyěni dimbango ehoka Anyambě yěhěpi.

28. ¶ Bandamakidi nyolo janyu na

mwanga mua Ilina Iyamu vědi inyěni, na umbwakiyani muěhěpi, ijedě ja church ya Anyambě, eaju e hambaki na makiya maju mětě.

29. Ikabojana mba dimbakiya na umba okava valango, vâkâna wolf j' ikito e pâ-ndi o inyěni o jadi, i ka mëndě ba yongě mwanga.

30. O vengě lě bato ba ka viyate o tango 'anyu mětě, ba ka kalaka belombo bea ujo-longo o ikova ja beyokwedi.

31. Ovaně nd' umba-mbi vâkě n' inyěni, na, pepwakani, n' inyěni o ka yongakiděni na mbi 'bě dângo inyěni ikelevidě o ulingo mua mepuma melalo, na bulu na mwehe, na manyângâdiba.

32. Ndi bana-bina, mbi bweyakiděndi 'nyěni Anyambě, na ndaga ja 'hěkwě 'aju, e didi e yâdâkidě inyěni na jâ-ja vědi tepě inyěni ekuha na ba di nyěvudwěngo.

33. Mbi 'bě tânginango silvēr ya moto, tombe ka gold na ibâtâ.

34. E, inyi mětě o te pě ni yowěngo na benâ tēkabe te be ma yongakě 'mba, na mala na ba ma diyaka n' umba.

35. Mbi t' inyěni leviděngo belombo beěhěpi na nyanga 'anyu e ka hayě megono ;

o ka yongaki bekěhě; o ka yongakiděni ndaga ja Upangiyi Jisus, i vâki, na, Bova a bwam' wa na ipahiya.

36. ¶ O mâ-a bi nonaně vângo, ka mâ-a balama na bâ-ba ka kalakiya.

37. Bâ běhěpi ba eyaki nangudi na bâ na hikamakiya Pâl. o ibâlu, ba ka pyâpyâ-kâ mâ.

38. Ba yěněkě ngěbě wa, na ndaga jaju i vâki na ba yěně pě boho boaju. Ka bâ-ba vala ka dikidě mâ o bwalo b' utangani.

KAPITA XXI.

1. Ka yâ-ya hohonganě o hwě na bâ ho paluanidě, ka hwa tindiya, jâ ndi jahu ja těmě ikângâ jâkâ na jâkâ na pâ o Koos, bopâkwě ka hwě-hwa pâ o Rods, o hwě-ho 'muwedi omě ka hwě-hwa pâ o Patara.

2. O hwě-ho duwi bwalo bo kěkě o Finisia, na hwě na vamaka omě, ka hwě-hwa tindiya.

3. O hwě-ho hemi Saiprus, ka hwě-hwa dikâ mâ na enâ 'a 'měngwě, ka hwě-hwa tamuwa na vala o Siria ka hwě-hwa hědě o

Tair : ikabojana bwalo b' utangani bo di-
yaki na bo hubaki junba omě.

4. O hwě-ho duwi beyokwedi, ka hwě-
hwa yěngidě omě hwi hěmbwědi, o bâ-ba
pugudwě n' Ilina ka bâ-ba vâ na Pâl na a
kěke o Jěrusalěm.

5. O hwě-ho tombidě hwi tedině ka hwě
ho 'muwa na vala, ka bâ na bajo babu na
bana babu ba viya ka dikidě hwě uliko,
kwanga na *hwě-ho* věngěmidi o mboka : ka
hwě-hwa huma mabângâ o uhěkě, ho ka
kalakiya.

6. O hwě-ho yohanidě ka hwě-hwa va-
ma ; ka bâ-ba timbanidě o wabu.

7. O hwě-ho hânjâbidě ikângâ *jahu* oviya
Tair, ka hwě-hwa pâ o Tâlimeis, ka hwě-
hwa homa bana-bina, na nangakiya na bâ
buhwa bâkâ.

8. Bia bwe ka hwě, ba diyaki ba njamba
ya Pâl, hwa vala na vala ka bweya o Sěsa-
ria ; ka hwě-hwa ngiya o ndabo ya Filip
ya minisě, (a diyakidi o tango ya hěmbwě-
di,) ka hwě-hwa diya na ju.

9. Mâ momo těně a diyaki na babajo ba-
nai, behila, ba ma sâkâkâ.

10. O hwě-ho diyi hwi iitě *omě*, ka usâki
umbâkâ, dina na Agabus, ya viya o Judia.

nděngo ka hwě-hwa tinga tepě na bá tatake belombo těbeně, kabo na ba tatake nyolo jabu oviya belombo be yambakudwi megano, na makiya, na belombo be dibakwě jeku, n' ihonde.

26. Bia bwe ka Pál a nângâ bato tě o mâ-a bongude nyolo 'aju, bâ na bâ ka mâ-a ngiya těmpil, ilevidě j' ihânjâbidě ja hwi j' ubongo kabo mwambo mu-a ta yambudwě o pěl' 'abu ya bēhēpi.

27. O hwi hēmbwēdi i diyedi i ka 'mbaka o diba, ka Jiu ja Asia, ba vegudi bato bēhēpi, o bâ-ba yēněki mâ o těmpil, ka bâ-ba bweya mâ,

28. Ba yamaka, na, Bamo ba Isreěl, hanakani: momo tě a yokwakidě bato bēhēpi iboko viēhēpi na ba himbakidi bato na elekanako na iboko těkavi: wawa tepě na o mâ-a pâkidi Grik o těmpil, a jongoliděngo iboko tě via holi ekavi.

29. (Ikabojana ba yēněki mâ o mboka o bohoboho, bâ na Trofimus ua Ěfisis, uabu a yebakiyi na Pál a ngakidi mâ o těmpil.)

30. Ka mboka yēhēpi ya 'muwa, ka bato ba yolaně: ka bâ-ba nângâ Pál na puma na mâ o těmpil o bwebwe: tepě mambě ma dibakwě.

31. O bâ-ba 'mbakidi o weya mâ, ka sango ya viya o ngâwě eněně ya njamba e jadi, na Jěrusalēm yěhěpi e hakandi ilombe.

32. Ka mâ-a nāngâ sâjě na sěnturian o njamba pâkâ, ka mâ-a 'la umbila nala o bâ ba jadi: o bâ-ba yěni ngâwě eněně na sâjě, ka bâ-ba dika iboma ja Pâl.

33. Jâ ndi ja ngâwě eněně ja bakama ka mâ-a nāngâ mâ, ka mâ-a sombiya na a kâ-mâkudwě mehinganakano meḃale; ka mâ a uwa mâ na a lě nja, na eaju e hadi.

34. Bâkâ ba yamaka yeně elombo, bâkâ yeně o ebimba: a diye na ngudi ya time upako n' ipako, ka mâ-a sombiya na a valanakwě o kastěl.

35. A pâkâte ilala, tepě a ka bapakwě na sâjě na jāngâ ja bwayě boa bato.

36. Ikabojana ebimba 'a ḃato e vakindi e vaka e yamaka, *na*, Věngěmi na mâ ovaně.

37. O Pâl a diyaki na a nganakudwěndi o kastěl, ka mâ-a vâ na ngâwě eněně, *na*, Mbi kalakete na nâvě? Ka mâ-a vâ, *na*, Wa kalakate Grik?

38. O nyanga ya na a 'bě âvě moto tě ua Ijipt a hakidi ilombe hwi tēkadině, ka mâ-a tumbwana tâjen ja bato inai ba ma weya-naka, o nginga?

39. Ndi Pâl a vâki, *na*, Mbi momo a didi Jiu ya Tarsus, ya Silisia, udiya mua mboka e ha 'bë yëviyëngo: ka umba-mbi hâhâlâkid' âvë, *na*, bâbâkâ 'mba-mbi kalaka na bato.

40. O mâ-a kamidë, ka Pâl a tēmë o ilala, ka mâ-a pëpidë bato na enâ: o bâ-ba vâlâmiyedi, ka mâ-a kalana bâ, na joyi ja Hibru, *na*.

KAPITA XXII.

1. Bamo, banabina, na bapaia, yökakani upako muamë u pakwakë inyëni.

2. (O bâ-ba yoki mâ a kalaka na bâ joyi ja Hibru, ka bâ-ba vâlâmiyë pë n' inënë; ka mâ-a vâ, *na*,)

3. Mbambayë mbi momo a di Jiu, a jakudwë o Tarsus, ya Silisia, ndi mbi tombwa-kindi o mboka tēkanë o beko bea Gemelial, k' umba-mba yokudwë hohonganëngo na nyanga ya hânjâbiëngo ya belekanako bea bapaia, mbi diyaki na jai o pëlë ya Anyambë, bwësë te k' inyëni bëhëpi o jadini o buhwa tēkabo.

4. Mbi ma vitaki ba njeya tēkanë kwannga nala iwedo, mbi katakidë na mbi vamaake bajo na bamo o ndabo-iviti.

5. Na prist ya molo a tepě 'mba tali na ekondo ya batodu yěhěpi; ibamě ba ma nāngānākā mbando o banabina ba jadi, k' umba-mba vala o Damaskus, ka pādě ba didi ovoně na mekato o Jěrusalēm, ka vo-mudwě.

6. Ka yâ ya diya o 'mba-mbi diyaki mbi tamwaka, mba bě baka na Damaskus, joba meolo, o njo pākâ ka bwe ya panyiya 'mba oviya oba.

7. K' umba-mba kwa o he, na yokaka joyi i vākâ n' umba, *na*, Sâl, Sâl, o yalakě lě 'Mba nande?

8. K' umba-mba timbě, na, Ávě lě a nja, Upangiyi? Ka Mâ-a vâ n' umba, na, Umba ndi Jisus ya Nasarět, uávě a yalakě.

9. Ba diyaki n' umba ba yěněkite mětě bwe, ka bâ-ba banga; ndi bu yokaka joyi ja a kalaki n' umba.

10. K' umba-mba vâ, *na*, Upangiyi, mbi hake lě na ě? K' Upangiyi a vâ n' umba, *na*, Těměkě, wa vala o Damaskus, ovoně nd' ávě o ka langudwě o pělě ya belombo beávě be di lenudwěngo, na o ka handi.

11. O umba-mbi ha diyaki na ngudi ya yěně n' imanyi ja bwe těně, ka ba diyaki n'

umba ba bweyidě 'mba o 'nâ, na pâdě 'mba o Damaskus.

12. Ka Ananaias pâkâ, moto uyam' o pělě ya belekanako, ua Jiu i ma diyaka omě a ma langwaka ilango iyamu,

13. A pâ o umbi jadi, ka mâ-a tēmě, ka mâ-a vâ n' umba, *na*, Mwanina Sâl, yěněkě. Já iwěla tě, te ijamě i tamwakiyi mâ.

14. Ka mâ-a vâ, *na*, Anyambě ya bapaia a paluděnd' âvě, na yowakě upango 'muaju, wa yěně Uyamu, na n' âvě wa yoka joyi ja udumbu 'muaju.

15. Ikabojana o ka diyi tal' 'aju ya belo-mbo beâvě be di yěněngo n' ibeâvě be di yokango, o bato bēhēpi ba jadi.

16. Ndi o dilakě lě pě nde? tēměkě, wa baptaiswě, na n' âvě wa tuka mabe mâvě, o ka dakakiya dina ja Upangiyi.

17. E diyakindi o 'mba-mbi timbidi o Jěrusalēm, mbi kalakiyate o tēmpil kakana k' umba-mba kwa uge;

18. K' umba-mba yěně Mâ a vâkâ n' umba, *na*, Hadivakidě, wa hungana o vě-ngěmě o Jěrusalēm: 'kabojana ba yoke ilango jávě i ka languwě o pěl' 'amě.

19. K' umba-mba vâ, *na*, Upangiyi, ba dimbakiya, na mbi ma tinakiyi ba kama-

kid' âvě meboka, mbi bomaka bâ o sinigâg yěhěpi.

20. Na o makiya ma martyr mâvě Sti-
vën ma popakidi, mbi diyakite de, kami-
dëngo iwedo jaju, mbi tataka ngâi ja ba
weyaki mâ.

21. Ka Mâ-a vâ n' umba, *na*, Kěķě: 'ka-
bojana mbi ka lomand' âvě okava yavidě-
ngo mavuvě na Jëntail ba jadi.

22. ¶ Ka bâ-ba hukidě mâ iyokolidě o
ndaga tēně ovaně, *jâ ndi* ijabu ja betě
moyi mabu, *na*, Věngiděni elombo tēně o
• he tēkaně, a ibě pě nyěviyěngo na a diyaka.

23. O bâ-ba yamidi, ba ka duwaka ngâi
jabu, ba uhwaka mahě oba,

24. Ka ngâwě eněně a sombiyě na a
ngakudwě o kastěl, na mâ a ka kâtâkwě na
mbomako: na ovaně nd' o mâ-a ka yowě
tina 'abu e yamakiyi mâ nonaně.

25. O bâ-ba kati mâ na mepinja, ka Pâl
a vâ na sěnturion a diyakid' omě de, *na*, E
te hohonganěngo na bomaka moto a di ua
Roma a kobe ?

26. O sěnturion a yokidi, ka mâ-a 'la ka
languwa ngâwě eněně, *na*, Bandamakidě
nyanga 'âvě e hakě; 'kabojana momo tēka-
ně a ndi ua Roma.

27. Ka ngâwě eněně a viya ka mâ-a vâ, *na*. Langwakiya 'mba, o ndi ua Roma? Mâ na, E.

28. Ka ngâwě eněně a timbě, *na*, Mbi hambaki humu na ihambe iněně. Ka Pâl a vâ, *na*, Nd' umba mbi bojakwě.

29. O njo pâka tepě ka ba 'mbaki o kâtâ mâ ba valanidě : na ngâwě eněně tepě a ka bangaka o mâ-a yowudě a ndi ua Roma, ka-bojana a katakidi mâ.

30. ¶ Bia bwe o mâ-a vahakidi o yowě tina ya Jiu e bakakidě mâ, ka mâ a 'njuwa mâ mekato, ka mâ-a sombiya prist iněně na ikando jabu jěhěpi na ba pulakiye, ka mâ-a hubana Pâl, na tēdě mâ o boho boabu.

KAPITA XXIII.

1. Ka Pâl a hilě ehoka dihâ sii, ka mâ-a vâ, *na*, Bamo *na* bana-bina, mbi diyango n' ulema uyam' o boho boa Anyambě na boa buhwa tēkabo.

2. Ka prist ya molo, Ananaias, a sombiya ba tēměki na mâ baka na ba bweyake mâ udumbu.

3. Jâ ndi ja Pâl ja vâ na mâ, *na*, Anya-

mbě a ka bweyate âvě, âvě epima e jadi tanwěngo; o diyango okava na o yěkěkidi 'mba hohonganěngo na belekanako, nd' o ka sombiyakě 'mba na mbi bweyakwě, e diye hohonganěngo na belekanako?

4. Ka ba diyakidi omě tēměngo bâ vâ, *na*, O kilakand' Anyambě prist 'aju ya molo.

5. Ka Pâl a vâ, *na*, Banabina, mbu yowě na mâ ndi prist ya molo, ikabojana e lëndwěngo, *na*, O kalake bobě o pělě ya upangiyi mua bato bâvě.

6. Nd' o Pâl a yowude na mběi pâkâ e ndi Sadusi, epâkwě Farisi, ka mâ-a yama o ehoka, *na*, Bamo *na* banabina, mbi ndi Farasi, mwana ua Farisi; ipite n' ipumbuwa ja bawewe ndi jamě i yěkěněkudwě.

7. O mâ-a bědi nonaně vângo, ka Farisi na Sadusi ba yomana jomano: ka ebimba ya pěhě.

8. Ikabojana Sadusi ba vâki na ipumbuwa i 'bě, na enjěl na ilina be ibě tepě; ndi Farasi ba ma kamakiděte beěhěpi.

9. Ka bâ-ba betě ilombe iněně: ka balěndi ba pělě 'a Farasi ba tēmě, ka bâ-ba sâja, *na*, Hu duwa moto těkaně na bobě; ndi tombe b' ilina oviya enjěl ya kala na mâ, ho yanakeni na Anyambě.

10. O jomano i kenidi, ka ngâwě eněně o mâ-a bangi na o banga Pâl a pahuwa, a sombiya sâjě na i hubake na bâ-ba 'la ka nângânâ bâ mâ na bwai, na bâ-ba vana mâ o kastěl.

11. Bulu tě bo bengidi boně, k' Upangiyi a těmě na mâ baka, ka Mâ-a vâ, *na*, Pâl, yâdâkiyě: nyanga 'vě e languwedi o pěl' 'amě o Jěrusalēm yâ te 'âvě e ka diyě tal' 'amě o Roma.

12. O bwâ bo yadi ka Jiu jâkâ ja lata-niya, ka bâ-ba hâkâ nyolo jabu jâki, na, Hwa je elombo na hwě-hwa mâte tepě, ho t' o weya Pâl.

13. Ba tingakidi utingo těkamu, ba diyaki wa na mabo manai.

14. Ka bâ-ba pâ o prist iněně na batodu ba jadi ka bâ-ba vâ, *na*, Ho hâkângo nyolo jahu jâki iněně, na, Hwa je elombo ka 'lombo, ho t' o weya Pâl.

15. Nandi inyěni na ehoka yowânakiděni ngâwě eněně na a hubanake inyi mâ vake, ona o vahaka o batěni elombo bwamu o pěl' 'aju; na hwě, o mâ-a ka vâye na a bakame, hwa paniya o weya mâ.

16. O mwana-kad' 'a Pâl a yokidi o pělě 'a evenga 'abu, ka mâ-a 'la ka ngiya o kastěl ka languwa Pâl.

17. Já ndi ja Pâl i ndakiya sěnturian pākâ ka mâ-a vâ na mâ, *na*, Pâkidě iwanja těkadi o ngâwě eněně e jadi, 'kabojana a na elombo ya giligili eaju 'mbakě o langu-wa mâ.

18. O mâ-a nângi mâ ka mâ-a pādě mâ o ngâwě eněně e jadi, *na*, Pâl tě ya mbwedi a ma ndiyi 'mba, ka mâ-a hâhâlidě 'mba na mbi pâkidě iwanja těkadi o âvě-o jadi, a na 'lombo e langwakiy' âvě.

19. Ka ngâwě eněně a bweya mâ o 'nâ, ka mâ-a vala *na mâ* o pěpěkě ikutakuta, ka mâ-a uwa *mâ, na*, O 'mbaka lě o langu-wa 'mba nja 'lombo-ě?

20. Ka mâ-a vâ, *na*, Jiu ba tingango na ba vahand' âvě o hubanaka Pâl vake o ehoka, o na ba vahaka pě o batě na ju elombo bwamu.

21. Nd' o bâbâke: ikabojana a vengakwendi okava na mabo ma bamo wa na manai, ba di kaniyango nyolo jabu na ba je, ba mâte, ba t' o weya mâ: ba bënd' okava kokěngo, ba 'mbwakiyate kabo mohano mu-a viya o âvě o jadi.

22. Ka ngâwě eněně ya hulidě iwanja tě, ka mâ-a languwa *mâ, na*, O pakwake moto na âvě ndi ua levidě 'mba belombo těkabe.

23. Ka mâ-a ndiya sënturion ibale, na, Kokakěni kama ja sâjě ibale i kěkě o Sěsaria, na bamo ba kabala mabo hěmbwědi, ba makângâ kam' ibale, o mawěla ma bulu ibuwa ;

24. Wa kenjěni tito i jabu i ka diyidě Pâl, wa pâdi mâ ni o Filix ya gâveni a jadi bwamu.

25. Ka mâ-a lëndě ejanganangobo ya mbando kakana :

26. Klâdias Lisias a homakandi gâveni e balanakě na bwamu, Filix.

27. Momo těkaně a bweyakudwi na Jiu, ka bâ-ba omba o weya mâ : já ndi ijamě ja pâ na ndumba, k' umba-mba yongě mâ, o 'mba-mbi yowakidě na a ndi ua Roma.

28. O 'mba-mbi vahakidi o yowě tina 'abu e bakakidě mâ, k' umba-mba pâdě mâ o ikando jabu :

29. Uamě a hilidě na a bakakudwěndi matato ma belekanako beabu, ndi a ibě na 'nângâ e di twětwě n' iwedo, tombe meboka.

30. O umba-mbi langudwě nyanga ya Jiu e vengamakiyě momo těkaně, k' umba-mbi panakiyě o bandidě mâ o âvě-o jadi, n' umba-mba sombiya tepě ba bakakidě mâ na

ba langwake eabu e di na mâ o boho boâvě.
Diyaka bwamu.

31. Ka sâjě ja nângâ Pâl te ka bâ-ba sombiyakudwě, ka bâ-ba pâdě mâ na bulu o Antipatris.

32. Biabwe ka bâ-ba dika bamo ba kabalâ na ba valanake mâ, ka bâ-ba timba o kastěl :

33. O bâ-ba pâdi o Sēsaria ka bâ-ba bweyidě gâven ejanganangobo 'a mbando, ka bâ-ba tědě tepě Pâl o boho boaju.

34. O gâven a langi yâ, ka mâ-a uwa na, a lě ua nja 'kulu-ě? O mâ-a yowudě na a ua Silisia ;

35. Ka mâ-a vâ, na, Mbi ka yokat' âvě o ba bakakid' âvě ba ka pâyě. Ka mâ-a sombiya mâ na a tatakwě o ikenga ja Hěrod ja yěkě.

KAPITA XXIV.

1. Na hwi 'tano ka Ananaias prist ya molo a huba, bâ na batodu, n' ukali 'mbâka, *dina* na Těrtulus, a salake gâven o pělě 'a Pâl.

2. O mâ-a ndudwě, Těrtulus a ka sâjakiya mâ, na, O hwě-ho pahakiyě hwěi eitě

na návě, na behayu bea weyango be hakwě
tepě etomba tēkae n' ipangiya jāvě,

3. Ho mēmēki 'â egombe yēhēpi, o loboko
lēhēpi na mbya, Filix enēnē.

4. Ndi o banga mba himbidě pē âvě,
mbi hâhâlâkiděnd' âvě, na, yokolakidě hwě
ndaga ihâlě o pělě 'a kěng' 'âvě.

5. Ikabojana ho hâkâlângo moto tēkaně
na a n' ulogo, a vegwakidě Jiu jēhēpi i
did' o he, utumbwani mua njamba ya
Nasarin:

6. A ombidi o vala ka jongolidě tēmpil:
ka hwě-hwa bweya mâ na ho yěkěkidi mâ
hohonganěgo na belekanako beahu.

7. Ndi ngâwě enēnē Lysias a pâkindi ka
mâ-a nângânâ hwě *mâ* o benâ beahu na
bwaye boitě.

8. Ka mâ-a sombiyě ba ma sâjaka na ju
na ba vake o âvě-o jadi: na ovaně nd' âvě
o ka bě mâ hilěgo na návě wa yowě belo-
mbo tē ibeahu be ma sâjaka na ju ekabe
beēhēpi.

9. Ka Jiu ba kamidě tepě, na belombo
tēkabe be diyaki nonaně.

10. ¶ Jâ ndi ja Pâl, o gâven a pēpidě
mâ na a kalake, ja timbě, na, Mbi yavwa-
nakandi o pěl' 'amě mětě na mbya, na mbi

dimbiye pě na wa bi mepuma meitě, âvě te kabo yěkékidě bato těkaba:

11. Kaboja o t' o yowakě na mba běte na viya o Jěrusalěm ka kaliya, na jomu ja hwi na hwi 'bale.

12. Bu kâbâkidě 'mba o těmpil, mbi bo-maka na moto penda, tombe mbi vegwakidě bato o sinigâg, na mboka:

13. Na bâ-ba sulě tepě belombo tě ibeabu be bakakidě 'mba ekabe.

14. Ndi mbi mēměkěndi ekae o boho boâvě, o pěl' 'abu e tubakě na lěngaměngo, nd' eamě e kalakiyě Anyambě ya bapaia, umba te kabo kamakidě belombo be di lěndwěngo o belekanako na basâki bēhēpi:

15. N' umba-mbi te n' ipitě ja Anyambě ijabu mětě i mēměkě, na bekengo be ka pumbuwandī, bea bayamu, na babe.

16. Omě okava nd' umba-mbi t' o volake, na ovaně nd' umba-mbi ka diyě ulema u ka mēndě u duwe njěnji o pěl' 'a Anyambě na ya bato.

17. O mepuma meitě me bi tombango, k' umba-mba viya ka dikidě etomb' 'amě bova na benambo.

18. Ka Jiu ja Asia jákâ ja kâbidě 'mba

o tēmpil bonguēngo, hanga tepě na na ebi-mba n' ilombe.

19. Ba ma nyěvě o diya o boho boâvě okava, na bâ-ba ka tatwaka eabu e di n' umba.

20. Tombe te bâ ekaba ba kala, ipě ba 'mba duwango na ehadi ebe, o 'mba-mbi tēmēkidi o boho boa ehoka,

21. Kabo ja diya joyi tē ja jākâ ekadi, ja na mbi yamakindi o 'bumbu 'abu, na, O pělě 'a Ipumbuwa ndi eamě e kâtânâkwě o buhwa tēkabo.

22. O Filix a yoki belombo tēkabe na mâ-a diyaki tepě n' iyowě iitě o pělě 'a njeya tēkaně, a yēngēkidi bâ, na, O ngâwě eněně Lisias a ka hubě, vākâna mbi yowu-děndi tumu y' itato t' ijanyu ekadi.

23. Ka mâ-a sombiya sēnturian na e take Pâl, a jelakě *mâ*, na a kandakidě mboi jaju i hakiya mâ, tombekete i vake o mâ a jadi.

24. Hwi tombango o Filix na mwad' 'aju Drusila, a diyaki ua Jiu, ba pâdi, ka mâ-a ndidě Pâl, ka mâ-a yoka o pělě 'a ikamidě ja Kraist.

25. O mâ-a tatuwedi o pělě 'a bwamu, tēmpērance, na yěkě e vakě, Filix a ka

likimaka, ka mâ-a timbë, *na*, Ta vala o kya okava: o 'mba-mbi ka duwë hongodi eyamu, vâkâna mbi ndiyendi âvë.

26. A ma bekinaka tepë na Pâl a ka vi mâ dâlë, na ma hulidë mâ: ovanë nd' o mâ-a ma ndakiya mâ bo ndakiya na bo ndakiya, a ka kalaka na mâ.

27. Na mepuma mebale, ka Portius Fëstus a pâ o maihana ma Filix: o Filix a vahidë o levidë Jiu ibiya, ka mâ-a dika Pâl na mekato.

KAPITA XXV.

1. Fëstus a bë na pâ o ehe të, na hwi 'lalo, ka mâ-a beta oviya Sësaria na pâ o Jërûsalëm.

2. Ka prist ya molo na Jiu inënë, ba languwa mâ o pëlë 'a Pâl, ka bâ-ba hâhâ-lidë mâ,

3. Na ba vahaki mâ a nyëvëkiyë bâ, na ma banda Pâl o Jërûsalëm, ovanë ba vengaka mâ o njeya ba vahaka o weya mâ.

4. Ndi Fëstus a timbakidi na Pâl a tata-kwëte o Sësaria, na mâ mëtë a ka ombaka tepë o timba *ovonë*.

5. Ka mâ-a vâ pë, Na ndi bâbâkâni ba

tango 'anyu ba di ba yâlâkě, ba hubaka n' umba ba 'la ka sâja na moto tēkaně, ipě a na elombo ebe.

6. O mâ-a yěngidě pě omě keběngo jomu ja hwi, ka mâ-a huba o Sēsaria; biabwe ka mâ-a diya o ediya ya yěkě ka mâ-a sombiya na Pâl a vanakwě.

7. O mâ-a pâdi, ka Jiu i vakiyedi o Jērusalēm ja lunga mâ, ba ka bakakidě Pâl me-pako medilo meitě nangudi, i meabu me ha diyaki na ngudi ya sulě.

8. A yavwanakindi o pěl' 'aju mětě, *na*, Mbi 'bě hango elombo ebe o pělě ya belekanako bea Jiu na tēmpil, tombe na Sisar.

9. Nd' o Fēstus a vahakidi o nyěviya Jiu, a timbakidi Pâl, *na*, O ka kamiděte o vāla o Jērusalēm, ka yěkudwě belombo tēkabe beěhěpi umba diya?

10. Jâ ndi ja Pâl ja vâ, *na*, Mbi tēměngo o 'diya ya Sisar ya yěkě, o mbi luki na yěku-dwi: wa dimbakiya na mbi ibě beviyango Jiu.

11. Jambojana umba kobango, tombete mba ha elombo e weyanakwě, mba kiyaka iwedo; ndi oningě na belombo tē bea 'kaba be sâjake n' umba ekabe be 'bě, o 'bě na

moto a ka nyěvě na bweyidě 'mba bâ. Mbi dakakiyi Sisar.

12. O Fěstus a kali na ikando ka mâ-a timbě, *na*, O dakiyendi Sisar? O ka pând' o Sisar a jadi.

13. ¶ Hwi kělěbě ka upolo Agripa na Běrnisi ba pâ o Sēsaria ka homa Fěstus.

14. O bâ-ba diyaki ba bě omě hwi iitě, ka Fěstus a languwa upolo itato ja Pâl, *na*, Moto 'mbâkâ a nd' okava ua Filix a dikaki na meboka :

15. Ua prist iněně na batodu 'ba Jiu, a langwakiyi 'mba, o 'mba-mbi diyakidi o Jěrusalēm, na ba vahaki mâ a yěkěkudwě.

16. K' umba-mba timbwana bâ, *na*, E 'bě pan' 'ahu ya ba Roma, ya na ho weyakidi moto, a sâjakě a t' o yěně ibaju ba sâjanakě, na mâ a ta hahuwa benângâ beaju be punudwě.

17. O bâ-ba pând' okava, mbu dilě pě, bo-yaka mbi diyaka o 'diya ya yěkě, k' umba-mba sombiya na momo tě a vanakwě.

18. O ba ma sâjaka na mâ ba tēmidi, bu běkěkidě pě usāju mua belombo beamě be yebakiyedi :

19. Ndi ba diyaki pě mâ na matato ma bekaliyěkaliyě beabu, na o pělě 'a Jisus pâ-

kâ e wedi, ua Pâl a mēmēkē na a ngite mihâ.

20. O 'mba-mbi diyaki mbi bomaka matato ma jângâ tēdinē penda, k' umba-mba uwa *mâ* na, ipě a t' a kēkē o Jērusalēm, ka yēkudwě matato tēkama ovoně.

21. Nd' o Pâl a uwi na a tatakwě na pādwe o matâ ma Âgustus, k' umba-mba sombiya na a tatakwě, kabo umba-mbi ka bandidě *mâ* o Sisar a jadi.

22. Já ndi ja Agripa ja vâ na Fēstus, na, Mbi' ka ta tepě o yoka momo tēně umba mětě. *Mâ* na, Vakě, vâkâna o yoki *mâ*.

23. O boâ bo yadi ka Agripa a pâ na Bērnisi na egândâ eitě, ka bâ-ba ngiya o iboko vi yokakwě, bâ na ngâwě iněně na bato ba mboka tēně baněně, o Fēstus a sombidě ka Pâl a vanwě.

24. Ka Fēstus a vâ, na, Upolo Agripa na bamo ba di na hwě hindaněngo okava bēhěpi, o yěněkěti momo tēkaně ua ebimba ya Jiu yěhěpi a tatiyi 'mba oviya Jērusalēm na pâ okava, ba yamaka na au nyěvě pě na diya ulingo.

25. Nd' umba-mbi duwi na a ibě hango elombo weyanakwě, na *mâ*-a dakiye tepě

Águstus, k' umba-mba lenidě' na mbi vala kidi mâ.

26. Mbi 'bě mâ okava na elombo ya gili-gili ya lëndiya paia. Ovaně nd' umba-mba vana mâ o inyěni-o jadi, wawa nd' âvě-o jadi, Upolo Agripa, na ovaně nd' o mâ-a ka bě kâtwěngo, n' umba-mba duwa elombo e lënděkě.

27. Ikabojana mba yěněkě na e batango na mbi bandakidě mbwedi, ndi mbi tube benângâ beaju, be jadi punuěngo.

KAPITA XXVI.

1. Já ndi ja Agripa ja vâ na Pâl, na, O huludwi na kalakiya nyolo 'âvě mětě. Ka Pâl a hambid' enâ, a ka timbwanaka o pěl' 'aju mětě:

2. Upolo Agripa, mbi yěněki mbya k' umba mbi timbwanaka o buhwa těkabo o pělě 'a helombo tě bea Jiu be bakakidě 'mba ekabe o boho boavě:

3. Wawa n' umba-mbi di yowěngo na o hilinganango na pani na matato ma Jiu ma janidi: ovaně nd' umba-mbi hâhâlâkid' âvě na yikaka ka yokaka.

4. Idiyedi viamě oviya nděmbě, i taki na etomba 'amě mětě o Jěrusalēm, Jiu bēhēpi ba dimbakiya viā,

5. Ba yowakidě 'mba oviya jali, (ba jaka na ba ndi ba langwaka,) na umba-mbi ma bengaka pělě ya hohonganěngo mětě ikaliyedi viahu, mbi diyakindi Farisi.

6. Ndi mbi nd' okava de, na mbi yěkěku-dwěndi n' ipitě ja panga ya Anyambě e pangaki na bapaia :

7. Yā panga tē ndi ya jomu jahu ja miyā na miyā mabale e lilimakidě idilě ja Anyambě, bulu na mwehe n' ipitě ja na e vakan-di. Jā ipitě tē, Upolo Agripa, ndi ja Jiu i sājaka n' umba ekadi.

8. O ka pivi na e ndi 'lombo e ha ibě na ngudi ya kamudwě, na Anyambě a t' a pumbwakidě bekengo ?

9. Mbambayě mbi piviyakindi na mbi nyěvēkěndi o ha belombo beitě be kěkě na dina ja Jisus ya Nasarēt ka melombyani.

10. K' umba-mba ha tepě yā o Jěrusalēm ; o 'mba-mbi duwi ngudi na prist ja meolo, mbi ka dibaka bato bayamu baitě na nda-bo-ivititi ; mbi ka běkě ba weyakwě, vākāna mbi vamaka tepě ijamě joi.

11. Mbi ma vomwakidi bâ njo iitě o sini-

gâg, mbi tundwakidě *bâ* na ba kilake Anya-mbě; o 'mba-mbi yoki na *bâ* jeku iněně, mbi ka vitakě *bâ* kwanga na-la mamboka ma ngani.

12. Yâ te eamě e valanakidi o Demaskus, na ngudi n' uloma mua prist ja meolo,

13. Upolo, na joba meolo, k' umba-mba yěně bwe ya viya oba, e kebakě epanyidi ya joba, e pangakiyi hwě, na ba diyaki n' umba o njamba uluaniděngo.

14. O hwě běhěpi ho kwedi o he, k' umba mba yoka joi i kalaka n' umba, i vâkâ na emi ya Hibriu, *na*, Sâl, Sâl, o yalakě lě 'Mba nande? *E* bokolo na o tudakiya o ndongo.

15. K' umba-mba vâ, *na*, Upangiyi, âvě lě nja? Ka Mâ-a vâ, *na*, Umb' i Jisus, uâvě a pinyilakidě.

16. Nd' umwaka, ua tēmě na beko beâvě: kaboja tina 'amě ya pumiy' âvě, ndi ya na mbi pangakand' âvě minisě, na tali ya belombo tē ibeâvě be yěnidi ekabe, n' ibeamě be ka pumiy' âvě;

17. Mbi patuaka âvě o benâ bea bato na bea Jěntail, ijamě i lomaki âvě.

18. Na ka đubwake *bâ* mihâ mabu, o 'luakidě *bâ* oviya ivititi na puliya o bwe,

oviya o ngudi ya Sětan na pâ o Anyambě a jadi, na ovaně ndi o bâ-ba ka pahiyě iyi-dwě ja mabe, na ekuha na tango e di nyě-vudwěngo n' ikamidě jamě.

19. Upolo Agripa, ovaně nd' o 'mba-mbi ha lěvēkiyedi ehihila ya oba:

20. Ndi mbi takindi o levidě ba Dama-skus na Jěrusalěm, na betěbě bea Judia beěhěpi, nandi běngě mbi levakidi Jěntail na ba uluakę na bâ-ba vonguwa o Anyambě a jadi, na bâ-ba ka haka behavu be di kokango n' iluwa.

21. Jâ tina těkadi ndi ja Jiu i bweyanakě 'mba o těmpil na ba weyaki 'mba.

22. O 'mba-mbi duwedi ihana ja Anyambě k' umba-mbi dite na boa buhwa těkabō, mbi langwaka bahâlě na baněně, mbi tube belombo bepâkwě kabo bea basâki na Mosěs be vâki na be vakandi:

23. Na, Kraist a ka yěni betuniya na Mâ ndi a ka tě na pumbuwa, na Mâ-a ka levakidě bato na Jěntail bwe.

24. O ma-a diyakidi a kalaka nonaně o pěl' 'aju mětě, ka Fěstus a vâ joi kehěngo, na, Pâl, o potuwendi; iyokuwa iněně i potuděnd' âvě.

25. Ndi a vâki, na, Fěstus e ha balana-

kiya, mbi 'bě potuwango, ndi mbi kalaki ndaga ja pákwěpákwě, mihâ bwe.

26. Ikabojana, Upolo, uamě a kalanakě bwebwe, a dimbakiya belombo těkabe. N' umba mbi tepě yowěngo, na belombo těkabe be 'bě kutamango o mâ-a jadi na ya yâká, 'kabojana belombo těkabe beu hamaka o itududu.

27. Upolo Agripa, o kamakiděte basâki? Mba dimbakiya na o kamakiděte.

28. Já ndi ja Agripa ja vâ na Pâl, *na*, O manini ma tundudě 'mba na mbi diyaki Kirisâni.

29. Ka Pâl a vâ, *na*, Mbi yombwakandi o Anyambě, na hanga kabo âvě dipâ, ndi běhěpi ba yokakě 'mba o buhwa těkabo, na te ba diyandi manini ma na bâ tepě leniyanango nyang' 'amě e jadi, věngiděngo kabo meboka těkame.

30. O mâ-a bi nonaně kalango, já tepě j' upolo i umwake, bâ na gâven na Běrnisi na ba diyaki na bâ.

31. O bâ-ba validi o pěpěké, ka bâ-ba kala bâ mětě na bâ mětě, na, Momo těkaně a ibe hango elombo eaju e weyanakwě tombe e kâmânâkudwě meboka.

32. Ka Agripa a vâ na Fěstus, *na*, Momo

těkaně a ma diyate a hulamakě, a jaka te a dakiye Sisar.

KAPITA XXVII.

1. O yâ e leniyi na ho ka tamuwandî na vala o Itali, ka bâ-ba bweyidě Pâl na mbwedi ipâkwě n' ihuhu o benâ bea moto, a tubakwě na Julius, sěnturion ya njamba ya Âgustus.

2. O hwě-ho vamidi o bwalo boa Adramitium ka hwě-hwa tindiya, ho yanaka na ho ka tombi baka na betěbě bea Asia, Aristarkus ya Masidonia, a ma diyaka o Těsalonika, a diyaki na hwě o njamba.

3. Buhwa bopâkwě ka hwě-hwa bakama o Saidon. Ka Julius a ha Pâl ibiya, ka mâ-a huludě mâ na a kěke o mbweyi jaju i jadi, ka yâdidě nyolo.

4. O hwě-ho tindiyedi omě, ka hwě-hwa tamuwa baka na Saiprus, ikabojana mepupě me vakiya oboho.

5. O hwě-ho tamuwi manga ma Silisia na Pamfilia, ka hwě-hwa pâ o Maira, mboka ya Lysia.

6. Omě nd' o sěnturian a kâbâkidě bwalo boa Alěxandria, bo kěkě o Itali: ka mâ-a vamě hwě omě.

7. O hwě-ho tamuwedi na jana hwi iitě, manini ma na ho t' o hohonganě na Naidos, upupě mu-a 'la ka beva, ka hwě-hwa tumba baka na Kriti, hohonganěngo Salmone:

8. O hwě-ho tombidě omě na bâde, ka hwě-hwa pâ o iboko vi tubakwě, na, Tungu Iyamu; mboka ya Lasia e te omě piělě.

9. O egombe eitě e tombidi, bekëndâ bea bě na mahihi, n' ihindina ja komania ja tomba, ka Pâl a kelevidě bâ.

10. Ka mâ-a vâ na bâ, na, Bamo, mbi yěněki na ekëndâ tēkae e ka diyi hwě na ikokiya na inyangě, hanga kabo ja jumba ja bwalo, ndi na beměná beahu mětě ta.

11. Ndi sěnturian a kamakiděndi ngâwě na a duwě bwalo, wa na nyanga ya Pâl e kalakidi.

12. Ikabojana tungu yu diyaka twětwe na tomba egombe y' ivěvu, ovaně nd' o mběi pâkâ e timbaki na ho 'mwake omě, ipě ba ka tāmâ o bweyidě Finisi, na bâ ba tomba egombe y' ivěvu omě; e diyakindi tungu ya Kriti, e ndi o pěl' 'a diko na ya ngângâ.

13. O upupě mua diko u vungi na jana, ba ka yebakiya na ba ka vahakandi o hohonganě nyang' 'abu e ma vaha, ka bâ-ba

unjuwa *omě*, ba ka tamwaka baka na Kriti.

14. Ulingo mu yavakiya pě na ekudikudi y' upupě ya betě, u tubakwě na Yurâ-klidân.

15. O bwalo bo pukidi bo yâlě pě o yekamiya upupě, ka hwě-hwa hulidě boá.

16. O hwě-ho tombi baka na nenge e tubakwě na Kláda, ho duwakindi ehavu eitě ibakidě ja elende :

17. O bâ-ba betidě yâ, ka bâ-ba 'nângâ belombo be hanakě, ba ka tingaka bwalo oviya ukângâlâ; o bâ-ba bangi na banga ba kahama o tomba, ka bâ-ba hubě maku-ku, ba ka vombwaka.

18. O hwě-ho bolongani n' ukudi sasě, o buhwa bopâkwě bo yadi, ka bâ-ba hadividě bwalo.

19. O buhwa boa ilalo ho ka uhwaka belombo bea bwalo b' utangani na benâ beahu mětě.

20. O hwě-ho tombidě hwi iitě, ho yěni joba tombe nyětěti, n' ukudi u yeviye tēpě, ka hwě-hwa pojě ipitě j' iyonga.

21. O hwě-ho hindini nangudi ka Pâl a tēmě o hanganě 'abu, ka mâ-a vâ, *na*, Bamo, o jakate o yokakiyi 'mba ni n' inyěni

o 'njuwe pë ni o Kriti, te wu kovani ikoki-
ya na inyangë tē ekadi.

22. Mbi kelevakidēndi inyēni na yādāki
melema: 'kabojana o ibě na moŋo a ka nya-
ngě emēnā 'aju, kabo bwalo b' utangani.

23. Ikabojana enjěl ya Anyambě, e duwě
'mba, uamě e dilakě, e ma tēmi baka n'
umba na bulu tēkabo,

24. Na, Pâl, o bangake; o ka pādwēndi
o boho boa Sisar: ndi hilakēte Anyambě a
vēnd' āvē ba tamwakě na nāvē bēhēpi.

25. Bamo, ovaně nd' umbi vākě na yā-
dāki melema: 'kabojana mbi kamakidēndi
Anyambě na e ka diyandi k' umba-mbi ma
langudwě.

26. Ndi tombekete ho ka tandi o kwa
o nenge na ehuhu.

27. O meulu me diyaki mea diba jomu
na menai, hwě te kabo vombwaka o Adria,
ho betaka ho hubaka, na bulu o hanganě,
- ka bamo ba bwalo ba yebiya na ba bi baka
na ehe:

28. O bâ-ba uhwi honge, ka bâ-ba duwa
mabo ma beguba mabale: o bâ-ba vombuwi
pě kwěi ka bâ-ba yějiyě pě, ka bâ-ba duwa
jomu na beguba betano.

29. O hwě-ho bangi na banga hwa ku-

mbiya o malale, ka bâ-ba uhwa nyilo inai o mahina, ba ka yombwaka buhwa.

30. O bamo ba bwalo ba ombidi o kweya bwalo, na bâ-ba hubě tepě elende o miba, ba vohanakidě na ba 'mbakandi o 'hwa nyilo o mahâ,

31. Ka Pâl a vâ na sěnturian na sâjě, *na*, Ekaba ba diye o bwalo, wa yongeni.

32. Jâ ndi ja sâjě ja lena megulu mea elende ka yâ-ya kwa.

33. O buhwa bo diyaki bo ka vaka, ka Pâl a hâhâlidě bâ běhěpi na ba jake, *na*, Buhwa tēkabo ndi bwa jomu na hwi 'nai n' inyi na diya o hindinakani, o jeni elombo ka 'lombo.

34. Ovaně nd' o mbi hâhâlakidě inyěni na jakani, 'kabojana i ndi iyongě janyu: 'kabojana tombe na howe ya meolo meanyu ya kutuwe.

35. O mâ-a bi nonaně vângo, ka mâ-a nâ-ngâ pěmbě ka mâ-a vě Anyambě akeva o boho boabu boa běhěpi, o mâ-a pěhi *yâ*, a ka jaka.

36. Ka bâ běhěpi ba yâdiyě melema, ka bâ-ba ja tepě.

37. Hwě ba diyakidi o bwalo běhěpi, ho diyakindi kaṁa ibale na mabo hěmbwědi na bato utoba.

38. O bâ-ba vulidi, ka bâ-ba hadividě bwalo, ba ka 'hwaka hwit o manga.

39. O buhwa bo yadi bu yembaka ehe ndi ba duwaki tungu ehâlě n' uhěkě, ka bâ-ba panga na ba ngakidi bwalo omě, oningě ba yâliděngě.

40. O bâ-ba leni nyilo ka bâ-ba dika jâ o manga, ka bâ-ba unjuwa mekâdi mea epepa, ka bâ-ba betě porsen upupě, ba ka vitaka he.

41. O bâ-ba kwedi o mwega, ka bâ-ba hikě bwalo; mahâ ma kâmâmâkindi, ma diye pě na ngudi ya ninganě, ka mahina ma wa na ngudi ya mekeba.

42. Ehoka ya sâjě e diyaki na ba weyaki mbwedi, banga ba yâkiyě na kweyanidě.

43. Ndi o sěnturian a vahakidi o yonga Pâl, a himbakidi bâ upango 'muaba, ka mâ-a sombiya na ba di ba yâkâkiya ba take o kwa o manga na bâ-ba jabuwa o he:

44. Na bapâkwě ekaba, bâkâ o betimbe, bâkâ o *bepěhi* bea bwalo. Nonaně ndi o yâ e hohonganakidi, ka bâ běhěpi ba jabuwa o he pâlâ.

KAPITA XXVIII.

1. O bâ-ba yongidi, běngě ba yowakě na nenga e tubakwi na Mělita.

2. Bato tě ba duwě ehe baně ba hakiyi hwě kěngâ eité : ba latakidi hwě veyā, ka bâ-ba yolě hwě bēhēpi, 'kabajana mbwiya e diyakindi e nâkâ na ivěvu.

3. O Pâl a yolidě ubâmbâ mâ-a mendodi na kahidě meâ o veyā, ka mbamba ya viya o veyā, ka yâ-ya dinga mâ o 'nâ.

4. O ba duwě ehe tēně ba yēni tito tě ya ekěmbě nē mâ o 'nâ kělēmēngo, ba vâki bâ mētě na bâ mētě, na, E 'bē na penda momo tēkaně a nd' eweyi bato, tombe ka mâ-a yongidi o manga, mangundako ma vahaka a diyaka.

5. Ka mâ-a kutudě tito o veyā, á yoki mehiyo.

6. Ndi ba umbwakiyi na a viyi ka landa tombe ka kwa ekengo o njo pâkâ : ndi o bâ-ba umbuwedi ulingo unēně, ba yēně mâ a kokakiya, ka bâ-ba uludě mapikilia mabu, ba ka vâkâ na a nd' anyambě.

7. Hanganě tě e diyaki na behiki bea moto unēně ua nenge tēně dina na Publius, a nângâki hwě ka mâ-a diyidě hwě n' ulunda hwi 'lalo.

8. Hwě t' omě ka hangwě 'a Publius, a nangiya na ebědi ya ivěvu, n' ulema mâ-a makiya : ka Pâl a ngiya o mâ a jadi, a

ka kalakiya, ka mâ-a kahidě mâ benâ, n' a yongakě mâ.

9. O ekae e hamidi, bapâkwě ba diyaki tepě na bebědi o nenge tě, ba vakindi ka bâ-ba yonga.

10. Ba dilakidi hwě idilě iněně, o hwě-ho validi, ba kenjakidi hwě belombo bea mala.

11. O ngânde ilalo i bědi kělěbě, ka hwě hwa vama na bwalo boa Alěxandria, bo tombakidě egombe e' ivěvu o nenge tě, ndembo 'aju ndi Kastor na Pâlâx.

12. O hwě-ho hědě o Sirikus, ka hwě-hwa yěngid' omě hwi 'lalo.

13. O hwě-ho 'muwedi omě ka hwě-hwa bâkâ na pâ o Rigium: buhwa boa bě tombango bâkâ, k' upupě mua diko mu-a vunga, ka hwě-hwa pâ bopâkwě ekabo o Pútiolai.

14. Ka hwě-hwa kâbidě bana-bina, ka bâ-ba vaha ho yěngěkidě o bâ-ba jadi hwi hěmbwědi, ka hwě-hwa vala na vitě Roma.

15. Ka bana-bina ba umuwa omě na viya ka bonganiya hwě o Apii Forum, na Tavěrn Ilalo: o Pâl a yěni bâ, ka mâ-a vě Anyambě akeva, ka mâ-a yâdiyě.

16. O hwě-ho pād' o Roma, ka sěnturion a bweyidě mbwedi ngâwě ya ba pepwakě:

ndi Pál a hulakudwěte na a diyake iboko n' iviaju, bâ na sâjë e ma tataka mâ.

17. Hwě t' omě na hwi 'lalo, ka Pál a ndidě Jiu iněně ndiděngo kota. O bâ-ba yolaniďě, ka mâ-a vâ na bâ, *na*, Bamo *na* bana-bina, mba bevakiya bato, na pani ja bapaia, ndi mbi bweyakudwě mbwedi oviya Jěrusalēm na vamwě o benâ bea ba Roma.

18. O bâ-ba hilidě 'mba, ba ombakite o hulidě 'mba, 'kabojana mbu diyaka na tina ya weyanwě.

19. Ndi o Jiu ba ha bâbâkidi, k' umba mba tundudwě na mbi dakakiya Sisar; hanga pělě ya na mbi na elombo 'amě e 'mbakě o sâja na etomb' 'amě.

20. Yâ tina těkaně nd' eamě ya ndaniya inyěni na mbi yěni 'nyěni mba kala n' *inyěni*: 'kabojana ipitě ja Isreěl ndi jamě i vamanakwě uhinganakano těkamu.

21. Ka bâ-ba vâ na mâ, *na*, Ho ibě pahiyango mbando ja viya o Judia o pěl' 'âvě o věngělě na bana-bina ba vakidi bu levakidi, na bâ-bu kalaka tepě bobe o pěl' 'âvě.

22. Ndi ho vahakand' o yoka na nâvě nyanga 'vě e pikilakiyě: 'kabojana ho yowěngo o pělě ya njamba těkaně, na e ibě na ba kamanakiyě yâ, iboko t' iboko viěhěpi.

23. O bá-ba lenidě má buhwa, ka baitě ba yolane o ediy' *'aju*: ka mâ-a pěhě na mâ-a ka pakwaka bá ipangiya ja Anyambě, a sulakě bá o pělě ya Jisus oviya elekanako ya Mosěs, na basáki oviya ubwa na pá o kolo.

24. Bákâ ba kamakidě belombo be kala-makidi, bâkâ bá kamidě.

25. O bá-ba ha latanakiyedi bá mětě na bá mětě, ka bâ-bâ pajangana, o Pâl a bi na bá kalango ndaga tě ya pákâ ekaně, na, Ilina Iyam' i huwakite o kala na bahangwě bahu n' udumbu mua Isaias ya usáki,

26. Na, Ka vâke na bato těkaba, na, O boyokaka o ka yokateni, ndi wa bweyiděni: na o boyěněkě o ka yěně tepě ni, ndi wa batěni.

27. Ikabojana ulema mua bato těkaba u yâdindi, na matâ mabu ma tuni n' ivula j' iyoka, na bá-ba dibi tepě mihâ mabu; na banga ba yěně na mihâ *mabu*, ba yoka na matâ *mabu*, na bá-ba bweyidě na melema *meabu*, ba uluwa n' umbamba yongě bá.

28. Yowaki na iyongě ja Anyambě i pendudwi Jěntail, bâ ndi ba ka yokě já.

29. O mâ-a kali ndaga těkadi, ka Jiu ba

hama, na ba ka bomaka penda bâ mětě na bâ mětě.

30. Pâl a diyaki mepuma mebale mehuhu o ndabo 'aju mětě e ma vĕkĕ dâlĕ, a ngakidĕ ba ma vaka o mâ-a jadi.

31. A kalakiya ipangiya ja Anyambĕ, a yokwakidĕ belombo bea pĕlĕ ya Upangiyi Jisus Kraist, a bekinaka, a diye na moto ua kandidĕ mâ.

IHUKU JA BEHADI.